



27,140/3



Digitized by the Internet Archive
in 2018 with funding from
Wellcome Library

https://archive.org/details/b30528112_0007

53350
ANTONII DE HAEN

S. C. R. A. MAJESTATIS
CONSILIARII, ET ARCHIATRI,

MEDICINÆ IN HAC AIMA ET ANTIQUISSIMA
UNIVERSITATE PROFESSORIS PRIMARIJ,
PLURIUM ERUDIT. SOCIETAT. SOCIJ

PARS DECIMAQUARTA
RATIONIS MEDENDI

IN NOSOCOMIO PRACTICO

*Quod in gratiam, & emolumentum
Medicinæ Studiosorum condidit*

MARIA THERESIA

AUGUSTISSIMA ROMANORUM

IMPERATRIX

HUNG. BOHEM. &c. REGINA &c. &c.



L U C Æ MDCCLXXVI.

Typis JACOBI JUSTI
SUPERIORUM PERMISSU.

WELLS - WYOMING
JAN 18 1880
COMMISSIONER OF THE LAND OFFICE
DEPARTMENT OF THE INTERIOR
WASHINGTON
TO THE LAND OFFICE
WASHINGTON




MARIA T. L. L. L.
JAN 18 1880
JAN 18 1880



RECEIVED
JAN 18 1880
JAN 18 1880

P R Æ F A T I O .



Voluminis hujus XIV. Operis annui insolita plane materies erit, medica tamen, & nisi me animus fallit, tam Patriæ, quam Medicinæ, utilissima. Ut autem quæ ad Medicinam spectant, præmittam; Volumina meo pleraque Medici laudibus resonuerunt, cui parem ars nostra neque hucusque vidit, neque ut videat quondam, sperare multum potest; incomparabilis scilicet Hippocratis Cui; quem quarto ante Æram Christianum sæculo florentem, ab illo tempore, in nostros usque dies, & Medici omnes, & Viri alii auctoritate, sapientia, religione, dignitateque conspicui, iis laudibus, quibus alium Mortalium neminem, extulerunt. Id Medicos fecisse, millena ab ipsis conscripta volumina testantur: id ceteros præclaros Viros, dum vel Religionem, vel Historiam, scriptis exornarent, quoque fecisse, cum notum plerisque sit, unicum Meldensem Antistitem e pluribus selegisse sufficiat, Jacobum Benignum Bossuet, quem virum nominasse, laudasse est, sic de Hippocrate scribentem: „ Inter summos
„ Philosophos recensendus Hippocrates, Medicinæ
„ Pater, aureis illis Græciæ temporibus inter me-

„ dios magnos Philosophos eminens . „ * Ubique ego Opera, Virumque, canebam, quibus Medicina redacta in Doctrinæ Corpus, quibus promota, quibus conservata, inque sua & dignitate, & splendore, gratæque mortalibus beneficentia, unice servanda esset. Quod enim utile, quod certum, quodque præclarum, Medicina haberet, Hippocrati id, ut auctori, ut parenti, merito referendum esse: & quidquid aut emolumenti, aut incrementi, ab illius tempore in nostros dies usque, Arti accessisset, id Viri immortalis Lucubrationibus, atque sapientissimis Præceptis, omne deberi; indefessoque eorundem studio Medicinam ad illam dignitatem, ad illum, quo jam fulgeat, conscendisse splendorem, palam testatus ubique fui. Atque hac olim.

Jam vero e contrario tam Hippocratis, quam præclarorum, qui Medicinam vere illustrarunt, Virorum, & infirmitatem ostendo, & incertitudinem monstro, & curtam Artis plango suppellectilem. Habebit tamen & hoc insigne emolumentum. Ut enim Medicinæ præstantiam, nobilitatemque, docere debeo Tirones, ita quoque eorum interest arctos cognoscere, quibus circumdetur, termineturque, cancellos: quo demum quid vel posset illa, vel non posset; quidque sperare ejus auxilio, agrisque promittere debe-

* On peut compter parmi les plus grands Philosophes Hippocrate, le Pere de la Medicine, qui eclata au milieu des Autres, (Socrate, Platon, Zenon, &c.) dans ces heurenx tems de la Grece. Hist. univ. pag. mihi 73.

deberent; perspicue intelligant. Et, ut cum Hippocrate omnia verbo dicam, Artificis periti est, non minus Artis suæ angustias nosse, quam amplitudinem.

In secunda sectione horrendus ipso nomine morbus, terrifica Pestis, me totum occupat. Cur autem hanc in me provinciam susceperim, priore ejusdem capite expono; quo tamen quorundam in me ob hoc ipsum stomachum præoccupem, paucis dicam: Furit Lues vicinis in Regnis, Patriæ jugulo imminet, necem incolis minatur. Patri, ac Matri Patriæ, semper Augustis, diu noctuque ingens volvitur, anxiamque in animo cura, ut quomodocumque hanc plagam finibus averruncent suis; eoque, cujuscumque & ordinis & dignitatis sint Subditi, unita collineant opera, ipsis mens est. Hinc Sacer Clerus ad Altissimi prostratus pedes, hoc Coeli flagellum, nubes scindente Voce, deprecatur. Hinc bellipotens Miles murum explicata acie præstat, infectas arcentem res, hominesque. Hinc ubique providus vicinarum urbium Senatus severa, atque inviolabili Lege, habenas Commercii moderatur, ne cum mercimoniis letum emamus. Quid porro ego hic? Num ab Augusta eo munere gratiose honoratus, ut sibi Medicos in mea Schola adaptem, qui præterquam quod communibus Mortalium calamitatibus probe medeantur, etiam Pestilentia cognoscenda, sistenda, curandaque, sapientia valentes, veros Machaones Podalyriosque præstarent, officio huic deesse possim? Itaque de Peste erant instruendi. Verum enimvero, frequenter data in Lectionibus occasione, & semel biennio abhinc decurso

de illa ex professo, quod ajunt, differens, duo maxime dolui: alterum quod in tota Bibliotheca Medica non extaret Autor, qui completum, cunctaque Pestilitatis speciei accomodatum opus, quo duce uterentur, adornasset; alterum quod ea, quæ me docente didicerant, numerosa adeo essent, ut recondi memoria, quantumvis felici, atque tenaci, minime possent. Effecit demum & hæc considerantia, & tetrae Luis cum inerecrementum, tum proximitas, ut pristinos in illam peractos labores refundens, universamque Bibliothecam Medicam sedulo revolvens, Pestis cognoscenda curandaque tutiora ac certiora principia quarerem. Verum quo labor ad hæc mihi comparanda intensior erat, eo quoque graviore difficultatum pondere crevit. Animis fleti tamen, & hinc bonum Civem præstandi voluntate, illinc stimulantem Conscientiam compescendi desiderio, officium Civis boni, & Professoris religiosi, si non explevi, explere saltem conatus sum. Acceptorque, ni fallor, quem exantlavi, labor iis erit, qui norint me docendo, medendoque prægravatum, multam Lucubrationum fuliginem bibere debuisse, antequam arduum adeo negotium perficere potuerim.

Termino Præfationem, claros omnes per Europam Viros precando primum, ne mihi utibilibum atque commodorum Reipublicæ Virorum sortem invideant: me enim conspiciunt, nil nisi Medicinæ commoda, incrementaque, spirantem accusationibus impetuum confectis, diris maculatum calumniis, diffamantibus laceratum libellis, ingratorumque quorundam Discipulorum petulantia expositum: ita quippe cum fru-

ctuosus

Et uosis Reipublicæ Civibus agere stolidum vulgus solet, sed hoc ipso indicio ab inutilium turba internoscendis. Est proinde grate ferendum, quod ipsorum ingratis maiorem Proborum existimationem conciliat nobis, maioremque decorem. Secundo rogo eosdem præclaros Viros, ut mirari desinant, quod adeo ignominiatus, publicæ Potestatis majestatem, auctoritatemque, non invocem; cum primo tunc Titivillitia illa pervolvenda mihi essent, quæ sancte profiteor me neque legisse unquam, neque lecturum esse. Quid enim jucundam meam animi tranquillitatem hisce turbem? Deinde ipsa hæc invocatio Potestatis publicæ aut vafri illis libellorum fictoribus, aut, qui eos legerint, idiotis, dubium moveret, an ne ridiculus illorum furor mihi reapse detrimento foret? Atque nihil profecto minus ego censeo, neque arbitrantur omnes Boni. Unde potius & Publicam invoco, & Divinam potestatem, ut utraque illis crimen condonet; HÆC vero eorundem malevolum animum, in benevolum, in honestum, in Christianum, miserata transformet.



SECTIO I.

CAPUT PRIMUM.

*De iis , quæ in Med. nonnunquam
improvisa contingunt , ac
consuetis legibus contraria .*

- §. I. Hippocratis Laudes , non modo ob æternas , quas condidit , Medicinæ leges , dignitatemque , ad quam illam evehit ; verum etiam ob demonstratas illius & defectus , & angustias . Quid inde discendum sit . Recensetur Aphorismus ejus 19. Sect. 2. qui deinde per omnia sectionis capita explicatur .
- §. II. Morbus juvenis hanc veritatem docens .
- §. III. Anatomie eandem confirmans .
- §. IV. Conclusio utriusque .
- §. V. VI. VII. Altera Historia morbi idem docens , Anatomie confirmans , ejusque sequela .
- §. VIII. IX. Historia tertia cum Anatomie .
- §. X. Similitudo Historia secunde tertiæque ; qua occasione sex Problemata proponuntur & solvuntur .
- §. XI. XII. XIII. Quarta Historia cum ejus & Anatomie & Discussionem pathologica ; Aphorismum haud secus , quam tres priores , confirmans .
- §. XIV. XV. XVI. Historia quinta per omnia mirabilis , morbi , mortis , cadaveris ; qua veritatis , in Aphorismo proposita , demonstratio convincentior haberi vix potest .



Luribus annui Operis mei Tomis, in Medicæ Artis principiorum certitudine demonstranda frequens sæpe, longusque fui; & eo quidem usque, ut illa ceterarum Artium, Disciplinarumque, nulli vel minimum cedere, sive præceptorum perspicuitate, sive, principiorum certitudine, debere videretur. Asseverabat hoc jam ante XXIII. Sæcula illa ipse, qui in sua Æsculapiadæa Familia decimus & nonus Medicus, tot eximiorum Prædecessorum præceptis dives, observatis Tempia Divorum ornantibus ditior, Adnotationibus demum tum propriis, iisdemque innumeris, tum Filiorum, Generi, Discipulorumque, quos, ad examinandam traditorum præceptorum veritatem, alia in Regna immiserat, ditissimus, Corpus Medicinæ immutabile, quamdiu Natura rerum immutabilis manebit, condidit, conscripsit, posteritati ne dicam, an æternitati, consecravit, *Hippocrates Cous*. Idem confirmaverunt Viri artis præstantia immortales, *Hollerius, Ballonius, Mercatus, Jacotius, Duretus, P. Alpinus, Sydenhamus, Baglivius*, & quotquot præter hos honorem in Medicina, famamque meruerunt. Compendio uti hic liceat ingentis *Boerhaavii*, genuini *Hippocratis* filii, verbis, ex oratione habita *Leydæ* anno 1721. cui titulus *de commendando studio Hippocratico*: „ En vo-
 „ bis Adversariorum thesaurum! En modum acquiren-
 „ dæ sapientiæ medicæ verum! Hæc felicia Artis fa-
 „ ta! Hæc fortunata tempora! Quum unus atque idem
 „ sapientissimus tot Artificum peritorum opera utere-
 „ tur! Quam omnium Coryphæus tot labores, tot
 „ experimenta aliorum suis perficiens, in corpus redi-
 „ geret ordinatum! Eant jam, qui ignorantia afflati,
 „ vel

„ vel invidia, tanto viro obtreſcant. Comparetur il-
 „ li, quem volunt; quam diſpar erit ratio? Alii quid
 „ unius; hic, quid plurium induſtria valeat, exhibet:
 „ aliis ſuis modo vident oculis, hic multorum uſus eſt
 „ acie: cæteri per ſingulos ægros, hic per eorum a-
 „ gmina experimenta fecit: pauci quid intra arcta u-
 „ nius urbis pomeria morbi ſit, tradiderunt; ille, quæ
 „ in tot vicos, urbes, regiones, & regna, lues graſ-
 „ ſaretur, obſervabat.

„ Hanc ego cauſam, cur minus alios huic pares
 „ ſtatuamus, inprimis magnam puto. Profecto ſapien-
 „ tia artis major longe in illo fuit, qui tantis ad Me-
 „ dicinam auxiliis uſus eſt, quam in reliquis, qui,
 „ quamvis cetera æquales, his deſtituti fuerunt. Atque
 „ inde natam arbitror eorum, quæ ſcripſit æternitatem;
 „ hinc ortam puto illorum, quæ viginti trium ſæcu-
 „ lorum examen ſuſtinerunt, integritatem. Evolva-
 „ tur illorum ordo, mutata *Hippocraticæ* veritatis fa-
 „ cies nullibi apparebit. Excutite *Grajos*, cognoscite
 „ *Romanos*, verſate *Arabes*; repetitam atque confirma-
 „ tam ubique invenietis doctrinam *Hippocratis*.

Profecto nihil unquam hac veritate clarius demon-
 ſtravit ſæculorum evolutio, nihil teſtatius reliquit. *Hip-
 pocrati* fuerunt Adverſarii multi, cum viventi, tum
 vita dudum functo: *Asclepias* ejuſque tota ſchola; *Gal-
 lenus*, quando *Hippocratis*, oblitus, *Aristotelis* in ſcho-
 lam tranſivit; *Celfus* in multis; *Cælius Aurelianus*,
 Afer, juratus ejus, ac vaſerrimus hoſtis: at vero fu-
 mo citius evanuerunt hæc omnia, quando toties ad
Hippocratis præcepta, tanquam ad *Apollinis* oraculum,
 Medici coacti, vel illum, nomine ejus laudibuſque
 ſuppreſſis ſequebantur, ut *Arsteus Cappadox*; vel me-
 ritis elatum encomiis, ſolum exclamabant dignum eſſe
 quem legerent, quem diurna verſarent, nocturnaue
 manu; quem unicum, quo certior eſſet, tutaque Pra-
 xis, ſequerentur. Ubi autem poſt & *Galeni*, & *Ara-
 bum*

bum haud paucorum, servitutem, Medicina a Græcis, *Byzantio* Thracum in potestatem redacto profugis, Hippocratico iterum lumine illustrari cepit, vox Medicorum præcipuorum una fuit, qui præcipuum, qui solum, sequatur *Hippocratem*, eum unicum esse, qui tuto medeatur. Eodemque modo post Chemicorum tyrannidem, post varium sectarum diversarum philosophandi morem, post nimium laudabilis ceterum *Mechanices*, *Hydrostatices*, *Hydraulicesque*, in Medicinam invectum usum, semper a principibus Medicis recursum ad *Hippocratem*, fuit, quo labantem fulcirent, restaurarentque *Praxin*: sic quidem ut illi, qui fallacibus inventis seducti, hunc Medicorum principem spernere audent, jam futuram suæ novitatis sortem augurari possint, certoque prævidere, fore demum ut, si ve ipsi, si ve eorum, quos seduxerint, quam plurimi, doctrinarum fatigati fallacia, infortuniorum pondere pressi, deque interfecta plebe, novarum opinionum passim victima, mœsti, ac fere desperabundi, *Hippocratem* de integro arripiant, ducemque sequantur.

Quæ cum ita se habeant, jure merito mea opera immensas hujus viri laudes perpetuo resonare, Lectores capiunt, eumque ducem in explicanda Medicina & sequi me, & dare Auditoribus, sponte laudabunt.

At vero utilitatem aliam præterea *Hippocratis* præcepta afferunt nobis. Ut illinc ampla Artis pomeria ostendunt, ita hinc arctos docent, qui coerceant illam, circumscribantque, Cancellos; ne quid nimis: nec non insolitos si ve Naturæ, si ve Morborum, errores, qui haud perraro seducant medentem: eamque docent animi candorem, ingenuitatem, salutisque humanæ amorem, ut si ejusmodi Naturæ, Morborumve errores, aliquando imposuerint nobis, pandere illos, cunctorumque in notitiam prodere, non erubescamus: quo tandem haud modo ipsi nos, sed moniti per nos, eorundem deinceps præsagi, vel prævideant illos, vel prævertant.

Que-

Quemadmodum itaque per omnia opuscula mea prosequutus rem hanc utramque sum, priorem autem magis; ita nunc posteriorem demonstrare animus est: non minus priore posteriorem Medentibus profuturam ratus.

Ac primum quidem *Hippocratis Aphorismi Sect. 2. n. 19.* ostendam veritatem; Τῶν ὀξέων νοσημάτων, ὃ πάμπαν ἀσφαλές αἱ προδιαγορεύσεις ὕτε τῷ θανάτῳ, ὕτε τῇ ὑγείῃς. „ Morborum acutorum præsentia, seu prædictiones, non sunt, si stricte loqui velimus, omnino, citrave omnem exceptionem, tutæ, siue ex mortis fuerint, siue sanitatis. Explicuerat Autor Aphorismi luculenter in omnium Aphorismorum suorum primo, hoc vel ab Artis longitudine, seu ab ea ejus amplitudine, ut eidem addiscendæ plurimorum vita vix sufficiat, pendere; vel ab experiundi difficultate, quæ aut desiderata, aut illicita sæpe sit; vel a rapida calvæ occasionis præcipitantia, qua fulminis instar prætereat occasio agendi; vel neglectu, inobedientia, tergiversatione, erroribusque siue Medici, siue ægrotantis, siue adstantium, ministrorumque; vel denique a Cæli mutatis tempestatibus.

§. II. Explicare idem memorabili Historia conabor. Juvenis 22. annos natus, Textor, qui Variolas & Morbillos infans passus, atque illibata postmodum valetudine gavissus, acuta Febre 14. dierum spatio, 20. ætatis anno, laboraverat; ab eo vero tempore sanitate perquam integra floruerat; incidit demum 26. Ian. 1770. ex ebrietate in Peripneumoniam; cujus citra vel minimum Artis auxilium, quartum diem agens, in Nosocomium nostrum illatus est.

Peripneumonia principio vehemens, cum sicca tussi, eaque tam violenta, ut caput sibi dissilire pluries acerbique æger conqueretur, post iteratam quater Phlebotomiam, rariore cum tussi, emendatioreque respiratione, continuabat; die autem sexto propemodum finito,

to, dolor gravis mediam superioris Ventris partem, Præcordia nunc, nunc Epigastrium vocant, occupare cepit, se paulatim in Ventris inferiora diffudit, vomitumque in quartam repetivit usque vicem. Hic dolor vix XV. horas furens, septem cum dimidia horas silens, & Morbi die septimo, duas sui tertias emenso partes, recrudescens, ad emollientia remedia in os immissa, injecta in Rectum, Ventrique admota, conticuit, nec rediit; continuavit nihilominus Vomitus, accessitque Asphuxia horis ante mortem duodecim, quæ die octavo medio contigit.

Sanguis de Vena quater, quantitate Libræ medicæ singula vice missus, crusta inflammatoria tegebatur, densa quidem duraque, alio autem atque alio tempore duriore, & crassiore. Urinæ perpetuo malæ: solito enim coloratiores omnes, aut suspensa enæoremata gesserunt, aut caruere contentis. Alvus quarto morbi die ab enemate mota bis, eaque naturalis, ac multa: die quinto spontanea, ac naturalis: die sexto naturalis cetera quidem, sed cinerei coloris. Die septimo prima alvus a clysmate scybala eduxit, altera copiosam pul-tem, gryseo fuscam; similem tertia, sed paucam, quam violentia vomitus in lectum expressit: quinta, & sexta, in excipulum reddita est, non mista, prior ex flavo virens, posterior æruginosa. Die tandem octava pauca atque fusca a clystere prodiit.

Pulsus vigente Inflammatione celer, subdurus, compressus: ea mitiore celer, plenus, mollisque; in ventris doloribus subdurus, iisdem autem conticescentibus præter celeritatem bonus; & quo tempore in Nosocomio fuit, semper æqualis. Die 7. tandem debilior percipiebatur, ac leviter remittens. Asphyxia tandem successit, in qua priore trihorio calor idem, qui prior, postmodum vero sensim minor, verum tandem frigus observabatur; una cum frequenti vomitu materiæ tenuis, turbidæ, flavedinemque, aut levem nonnunquam
rese-

referentis virorem. Media ante mortem hora leve delirium observabatur, convulsio, ac dentium stridor, quæ symptomata una cum vomitu in letum abierunt.

§. III. Horis a morte XXIII. elapsis, cum ob loci frigus, in quo repositum cadaver fuerat, ob artuum requisitum in vere mortuo rigorem, & præcipue ob Corneæ cum opacæ, tum corrugatæ conspectum, de vera morte certi essemus, aperuimus cadaver elegans & torosum. Tumidum atque durum abdomen in morbo nunquam fuit, unde & naturale ac molle a morte. Omentum bene pingue tantum modo sinistram texit ventris partem, idque ad inguen usque; ita ut hic homo ibi ἐπιπλοκὴν potuisset pati, in dextro vero inguine minime: quantumcumque enim Epiploon in dextro latere evolveremus, infra umbilicum non extendimus.

Jecur sub Costis sinistris parum, sub dextris multum, imo ad tres digitos latos uno in loco infra costas propendebat, lobo majore integrum Hypochondrium dextrum, minore mediam occupans sinistri partem; cava superficie, maxime pone vesiculam fellis, lividum. Hepatis hic situs ac moles, si in vita, quacumque de causa, tumidum redditum idem, durumque fuisset, vitium indicasset tangentibus; quod idem viscus toties sub costis reconditum, negat.

Coli Intestini transversa portio neque in flexu dextro, neque in sinistro, altius conscendit; hinc præ Hepatis cuncta explentis mole, illinc præ Ventriculi, Splenisque amplitudine, medio in ventre sub Ventriculo penitus delitescens. Sic ut in homine affectus, in Coli his flexibus hærens, non potuerit mentiri Pleuritidem.

Cæcum Intestinum, ac Colon, usque ad flexum splenicum, levit erat inflammatum, angustum autem valde, usque ad suum in Ileo osse decubitum; ex quo emergens, amplificabatur vehementer, binosque altiores Flexus formans, deinde leviter inflammatum, in Rectum abivit.

Ven-

Ventriculi oram superiorem totam inflammatio prehenderat, nec non Duodenum, portionemque Omenti illam, quæ Mesenterii vicem Duodeno Intestino supplet.

Jejunum Intestinum nihil, Ileum vero potiore sui parte vehementer, inflammatum erat; & quidem sic, ut una in plaga ruberrimi, in alia jam esset purpurei coloris; hic per omnem Intestini ambitum, ibi ad anteriorem, inferioremque, duntaxat partem.

Plagas aliquot inflammatas, Mesenterium habebat, pluresque Glandulas, pisum has, illas fabam, magnas, fuscas intus subnigrasve. Bonus Splen, & Renes.

Peritonæum autem & anterius, & laterale, & posterius, eaque etiam parte, qua Vesicam Urinariam contegit, dirissime inflammatum; Vesica vero sana. Plagas itidem inflammatas idem Peritonæum ostendit, ubi felleam Vesicam succingit.

Porro in toto abdomine, ex cunctis, quas Inflammatio invaserat, partibus, transsudaverat inflammatoria materies; quæ aut spissior Intestina coagmentabat inter sese, aut liquidior effusi præbuit speciem pluris.

Boni Pulmones, liberi undique. Pallidum Cor, utroque in thalamo, in dextro tamen plus, sanguinem parte fluidum, parte polyposum gerens. Plus solito in Pericardio aquæ.

§. IV. Qui cum Anatome confert Morbi historiam, ubique haud mediocrem offendet explicandi difficultatem, consuetas utpote excedentem Naturæ leges. Si in Bibliotheca Medica adminicula ad exponendum quæsierit, casus quidem nonnullos in multis nostro non ab similes reperturus est, in pluribus vero admodum ab similes. Id vero, quod & ex antiquis omnibus, & ex recentioribus, colligi posset, totum, accuratissime relatum, atque observationibus multis, iisdemque æque præclaris, quam mirandis ornatum, invenitur in Libro magni Morgagni de sed. & caus. Morb. Ep. XXXV.

Ex

Ex omnibus hac Epistola relatis constat I. Inflammationem Intestinorum dari, adeo celerem, ut spatio aut trium dierum, aut duorum, aut unius, aut etiam dimidii, perimat hominem.

II. Eandem quidem crebro esse valida cum Febre conjunctam; at vero etiam non perraro cum aut exigua, aut prorsum nulla.

III. Fallacissimam hanc Inflammationem esse, eoquod ægrotum dolore demum carentem, ac reconvallescere visum, tandem, subitoque, necet.

IV. Attamen Inflammationem hanc non adesse, nisi cum Abdomine duro tumidoque.

V. Passim alvum in illa immobilem pertinaciter esse.

Ut porro hæc observata cum nostris conferamus, notamus I. tantam fuisse letalis morbi in ægro nostro celeritatem, ut a percepti doloris principio, ad mortem usque, dies duntaxat unicus, cum 18. & media horis intercefferit.

II. Febrem notavimus tempore inflammati Ventris non majorem fuisse, quam vigore Peripneumoniæ; prout & Pulsuum exacta observatio, & Thermometron, quod bis die admotum, binorum modo graduum, idque simplice vice tantum, augmentum indicavit, manifesto docuerunt.

III. Advertimus morbi fallaciam non minorem nostro in ægro adparuisse, quam in iis *Morgagni*; cum dolor prima die vix 15. horas duraverit, alteroque necdum dimidiam horam.

IV. Imo longe fallaciorem hunc morbum, quam in ægris *Morgagnianis* fuisse, eoquod nullum unquam ventris tumorem æger noster habuerit, nullam prorsus duritiem comitem.

V. Imposuisse autem præprimis nobis apertam ab ipso inflammatorii morbi Intestini principio alvum, quæ pertinaciter clausa soleat in illo esse.

Si igitur inflammatio Intestinelum in Historia Medica reperiatur extra nonnullas consuetas Naturæ leges nonnunquam extitisse; quanto hac mirabiliorem ac singulariorem istam non existimabimus, contra leges Naturæ multo plures peccantem? Nisi Intestinelum inflammationem quis statuerit feriozem doloribus; brevibus itaque ante obitum horis ortam, juvenemque subito, ut in *Morgagnianis* est, internecioni dedisse; Peritonæi vero universi inflammationi, a metastasi peripneumonica ortæ; Pulmo enim in Cadavere inflammatus non apparuit; dolorum deberi originem.

Huic ita cogitanti quæ multa reponam vix video, nisi quod dolor quandam duntaxat ventris partem, quam æger constanter indicabat, occuparet, Peritonæo interim universo inflammatissimo. Sed ipsi responsio meæ consimilis in promptu erit, si mihi obiiciat, quamvis Ventriculi diram latamque inflammationem deprehenderimus, ægrotanti tamen dolorem illius vix octo horis solum, & vix quindecim horis cum Ventris sociatum doloribus observatum fuisse: hancque ipsam doloris absentiam non posse gangrænæ tribui, cum ea careret Ventriculus: adeoque Peritonæum videri habuisse potiozem partem, causamque doloris, nec tamen doluisse.

An igitur merito non pronunciavit *Hippocrates* Acutorum morborum Prædictiones sive mortis, sive sanitatis, haud omnino tutas esse? Maturius ejusdem examen id demonstrabit clarius. Ventriculi inflammationem docet durioze cum pulsu febris, docet loci dolor, docet vomitus mox ab acceptis præceps. Vomitus perpetuo adfuit, febris, durusque pulsus utcumque etiam; dolor vero non nisi principio vexavit, neque post quindecim horarum intervallum unquam rediit, & perseverante vomitu, & ut cadaver ostendit, inflammatione.

Deinde Peritonæum totum quantum inflammatum, una cum pene integro Cæco, atque Colo Intestino,

una cum inflammato Ileo, Omentique ad Duodenum portione, cum Mesenterii denique, felleæque Vesiculæ parte, idque citra vel minimum sive Epigastrii, sive Hypogastrii, aut dolorem, aut duritatem, omnem videtur exsuperare eludereque, experientiam.

Expediret hic in Pathologicis exspatiari paulisper. Peritonæum in binis cadaveribus inflammatione occupatum illustris *Morgagnus* scripsit. Ejusdem inflammationem alibi ostendi. Ejusdemque universalissimam præsens Anatome exhibet. Ill. *Haller* arterias peritonæales a XXVII. originibus natas ostendit, *Tom. VI. Elem. Phys. Lib. XX. §. XIX.* Mirum proinde non est tam dire illud inflammari. Sed latius de hac re, post relatos alios casus.

§. V. Cementarius 32. ann. fortis adeo naturæ vir, ut quibus variis laborabat, incommoda, flocci faciens, duro labore corpus exerceret, pluribus tamen morbis impetitus, ac maxime novem antea annis sæva Pleuritide; in violentam adeo tussim inciderat, ut uxor illius, materque, ne dilaceraret pectus totum, subinde vererentur: utque posteriore vitæ anno, in lævum latus ægerrime, in dextrum haud facile, in dorso vero omnium commodissime, cubaret; crebro etiam ad graviores labores anhelaret: eo tamen robore natura præditus erat, ut eadem mulieres non recordarentur illum, post Pleuritidem, vel unicum diem unquam in lecto transgisse. Consuetudinis illi fuerat, singulis a curato morbo laterali annis, idque majali tempore, Phlebotomia; quam hæmorrhagia narium indubitato consequi solebat: hoc vero anno & illam neglexit, & hanc non habuit.

Die 7. Nov. 1769. Pleuroperipneumonia cum dolore in sinistro latere, eodem scilicet, quo ante novennium, corripitur. Alterius diei principio tunditur Vena illi. Tertio propemodum finito ad nos adfertur. Dolor lateris sævissimus; & eo die, & quarto, & quin-

quinto. Inchoante autem die sexto dolor invasit medium pectus, breviq̃ue dein latus dextrum, sævitie, quam prius lævum, haud minore, & septimi diei tertia ferme elapsa parte, præcordia sola. Pulsus totis sex diebus celer valde, durus, magnusque idem, ac plenus, nunquam inæqualis, licet summæ inflammationis vis nos ad nonam Phlebotomiam, adeoque ad sanguinis Librarum medicarum novem cum dimidia, effusionem coegisset; sub initium septimi diei pulsus minus fortis, & vitæ ultimis XII. horis tandem leviter remittens, ac Myurus. Sanguis missus toties, semper quidem crustam tenacem densamque gessit, rubramque partem compactam, nunquam vero aut hanc compactiorem, aut densiorem tenacioremque illam, habuit, quam septimi diei principio in ultima venæ sectione: semipollicem enim ejus crusta æquabat: pauca modo sputa tussis violenta dabat, eaque fere semper haud tantum lineis sanguineis interspersa, sed sanguinea fere integra. Urinæ assiduo rubicundæ aut cum suspenso enæoremate, aut pertinaciter jumentosæ. Alvus nec cocta unquam, nec bene colorata, sub finem olentissima. Somnus rarus, nihil reficiens. Sudor gravans. Situs corporis sive in lectulo, sive in sedili, erectus, præ suffocatione, dolorumque in decubitu intolerabilitate. Interea excepto leviori rarioreque tribus postremis vitæ horis delirio, mens perpetuo præsens, per hæc fere continuas dierum vigilias.

§. VI. Horis XXIII. a morte decursis cadaver aperuimus, lege lata maturius quidem: verum hinc ex cadaverosa rigiditate, pellucidæ cornæ opacacitate, rugisque, nec non ex morbi natura, de vera morte certi; illinc putredinis ob singularem hyemis teporem, humiditatemque, præfagi, præcipitavimus Anatomen.

Corpus torosum in musculis, non pingue: Venter nonnihil tumidus.

Aperto abdomine, reflexisque penitus, quas in crucis formam divideramus, partibus, nihil sub conspectum cadebat, nisi tenuia & crassa Intestina, & Hepatis crepido digiti latitudine infra costarum spuriarum cartilagine, descendens.

Omentum debitæ magnitudinis, mediocriter pingue, in medio tenue valde.

Color Intestinum amplissimum, maxime ad suum cum Cæco principium, & formans ibi ingentem dorsum versus, postque Jejunium Intestinum, saccum, Jejunum tumens. Gracile Ileum. In Intestinis autem, uti neque in Mesenterio, neque in Mesocolo, vel minima Inflammationis indicia.

Amplus adeo Ventriculus, ut Libras XI. aquæ caperet, locatus post Hepar, subterque illud, neque inflammati quid habens.

Vesicula fellea vacua; forte dudum, quod ne minima flavedine tingerentur vicinæ partes.

Aperto Thorace, ingens Pericardium apparuit, ad jugulum usque tumens, ibidemque firmissime connatum, cum Pleura autem sic tota sua longitudine concretum, ut separandum ab illa non nisi cultro fuerit. Crassum valde hoc Pericardium erat, phlogistica membrana interius cinctum, eadem sua superficie interna tota dire inflammatum.

Liquor turbidus atque subalbidus explebat Pericardii cavum, qui eductus siphone pondus IX. unciarum superabat: in cochleari imposita igni, crassam flavam materiem, lividiore avolante, reliquit.

Eadem pelle inflammatoria Cor vestitum fuit; qua ablata, priorem ejus faciem ingens inflammatio occupare apparebat, posteriorem autem minor. Sinister Ventriculus vacuus fere; dextri orificium grumosus sanguis explebat, polypi flavi principium, qui ex Arteria pulmonali extrahebatur, perquam ramosus.

Dexter pulmo lobo inferiore toto, transudantis materiæ phlogisticæ ope, cum pleura uniebatur: sinister & partim quidem eodem modo, & partim nova membranarum genitura, indissolubilem habuit cum pleura nexum. Dexter Pulmo tabe gangrænosa fere totus diffluxit; minus sinister: uterque autem superficie posteriore niger.

Hydrops crassus purulentus utriusque cameræ Thoracis, ei, qui Pericardii, similis, valde copiosus.

Pleura utroque Pectoris in latere præ inflammatione ruberrima; idque non ad costas duntaxat, verum etiam qua Diaphragma, potissimumque, quod illud tendineum est, convestit.

Puris haud modica collectio inter Mediastini Laminas prope thymum, ubi accretum Pericardium fuerat.

Cerebri Meninges naturales, Ventriculi superiores siccissimi. Plexus choroidei flava materia turgidi.

§. VII. Peracuto morbo ante VII. diei finem denati hominis inflammata reperitur Pericardii interna superficies, Cordisque externa: versi jam in Gangrænam Pulmones: Inflammata denique Pleura, non modo qua Costas, sed & qua Diaphragma, succingit. Cum Thoracis igitur, vitaliumque, quas recondit, partium, universalis pene inflammatio adesset, facile capimus, cur nonies missus sanguis, omniumque maxime postremus, perpetuo phlogisticæ fuerit tenacitatis: cur & pulsuum perpetua durities, & peracutæ continuatio Febris?

Exponendum nunc esset, quæ vitia corporis Pleuritis, a novem retro annis tolerata, genuisset; quæque acutus, quo perierit, morbus? ut aut temere nihil hic proferam, expediet paralelam historiam eo fine præmittere, ut forsitan altera alterius expositioni mutuam lucem ferat.

§. VIII. Famulus, cui Cellarum cura demandata, annum agens 30, qui neque Variolas, neque Mor-

billos, prout ipse ex parte memorari potuerat, materque adhuc vivens testabatur, unquam passus erat, Cephalææ olim obnoxius quidem, jam vero, a decennio non ultra; intermittente quoque febre quondam crebro vexatus, nihil autem ultra a sexennio; nunquam acutum morbum passus; nunquam incommoda pectoris, neque catarrhos graviores, diuturnioresve, neque narium, sedisve, hæmorrhagias; verbo ea valetudine usus, ut ipsi nunquam mittendus sanguis fuerit; acute demum ægrotare cepit.

Die 29. Nov. 1770. inter 8. & 9. vespertinam horam subito eum invasit Pleuroperipneumonia. Missobis ipsi sanguine, antequam morbi primus elapsus dies esset, sumtoque prioribus diebus, Emulso, in Nosocomium nostrum media quarta die elapsa inferebatur. In dies creverat morbus jam, crevitque deinceps in Nosocomio. Tussis in sextum diem usque vexabat, sicca plerumque, & si quid prodiret, gluten plurimo cruore mistum erat: post sextum diem in decimum omnis tussis siluit, quodque semel bisve die ejiciebatur, nigro sanguine & muco conflatum erat.

Homini instituta decies Phlebotomia est, crusta densa sanguinem perpetuo tegente. Copia missi cruoris fuit Librarum novem cum dimidia: detractaque hæc omnis est, primis sex cum dimidia diebus morbi. Pulsus cum inter Phlebotomias, tam post eadem, usque ad diem decimum fere finitum, plenus fuit & fortis, & æqualis, cum celeritate multa. Respiratio perpetuo brevis, celeris, inæqualis, anhelosa, & sub finem sibilosa sæpæ. Migravitque a Thorace lævo dolor in dextrum, mitior in eo tamen, die inchoante octavo: utroque in latere nunc pauca, nunc major, die octavo medio: hujusque sub finem nullus ultra percipiebatur, ejus vero loco anxietatis, oppressioisque pectoris, incrementum; exinde ad mortem usque semel modo levem doloris perceptionem habuit.

Cum

Cum pulsu hoc bono ac forti, post tot Venæ sectiones pleno, & æquali; cum pulsu, inquam, una celeritate culpando, coctio in alvo a 5. in 11. diem apparuit; quæ quippe modica non esset, & flava, & exceptis nonnullis tenuioribus, ac spumosis, passim pul-tiformis. Urinæ perpetuo pravæ; rubicundiores enim passim erant, suspensumque enæorema, & in globum plus minus collectum, quod pravum admodum, gerebant. Die 10., nunquam critico, Crisis quædam fieri apparebat ex sputis crassioribus, albidioribusque; tum & ex Lotio vario jumentoso, arenoso, unoque hypostatico. Septem ante obitum horis pulsus tandem debiliior, & inæqualis, & cepit esse, & semihora ante mortem deficere. Ante finem Undecimi diei cum levi ac brevi convulsione obiit.

Conferentes obiter hunc morbum cum eo ægri præcedentis, nomine agnoscimus eundem esse, ac pulsum, urinarum, respirandi quoque difficultatis, sputorumque penuriæ, ac pravitatis, doloris tandem ex sinistro ad dextrum migrantis, atque nonnunquam latus utrumque occupantis comparatione, multam sane contemplamur paritatem: Operæ precium est igitur causas morbi in posterioris cadavere rimari, atque, num etiam cum causis morbi prioris conveniant, examinare.

§. IX. Die 12. Dec., horis a morte 36. elapsis, cadaver aperturi,prehendimus oculos non corrugatos quidem, sed opacos; rigoremque esse in artubus cadaverum.

Omentum integrum, sic ut perfecte tegeret abdomen, excepto lævo inguine, ubi turgens admodum intestinum Colum de sua illud sede removerat. Ceterum non modo tegebat Omentum omnia, sed & circumvolutum Intestinis, ex anterioribus ventris ad posteriora tendebat: ita ut Hernia Omenti hic possibilis fuisset.

Intestinum Colon octies flexum, in medio ventre diverticulum formaverat adeo amplum, ut a margine Hepatis usque ultra umbilicum cuncta impleret.

Hepar duos pollices latos in medio Epigastrio infra costas descendebat, ac lobo suo minore mediam sinistri lateris partem occupabat: ita quidem ut Hepatis vitia in hoc homine & infra costas tactui patuissent, & latus sinistrum quoque occupare potuissent. Cavum sinistrum Epigastrii ab Hepate vacuum, amplius Ventriculus explebat, hicque ingentem post se, dorsum versus, Splenem recondebat. Vesicula fellea bile vacua, nil nisi paucum liquidi, loturæ carniū similis, habuit.

Tenuia Intestina alba, Ilei vero portio, spithama longior, cum annexo suo Mesenterio inflammata erat.

In Thorace Pulmo dexter, colore in lividum vergens, partim liber, cohærens partim, non admodum fortiter tamen, cum Pleura infima, & Diaphragmate.

Pericardium ingens, tota sua superficie anteriore cum Pleura cohæsit; quo itidem modo Pulmo sinister, idque minore parte sero phlogistico coagulato, majore autem genitura forti membranea. Cæterum Pericardium crassum valde; cum substantia membranarum, tum sero coagulato, quod, crassioris membranæ in morem, internam illius superficiem contexit. Ablato vero eo, superficies hæc præ inflammatione intense rubuit.

Cor album visum, quod similis illud crusta teget; quo ablato carneum apparuit, solito forte pallidius.

Liquoris albi, tenui puri similis, uncix septem cavum explebant Pericardium.

Ex sinu venoso dextro polypus grumosi sanguinis crassus, atque longus, de venis cavis extrahebatur: ex arteria pulmonali alter, crassus, cum figura Arteriæ divisionum: ex sinu venoso sinistro mollior polypus, crassusque idem, & ramosus: qui ex Aorta, longus ille,

ille, durus, flavus ita, ut potiore parte coagulato ferro constare videretur.

In auferendo Sterno purulentus locus apparuit in anteriore superficie Pericardii; neque in eo modo, sed in tota quoque & Pericardii, & Lobi inferioris Pulmonis laevi, ad dorsum, ejusque spinam usque, pus copiosum detinebatur; inter multas, fortesque productiones membraneas, quibus Pleura cum illis connota erat. Texit præterea factitia ex sero nata Membrana has omnes partes. Puris effluentis uncias propemodum quatuor ex singulo pectoris cavo eduximus; ex singulo, ajo, cum soluto Pulmonis dextri cum pleura coalitu pus effluxit quoque. Lobi porro inferioris Pulmonis sinistri substantia glabra fuit, extenuata omnino, non vero erosa. Postica pulmonis utriusque superficies ab inflammatione nigra fuit.

Deglubita factitia a Pleura Membrana, impleta, & rubro sanguine infarta vasa nudo oculo conspiciebantur, potissimum in Pleura dextri lateris.

In frontis dextro latere Cicatrix, & os ibi excavatum: nulla quidem ibi præternaturalis cum Dura matre cohesio, sed paulo altius, aureum nummum magna. Dura Mater ceterum naturalis, Pia quidem sanguine plenior, in lobo autem posteriore admodum. In sinu longitudinali ingens polypus flavus, cum fortibus lateralibus ramis, de Venis Duræ matris extractis. Sinus duo superiores vacui, & sicci: tertius & quartus vix madidi erant. Substantia medullæ cerebri bona; ea cerebelli paulo siccior, nec fere arboream figuram transscissa referebat.

§. X. Si in utriusque hujus ægri morbo multam mirati paritatem fuimus, majorem ea miramur in anatomicæ. Ne Omenti integritatis amplissimæ, ne situs Jecinoris, ne Coli degeneris facci, neve Bilis deficientis, similitudinem commemorem, quid ovo similis ovo, quam utriusque conditio Thoracis? Ingens in utroque Peri-

Pericardium : puris in posteriore uncix VII. in prior uncix IX. cavum explentes Pericardii : ejusdem in utroque superficies interna, cum factitia membrana tecta, tum inflammata valde : Cor eadem purulenta coagulatione incrustatum, polyposque habens : Pulmo utriusque cum Pleura connexus, tam ope factitiæ membranæ, quam vinculi membranei ; dorsoque niger uterque : Purulentus in amborum Thorace liquor : Pleura inflammata in utroque : Pus in Mediastino, ubi Pericardium cohærebat : Plexus Choroidei flavi, Ventriculi Cerebri, ac Cerebelli, vacui.

Similitudinem morbi utroque in ægro contemplati, commodè valde hanc ex tanta partium in cadavere affectarum paritate explicamus ; minus vero commodè rationem dabimus præcipuorum, quæ exhibuit morbus uterque, phænomenum : agite tamen videamus.

1. Cur Respiratio utrique quidem mala fuit, priori tamen pejor ?

R. Inflammatio Pulmonum, Laterumque, ad explicandum utriusque in respirando laborem, sufficit : quia autem prior, docente Anamnesi, pessima cum tussi, tum respiratione, novenis annis, a Pleuritide tunc tolerata, laboraverat, creditur laterum pulmonumque coalitum exinde habuisse, adeoque pejus altero respirasse, quod pulmo tot annis tussi conquassatus, & accretus Pleuræ, ad inflammationem tolerandam ineptior fuerit : de hac re mox latius.

2. Cur pauca utrique tussis posterioribus morbi diebus, sputaque cum paucissima, tum prava ?

R. Morbi materies seu cruda, seu semicocta, seu etiam cocta, si intra cavum Vesicularum Bronchiorumque transfudasset, & tussim excitasset, & sputorum forma prodiisset ; jam vero cum per pulmonis vias, adhuc patulas, in Cor sinistrum parte sui pervenisset, cum sanguine Aortæ & in arterias aut Cordis, aut Pericardii, aut utriusque, & in arterias Intercoştiales, atque

atque Mesentericas pulsus, in Cavum Pericardii, & Pectoris, inque illud Intestinalis tubi, excrevit se. Hinc neque excitare tussim, neque sputa formare potuit.

3. Unde utrique in Pericardio, & Thorace, puri similis materies?

R. Ab exposita mox erronea Naturæ secretionē. Liquet hinc haud ita laboriosas, tortuosasque vias, quarēdas fuisse, ut Pleuritidis per sputa Crisin explicaremus. Constitit quippe Pus a Pulmone & a Pleura, citra sputa, urinariis, alvinisque viis, secerni, & excerni: Videmusque in hoc utroque casu a Pleura, & Pulmone, intra cavum tam Thoracis, quam Pericardii, purulentam effusam materiem. Proinde si inflammatoria Pleuritidis materies ita coquitur, ut mobilis facta in venas transmitti, tradique Cordi dextro possit, comprehendimus eam in cavas vesiculas, bronchiaque posse excerni; via profecto longe & faciliore, & breviorē, per quam novimus eandem alias ab Aorta arteriis aut renalibus, aut mesentericis, sic tradi, ut perfecte judicetur sine spuris morbus.

4. Unde utrique Pulmonis cum Pleura tam pertinax concretio?

R. Ex observatis Anatomicis novimus I. concretionem hanc observari frequentissimam. II. Ex observatis Pathologicis intellegimus a multis impune illam tolerari, a non paucis ægrius ferri; id quod integra Respiratio in illis demonstrat, in hisce vero læsa; dum interea nulla causa alia, præter hanc concretionem, detegatur, in quam istud respirationis vitium jure refundas. Rationem verò ignorare me lubens fateor, cur eadem ipsissima causa in uno corpore effectum sortiat, in altero eodem careat! solitariam tamen hanc observationem non esse, imo frequentem valde, observata testantur in compluribus Morborum causis præparantibus, quæ in nonnullis nullum effectum edunt, in aliis

aliis autem & Epilepsias generant, & Apoplexias, & Asthmata, & Cordis palpitationes, &c. Horum in operibus meis plura exempla communicavi; qui vero *Morgagniana* opera hoc scopo evolvit, inventurus numerosiora erit.

Hinc id audeo conficere, ut utrique horum Virorum dudum natus fuerit hic pulmonum coalitus membranosus; cum alias adeo firmus ac tenax, spatio paucorum aut dierum, aut mensium, non existiret, ut illacerabilis esset: posteriori itaque nullam, priori vero multam attulerit valetudinis jacturam.

At vero quæret forsitan quis, cur purulentum humorem, qui intra Pericardium, intraque utramque Pectoris cameram, effusus cernebatur, minus existimem annosi mali fuisse originem? Quia in eo, qui usque ad ultimum morbum illibata sex annorum sanitate gavisus est, Pericardii a pure repletio non nisi ex natura peracuti, quo periit, morbi, fieri potuit. Cur igitur, cujus rei in hoc viro certiores simus, ejusdem in priore homine originem alibi quæramus?

Instabis: Pericardii Hydropem Anatomici in illis invenerunt, qui nulla ejus præbuerant in vita indicia. Itidem Hydropem Thoracis, cujus ne minima quidem unquam fuerat ante mortem suspicio: cur ergo adhæsiōni pulmonum unice tribuamus, quod forte Cordi adscribendum sit; cum virorum nostrorum alter tot annis male valuerit, & alter idem Pericardii vitium impune tolerare potuerit?

Respondeo I. Respiratio quæ nostrorum priorem tot annis vexarit, non a Pericardii impletione, sed a Pulmonum cum Pleura concretione originem duxisse supra constitit. II. Casus inventi Hydropis Pericardii, absque præviis ejusdem signis, inter omnium rarissimos est; igiturne sapientis est velle utramque hanc historiam, quæ probabiliorem expositionem admittit, ad singularissimum casum referre, aut ut verius dicam, re-
tor-

torquere? III. Qui hoc vellet, non unam, sed duas admitteret eodem in corpore causas, ingentesque eas, & nihilominus indicibus cunctis in vita destitutas: quod videretur rarissimæ rei memoria abuti velle. IV. Data superius explicatio modi, quo in Morbis acutis humores moveantur, secernantur, & excernantur, manifesto docet errantem naturam haud pluribus indigere aut diebus, aut horis, ut ad Pericardium Thoracemque materiam ducat, in eaque excernat, quam vel ad Renes, vel ad Intestina, vel ad organon Cutis, vel ad hos locos omnes.

5. Cur posteriori bona passim alvus, & quid inde boni?

R. Superius jam consistit neque errantem ubique, neque otiosam semper, Naturam fuisse, hacque via portionem excrevisse cocti: forsitan hinc quatrIduo serius, quam prior, mortem procrastinavit.

6. Unde tantæ vires utriusque? tantique pulsus arteriarum?

R. Pulsus Peripneumonicorum tunc incipit debilis mollisque prehendi, quando non nisi copia longe parrior cruoris per inflammatum transire pulmonem potest. Sed utriusque his viris pulmonem a portione materiæ morbosæ puris in alia loca depositio exonerabat; minus ergo & cito, & copiose, a Sanguine gravis redditus, impermeabilisque, Pulmo; copiosorem cruorem transmissit, quam ut consueta pulsuum mollitudo, confidentiaque adessent: hinc se pulsus fortem semper plenumque stitit, quin & sanguis non in serosa parte duntaxat, verum & in rubra, difficulter scindendus, fortiozem, duriozemque ictum parietibus arteriarum impressit, easdemque in validiorem renixum irritavit, coegit. Præterea cum Hydraulica doceant humorum subtiliorem partem ex Aorta ad Cerebrum, Cerebellumque ferri, videtur secretio hujus subtilioris ad Corticem Cerebri & Cerebelli parum tantum turbata fuisse;

se; videntur ideo Nervi id a sua origine accepisse, quod ad eorundem actionem, motumque requireretur. Quapropter etiam Pulsus ad finem fere usque æqualis, viresque ad erigendum, ad sedendum, ad movendum, solito fortiores; ac nulli fere unquam tendinum subsultus. Tandem tamen Pulmo, solidescente fere cruore magis repletus magisque, non potuit ultra sufficientem ejus copiam transmittere, neque exsiccatus idem cruor ultra id subtilia suppeditare Encephalo, quod suppeditaverat eo usque; unde brevi collabi pulsus, & tendere in gangrænam pulmo debuit, letumque inevitabile facere. Defectu hujus subtilioris & sanguis polyposus inventus est, ipsique choroidei plexus, & vacui omni liquore quatuor Ventriculi.

De Membranarum inflammatione differendum accuratius foret: sed cum ejusdem nonnulla exempla casus sequentes adhuc dabunt, malo dissertationem hanc differre, donec hos enarraverim casus.

§. XI. In Consultationem frequentem vocatus fui apud feminam juvenem, quæ valetudinaria a teneris, matre genita, quam in flore ætatis vomitus incurabilis, Phthisisque pulmonaria, e medio sustulerant, pallida, laterum frequentem conquesta dolorem, hilaris ceterum, demum sedecim annos nata nupsit; enixaque primogenitum mortuum, partu altero vivam filiam peperit. In priore graviditate, puerperioque, male sæpe habuit; in altera graviditate longe melius, inque puerperio optime, usque in nonum diem; quo ceperunt eam & febris corripere, & tussis, & vomitus, quæ illam nunquam dereliquerunt. Vomitu abundantiore prægresso, tussis aut nulla erat, aut modica; vomitum instantem tussis pronuntiabat frequentior. Pectus, post vomitum liberius, alios mecum Practicos dubitantes sæpe reddebat, an aut revera, an saltem notabiliter, affectus Pulmo foret? Eventus autem nos docuit haud in Acutis modo, sed etiam in Chronicis, haud omnino

tutas prædictiones esse, quandoquidem inchoante Decembri mense 1769. purulenta sputa Phthisin pulmonarem manifestarent, cum vomitu junctam, posterioribusque Vitæ septimanis cum immani lateris Thoracis sinistri dolore; quo in loco morbi foveam esse aiebat, eumque Paracentesi a nobis inde auferendum poscebat. Sputis tandem cœnosis, & sudore, alvoque colliquantibus, periit 4. Febr. 1770.

§. XII. Altera a morte die Medici complures, Chirurgique, cadaver lustrantes, vidimus emaciatissimum quidem corpus, Thoracis vero Ventrisque lacertos inexpectatæ pinguedinis copiam habere.

Lympha multa in cavo Abdominis. Omentum & pingue valde, & amplum adeo, ut non modo cuncta Intestina contegeret, verum quoque sinistrorsum Lumbos versus, se circum Colon, Ileumque, circumvolveret.

Quamvis a Diarrhœa colliquante pluries vidimus inflammata esse, gangranosaque intestina, hic minime.

Coli Intestini transversus per ventrem situs ita inferior consueta sede, ut infra umbilicum diametri suæ parte decumberet, neque majores suos flexus, jecorarium, splenicumque, haberet medio altiores. Situs hujus in causa Jecinoris moles insignior fuit, totum Epigastrium, seu Hypochondria, replentis, Intestinorum proinde universam præcipitantis molem. Hepar autem ipsum, tantæ licet molis, leve adeo ac molle tamen erat, ut quinque cum dimidia librarum medicarum pondus vix æquaret: pallidius totum, pultisque consistentiæ fuit: Lien modicus, justo mollior.

Ventriculus versus os superius amplissimus, sub jecore descendens, in medio suo coarctabatur ab habentibus tendinosis, illarum, quas Pylorus habet, consimilibus; postea iterum amplissimus ad Pylorum usque: quod autem notandum, Lobo minore Hepatis contegebatur ab orificio superiore, ad usque expositam mox
coar-

coarctationem, emergens inde trium digitorum latorum spatio nudus erat, denique sub lobo majore Hepatis reliqua sua parte se recondebat.

In Mesenterio, atque Mesocolo, tantam luxuriantis adipis copiamprehendimus, ut inde conficeremus, & Lactea vasa, & glandulas primi secundique generis, comprimi, chylique tum elaborationem, tum transitum, retardari multum, cohiberique debuisse.

Vesicula fellea bilis quid continebat, sed æruginosæ.

Uterus cum Ovariis non majoris molis, quam in vix nubili puella.

Thoracis conspectus. Hydrops Pericardii ab unciiis lymphæ tribus. Hydrops utriusque cavi pectoris a ferro rubello non modico.

Pulmo dexter anteriore & laterali superficie liberri-
mus, si excipias ejus cohæssionem cum costæ superioris
arcu, posterioreque parte: cum vertebrae autem tota
sua longitudine coaluerat. Vomicis carens, tubercula
pure plena ostendit, adeo numerosa, ut tres hujus Pul-
monis lobi nonnisi ejusmodi tuberculorum congeriem
referrent. Pulmo sinister nullibi cum Pleura cohæsit,
nisi ad Costam superiorem, ad latera omnium vertebra-
rum dorsi, & media sui, pedis equini dicti, portione
ad Diaphragma; concava autem sua parte cum uni-
verso Pericardio. Lobi ambo ejus haud secus, quam
in dextro, scatebant tuberculis; lobus autem superior
magnam præterea habebat Vomicam. Percusso hoc pul-
mone ubique locorum, pus effluxit hinc griseum ma-
gis, illinc plus subviridescens, quam ex Pulmone dextro.

Qua parte Pericardium & Diaphragma libera a
concretionem hac erant, non nisi pannum exhibuere
ruberrimum.

Ipsa denique Pleura a costa sexta vera, usque ad 5.
id est infimam spuriam, eundem habuit ruberrimorum
vasorum infarctum, eoque manifestiorem: quo ab ejus-
dem dorso cellulositatem accuratius degluberes.

§. XIII. En iterum Diagnoses Prognoseosque ingentem, ineluctabilem, præ tot morborum, eorumque causarum syndrome, difficultatem.

Ut enim a ventre incipiamus; sua importuna mole Jecur medium ferme ventrem sic implevit, ut & Ventriculus, & pariter Intestina, vehementer hic non minus compressa, quam depressa, necessarium agendi, evolvendique se, & explicandi, spatium non habuerint. Nonne hinc sæpe illa tarda, qua laborabat, difficilisque, alvus? An non inde quando aut materie, aut flatibus, hæc viscera tumebant, anxietas dolorque! An ipsa Chyli confectio non turbata? non impedita propulsio? Ventriculus vero sub hac mole compressus, an non pro varia, qua repletus materia, impeditus omnino? An hæc compressio non fecerit, aut auxerit saltem, in medio ejusdem inventam constrictionem? An spasmus in hoc angustante circulo vomitum generare aliquando non potuerunt? Nunquid vomitus etiam superato hoc coarctante circulo, adesse sæpe non debuit, quando contentis turgens Ventriculus una cum Pylo-ro, ab immensa jecoris mole comprimeretur? Et vomitum eundem an non excitavit sæpe Omenti circumvolutio circum Intestina ad Lumbos, Ventriculum, quocum nequitur, trahens, non obsequiosa ejusdem motibus; quemadmodum ab Hernia Omenti solius nasci Vomitum credimus, quando Ventriculum plenum & agentem irritat, vellicatque perpetuo? An & æruginosa bilis in Vomitum non proritat aliis in morbis Ventriculum? Et in hoc emaciatissimo corpore inventa importunæ adipis in Mesenterio moles, an quoque non potuit pondere immodico irritare in Abdomine nervos? Chylo certe debuit, ut supra jam advertimus, impedimento fuisse. Non desunt itaque causæ inemendabilem in vita vomitum explicandi.

Thoracem contemplantes, Hydropem utrisque Pectoris Cavi, Hydropemque invenimus Pericardii: Pul-

mones præterea & connatos hinc inde cum Pleura, & vomicam gerentes, & tuberculis plenos: diram denique Diaphragmatis Pleuræque inflammationem. Horum profecto singula singulos gignere morbos, gravesque illos & letales, possunt. Difficile porro determinare est, quandonam singulæ partium & in Ventre & in Thore, degeneres mutationes ortæ fuerint? An congenitæ quædam, aliæque originem habuerunt longe ferio-rem? Sic quidem ut, si congenitas velis, hæc siluerint diu, adoleverintque tandem, ut in effectum prorumperent? Et qua accidente causa? Nunquid etiam, quod & Ventriculi & Oesophagi, distractio, vellicatio, & compressio, quas ab utrisque situ formaque consequi necesse fuit, irritando Oesophagum, faucesque, Tussim, vere stomachicam, eandemque solam in principio, molestissimamque, creare potuerunt; quemadmodum explicare nonnunquam rariores quasdam tusses, vere ac unice stomachicas, debemus? An ejusmodi tusses agitando quatiendoque pulmonem, demum eundem ita corrumpunt, ut Phthisis inde nascatur? Inflammatio autem Pleuræ ac Diaphragmatis ingens & lata, brevine ante mortem, an vero eo tempore nata, quo laterum dolorem conqueri cepit? Saltem qui toto hoc capite nos occupat Aphorismus *Hippocratis*, si antea in Acutis, in hoc quoque lente morbo veritati consono- nus deprehenditur. Sed mirabilia videbimus.

§. XIV. Natus XVIII. annos juvenis, Cementarius, narrabat nobis ventrosum a teneris, verminosumque, se fuisse; deinde circa XII. ætatis annum, sumto ignoto quodam pulvere, integros vermium glomeres se dejecisse, ab eoque tempore & ventris concidisse tumorem, & siluisse incommoda vermium: Variolas se infantem, puerumque Morbillos, ita transisse, ut labes nulla remansisset sanitati: crebrioribus narium hæmorrhagiis obnoxium quondam se fuisse, ab anni autem elapso spatio haud ultra. Febri tertiana ante quinque
abhinc

abhinc decursas septimanas se laborasse, quam demum ignoto pulvisculo, ante 7 & 8. insultum sumto, profligasset.

Hic Juvenis die 3 Junii 1770. cum in sylva publica ambulans, neque, ut ait, æstuans, sudansve, frigidam cerevisiam bibisset, domumque repetivisset, mox horam integram horruit, æstuavit deinde, unaque & lateris dextri, & ventris, pungentem expertus dolorem, siti immani, ac dolorosa respiratione, laborare cepit. Idem & altero die, & tertio, & quarto, per omnia continuavit, cum noctibus propemodum insomnibus. Finiente quarto die Phlebotomia in dextro brachio facta, Infusumque pectorale datum est: effectum inde id, ut dolor pauxillum leniretur: febris tamen cum enarratis symptomatibus, inquietisque noctibus, perseveravit. Die V. ac. VI. Diarrhœam passus est, quam oleum cum jure carniū septimo die epotum pacavit.

Die 7 morbi majorem partem elapso, in Nosocomium illatus, pulsus mediocriter celerem habebat, plenumque illum, & fortem, & subdum, æqualemque. Latere dextro, ac ventre universo, admodum dolentem juvenem vidimus, laboriose respirantem, sicce, frequenterque tussientem, sitientem admodum, leviter transpirantem, valentemque unico, idque totius ægritudinis decursu, capite.

Vena, ut monui, domi secta fuerat. Nos autem summam morbi cruditatem die hoc septimo, octavoque continuantem intuiti, Phlebotomiam utroque hodie repetivimus, Libræ ad singulam vicem copia. Utriusque sanguis vehementis inflammationis notam habuit. Mitiora paulatim facta symptomata coctionem incipientem designabant; sic ut nono quidem die finiente naris sinistrae hæmorrhagia modica prodiret; undecimo autem mox instante, ipsoque illo die, alvus copiosa, flava, atque pultiformis, varia vice, una cum Lumbricis teretibus numero quinque, exoneraretur:

ita ut die quarto & decimo judicatus a morbo videretur. Urinæ & sub hoc tempus, & postmodum plerumque, naturales, arenam passim gerentes, postque Aquam lax. Vienn. die 18. assumptam, hypostaticæ.

Hoc ipso die Febris rediit, crevitque cum respiratione perquam anxia, pulsuque & duro, & ad minimum motum inæquali; unde 20. die sanguis missus est, qui summe pleuriticus fuit. Hoc ipso die amplissimas habuit, ut horreremus, pupillas; utque nidum vermium adhuc latentem suspicaremur. Febre parumper mitesciente, stillicidium sanguinis nare sinistra observavimus, & dolorem dextræ pectoris ventrisque partis, mitiorem. Sextum Lumbricum hoc die deposuit. At vero die 23 Febris valde inflammatoria fuit, cum auctioribus doloribus, celerique ac dolente valde respiratione. Unde ex dextro brachio iterum decem detraxi uncias cruoris, qui momento crassescere, densoque cepit corio tegi. More nostro, sæpe fortunatissimo, Emplastrum amplum, ex una parte Empl. Vesicantis, tribusque Meliloti, compositum, dolenti lateri admotum est. Brevi post & urina hypostatica mingebatur, & semicocta alvus dejiciebatur, cum septimo Lumbrico, dolore soluto omni, febreque mitiore. Die vero 26, cum dolor redivivus respirationis suffocationem minaretur, nec ullis remediis auscultaret, missionem sanguinis iteravimus, crassitudine, corioque, non cedentis proxime priori.

Die 27. 28. 29. 30. 31. æger melius habuit, alvum urinæque subcriticas reddidit, viribus crevit, dolore caruit; modicam tamen pulsum celeritatem, & si moveret se, inæqualitatem, habuit perpetuo. Octavum Lumbricum ejecit finiente 31. die.

Die 32. 33. 34. excepta pauciore pulsum celeritate, per omnia valebat. Die 35. & 36. pulsus sæpe lentus, a minimo autem motu paxillulo celerior: optime ceterum appetivit juvenis, digessit, egressit, hilaris & ani-

& animosus fuit, robustusque ita, ut tota fere die aut ambularet per conclavia, aut sederet. Observavimus modo singulis 35. pulsibus, sive celerioribus, sive lentioribus, Dicrotum pulsum.

Die tandem 37 post optimum somnum media nocte expergescit, bene tamen, licet somnum ultra capere non posset, se sentiens, & cum vicinis, quoque vigilibus, ægris confabulans. Vix vero audita hora secunda crampum conqueri cepit manum pedumque, ac valde ejulare. Pulsus tunc celer valde, ac per omnem modum inæqualis. Celeris quoque, anhelosa, atque inæqualis respiratio. Dilatatissimæ tunc Pupillæ, admotaque immobiles candela. Pluries, quid causæ cur ita vociferaretur, rogatus, nihil regessit. Cum vesperinus Clyster in ventre adhuc hospitaretur, immixtum Recto Suppositorium fuit, unde mox cum Lumbrico Duodecimo copiosa alvus. Expulso eo enemate, aliud immixtum, idque oleosum, fuit, ad sedandos dolores. Verum obstupebant Assistentes & Custos eam ani amplitudinem, ut facile pugnus immitti potuisset; qui tamen adeo contractus olim, ut clysteris cannulam ægre admitteret. Emolliens atque calens Cataplasma universo ventri obvolvebatur. Deglutitio, & loquela, impossibiles. Vomuit aliquoties. Postea deglutiit Spiritus Cornu Cervi succinati tantillum, Juris, Vinique: vomuit iterato. Hora quarta contorquere se per intervalla cepit, & per lectum devolvere, genuaque ad pectus replicare: pauca tunc locutus est, testatus dolorem, Deumque precatus. Mox momento tranquillior visus, expiravit. Horis 50. a morte Cadaver lustravimus.

§. XV. Aperto Ventre, Jecur utroque lobo tres latos digitos infra costas propendebat: ita ut, in cunctis hujus Capitis casibus, si quam duritatem, tumoremve, Hepar habuisset, externus nunciasset contactus:

quem tamen ab altiore ejusdem situ frequenter negari numerosiora cadavera nos docuerunt.

Colon Intestinum infra Hepatis lobi majoris crepidinem, lævoque in latere infra Ventriculum decurrebat sic, ut si Ventris altitudinem a sterni mucrone ad umbilicum tripartitim divideres, Coli transversi situs ad duas tertias infra sternum partes esset.

Jecur & Splen boni. Vesicula bile bona plena.

Ventriculus dexteriore sua parte locabatur Colon inter & minorem Jecoris lobum; sinistriore autem ad dorsum sub Hepate abscondebatur. Percussusque oleum ostendit, quod cum jure carnis multum ultima vitæ lucta sumserat. Rugas habuit villosæ tunicæ in cavo majore, in media dextraque vero parte fuit glaberimus.

Amplus adhuc, minus tamen, quam in ultimo vitæ certamine, orificio suo Anus. Intestina ab ano sursum versus perscindendo, Rectum vidimus, principiumque Coli, altitudine quinque digitorum laterum vacuum: Colon abiinde, ad Cœcum usque, plenum flava ac pulvem referente materie, affixa undique interiori tunicæ.

Tenuia Intestina a Duodeno deorsum versus aperientes,prehendimus Duodeni, Jejunique omnis, internam superficiem muco exiguo indui; in Ileii autem plagis quatuor Vermes numero sex: in duobus scilicet locis singulum, in duobus geminos; macrem unum, albumque, ac spithama breviorē; macrum alterum brevemque, minus priore albidum; tres fuscis solitæ magnitudinis; crassum unum longum, variegatum, pluribus in locis maxime fuscum. Hi sex Lumbrici, cum duodecim illis, quos vivus æger excrevit, faciunt una octodecim.

Ab ipso jam principio molliore manu Intestina contractaveram, ne quid turbarem, si forsan alicubi lumbricus, proboscide in tunicam infixam hæreret pendulus:

sed

sed cum mortui omnes essent, deprehendi quid simile non potuit.

Ileum Intestinum a Valvula sursum sesqui ulnæ longitudine repletum erat pultiformi stercore, lateribus per ambitum adhærente. Pluresque inflammatae in illo Plagæ. Volvuli non pauci, contorsionesque Intestini; tum & compressio ibidem laterum ejus tanta, ut cavitas integre deleretur; deprehendebantur. Mucosos autem glomeres, quibus plures lumbrici involuti sæpe prodeunt, non reperiēbamus: ad duos modo Lumbricos pauculum muci spissioris invenimus.

In Thorace boni Pulmones, nisi quod dextri inferior pars jam purpurasceret. Sinistri adhæsiō nulla, dextri pauca, rara, infirma, cum Pleura; paulo firmior cum Septo medio. Utroque in cavo Thoracis una alterave uncia lymphæ rubellæ.

Pleura dextri lateris longe lateque inflammata, rubris vasis vehementer infartis turgens, pannum proinde ruberrimum, crassissimumque exhibens. Rubedo autem hæc ab externa Pleuræ partæ cellulosa vix conspicua, partem ejusdem interiorē maxime tingebat. Musculorum intercostalium inflammatio nulla.

Solito plus in Pericardio Lymphæ. In cordis sinistri superficie album stigma veluti quondam inibi existentis abscessuli. Uterque thalamus vacuus. Substantia pallida cordis.

Pleura succingens diaphragma æquabilissime rubra in ejusdem dexteriore regione; in sinistiore paulo minus, in tendinea autem parte non modice: inferior Diaphragmatis facies sana.

Bona Dura mater. Sinus longitudinalis vacuus. Pia vero mater ita rubicunda; ut nunquam a fortunatissima injectione simile viderim; idque anteriore parte æque quam & laterali, & superiore, & inferiore, interiorēque, usque ad Callosum Corpus. Sinus duo superiores, nec non tertius, ne guttam quidem Lymphæ

habebant ; forte nec quartus , sed id affirmare imprudens ejus dilaceratio asserere vetat . Cerebri Nervorumque originum durior solito substantia .

§. XVI. Si Aphorismi *Hippocratis* , quem pro Thema posuimus , veritas unquam manifesta apparuit , hic profecto sic apparuit . Quis enim hic consuetas leges sive naturæ morbi determinandæ , sive prædictionis formandæ , sequi potuit ? Morbus a principio inflammatorius , 11. die judicari visus ; febricula superstite deinceps die 23. de integro inflammatorius ; imperfecta crisi triduo iterum remittere visus ; denuo maxime inflammatorius ad 26. diem ; postmodumque crisi lenta atque tarda curatus adparens , tandem inopina morte redivivam excipientem salutem , tam amplas , tam perspicuas , tamque nobiles occupasse partes deprehensus , quam immensum a consueto naturæ tramite non aberraverit ? sed quo rem facilius enodem , singulam singulo capite resumam .



SECTIONIS I.

CAPUT SECUNDUM.

*De necessitate notandi exacte viscerum in
Cadavere situm, sive a natura, sive
a Morbis natum.*

§. I. *Contemplatio frequens situs Viscerum in Cadaveribus necessaria omnino est, quia ingens saepe est differentia loci, quem occupant. Sine hac attentione non evitabuntur errores in determinandis morborum sedibus. Hoc exemplis probatur.*

§. I. **I**N singulis hujus horni mei Operis tomis scrupulosius semper Viscerum in Cadaveribus situm notavi; neque unquam Medicorum, Studiosorumque corona, in secando cinctus, eorum in hunc ipsum attentionem excitare neglexi. Quippe quando primo toties Hepar aut vix, aut omnino nihil, infra Thoracis crepidinem eminet; nonne fallimus ægros, dum quemcumque sive tumorem, sive duritiem, sive dolorem, infra costarum marginem illi deprehendunt, horum in Jecore causam fontemque statuamus, nihilque nisi Jecoris deoppilationem clamitemus? Neque dicat quis efficere Jecinoris tumorem, ut si neutiquam antea, saltem jam grandescendo sese infra costas percipiendum præbeat: etenim doloris principium vix comitem tumorem habens, tumorisque etiam notabilioris incrementum versus posteriora, Hepatis lobi majoris anteriorem parte infra costarum marginem notabiliter
non

non deprimentia, vanitatem hujus asserti ostendunt. Quando II. sinistrum Hepatis majoris lobum & totum videmus explere Hypochondrium lævum, & longe lateque infra costas descendere; an non ridicula nostra sententia est de absentia eo loco Hepatis, deque sede Morbi aut in Ventriculo, aut in Pancreate, aut in Liene, aut etiam in Colo, quærenda? Ubi III. Splenem innumeris vicibus in arcu costarum, dorsumque versus, recondi advertimus, ita ut rarissime ad costarum marginem porrigatur; annon male Splenem, Patrem morborum appellamus; dolorem, tumorem, duritiem, sub Costarum sinistrarum experti Crepidinem? Si IV. Hypochondrii sinistri incommoda aut in Liene, aut in Ventriculo, aut in Pancreate, Colove, quærimus; jecorarios morbos non nisi in dextro Hypochondrio quærendos rati? Dum V. censemus Ventriculum eorum malorum sedem, originemque esse, quæ in medio, eoque altiore Epigastrio, pauloque sinistrius, percipiuntur; minime attendentes ad Ventriculi situm frequenter vel multo inferiorem, vel penitus sub Jecinore reconditum, dorsove, quam anterioribus, proximiorum? Quando VI. Colicos dolores nuncupamus eos, qui obtinent in Epigastrii superioribus; Colo Intestino vix supra umbilicum inveniundo: viceque versa, dum in Ileo Intestino sedem figimus dolorum, qui umbilicalem regionem torquent, ubi Colon præcipue hæret? Ubi VII. Pleuriticum dolorem eum appellamus, quem ad inferioris Thoracis latera percipit æger; cujusque origo unice in Coli flexu, seu lienari, seu jecorario, est, ad 9. 8. 7. costam, ab inferioribus numeratam, aut alterutro ascendentis, aut utroque latere; interea dum flexus illi pedis forte longitudine depressiores hærent? Et e contrario dum VIII. propter Coli, ejusdemque flexionum, depressiorem, quem observamus quoque non raro, situm, negare audemus ab illius Intestini aut fartura materiæ, aut flatu,

flatu, aut inflammatione, acritudine, vermibusque, hominem sæpe ad latera thoracis, cui tunc illæ Coli flexuræ contiguæ, dolorem percipere posse, qui mentiatur Pleuritidem? Singulares rarioresque præterea naturæ lusus, insolentesque errores, quos neque prævidere, neque vel conjecturando assequi possumus; sed ejusmodi partium formas atque sedes hic volo, quas eo frequentiores deprehendimus, quo Cadaverum sectioni incubuerimus seduliores; quæque eam saltem prudentiam insinuant, ut ne ex sede tantummodo mali, sed etiam ex reliquis morborum signis; illorum naturam determinemus, aptamque medelam admoveamus.



SECTIONIS I.

CAPUT TERTIUM.

De Inflammatione ac dolore Membrarum.

§. I. *Membranas omnes vasculosas esse demonstratur: & quidem primum Pleuram innumeris arteriis venisque scatere evincitur experimentis Abrahami Caau Boerhaave, Morgagni, partimque Halleri; unde Mullerus refutatur, quique cum eo hoc negaverunt. De Peritonæo ac Mesenterio idem probatur. §. II. Sensiles quoque Membranas hasce esse, probatur ex Winslowo, Caauio, & quodammodo ex Hallero. §. III. Et vasculosum, & sensile esse Pericardium, similiter patet. §. IV. Mesenterii sensibilitatem ostenderunt Wepferus & Ruischius. §. V. Argumenta numero æto,*

octo, quibus apparet opinionis sensibilitatem Membranarum, ac præcipue Pleuræ, negantis, ea nunc esse tolerabilitatem, ut Pathologiam hanc ultra turbet, jamque citra metum nocendi integrum cuique esse, utram velit, sententiam amplecti; & ut ultra non subsistat, quod olim nos inter, Gallerum, meque, intercesserat, dissidium. Querela de amicis Italis, qui hanc nostram turbare concordiam moliebantur. Epistola Viri illustris Halleri testatam faciens eandem. §. VI. Interea tamen inexplicabile quid Membrana habent, eo quod etiam illa, quæ omnibus fatentibus sensilissimæ sunt, sæpe insensiles esse appareant. Demonstratur res exemplo Ventriculi, Diaphragmatis, Piæ Matris, Intestinorum, nec non nervorum incumbentium Articulorum capsulis. Diagnosin ex Albertino pro Intestinis. Casus unus citra exemplum.

§. I. **M**embranas vere, direque, inflammatas Auditoribus meis toties demonstravi, ut earum ipsis necessariam debeam expositionem. Pleuram siquidem, tam qua costas, horumque musculos contegat, quam qua convesiat Diaphragma, Mediastinumque formet: Pericardium internum, externumque: Peritonæum, cum abdomen tegens universum, tum Mesenterium formans, rubicunda vicibus numerosis viderunt mecum. Quum autem muriades vasorum non inflammarentur in illis, nisi hæc vasa præexisterent, minus recte has Membras ex complanata cellulositate, aut penitus, aut propemodum vasis destituta, fabrefactas existimamus.

Abraham Caau Boerhaave in Aortæ descendente, quem vocant, truncum, ligatis Axillaribus, & Carotide dextra, incisæque Cava vena superiore, thoracem mox ingressura, perque immissam aciem perforata, ac perscissa valvula, injecit tepidam aquam, premendoque thoracem cruoris notabilem expressit copiam. De-
terfa

terfa autem aqua, quæ in cavum pectoris tranſſudaverat, preſſoque thorace,, omni momento ſudabat,, membrana coſtas ſuccingens humidum tenue, aquoſum, ut & in omni puncto Pericardium, Mediſtinum, Pulmones, quorum omnium ſuperficiem docuimus hujus membranæ (Pleuræ) eſſe propaginem, preſſa exſpirabant aquam: & ſponte. Demonſtrat hoc experimentum patere viam ex Aorta per innumeros ramos in omnium harum partium ſuperficie oſculis minimis. Multum tamen differunt hæc oſcula ſubtilitate ab iis, quæ inter binas Cerebri meninges vaporem exhalant. Abterſa enim ſuperficie, dein preſſa, armatus oculus deprehendebat diſtinctas guttulas procedentes, quæ mox conſuebant. Ergo vaſculofam eſſe Pleuram, atque exhalantibus oſculis plenam, hoc ſaltem experimentum demonſtrat.

Mediſtini ac Pericardii quidem vaſa illuſtris vir *Hallerus* deſcripſit, non vero, quod ſciam, ullibi ea Pleuræ; admittere tamen illa videtur dicendo *Lib. IV. Elem. Phys. pag. 257.* Alba ceterum Pleura, inflammata tamen, aut ab admiſſo in arteriolas ſeſo, vaſculis non maximis pingitur.

Hinc refutatur ſyſtema *Cl. Mulleri de ſede & indole Pleuritidis Giſſæ 1756.* editum, Pleuramque negans vaſis gaudere. Addit Autor *Cl. Virum*, magnumque Anatomicum *M. Meckel*, vaſa quidem in cellulofitate Pleuram circumdante detexiſſe, ſed neque injectione ſubtiliſſima, neque diſſectione, unquam in ipſa Pleura vaſa vidiſſe. Subjunxit etiam *Cl. Mullerus* ſe quoque in Pleuriticorum cadaveribus rem examinaſſe, Pleuram vero reperiſſe albiſſimam. Celeber etiam Autor quiſpiam, in *Mulleri* hanc ſententiam commentatus, mitigat quidem illam utcunque conſideratione nonnullorum corporum, quorum Pleura inventa eſſet haud omnino ſanguineis deſtituta vaſis; abeſſe tamen non potuit, quin Pleuræ, ſanguinea vaſa habentis, rariffimam obſervationem eſſe concludat.

Dixe-

Dixerat Vir egregius *Licentaud*, *Cap. de Infl. Pectoris*: si inspectioni cadaverum fides, quæ sola tamen decidere quæstionem possit, Veram Pleuritidem in morbis rarissimis esse: se enim in ingenti numero hominum, quos pectoris inflammatio occidisset, duos periisse duntaxat, qui veram Pleuritidem passi essent.

At vero quanto in numero cadaverum, tam hoc capite, quam præcedentibus hujus operis Tomis descriptorum, centeni testes mecum non viderunt, Pleuram vel rubicundam utcunque, vel rubicundiozem, vel panni scarlatini instar rubicundissimam! Si rarissima res est, cur nobis, post laterum dolores toleratos, visa toties? Si rarissima res est, cur *Viris magnis, Valsalva & Morgagni*, observata quater & decies? Vide hic *Rat. Med. Tom. IX. Cap. IV.* Abunde sane vindicata Veterum doctrina videtur, in Pleura Pleuritidis stantentium sedem. Et si non raro contigerit, ut alba hæc membrana post Pleuritidem reperta fuerit, haud minus tamen & Pleuritidis sedem esse, & necessario insequente Peripneumonia hominem necare, quemadmodum ex cunctorum Medicorum, ita & Clarissimorum *Valsalva & Morgagni* observatis demonstratur; qui disertis verbis adnotarint Pleuriticum dolorem non modo inflammatae Pleuræ, sed & pressæ eidem, distrahæve, adscribi oportere.

Atque hæc de Pleura satis; ad Peritonæum nos convertamus. Idem *A. Cæu Boerhaave Per Hipp. §. 555. & seq.* „ Aperto Thorace canino in Aortam „ descendentem per siphonem, abdomen versus, leniter „ immisi tepidam, expresso prius per incisam Cavam, „ & supra incisionem ligatam, sanguine. In aperto abdomine inveni omnia contenta humore subrubello „ perfusa, atque collectam aquæ subsanguineæ quantitatem, venasque omnes ad rupturam usque distentas; „ sanguine scilicet, per aquam a tergo prementem in „ illas ex arteriis adactæ. Spongia ebibito omni humi- „ do,

„ do, absterfa Peritonæi superficies interna, dein pres-
„ fa, vel & sponte, dabat distinctas oculo armato,
„ quin & nudo, videndas guttulas, quæ ut in thora-
„ ce, mox confluebant. Docet hoc experimentum mo-
„ dum & viam, quibus in sanitate cavum a non con-
„ cretis factum in abdomine repletur spiritu (rore)
„ ex continentis superficie exhalante.

Ut in Pleura superius, ita hic cernimus iterum in Peritonæi membranæ substantia vasa numerosa: sed rem evidentiorē *Ill. Haller* reddidit *Elem. Phys. Lib. XX. § 19.* Nam vasa Peritonæi a septem post viginti originibus oriunda descripsit, ut jam ante monui.

Mesenterium ac Mesocolon, itidem vasa sua *Kauiano* Experimento numerosissima demonstrant. *De Persp. Hipp. Cap. 27. §. 562.* „ Injecta in Art. Mesenterii-
„ cam superiorem aqua, exit per ultimas Arteriolas
„ in tota Mesenterii superficie, & inter hujus plicas,
„ patentes: sudare fecit & eadem omnem Intestino-
„ rum superficiem externam in omni puncto. In Ar-
„ teriam mesentericam inferiorem, quæ Mesocolo pro-
„ spicit, injecta aqua transpiravit ex omni Mesocoli
„ & crassorum Intestinarum superficie externa in omni
„ puncto: absterfa vero aqua, eventus, ut ante, erat
„ conspicuus.

Egregius *Haller. loc. cit.* „ Mesenterii & Mesocoli
„ vasa propria distinguere oportet ab Intestinalibus.
„ Illa perexigua, multa, brevia; hæc amplissima sunt.
„ Mesentericæ arteriæ venæque fere sunt ab Intesti-
„ nalibus: Mesocoli vascula, ut perampli, a sacris,
„ ab Ileolumbalibus &c. scilicet a XIX. diversis trun-
„ cis. Recta sunt Vasa Mesenterii & Mesocoli, ne-
„ que habent illos pulcros intestinalium arcus.

Albæ igitur hæ membranæ omnes a mera complica-
tione cellulosæ telæ si formentur, non ab eo sola sal-
tem, sed ex numerosissimis simul vasculis arteriosis &
venosis; adeoque obnoxia sunt nimia impletioni, in-
flam-

flammationi, gangrænæ. Quod magno prudentis injectionis labore Anatomici, hoc nostris in ægris toties morbi demonstrarunt nobis. Namque cribra non sunt membranæ hæ, humorem unice transsudantia, qui ex Arteriis supra earum dorsum decurrentibus, per Membranarum transsudaret poros: Morbi demonstrant hæc vasa in ipsa earundem substantia; & cellulositas externa vix vasculosa, si deglubatur, omnium patentissime hæc vasa in mera membrana conspiciuntur.

§. II. Opinio communis fuit Membranas, præsertim autem Pleuram, Mesenterium, forsan & Peritonæam, acutum præbere posse doloris sensum. Consulamus Anatomicos præcipue, & experientiam, ne temere quid aut rejiciamus, aut amplectemur.

Summus Anatomicus *Jacobus Benignus Winslow Lib. IV. Exp. pect.* ubi ostendisset Pleuræ vasa Intercoastalium arteriarum venarumque, nec non Mammariarum internarum, atque Diaphragmaticarum, ramusculos esse, eosque & multos admodum, & valde tenues, & frequenter inter se mutuo coeuntes; tandem ejusdem Nervos describens, eos Dorsalium, seu Costalium furculos esse censet. *Pleuram*, ait, ideo nexam costis, ut tendatur, nec dimoveatur: at vero hoc ipso nexu summæ sensibilitatis am esse ad minimam sive accumulati cruoris, sive densatæ Lymphæ pressionem; eoque magis, quo hi nervuli præter modum tunc comprimantur in inspiratione, in qua musculos intercostales intumescere oporteat.

A Kaau libr. cit. Cap. VII. §. 142. & seq. „ Interea tota cava superficies Thoracis, ad Costas, Costarum cartilagines, & Diaphragma, ubi illud extra „ Pericardii basis ambitum convexum est, obducitur „ una, continua, tenui, nervosa, forti valde membrana, interne politissima. Hæc Pleura dicitur. Huic „ succumbit ubique membrana cellulosa ad externam „ superficiem; hæc in saginatis optimo refertur adipe, „ in

„ in omni parte; supra corpora Vertebrarum dorsi,
 „ costas, illarum cartilagine, sternum, diaphragma mu-
 „ sculosum: ita ut elato tumore pingui sæpe thoracem
 „ arctet, & obesitas angat organum respirationis, &
 „ Pleuram a costis interiora versus recedere faciat.
 „ Quin & in pinguioribus flatu inde distendi potest
 „ Pleura. Hinc quatit ægros tussis anhela fues, &
 „ faucibus angit obesitas. Nusquam uberior hæc pingue-
 „ tudo, quam ad loca intercostalia in pectore: ibi
 „ muscoli semper agentes hanc naturaliter requirunt.
 „ Ibi aggeritur pinguibus maxime, quasi squammatim.
 „ Ibi tam facile separabilis Pleura: in Inflammatione
 „ laterum elevatur sæpe, & in abscessus mutatur. In
 „ macilentis & tabidis evanescit prorsus.

Inclytus *Haller. Lib. El. Phys. VIII. §. 2. Caavium*
 in his injectionibus secutus, eisdemque effectus exper-
 tus, a *Caavii* sententia de sensibilitate acuta Pleuræ re-
 cedit, quod experimenta a se facta eandem aut plane
 insensibilem, aut parum admodum esse, demonstrare vi-
 sa sint; sed *Tom. VIII. in Præfat.* rem clarius expli-
 cat, & Pleuram secundo saltem posse dolere conce-
 dit. „ Nihil ego de Pleuritidis sede, inquit, præter
 „ paucissimas voces scripsi.... Pleuram quidem sensu
 „ carere, impositos ejus convexo dorso nervos vero, si
 „ quando ab inflammatione vicinæ membranæ corri-
 „ piantur, acriter dolere, hæc omnia & cum ratio-
 „ nis speculatione consentiunt, & cum experimentis.

§. III. Pericardium inflammari posse illustris ejus-
 dem triumviratus testimonio evincitur; vasa numerosa
 illius singulo horum accurate describente, *Winslow. lib.*
III. §. 85. Caav cap. XXX. Haller lib. 4. §. 16.

Utrum vero sensile Pericardium, nec ne, vix ultra
 sub lite est. *Winslow* sensibilis apparet, cum propter
 nervos, tum propter tendineas ejus fibras. *Caav* cum
Ruffo Ephesino hanc membranam *νευρωδὴν* appellans,
 sensibilem statuit. Illustrissimo *Hallero* „ obtusus ejus
Pars XIV. D „ esse

„ esse aut nullus sensus videtur; eoquod nervi multi
 „ quidem Pericardium penetrent, ad Cor ituri: in eo
 „ sacco pauci manere videntur, neque satis noti. „
 Explicationem hanc minus esse priorum repugnantem
 sententiæ, quam primo intuitu apparet mox videbi-
 mus.

§. IV. Mesenterium denique sensibile sit, paucis in-
 quiramus.

Ac primum quidem, *Wepferiana* experimenta sum-
 mam nos docent sensibilitatem inesse exteriori Intesti-
 norum tunicæ, quæ nonnisi Mesenterii propago est.

F. Ruisch. Adv. Anat. Dec. II. n. 4. annos quin-
 quaginta & plures, ab *Amstelodamensi* Magistratu præ-
 positus interemtorum examini, numerosissimas habuit
 occasiones hanc quæstionem illustrandi, in populosissi-
 ma illa urbe, in qua innumerabilis Nautarum gens
 cultro lites mutuas dirimere solet. Primo notat fre-
 quentem ex Hæmorrhagia mortem, post folius Mesen-
 terii læsa, perfoſſo, si ibi adest, omento, vasa: quæ
 arteriosa venosæque *Eustachius*, mira sua præparandi
 arte, tam grandia, tamque numerosa nobis Tab.
 XXVII. depicta reliquit: *secundo* Mortem & certam,
 & præproperam, & summis stipatam cum anxietatibus,
 tum doloribus; vix ceterum ullis vasis læsis, nec sa-
 uciatis aliis partibus, nisi unius Mesenterii substantia.
 Unde nobis *Boerhaavius*, de Mesenterii vulneribus fer-
 monem faciens, eorum nobis letalitatem serio inculca-
 bat; quam ab hujus duplicatæ Membræ Nervis, to-
 to cum corpore communicantibus, oriri arbitrabatur.
 Profecto aliam fuisse læsionem suspicari nemo poterit,
 nisi *Ruischii*, Anatomici summi, Viri annosissimi, &
 in examine, renunciationeque Vulnerum versatissimi,
 testimonio fidem deneget. Confirmabat mihi hujus ob-
 servati veritatem Vir optimus, *Josephus Jaus*, Chirur-
 giæ in hac inclyta universitate, dum viveret, dignissi-
 mus Professor: objicientique mihi Chirurghi de la Pe-
 yero-

Yeronie casum ex *Tom. I. Act. Chir. Reg. Par.*, qui in Herniotomia, ablata gangrænosa totius Intestini portione intermedia, ora Intestini utrinque adducens ad vulneris labia consuebat, eademque ibidem, acu cum filo Mesenterio impune transso, firmabat; respondit plagam oportere hinc inde in Mesenterio esse, quæ nervo destituta, operationis admiserit impunitatem.

Interim egregius *Haller Lib. XX. §. XI.* „ Mesenterii fabrica, inquit, eadem est, quæ in universum Peritonæo; natura nempe ex cellulosa tela stipata, absque fibris; vasculis numerosis picta, sed exiguis, nullis nervis conspicuis. Hinc absque sensu est, ut omnino convulsiones ab acriori spiritu Nitri superfuso, in cane vivo natas, ipse experimenti Autor *Amatus Lorry* Nervis intestinalibus, per tenue velamen tactis, tribuerit. „ Estque *Wepferi* experimentum. An non videtur *Lorryus* sibi vim intulisse, hoc effugium quærendo?

§. V. Quandam itaque sententiarum advertimus discrepantiam, in harum omnium membranarum expositione; paucam tamen eam esse, ac prope nullam, docebo.

Pleuram concedamus insensilem esse, demus etiam insensile esse Pericardium, & Peritonæum, & Mesenterium, Articulorumque præterea & capsulas, & ligamenta, tandem & tendines: inde nullo modo consequitur id, ut falsum sit omne, quod de harum membranarum dolore, partiumque convulsione, ab his affectis nata, deque subsecuta morte, celeberrimi cum Anatomici, tum præsertim Pathologici, adnotarunt. Militari Veritas parti utrique potest.

Namque I. Membranæ, Ligamenta, Tendinesque, possunt videri insensiles, quando subito, quando integre, persciuntur; acutissimi interim sensus esse; dum aut paulatim sive sciuntur, sive roduntur, sive distrahuntur, aut dimidiatim, partimve, duntaxat

diffolvuntur. Id Historia vulnerum evincit abunde, nec dubii quidquam hac super re in arte est. Vid. *Boerhaave cap. de vuln. in genere, & Comm. Ill. Pref.* Ipsa sensibilissima Cutis acriter sæpe dolet dum Vena tunditur; qua propter multi hanc puncturam, seu scissionem formidant: sæpe vero citra vel minimum sensum doloris perficitur: quo Chirurgorum quorundam artificiosa eruditaque manus facere solet. Itidem in Cutis subita expansione inflammatoria immanis dolor sæpe percipitur; in expansione Hydropicorum lenta, eaque & gravidarum, & spina ventosa benigna laborantium, sæpæ ne attacta quidem, aut distracta, dolet.

II. Membranæ, Capsulæ, Ligamenta, aut in sua substantia nervos habent, ut pluribus visum, aut minime. Si minime, nervos modo aut transgressos habent, aut circumpositos, aut subditos, aut inclusos. Utrumlibet censueris, Membrana ac reliquæ enumeratæ partes, ab applicata dolorifera causa non dolebunt, si eo in loco ab illis afficiantur causis, quo in loco vel substantia illorum nervo caret, vel ubi nullus adest in vicinia nervus, qui ledi possint: dolebunt vero parum, multum, plurimum, pro varia intensitate applicationis causæ dolorificæ ad Nervos; qui seu pauciores, copiosioresve, in ipsam harum partium Fabricam componendam concurrunt, seu in earundem vicinitate a natura ordinantur.

Unde merito conficere posse videor *Primo*, Lentam sanguineorum vasorum farturam dolore carere posse, eo quod & ipsa Membranarum vasa, si illa sint præ nervulorum in sua fabrica concursu sensibilia, paulatim tantum distendantur, adeoque tardiori suæ expansioni citra difficultatem, citraque molestiam, accommodentur: & si qui nervi vel in substantia membranacea, vel in vicinitate proximior decurrant, hos expansioni tardigradæ minutatim assueferi.

Secun-

Secundo, Hinc Ventriculum, Intestina, Pleuram, Pericardium, Peritonæum, Mesenterium, & quidquid demum membranei generis sit, rubicunda sanguine nonnumquam reperiri eorum in cadaveribus potuisse, in quibus viventibus nullæ exaudita essent quærelæ dolorum. Oculorum indolens in Adnata rubedo, qualem in diuturniore lippitudine observamus, & id genus alia, hoc confirmant.

Tertio. Si ea nobis animi sententia est, ut etiam minores arteriæ ob suæ compositionis nervulos sensibiles sint, hac tamen in præcipitante impletione indolentes esse posse, si laxioris per omnia Fabricæ sint. Exemplo sit subitanea indolensque oculorum rubedo; hominumque laxioris compaginis subitaneus, atque sæpe intensissimus, faciei rubor.

Quarto. Male ubique asseri hic doloris adfuisse causam, quæ effectu caruerit: sed asseri potius oportere, causam, dolorem quæ creare potuisset, nullum adfuisse; adeoque hisce positis, nullum partium recensitarum dolorem potuisse percipi.

Quinto. Oportere vero omnes has partes dolere, dum celerior vasorum impletio, sive arteriolarum nervulos de repente expandat vehementer, sive nervulos in Membranarum Tendinumve aut fabrica, aut vicinia præsentis premat, extendat, violentoque vellit pulsu.

Sexto. Neque a sola inflammatione, verum quoque ab acris quocunque intra vasa rodente, citra eorundem expansionem, partium membrnearum, tendinosarumque, dolorem excitare debere: id quod vix ob aliam causam, quam ob nervulorum in fabrica arteriarum præsentiam, fieri capimus.

Septimo. Hinc Arthriticos dolores tandem intelligi, in quibus acris podagrica dicta terra, sanguine advecta, atque in arterias lymphaticas pulsa; quarum per fines neque in venas, neque in minima oscula exhalan-

tia, transmitti, præ multa sua sive crassitie, sive duritie nequeat; dolores enormes creet, donec affluente liquido dilutior, motu pulsuque attenuatior, per cutis poros evaporare pauxillatim possit: unde Lymphaticis arteriis acutum tribuere sensum cogimur: nisi quis in id inclinet potius, ut a turgentibus pulsantibusque non quidem lymphaticis, sed potius proximis vasis rubris, nervos premi, tundi, vellicarique opinetur. Porro acrem hanc materiem, seu podagricam calcem, in vasis hære, non extra illa diffundi, Methodus *παλαιοκηνή* docet admovendi ad Podagræ sedem Hirudines: quam Methodum renovatam pulcro tractatu anno 1769. tradidit, experimentis & in propria, & in multorum aliorum Podagra captis, confirmavit, venerandæ canitiei Medicus Andegavenfis *Franciscus Paulmier*. Sin vero vasa crudeliter erosa frangantur, diffundaturque calx podagrica, nodi ac topi nascuntur, qui vel foras erumpentes, siccior, dilutiorque calcem excernunt; vel partem, in qua hærent, vicinasque, rodendo destruunt; quin imo eorum materies aut tenuatior, aut saltem majoribus erosorum vasculorum oris resorpta, vel alios articulos invadit, vel nobiliores malo omine partes.

Octavo. Hinc forte *Arætai Cappadocis* difficiliorem textum capi, quando nostras animadversiones ad illum contulerimus; quod rite ut fiat integer ille transferendus est. „ Est Arthritis omnium simul Nervorum affectus, si auctum malum omnibus ingruat: initio „ vero Nervi, articulorum vincula, & quæcumque „ ex ossibus exorta sunt, & in ossa inferuntur, dolere „ incipiunt. Ast istorum magnum est miraculum: non „ dolent quidem vel minimum, etiamsi quis fecet, aut „ collidat. At si quis ab ipsis doleat, nihil aliud est „ eis ad dolorem excitandum potentius; non ferramenta adstringentia, non vincula, non vulnerans gladius, „ non exurens ignis. Nam & hæc assumuntur tan- „ quam

„ quam dolorum majorum remedia; quod si quis (ita
 „ ut si quis) ipsa dolentia præciderit, sectionis dolor,
 „ ut exiguus, a majore obscuretur: sin autem iste
 „ etiam validus sit, eos voluptas capit, priorum ma-
 „ lorum oblivionem afferens. Id autem patiuntur Den-
 „ tes & Offa; causam quidem veram soli Dii nove-
 „ runt, verisimilem etiam homines. Est autem, ut
 „ simpliciter dicam, hujusmodi: quod est prædensum,
 „ contactum, vulnerationemque non sentit; idcirco
 „ nequa ex tactu, neque ex vulneratione, dolet. Do-
 „ lor enim est res aspera sensui: Densum autem non
 „ est exasperabile, ideo quoque est indolens. Quod
 „ vero non densum, sed rarum est, id bono sensu
 „ præditum est, & vulnere exasperatur. Sed etiam
 „ quoniam & densa innato calore vivunt, per hunc
 „ eundem calorem etiam sentire possunt. Si calidita-
 „ tis innatæ intemperie, *δυσκρασίη*, corripiatur, sen-
 „ sus fit permutatio.

Difficilem hunc textum ex *Leidenſi* Editione huc tranſtuli, hinc inde nonnihil mutans, quando nimia libertate Interpres a sensu ſtricto deviat. Difficultas partim a Jonica Dialecta nascitur, partim a variantibus lectionibus, partim forte quoque a vitio Notariorum, qui Exemplaria quædam corrupte verterunt: de quibus omnibus Viri doctissimi *Petit*, *Wiggan*, ac præcipue magnus *Trillerus*, aliique, consulantur. Verum enimvero, si textum hunc post prægressas meas adnotationes legamus, videtur simpliciter velle ut notemus, Partes primo esse, quas tactus etiam rudior vix sensibilis esse demonstret: Verbi causa dentes, quæ in durorum corporum percussione, confractione, commolitione, sæpe ne minimum doleant; attamen ab intemperie humorum, ardorem, caloremque majorem excitantium, dolorem crudelem patiantur. Ita ut una eademque res indolens dici, dolensque possit. Offaque ipsa & tendines, & ligamenta, duriora utique corpo-

ra, si quis indolentia esse existimaverit, fateri nihilominus illum oportere, non esse indolentia, ubi ad nervos, qui illa aut permeent, aut subjiciantur, aut transfadigantur, acrium irritamenta admoveantur. Scite hic, & ad rem nostram, *Parisiensis* elapso abhinc sæculo Medicus *Perit*, in eruditis suis ad *Arataum* Commentariis: „ Si quis porro quærat, inquit, quid ipse „ de illa difficultate sentiam; equidem si cum *Gale-* „ *no* dentes ipsos sentire fatendum est, hæreo, nec „ quidquam probabile afferre possum: si vero, quod „ alii censent, dentes non sentiunt, sed ipse nervus, „ qui eorum radici insertus est, ad quem per poros „ dentium calor & frigus transmeant, in promptu est „ solutio: nam ad nervum qualitates activæ, utpo- „ te incorporeæ, facile subeunt; durities vero, & aliæ „ ejusmodi materiales, non ita; quia materiæ propriæ, „ ceu modi quidam ita adhærent, ut extra ipsam non „ possent diffundi. „ Crusta scilicet vitrea dentis integra, frigus, calor, acria, penetrare se per dentis substantiam inepta, nullum possunt in eo perceptionem excitare doloris: adamantino vero hoc involucre fisso, destructove, penetrant hæc ad filamenta nervosa, excitantque dolorem. Et quia a nervulo tantillo dolor atrocissimus sæpe nascitur in Dente, an illi, qui ob nervorum per membranas, tendinesque, utique partes quoque tensas, durasque, paucitatem, exilitatemque, sensum illis denegant, satis naturam rerum consuluerunt, satisque per analogiam ratiocinantur?

Integrum igitur cuique est, eam in hac disputatione opinionem fovere, quæ ipsi verisimilior videtur: dummodo tam illi, qui aliquam partem insensilem esse censent, eandem nihilominus caute vitandam ob nervorum proximitatem esse intelligant; quam hi, qui sensibilem hanc ipsam arbitrantur, ejusdem vulnerationem, casu urgente, non vereantur. Hæc a principio hujus questionis præcipue urfi, ne qui irreperent in Pathologiam

logiam errores: neque calamum arripuissem unquam, si ab initio litis Pathologica facta tecta, ut nunc est, fuisset.

Quæstione igitur e medio solemniter sublata, nonne indignationem potius, quam responsionem, meretur illorum scribendi κακότης, qui eandem terminatam dolentes, excitare denuo, æternamque esse mallent? Scriptorum ajo, in quos vertenda esset Jovis ad Martem objurgatio apud Hom. *Iliad. V.*

Εχθιστός δέ μοι ἔσσι θεῶν, οἱ Ὀλυμπον ἔχουσιν.
Αἰεὶ γὰρ τοι ἔρις τε Φίλη, πολέμοι τε, μάχαι τε.

Invisissimus utique mihi Deorum es, qui Olympum tenent;

Semper enim tibi contentio grata, bellaque, pugnæque.

Quid, quod ironice, aut sarcastice potius, scribant me homines suæ sorti committere, necique tradere malle, quam vulnerando partem, quam falso credam sensibilem esse, in vita conservare? Responsum illis datum est; debuissentque, si sapuissent, ex singulis meis Scriptis conclusisse, haud aliam in hisce mentem mihi esse quam Viro immortalis Boerhaavio; qui *Cap. de Vuln. in gen. & Cap. de Vuln. Cap.* membranas ac tendines sensibiles arbitratus, nihilo secius & hosce dimidiatim abscissos integre perscindendos: sordibus vero sub Dura Matre latitantibus, hanc audacter pertundendam, docuerit. Sed de hisce satis: Libellum non legi: mox enim ut ex paucis, quæ caprim legissem, malevolum auctoris animum intellexissem, projecì, ut hujus farinæ quisquillas soleo, nec lectione unquam, nec reponione dignaturus. Profecto si attento animo, benevoloque, legissem quem in modum *Tomo. XII. Cap.*

Cap. VII. quæstionem amice terminatam exposuisssem ; neque illustri Hallero, neque mihi, sententiam a vero alienam tribuissent : sententiam meam denuo, clare, ni fallor, exposui : ne autem iterato meam mentem, eamve Halleri, male referant, ut meam nunc dedi, dabo quoque eam Halleri ; partem Epistolæ hic inferendo, quam Amplissimus ille Bernensis Reip. inclytæ Senator 29. Octobris 1770. ad me scripsit, eamque hoc Tomo publice ut ederem, petivit.

„ (1) Nervi qui nobis imponere ita possunt, ac si
 „ sensatio ipsis tendinibus inesset, sunt cutanei illi,
 „ qui per eorundem tendinum superficiem, toto fere
 „ in corpore, transeunt : præcipue autem in flexura
 „ Cubiti, in Femore, in Genu, in Manu, inque
 „ tendinis Achillis vicinitate, in dorso quoque Pedis.
 „ Nervi vicini tendinum Profundorum nos in Parony-
 „ chia decipere possunt, ut in Pleuritide ; eo quod
 „ horum sensatio haberi pro ea aut tendinum Flexo-
 „ rum, aut membranæ Pleuræ, possit. Igitur horum
 „ Nervorum sensationem recte deceptricem appello ;
 „ quando quidem ne unicum quidem ramulum sive
 „ tendonibus, sive pleuræ, largiantur. „ Quod

(1) Les Nerfs, dont le sentiment peut imposer, pour le sentiment des tendons memes, sont des nerfs cutanés, qui passent par la surface de ces tendons, presque par tout le corps, & principalement dans la plie du coude, dans le femur, au genou, à la main, aux environs du tendon d'Achille, au dos du pied. Les nerfs voisins des tendons profonds peuvent en imposer dans le Panaris, (comme) dans la Pleuresie ; parceque leur sentiment peut être pris pour celui des tendons flechisseurs, ou de la Pleure. J'appelle le sentiment de ces nerfs imposteur ; parceque effectivement ils ne donnent aucune branche, ni aux tendons, ni à la pleure.

„ Quod autem ad duram Matrem attinet, siquidem nullus hucusque detectus nervus est, sensibilis ea esse non potest. At vero si quondam nervi, in ea detegantur, sensatione gaudebit ea nervorum, quos adesse constabit, proportionem. Eadem mihi de tendinibus opinio, in quibus, hactenus nervi detecti non sunt. Idem de medulla affirmo.

„ Concedo, cum doctissimo *Whytt*, partes nervis quidem, at vero paucis, donatas, quarumque eam ob causam paucus sensus est, posse & in inflammatione & in violenta extensione, acutius sentire; minime vero credo destitutas nervis partes posse sensibiles reddi: testes hujus & ungues sint, & epidermis. Omnino opus nervis est, qui de ea, quod in corpore geritur, animam instruant.

„ Porro hæc omnia simpliciter resultant ex numeroso-

Pour la dure mere, comme aucun nerf n'y à été decouvert encore, elle ne sauroit avoir du sentiment. Si jamais on en découvre, elle sentira dans la proportion du nerf, qu'elle aura. Il en est de même pour les tendons, où jusqu'ici on n'a point decouvert des nerfs. J'en dis de même de la moëlle.

Je conviens avec Mr. Whytt, que des parties, douées de nerfs, mais en petit nombre, & dont le sentiment par conséquent est très foible, peuvent devenir plus sensibles dans les inflammations, ou par des extensions. Mais je ne vois pas, que de parties, dénuées de nerfs, puissent devenir sensibles. L'Epiderme & les ongles en font foi. Il faut absolument des nerfs, pour instruire l'ame, de ce qui se passe dans le corps.

Tout cela fait simplement le resultat d'un nombre extrême d'experiences, sans Système, ou Hypothèse.

„ rofissimis experimentis, citra vel minimum aut Sy-
 „ stema, aut Hypothesin.

„ Hocque id ipsum est, quod cum publico commu-
 „ nicare velis Tomo tuo XIV. rogo; præcisa sic erit
 „ omnis erroris occasio.

„ Forsitan dicta jam olim repeto; abesse tamen ne-
 „ queo, quin iterum moneam: Duo eruditi, dum in-
 „ ter se disputant, exponunt se ignarorum, sciolorum-
 „ que judicio: jamque, ejusmodi habere Judices, de-
 „ gradatio est.

„ Pathologiæ nunquam immiscere me volui.

Si ergo illustri huic Viro volupe sit promovere sua experimenta mille modis, mihique Pathologiam mactè tueri, extolere, ornareque; nullum unquam inter nos intercedere dissidium posse, clare quisque perspicit; cum & ipse hanc perpetuo excludat, & ego illa, utpote ad hanc non pertinentia, non attingam. Unde magni Viri discipulis, qui contra mentem Præceptoris experimenta urgeant, eaque a Theoria ad Praxin transferre gestiant, non nisi ad *Calendas Græcas* respondendum sit.

§. VI. Quiddam tamen in Historia Membranarum superest, ad quod dubito an unquam aptam adornemus solu-

Voici, Monsieur, ce que je Vous prie de presenter au Public dans votre XIV. Volume, & tout méprise deviendra désormais impossible.

Je ne fais, si c'est une répétition, mais je ne puis, que Vous prier, que deux Savans en dispute, s'exposent au jugement des ignorans, & des dèmisevans, & que c'est déjà une degradation que d'être jugé par de telles gens.

Pour le Pathologique, je n'en ai jamais voulu m'en mêler.

olutionem. Cur scilicet Membranæ, haud illæ modo, quarum ambigua sensatio est, verum etiam quarum sensum extra omnem dubitationis aleam esse fatentur omnes, sæpe non doleant, licet & certas in se gerant, & demonstratas, & necessarias doloris, ejusque atrocis, causas? Res autem ipsa indubitato repetitoque crebrius experimento certa est. *Tomo VI. hujus operis* publicam demonstrationem retuli juvenis, in quo periodici vomitus causam post mortem quærentes, invenimus „
„ Ventriculum ore superiore suo, initioque Oesopha-
„ gi, multo ampliorem solito, sanguine omnibus suis
„ in vasis ita turgentem, ut eadem in nonnullis dua-
„ rum, aliis in locis trium linearum, diametrum ha-
„ berent; ceterum Ventriculum & fundo toto suo, &
„ in aliis plagis duabus, tam interne, quam externe,
„ purpurei plane fuisse coloris. Interim nulla signa fe-
„ bris unquam; nulla Gangrænæ in pulsu; nullum
„ unquam in hoc viscere perceptum dolorem; nullam
„ cujusquam defectus Ventriculi, nisi qui sesqui hora
„ ante mortem contigisset Vomitus, notam observatam
„ fuisse. Ideo obstructio adeo notabilis, Inflammatio
„ adeo sæva, Gangræna adeo vehemens, ut totam
„ Ventriculi substantiam penetraret, citra dolorem, ci-
„ traque febrem, contingunt? bono cum appetitu for-
„ mantur? cum integra Visceris perficiuntur functio-
„ ne? Qua enim die Juvenis moriebatur, pulsum sa-
„ num ac per omnia naturalem, habuit; optimumque
„ ut meridie, ita vespere, appetitum. „

Tomo IX. Cap. 1. & 2. Anatomen descripsi Juven-
culæ, quæ ineunte mox febre acuta septies & vomue-
rat, & dejecerat alvo; deinde vero per quinque fere
dies totius morbi non modo, nec nauseaverat, nec vo-
muerat, verum e contrario jus carniū sumserat ap-
petens, siticulosa biberat, medicamentaque absque vel
minima Ventriculi molestia assumserat: cujus tamen
Ventriculum viderunt Auditores mei per universas tu-
nicas

nicas suas rubrum, interius autem ex inflammato ultra pedis spatium jam gangrænescentem.

Eodem Tomo IX. publicam Anatomen communicavi Diaphragmatis, adhuc post detractas 70 uncias sanguinis utrinque, & æque in musculosa, quam in tendinea parte, inflammati: quamquam æger in morbo suo sua nutrimenta, sua potulenta, sueque medicamenta, sic & deglutiisset; & retinisset, ac si nihil morboſi inibi latuisset; dum interim omnia ejicere Paraphrenitici soleant.

Strenuum Belli Ducem quondam vidi, qui a multo animi corporisque labore, longiore sæpe itinere, & tristi necessitate excessivis computationibus gratum se acceptumque reddendi Genti, ad quam missus Orator fuerat, Arthritidem *ἄροτον* sæpe habuit, Annosa & nodosa Arthritis erat, jamque in variis digitorum articulis Ancylosin formabat. Affui ipsi, Arthriticum patienti insultum, cum omnium articulorum valido & tumore, & rigore, citra dolorem, ne ab tactu quidem. Quique a secretis illi erat, testabatur mihi eam indolentiam in singulis se observasse paroxysmis. In hoc igitur Viro non tendines modo, ac capsulæ, quarum sensibilitas negatur, verum & nervi numerosi, accumbentes, succumbentes, interjectique inter hæc partes, ipsa tandem sensilissima cutis, quamvis subito expansa, sentiebant nihil.

Et, ut hic recens visa, & hoc capite recensita observata, ac maxime verminosi nostri juvenis, quoque commemorem; an ab una parte serenum assiduo caput, ab altera parte Piæ matris universæ, de cujus sensibilitate nemo hucusque dubitavit, inflammatio, qua diſſior existeret nequit, non confirmant hanc thesin abunde?

Memorabilis Historia est quam *L. Riverius* non ex aliis, sed ut testis ocularius, *Cent. III. n. 26.* narrat, hominis, qui primo die, duntaxat ventre doluerat, exinde vero usque ad 13. morbi diem, quo interiit, omnino

omnino nihil. Febris interim tertio die superveniens, sitis, linguæ ariditas, Vomitus usque in 7 diem vehemens, ut ipsa stercora sequerentur, inflammationem affirmare Medicorum consilio videbantur; quam tamen negabat doloris absentia, alvusque post 7 diem copiosa, & frequens. „ Aperto cadavere inventum est Intestinum Ileum tribus complicationibus convolutum, „ & quasi compactum in unam massam circa finem illius; tota autem illa Intestini portio complicata, „ gangræna affecta erat, cum portione Mesenterii sibi adjuncta. „ Excrementa per disruptum sphacelo intestinum in cavo ventris erant diffusa.

Si quis forte Sphacelum jam prima morbi die natum arbitraretur, eo quod dolor exinde cessasset, hunc *Ill. Morgagni Ep. An. Med. XXXV.* rogaret. „ Num „ Sphacelum primo jam die factum credes? Duodecim „ ergo dies sic homo vixerit. Deinde quomodo Sphacelo facto, febris, quæ antea non erat, accessit cum „ linguæ ariditate?

Idem Vir ill. *Morgagni Epistola XXIX.* dum in cadavere Patricii *Bononiensis* inveniebatur omnis Intestinorum substantia a Ventriculo, usque ad Recti finem, dira inflammatione occupata, ut ne minima quidem eorum pars illæsa relinqueretur, tandem ait: „ „ Si forte illud quæras, cur Intestina ipsa, tam graviter affecta, dolore igitur non cruciarentur, quo „ consentiens Ventriculus tentabatur; a veri similitudine non abhorrebo, si quo in homine tam crebro, „ tam facile, tot nervi resolvebantur, in eodem conjiciam quoque nervos resolutos fuisse, qui ad Intestina pertinebant. „

Item *Epist. XXI.* Agricola primum a contusione dextri lateris curatus, forte ob ingluviem in febrem ardentem lapsus, intra octavum ejus diem moritur, citra vel minima signa observata Medicis inflammati ventris, vel minimum ab ægro perceptum dolorem. „ In

„ cadavere imæ Ileï Intestini partes, ad magnos tra-
 „ ctus, undique ex atro rubebant, sanguiferis vasis non
 „ secus, ac post injectam coloratam ceram, manifestif-
 „ simis; gravis autem erat odor, qualis solet Intestinis
 „ inflammatis.

Et Senex a Pleuritide curatus, in eandemque rela-
 psus, citra vel minima Inflammationis Intestinatorum si-
 gna, licet pulsus vere Pleuriticus ad ultimum vitæ
 diem observaretur, moritur. „ Ventre aperto gravis
 „ ille odor perceptus est, qui ex Intestinis inflamma-
 „ tis. Et sane tenuia ad longos tractus circum circa
 „ rubebant.

Ut autem verbo multa contraham, laudatas magni
 Viri Epistolas pervolventi apparebit, I. Dari inflam-
 mationes notabiles citra febrim magnam. II. Easdem
 haberi citra vel minimam. III. Adesse inflammationem
 sine febre quidem, sed non sine dolore. IV. Adesse
 cum febre, sed sine dolore. V. Intestina & inflamma-
 ta, & inflammatissima, a morte reperta esse, absque
 vel febre in vita, vel dolore, perceptis.

De Febris absentia in summis inflammationibus, do-
 lore præsentem tamen, post relatas a *Morgagno* plurium
 Medicorum observationes, egregius nos monuerat *Sim-
 sonus*: cujus occasione Ill. noster Archiattrorum Comes
 in *Comm. ad §. 371. Boerhaav.* „ Inde saluberrimum
 „ inquit, in praxi medica monitum posuit *Simsonus*,
 „ ne decipiantur Medici, credentes nullam inflamma-
 „ tionem adesse, si febris absit. Cum sæpe fixos dolo-
 „ res Intestinatorum, imo Pleuritides spurias epidemicas
 „ se vidisse asserit, quæ sine ulla febre pluribus men-
 „ sibus affligebant ægros, nisi statim Venæ sectione &
 „ aliis, inflammationi debellandæ aptis remediis, cu-
 „ rarentur.

De summa inflammatione citra doloris perceptionem,
 de eadem citra vel febrim vel dolorem; cum ill. *Mor-
 gagni*, tum mea hætenus prolata, fidem faciunt: uni-
 cus

cus modo inter hæc omnia casus est, in quo nervorum paralyti, tribui forte doloris absentia posset: in ceteris neutiquam.

Egregius idem Autor harum observationum singularitatem minus admirari ceperat, ex quo venerandis suis Præceptoribus *Valsalva*, & *Albertino*, historiam Adolescentis sic denati, enarrans, similia, nec semel modo, ipsis occurrisset intellexisset: Posteriores vero addidisse latentium ejusmodi Intestinorum cognoscendorum modum, ex pulsu, abdomine, & facie. „ Pulsus enim „ humilis & debilis potius, & qui, si bene attendas, „ sibi obscure dissimilis sit, abdomen autem tensum, & „ durum, & cum dolore quodam: facies denique insoliti aliquid, sed in aliis aliud, ostendens, ut interdum oculos quasi exterrefactos, alias livorem quendam circa labra, animadverterim; hæc, inquit, ferre; nam aliquando linguam etiam adnotavi haud bene se habentem, & quandam sitim; mihi accidit, ut in ejusmodi casibus se observanda præbuerint. Sic ille ingenue, ut solebat, quæ requirebam, signa indicabat. Quorum mihi Veritas cum in aliorum, tum præsertim in *Thomæ Alliotti* casu perspecta est, prohi æque, ac nobilis civis mei. Cum enim post dolores quosdam Ventris, quibus erat obnoxius cubaret, nec eadem qua solitus erat celeritate convalesceret, me autem per eos dies; Autumnus erat, si recte memini, anni 1711 incommoda valetudo domi retineret, missusque sub vespere ejus Medicus, qui me consuleret, nonnulla ex iis signa narrasset, quæ modo commemorata sunt, ipse autem interrogando quædam alia ex iisdem non deesse intelligerem; respondi nihil tale opinanti, ad ægrum rediret, quem si vel tantillo interea pejorem factum animadverteret, continuo admonendum curaret, posse se magnum instare periculum; ut sibi, & posteris, consuetæ religione prudentiaque prospiceret. Quid

Pars XIV. E „ quæ-

„ quæris? Perpaucis post horis æger manifesto in pe-
 „ jus ruere cum cepisset, atque ea, de quibus tunc
 „ demum admonēbatur, statim perfecisset, intra ipsam
 „ illam noctem Vir optimus præcipiti casu ereptus
 „ est „ Locum longiorem reddere absque contractione
 „ volui eorum in gratiam, quibus præclari hujus Operis
 „ copia non est, quo tamen carere nemo Medicorum
 „ potest.

At vero præter hæc quinque singularia capita, suis
 quæque probata atque demonstrata observatis. Sextum
 est, quod in Viro, cujus historiam §. II. memoravi,
 præ reliquis omnibus *πυλιδόξου* apparuit; scilicet quod
 in dirissima inflammatione, eaque universalissima, cum
 universi fere Peritonæi, tum Ventriculi, Intestinorum-
 que, neque vel minimum abdomen intumuerit, neque
 defuerit alvus. Hic igitur præcipuum deficiebat signum
Albertini: alterumque de Alvo variorum Autorum,
 ad Diagnosin atque Prognosin requisitum, in solo Se-
 natore *Riverii*, cui a 7. a. d. 13. diem fluxerat al-
 vus, defuit.

Concludamus tandem ex hisce omnibus Inflammatio-
 nis Ventriculi, Intestinorum, Mesenterii, Diaphrag-
 matis, Pleuræ, signa tam clara atque evidentia sæpe
 esse, ut præsentem illam pronunciemus audacter; fe-
 brem acutam, ardentem, sitim ingentem, vehementem
 dolorem, Ventris tumorem, alvum clausam, Vomitus
 deinde ac primo ingestorum, deinde etiam contentorum
 in dictis partibus; nec raro denique veram earundem
 gangrænam sphacelumque: contingere tamen non per-
 raro, ut Intestinorum, ac Ventriculi, Mesenterii, O-
 mentique, ac Peritonæi, inflammatio lethalis, vel uno,
 vel pluribus, vel omnibus hisce signis deficientibus, ob-
 servetur. Ita quidem ut etiam inde Sententiæ *Hippa-
 cratis* veritas confirmetur, statuentis Acutorum morbo-
 rum prædictiones haud esse per omnia, & semper, tu-
 tas certasque, sive sanitatis, sive mortis.



SECTIONIS I

CAPUT QUARTUM

De Febre Verminosa.

§. I. Signa vermium in corpore humano degentium numerantur ultra sexaginta, quorum alia frequentiora, alia rariora, aliz rarissima sunt. In Juvene nostro signa plerumque pauca. Pseudo pleuritis & a Vermibus, & a dolore quocumque Intestinorum, explicatur N. 3. Non spuria tamen, sed vera Pleuritis, ea nostri egri fuit, quæ quomodo in illo nata fuerit, inquiritur: sic tamen ut eum Lumbrici potius, quam Pleuritis, interemerint. N. 4. De Tussi Verminosorum, eaque occasione de tussi, & quacumque alia causa, quam a Pulmone, nata. N. 12. Ampla Oculorum descriptio cum Verminosorum, tum nostri egri.

§. II. Vermes saepe adsunt, ubi deesse illos credimus, viceque versa: perperam autem statuuntur omnium morborum cause. Refutantur qui hanc verminosam Pathologiam tribuerunt Hippocrati: explicatur proinde Græcorum τ. Θέσιον, & Latinorum Ferinum, Belluinum: ex utriusque Sermonis genio. Vermes in corpore humano reperiuntur, non generantes morbos, sed aliunde se in corpus insinuantes. Seculis quatuor ante Aristotelem, Vermes e putredine vere nasci delirantem, Homerum novisse muscas ovula in Vulneribus deponere; moxque exclusis illis Vermes prodire; perspicue ex Iliad. XIX. patet. Responderetur iis, qui cunctorum morborum causas animatas esse probaturi,

contendunt morbos neque tutius, neque citius, quam antihelminthicis, curari. Prudentia adhibenda in legendis scriptoribus de hac re agentibus.

§. I. **C** Apite primo pag. 64. verminosi juvenis inopinam mortem mirabamur, veræ ejusdem causæ necdum gnari. Ea nunc quarendam est. Ut autem tolerabile quid de eadem, nec non de juvenis hujus & morbo, & morte, dicatur, necesse omnino erit primum de Vermium signis, deque ipsius Verminosæ febris natura, breviter differere.

Morbi præmittenda definitio foret; sed deficiet hæc. Ut eam autem nobis aptam comparemus, enarranda erunt ea omnia signa, quibus præsentibus vermes obsidere humanum corpus, vel cum Febre, vel sine illa, observentur. Hæc nunc dicuntur sequentia.

I. Morbi Verminosi aliquando aut pauca febre consociantur, aut nulla, sed potius affectarum viarum primarum symptomatibus; symptomatibus etiam quæ, ut ex *Eustachii, Willisii, Vieussenii, Winslovvi, Haller, atque Meckelii* Tabulis manifestum fit, commercium octavi Paris cum Sympathetico magno, horumque cum sensorio communi, omnium Nervorum scaturigine, conjunctio, excitare & promovere debent: Apoplexia scilicet, Lethargo, Paralyti, Hemiplegia, Palpitatione cordis, & Asthmate, Viriumque dejectione, Pulsibus quoque aut intermittentibus, aut remittentibus, aut inæqualibus, deficientibusve; tum Aphonia, Cophosi, Amaurosi, Convulsione etiam, & Epilepsia; quibus sæpe mors succedit.

2. Lumbrici cujuscumque generis & intermittentes generant, & continuas febres, & non raro malignas.

3. Producent quoque quoddam intermittentium febrium genus, vagarum prorsus, ac pertinacium, symptomata quoque ejusmodi referentium, cujusmodi bre-

vi in

vi in hisce explicandis, quæ continuarum Febrium sunt, enarrabo.

Scilicet *primo* dicitur Cephalalgia in hisce febribus tanquam a principio præsens: ubi vero signa nonnulla Criseos processerunt, caput grave tunc, atque hebes esse, narratur. Juvenis noster excipiendus ab hac regula est; quem triginta atque septem dierum tempore, quibus in Nosocomio fuit, nunquam aut dolentem capite, aut hebetem, sed potius perpetuo serenum, reperimus: idque vitæ etiam ultimis diebus; licet in iis causam gravissimam cum doloris, tum habitudinis Capitis, inflammatissima, cunctorumque testimonio sensilissima pia Meninx, ponere debuisset. Duplici itaque modo a generali regula eximere juvenem oportet.

Verminosa nostra femina *Tom. XII.* Capitis quidem hebetudinem perpetuam conquesta est, nunquam autem dolorem. Epidemias verminosas legi, quæ nullius in capite vitii meminerint.

Secundo. Lingua Verminosorum fuscam sæpe gerit, subpinguemque crustam, quam halitus foetidus oris commitatur: foetidus autem sic, ut & subputridi, & subacidi quid, referre videatur adstantibus. Juvenem nostrum & ab hac regula excipias, cui & semper tam leviter alba lingua fuit, posterioribus potissimum diebus, ut albam illamne, an naturalem pronunciaremus, animo hæreremus; & oris foetor nunquam perceptus est. Utrumque quoque defuit feminæ nostræ.

Tertio. Recensetur in signis lateris ille dolor, qui æmuletur Pleuritidem, qui inconstans vagusque sit, qui vel cum morbo ortus, ad Crisin cesset, vel post eandem perseveret. Hujus & veneranda antiquitas meminit. *Aræteus Cappadox* tribus diversis in locis nos monet, ne dum causa in Ventre hæreat, morbum salutaremus Pleuritidem: ac primo quidem *Acut. Morb. Caus. Lib. 2. Cap. 6. de Ile.* Si causa in Colo est,

„ dolorque modo ad costas superiores adscendit, εὐτα
 „ φαντασίη ἐγγίγνεται πλευρίτιδος καὶ γὰρ καὶ
 „ τρεταίησι οἶδε, tunc idea nascitur Pleuritidis, etc-
 „ nim hi quoque febricitant. „ Secundo *ibid. cap. 3.* „
 „ Quod si aliquando grandior lapis concavo Renis
 „ inhæserit, tunc dolores lumborum circa Musculos
 „ Psoas excitantur, & ad medias usque costas perve-
 „ niunt: multis sane dolor iste, ac si Pleuriticus ef-
 „ set, imposuit. „ Et tertio *Lib. i. Cur. Acut. cap.*
10. de Pleuritide. „ Sed nonnullis & dolor & inflam-
 „ matio erupit, quasi horum locorum (laterum) affe-
 „ ctus esse videretur, cum tamen id interiorum vitiorum
 „ incrementum sit. „ Textuum horum hic memini,
 non quod vermibus tribuat causam doloris *Arataus*,
 verum quod dolorem, Pleuritici æmulum, a causis
 longe aliis, quam à quibus Pleuritis, natum & obser-
 vaverit, & posteritati tradiderit.

Extant autem observationes numero non paucae, an-
 tiquorum recentiumque Autorum, *Gabucini*, *Donati*,
Etmulleri, aliorumque, quos in Sepulcreto *Bonetus*,
 quos in Epistolis *Morgagnus*, memorant; quæ a Ver-
 mibus in Ventriculo, Intestinisve latitantibus, dolores
 sæpe ortos esse docent, qui mentiantur Pleuritidem.
 Et quid in hanc rem evidentius ea historia, quam
 clarus ipse *Morgagnus* refert juvenis in *Nos. Bonomen-*
si? „ Is enim dolore lateris, tussi, ceterisque Pleuri-
 „ tidis indiciis affectus, & de his duntaxat conque-
 „ stus, nisi quod tamen simul nausea tenebatur, cum
 „ ab iis, quæ ceteros juvare pleuriticos solent, vel
 „ pejus se haberet; denique rejecto inter vomitum san-
 „ guineum terete Lumbrico, statim ab iis, quæ di-
 „ cta sunt, omnibus liber est factus.

Conservavit nobis idem perillustis Vir, cui ob id
 eximias debemus gratias omnes, conscriptam ab egre-
 gio Medico *Pedratto*, condiscipulo quondam suo, Epi-
 stolam

stolam de Febre Verminosa, cui Ferrariæ anno 1705. interfuerat, Pleuritidem vere referente; a qua convaluere omnes, qui Vermes sat cito ejicerent: unde posthabitis ceteris adversus Pleuritidem auxiliis, in solo Emetico, maturius dato, sita erat ægrotantium salus. Quantumvis enim Oleo, Mercurio, Myrrha, Corallina, Vermes ano mirifice expellerentur, augebatur potius a dejectionibus dolor, inflammatioque superiorum partium. Videntur hic vermes Ventriculi maximam molestiam creasse.

Si demum quærat, quo pacto morbi verminosi mentiri Pleuritidem possint, non uno quidem modo id exponi posse censeo. Primo enim Coli Intestini tractus transversus tanta sæpe ventris altitudine collocatur, ut utroque suo flexu ad 9. 8. 7. 6. Costam ascendat, seu alterutro in latere, seu in utroque: quam rem a me in secandis cadaveribus toties notatam, toties demonstratam Auditoribus, hic ut repetam opus non est. Dum itaque Lumbrici in sublimi adeo Intestino hærentes, vellicant idem, mordentque; annon, illibata Pleura, dolor, Pleuritici æmulus, ab ægro percipiatur necesse est? Ipsi enim Pleuræ accumbit doloris sedes. Annon dolens jam Intestinum a pleniori per inspirationem pectore pressum, dolebit acutius? Læsaque sic respiratione, num abesse diu tussicula possit?

II. Ab ipsa verminosa dispositione, sive Colum sublimiore loco, sive profundiore locatum, sit Pleuritidi similis dolor percipi poterit; qui re quidem vera verminosus suo in principio existens, vera tamen Thoracis, Partiumque Thorace contentarum, inflammatione hominem necet. In laudata *Pedratti* Epistola Viri anatomico legitur, quem hujus morbi vis celerior atrociorque sustulerat. „ Pulmones tūmebant adeo, ut totum „ Thoracis cavum implerent. Sinister autem, quo in „ latere dolor fuerat, penitus inflammatus, ac nigri-
„ cans,

„ cans, conspectus est, præterea inferiora versus albi-
 „ do ichore infarctus, abscessus instar. Pleura ubique
 „ inflammata livescens, & nonnullis quasi punctis san-
 „ guinis distincta. Intercostales muscoli, Interni præ-
 „ fertim & sinistri, hætenus inflammationem contra-
 „ xerunt, ut sugillati viderentur. Denique in Cordis
 „ ventriculis, annexisque magnis utriusque generis va-
 „ sis, grumi fuerunt atrii sanguinis, nec dissimiles po-
 „ lyposæ concretioni.

Unius quidem traditur duntaxat cadaveris sectio: ne-
 tamen ideo suspicetur quis hominem, cujus anatomen
 hic legit, peculiari modo per id tempus obiisse, cæte-
 ros vero verminosos viscera haud ita comparata habuif-
 se, *Morgagnus* compendio multa congerens, addidit: „
 „ illud certum cum multorum, quos descriptus mor-
 „ bus abstulerat, Cadavera, tum *Farnesii*, tum in
 „ proximis Oppidulis secarentur, viscera quidem Ven-
 „ tris in aliis aliter, ut propriæ singulorum affectiones
 „ ferebant constituta apparuisse; Scirrhosa videlicet, ob-
 „ structa, aut alia ratione male habentia; præ cete-
 „ ris autem valde affectum Ventriculum, & tympa-
 „ niticum in modum inflatum, putridaque & grave-
 „ olente humorum saburra onustum; sed præcipuam
 „ læsionem in omnibus intra Penetralia Thoracis, fe-
 „ re eandem ac quæ propterea ex uno tantum subji-
 „ citur, deprehensam esse.

Si quis ad hæc roget, qui fieri demum possit, ut
 causa morbi intra intestinorum tantum latitante ca-
 vum, Pleura, Visceraque Thoracis, vehementi adeo
 inflammatione occupentur; illi respondet *Morgagnus*: „
 „ Ut igitur appareret, primum quidem a Vermibus
 „ inferri aliquando Pleuritidis similitudinem, quæ eje-
 „ ctis vermibus continuo evanesceret; deinde autem
 „ veram ipsam Pleuroperipneumoniam interdum fieri,
 „ si porro illi irritare pergerent, & sic ad Thoracem
 „ non vapores nescio qui, sed constantes spasmodicæ
 mem-

„ membranarum crispaturæ traducerentur, quæ sanguinem denique, præsertim lentum, in vasculorum angustiiis retinerent, visum est, ut hoc licebat, ex recentibus *Pedratti* observationibus intelligere, sic illud quoque recenti mea observatione confirmare. Profecto in ardua adeo, difficilique quæstione, conjectura hæc *Morgagni* magnam probabilitatem habet, quam in Analogia augere videtur. Non omnem tamen difficultatem tollere ex eo patet, quod si a Vermibus Intestinorum spasmodicæ Membranarum Crispaturæ ad Thoracem traducerentur, quæ sanguinem denique, præsertim lentum, in vasorum retinerent angustiiis; expulsi Lumbricis mitius debuisset cum ægris agi; dum e contrario, ut in morbi *Ferrariensis* relatione est, dolor & inflammatio pergerent, mortemque inferrent, etsi Lumbricos probe expulissent Antihelmentica; imo dum graviora hæc fierent, quam ante expulsionem fuissent. An Membranarum crispaturæ ejusmodi, quæ illas inflammarent, a Lumbricis Ventriculi nascerentur duntaxat? Sed non omnes, qui Vomitu evaserunt, evomuerunt Lumbricos: Juvenisque prior, cujus historiam *Morgagnus* mox ante hujus casum dedit, qui ejecto cum vomitu sanguineo Verme, a pleuriticis mox levaretur doloribus; juvenis, inquam, ille prior a Pleuritide liberabatur ejecto, non Verme, sed grumo sanguineo castaneæ magnitudinis, foetidoque. Neque febres Verminosas cum laterum dolore ad solos Ventriculi Lumbricos ab Autoribus determinatas reperio, verum etiam ad illos Intestinorum. Nec suspicetur quis ab Antihelmentico purgante cieri nimios humorum motus, ideoque auctam inflammationem fuisse; siquidem *Aqua benedicta Rulandi*, quæ in eadem Constitutione passim dabatur ægrotantibus, longe violentius & corpus totum, & pectus potissimum, pleuramque, exagitat, divellitque, quam ejusmodi alvinum purgans. Quo ex hoc Labyrintho extricemur, *Aradnaum filum* mihi necdum videtur præsto esse.

Quan-

Quantamcumque vero difficultatatem in similibus solvendis reperimus, non minus tamen inde convincimur inflammationes in nostro corpore dari, a causis, quæ sedem procul ab illa inflammationum remotam occupent, inferreque necem possint: modi interim, quo fiant, viæ, quam capeffant; rationesque, qua in stadio puro inflammatorio longe ultra consuetos durationis Inflammationum terminos, sese continent, perpetuentque, penitus ignari.

Juvenis nostri vitam utrum Inflammatio abstulerit, an Lumbricus, supra inquisivimus; postremum probabilius esse rati. Etenim quod in vita dubiosum erat, quia frequenter observatur, an de Coli, a Vermibus dolentis, altiore flexu, dolor dextro, eoque inferiore Thoracis in latere, non nasceretur; hoc falsum esse totius hujus Intestini tractus, longe infimiorē sede in cadavere deprehensus, manifesto arguit. Mors nec opinata autem, quæque sociata secum symptomata habuit, ut a Vermibus verius, quam ab inflammatione, acciderint, pag. 68. haud citra magnam verisimilitudinem confecimus. Sed pergamus in Vermium, Verminosæque febris indiciiis.

Quarto. Lumbricorum indicia, una cum reliquis eorundem signis, a frequenti ac sæpe inani tussi desumuntur: quamquam *Galenus in Comm. Epid. VI.* paulo forte gloriosius, jactet se *millies* absque ulla tussi lumbricos, os ventriculi infestantes, animadvertisse. Hanc tussim aut modicam, vehementemve, crebram, raramve, siccam vero plerumque, in Diathesi verminosa, adsit febris, nec ne, deprehendimus. *Galenus in Libr. VI. Epid.* ad Hæc *Hippocratis* verba: *Θηζιώδης ψύξις*, tussi ferina, maligna, scribit quosdam Interpretes hujusmodi tussim intelligere siccam, quæ Lumbricis ad os Ventriculi sursum repentibus excitetur: „ quod si revera ita accidere compertum fuerit, inquit,

„quit, nulla prorsus quæstio esset: sed millies absque
„ulla tussi Lumbricos, os Ventriculi infestantes, vi-
„dimus. „Quosdam etiam ad Tabidorum tussim ac-
commodare, quoniam his, ut feris, ungues incurven-
tur. Alios etiam pro tussi maligna κακορροΐη, in quam
sententiam & inclinat *Galenus*; ac si *Hippocrates* hic
intellexisset tussim malignam, perniciosam, quæ nec
abscessum promittat, nec coctionem. Vide *Charterium*
hic, nec non & *Tom. ejus IX. pag. 405. & 406.*
Hanc tussim non miramur; ab affectis & Intestinis,
& aliis remotis a Pectore Partibus, eandem experti.
Doctissimus Pfaffius N. A. N. C. Vol. II. Obs. XII.
in Inflammatione, atque Gangræna Intestini, ægrum
notat adeo violenta tussi exagitatum fuisse, ut sputa
cruentâ excerneret. *Albinus Acad. Adn. Libr. 2. cap. 8.*
Militis a se pluries explorati historiam habet, qui Co-
lon Intestinum sinistro in latere in prælio *Rameliensi* vul-
neratum sic fuerat, ut XX. postmodum annis adhuc
ostenderet *Albino* factitiam suam vulneris in loco Al-
vum, cum tunicæ villosæ prolapsu æque superioris
quam inferioris Intestini portionis, quemadmodum
eleganti tabula nobis depictum reliquit. Quod autem
notandum in Milite, nulla tussi aderat Intestino laten-
te, ejusque apertura clausa; aderat autem & frequens,
& vehemens, quoties Intestini sive alterutra, sive utra-
que portio, ablato operculo prolaberetur foras. Nos-
que idem prorsum in femina observavimus anno 1762,
cui Intestinum, ut videbatur Ileum, suppuratione &
gangræna una cum toto inguine patefactum; quam
feminam usque ad incipientem vulneris consolidationem
molesta tussis quatiit. Tot igitur exemplis aliunde ca-
ptis, comprehendimus facile, quo pacto & Vermes,
& Sordes, in tubo intestinali latentes, excitare tussim
queant. Ventriculi tussim Practici, & merito quidem,
notant; eandem experti restaurato Ventriculo exulan-
tem. Inter varias oppositasque tusses infantum, puero-
rum,

rum, & nonnunquam adultorum, convulsivas, species una est, quam emetico prudenter repetito, tollas. In Utero, in Vesica urinaria, latentibus; quæ irritent, causis, annon pares habemus tussium observationes? Nunquam violentiorem perseverantiorisque tussim vidi, quam Puerperæ cujusdam: nunquam etiam vidi tussim citius perfectiusque sanatam, quam in illa; corpore oblongo calloso pudendis expulso. *Rat. Med. Tom. VII. Cap. VI.* Juvenis porro noster tussi sicca laboravit prioribus novem diebus morbi; ad 10. ad 23. nihil omnino; a 23. ad 30. parum; a 30. ad 37. diem, qui & mortis fuit, ne tussivit quidem.

Quinto. Indicia vermium petuntur a Pulsu inconstante, remittente, intermittente, quem cum Vermibus semper observavit *Solanus*; vel etiam a pulsu debili, ac veluti deficiente. Hic pulsus tot modis peccans a Scriptoribus Medicis sæpe notatur. In verminosa febre a supra laudato *Pedratto* descripta „ Pulsus non „ ut in Pleuritide solent, duri, tensive; humiles erant, „ parvi, inæquales. „ In praxi solet nobis talis observari; sic tamen, ut nihilominus aut parum peccantem, aut perfecte sanum, tam in pueris, quam in adultis, crebro observemus: & e contrario pulsus tam pravos, quam ii dicuntur Verminosorum, in compluribus aliis morbis, Vitalium potissimum partium, nec non & Naturalium, invenerimus. Sed, quemadmodum Auditores meos frequenter monere soleo, jamque in XVII. annum illis repetō, ne ex descriptis pulsibus concludant Vitalium Viscerum aut inflammationem; aut hydropem, aut aneurisma, aut deuteropathicam a Viscerum abdominalium vitio affectionem; neque etiam ob pravorum horum pulsuum absentiam, negent recensitos Vitalitatis morbos adesse: ita quoque eosdem moneo, ratione vermium; quos eum pulsu enarrato adesse, quos iteratissima experientia abesse, sic mecum norunt, ut subdubitare de hujus Observationis veritate non possint.

Unde

Unde alia signa vocari in opem oportet, quæ vel cum pulsu collata, vel absque eodem, quandam constituent morbi verisimilitudinem. Nostri utique Ægri verminosam fœturam nunquam quis ex pulsu conjecturasset, cum inflammationis triplicis temporibus durus ille, celer, plenus, æqualis, & aliquoties minus liber, esset; intermedio autem tempore ut plurimum vel naturalis esset per omnia, aut modicam cum æqualitate celeritatem haberet; postremisque tantummodo morbi diebus leviolem aut temporis, aut rhytmi, aut utriusque, inæqualitatem, ad motum corporis potissimum, & ad loquelam, referret. In verminosa præterea febre, quam longe, lateque, *Tomo XII. cap. II. & III.* conscripsi, paucò modo tempore Auditores mei pulsum, quem verminosorum ajunt esse, deprehenderunt.

Sexto. Sudor Verminantium symptomaticus describitur subfrigidus esse, & copiosus, prævioque rigore passim carens; ita tamen, ut nonnunquam incompositi rigores intermisceantur; subacidus denique, & una subputridus. In Constitutione Epidemica *Ferrariensi* ille sudor observatus non est. Neque in Juvene nostro, neque in aliis, quos vidimus, non paucis, visus unquam: unde constat firmum morbi criterium non posse ex sudoribus peti.

Septimo. Et cum sudore exanthemata notantur, generis petechialis præcipue, erysipelatosique. Exanthemata aut hæc, aut miliaria, neque noster æger habuit, neque *Pedratti Ferrariensis*, neque quicumque febre verminosa in nostro Nosocomio decubuit.

Octavo. Mucidam in hoc morbo alvum describunt, frustillatim missam, ramentosam, eamque *levantem*; quæ vero naturalis, vereque cocta prodeat, eam calamitatum afferre augmentum, *Metastasin* versus caput, *Recidivas* ingerentes. *Dysentericam* alii, & sanguineam, adstrictam quoque scribunt, & *tenesmodeam*. Verum ut in prioribus, ita & variant observata hic

Meretur Liber VI. Petri Foresti in hanc materiem legi, cum ob epidemiam verminosam, tum ob symptomatum varietatem, quibus alii aliis affligebantur, diversumque omnino experiebantur eventum. Juvenis noster & *levantem* dictam hujusmodi alvum diuturniore tempore habuit, & periit. Ab alvo quacumque, cum Vermium copia emissa, notabatur inflammationis incrementum in *Ferrariensi* Epidemia.

Nono. Urinas limosas memorant, & jumentosas, & inconstantes, & hypostasim habentes vel præmaturam, vel potractionem, albidas plerumque, vel ex albo flavescences. Ut sæpe verum hoc, ita non raro fallit. Neque accurate semper Autores urinæ notarunt naturam, sive ejusdem non recordati, quemadmodum in *Pedranti* relatione; sive obiter modo, raroque, ut *Petrus Forestus*. Quam parum vero certi hic statuere possimus, & in Juvene nostro, & in casu mox ex *Tomo XII.* relato, liquet abunde. Ita quidem ut, quod unus alterve Medicus seu privatis in ægris, seu in integra etiam epidemia, notavit, id non semper in consimilibus morbis obtineat.

Decimo. Dolor describitur vagus nunc lateris, nunc imi ventris, non raro acerbus atque spasticus. Hæc observatio frequentis exempli est. Quidam & Coxarium notarunt dolorem, plures minime, nos nunquam.

Undecimo. Faciei livorem notant, eumque potissimum in ea cellulositate laxiore, quæ oculis subsidet: hanc multoties experti in verminosis sumus, sæpe tamen desideravimus.

Duodecimo. In oculis splendorum scriptores notant, deinde squallorem, collapsumque, una cum eorundem veluti demersione; Albi oculorum livorem, visus Hebetudinem, Amblyopiam, Amaurosin, minorem, majoremque Pupillæ amplificationem. Licet haud raro hæc signa fallant, ea tamen adesse frequenter, non est quod diffiteamur. Si magni *Winslowi* descriptionem Ner-

vi paris sexti admittamus, ad quam comparandam, confirmandamque, plus viginti annorum impendit: si clarissimi *Parisiensis* Medici *Petit* lucubrationes, factaque in hanc rem experimenta laudemus, concinnam quandam, elegantemque adipiscimur hæc phænomena explicandi rationem. Vid. de hac re *Rat. Med. T. III. Cap. II. & Tom. X. Cap. I.* Ex omnibus, quæ ibidem recensetur, cum experimentis, tum argumentis, constat Intercostralem Nervum non a communi Nervorum in Encephalo origine, ut vulgo creditur, tabulisque exprimitur, nasci; sed a Gangliis potius, quæ a summa spina Vertebrarum, ad imam usque, numerosa locantur, totidemque veluti cerebra constituunt, ex quibus omnibus totidem habentur Nervi Intercostralis, seu Sympathetici magni, origines.

Ex quibus demum, quemadmodum olim mirandorum, *Colica Pictonum* phænomenon plausibiliorem priorē caperemus rationem; ita quoque nunc, ab affectione verminosa Abdominis, intelligimus effectum eundem sequi posse, qui spasmodicas gignat & in Thorace, & in nervorum in Encephalo cum origine, tum decursu, affectiones; mirabilesque, atque inter se mutuo oppositas, calamitates. Unde simul constrictio Colli, Aphonia, Linguae aut spasmus, aut Paralysis, stridor Dentium, Narum pruritus, efflorescentiæ Labiorum, in jejuno ventriculo Ptyalismus, Pupillæ arctitudo, frequentiorque ejusdem amplificatio; splendor, collapsusque cum squallore Oculorum, Amblyopia, Amaurosis, & quidquid malorum in capite, sensuumque organis, observatum fuerit, extricantur, faciliusque explicantur. Signa profecto hæc in aliis alia, communissima in Verminosis sunt. Sæpe Oculus lumbricos nuntiat, os, nares, dentesque. Invenis noster in prima recidiva, propeque mortem, pupillas horrendum in modum amplificatas ostendit; majorque Verminosorum numerus, ut egregius *Monro* advertit quoque, lum-

bricos hoc signo loquitur. Estque in signis frequentissimis albi Oculorum livor.

Decimo tertio. Recensentur, ut Vermium symptomata, Convulsiones, Epilepsia, Apoplexia, Paralyfes, Coma utrumque, Stupor, Catalepsis, Leipothymia, Itridor dentium, Hæmorrhagia narium, Aurium bombinac Sufurrus: quorum expositionem, secundum *Winslowianam*, *Petitianamque* sententiam, mox dedi. At diffundendum tamen non est deesse horum omnium, aut omnia, aut pleraque, idque sæpius, licet nihil sit existentibus in corpore lumbricis evidentius.

Decimo quarto. Numerantur varii præterea affectus aliarum partium: Ventriculi Nausea, Ptyalismus, Rosio, Vellicatio, Ruetus, Flatus, Pondus, Vomitus, Inappetentia, Canina-fames; summus sæpe; mox vero satiatus, Appetitus: Venter inflatus, durus, torminosus, cum aut adstricta Alvo aut Diarrhœica, aut Dysenterica, aut Mucosa, aut Sanguinolenta, aut Ramentosa. Stranguria præterea, Dysuria, Ischuria: quorum omnium plerumque nonnulla, aliis alia, alio atque alio modo, adesse solent, facileque explicantur.

Decimo & Quinto. Notant Medici articulorum in Verminosis tumorem pollicis præcipue, digitorumque. Pluries hanc in illis vidi, haud vero in illis solis. Obscurus textus *Hippocratis* spectat huc forte, Coac. n. 467. Ἐν Διεντερικοῖσι μετὰ Θηρίων οὐδύναι ἐρῶσιν ἡννομεναι, τὰ περὶ ἄρτρα μετεωρίζεσθιν ἐκ τῶν ἰσίων λέπια ἐξέρυθρα φλυκταίνεμενα ἐφιδρώσαντε. οὗτοι διαφορίσονται ὅτι μάλιστα.

Θηρίον, Θηριῶδες, incertum omnino utrum ad Vermes, an ad morbi, ulcerisve, malignitatem, pravitatemque, referre oporteat: cum multis videatur utrumque non paucis in locis *Hippocrates* intellexisse. Videatur hic in *Oeconomia sua Foësius*. Si in priore sensu textum interpretari velimus, eum sic reddere cum

Char-

Charterio debemus: „ In Lientericis cum animaculis
 „ dolores, tormine soluti, partes circa articulos tume-
 „ faciunt. „ Etiam *Foësius* & hic & ad n. 285. *Q*
 2. *Epid.* 5. 6. 8. intellegit Intestinorum ea non ine-
 pte tormina esse, quæ excitentur aliquando a Lum-
 bricis.

Si proinde hoc textu *Hippocratem* de Lumbricis a-
 gentem opinamur, duo ab eo notata advertimus, quæ
 in Verminosis aliquando apparent: Articulorum digi-
 torum sive vagos, sive diuturnos, sive perennes dolo-
 res, & efflorescentias: quam observationem quoque se
 fecisse testatur *Ill. B. Van Swieten Comm. ad §. 1364.*

Si addideris denique Autunni ad Vermes dispositio-
 nem, febrisque verminosa exacerbatorem vesperti-
 nam, ac peculiaris naturæ sive characteris foetorem oris,
 sudoris, excrementi; tandem Abdominis tumorem aut
 durum, aut nonnunquam tympaniticum; habebis in hi-
 ce XV. notis signa Vermium humano in corpore la-
 tentium Sexaginta & ultra.

§. II. Ut porro nostram de his omnibus sententiam
 proferamus, primo cum omnibus exercitatis in Pra-
 ti Medicis ingenui fatemur, quemadmodum ex obser-
 vatis pluribus, interque sese collatis cum Vermium,
 tum febrium Verminosarum signis, in Diagnosi mini-
 me fallimur; ita non rarius contingere, ut horum aut
 pauca duntaxat adsint, aut omnino nulla indicia, ea-
 que sæpe cum insignioribus ægritudinem aliarum sym-
 ptomatis intermixta sic, atque confusa, ut lumbricorum
 præsentiam nos plane lateat. Tandemque non per raro ac-
 cidere, ut ex paucioribus numerosioribusve signis, quo-
 rum operosa data enumeratio fuit, lumbricorum præ-
 sentiam, morbiq; ab iisdem originem, statuentes, to-
 to coelo erremus.

II. Vermium in humano corpore frequentioram esse
 morborum cum acutorum, tum lentorum, causam,
 quam vulgo credatur: ita ut persæpe contingat in cu-

ra morborum Medicum tamdiu inutilem, damnosumque ægrotantibus esse, donec vel ipse, vel qui ipsi suffectus fuerit, infortunioque prioris sapiens, antihelminthicam curam admoveat, ægrumque sanet.

III. Causam morborum justo frequentiore ab Insectis petere plures. Pathologiam verminosam volo, cujus Patroni, *Lancisio* referente, *Varro*, *Columella*, & *Palladius*, primis christianæ Æræ sæculis erant; cujusque labentis, imo oblivioni traditæ, Restauratores valentissimi fuere *R. P. Athanasius Kircherus*, Jesuita doctissimus, acutissimus Philosophus *Nicolaus Kartsoeker*: inter Medicos autem *Christianus Langius*, Professor Lipsiensis, in *Op. omn.* anno 1688. editis; tam in sua Thesi de Morbillis, quam in sua Pathologia, quam *animatam* appellavit. *C. F. Paullini* de morte verminosa, 1703. Annisi hi omnes sunt universalem hanc doctrinam reddere: Vermibus vel complurium, vel cunctorum morborum tribuere originem: venerandam Antiquitatem vix aliam morborum genetricem agnovisse, vix aliam sequentes ætates, audacter statuentes.

An non qui nimis probat, probat nihil? Rationes eorum primo perpendamus ordine: integrum deinde sit cuique, qualem præferat, sententiam amplecti.

Ut ergo ab *Hippocrate* incipiamus, quem in Pathologia ab Insectis formanda celebrem esse velint, num vere scripserint, inquiramus. Quod enim quotiescumque *Hippocrates* περὶ τῶν θηρίων verba fecit, animalcula passim intellexerit, ex textuum complurium collatione non apparet. *Θηρίον*, *Θηριώδες*, *Θηρία*, *Θηριώδης βῆξ*, *Θηριώδες παρακρίσεις*, *Θηριώδης διαίτη*, *Θηριώδες φθινόπωρον*, τὰ ἐμύμενα ἐπὶ τῶν τοις, κὶ *Θηριώδεα*. *Θηριώδης παραφροσύνη*, ἕλκος *Θηριώδες*, &c. frequenter scripsit *Hippocrates*; at vero plerisque in locis vermes indigitare non videtur. Primo enim si fidum illius interpretem *Galenum* consulamus,

mus, vix unus alterve textus est, in quo illum vermes per τὸν ἴδιον intellexisse censet. Nolo longiore redensione tedious benevolis esse Lectoribus; qui vero mecum *Galenum* ad omnes hos textus presse sequitur, potissimum vero in *Comm. ad Sect. 2. Libr. 2. Epid.* & ad *Coacar. No. 467.* illa vera esse, quæ assero, capiet.

Deinde *Galenus* ad plerosque horum textuum opiniones variorum Medicorum, hasque inter & illam de Vermibus, refert: quam posteriorem aut simpliciter narrat, aut rarius admittit, aut passim rejicit, confutatque.

Præterea dubitare licebit num *Hippocrates* de Lumbricis vel cogitaverit, dum tot Operum suorum in locis τὸν ἴδιον &c. scriberet. Mecum procul dubio dubitabunt ii, qui animadverterint illum de Vermibus proprie differentem, non hanc ἴδιον vocem, sed vermium proprium nomen adhibere & appellare εἰς μιντας, hasque dividere in εὐρογγύλας, πλατείας seu τινίας, & σκορπίω. Videatur *Libr. IV. de Morbis Libr. III. Aphor. No. 26. Lib. Prognost. Coac. Pronot. &c.* Hic enim in locis de Vermibus expresse acturus, non adhibet vocem ἴδιον, sed lumbricorum, quos sua singulos describit specie: ubi vero scribit ἴδιον &c. Lumbricorum neque generale nomen, neque speciem memorat, neque etiam propria, communiaque, vermium symptomata: quamobrem *Galenus*, quique Autores illum, Interpretesque, sequuntur, farentur de longe aliis morbis agentem posse credi *Hippocratem*, quam e iis, quos Lumbrici generent: volentem vero, ut resera de lumbricis illum agere intelligamus, distincte loqui, & ipsa symptomata, in morbo apparentia, singulis singula suis tribuere vermium speciebus.

Argumentum hoc ita stringere convincereque videatur, ut nisi refutetur illud, nobisque eripiat, haud

facile videamur admissuri eorum assertionem, qui illum voce τῆς θείας animatam potentiam intellexisse autument. Itaque θηρίων potest quidem latiore sensu humani corporis infecta significare, at vero determinato Hippocratis sensu, de vermibus de industria agentis, eos minime significat. ὀφίων Hippocrates proinde communi priscorum more intellexit, quo Latini *ferinum*, *belluinum*; quod quidem dum de Feris, sive de Belluis sermo sit, ad Belluas referendum est, minime vero quando metaphorice millies rebus longe aliis applicatur. Sic quando A. Gellius 19. 2. de iis scripsit, qui *belluinis voluptatibus sese dederunt*; quando ibidem loquitur de *ferinis voluptatibus*; quando Ovidius L. Trist. V. eleg. 12. ait.

Omnia barbaria loca sunt, vocisque ferina:

Omnia sunt Getici plena timore soni.

Quando Seneca Tract. de Clementia scripsit de *ferina hominum rabie*, sanguine & vulneribus aliorum gaudentium: non proprio sed metaphorico sensu hæc intelligimus. Imo ipsos Græcos sic rem intellexisse ex Aristotele liquet, toto suo primo Ethicorum septimi libri capite ostendente, τὴν θηριώτητα, esse veluti oppositum τῷ ἡρώικῳ, κὶ θείῳ: & quater hoc ipso capite resumit hanc vocem, hoc sensu, & tandem,, Atque,, eos homines, inquit, qui vitio ceteris antecellunt,, turpi atque infami nomine feros & immanes appellamus. Vid. Lib. V. similia, Annon ipse Tullius sic est interpretatus græci Autoris verba: τῷ ἀνωδύνῳ θηριότῳ τὸ σῶμα, κὶ τὴν ψύχην: immanitatem in animo; in corpore stuporem contingere? Arataus Cappadox, qui phrasas multas, jonicamque dictionem Hippocratis complexus & imitatus est, semel modo reperitur in totis operibus usus τῆς θείας voce; non profecto in sensu verminoso, cum nullibi ipsi unquam de Vermibus sermo sit; sed eo, quo Græci Scriptores,

res, quo ipse *Hippocrates*, quo Latini Autores, suum *ferinum* intellexerunt: ὄψων τὸ θηριώδες μέστωρον. Videatur ad finem *Cap. XIV. Lib. I. Diut. morb. de Liene*: ubi certe de Vermibus loqui in animo habere non potuit, sed de Autumno, Tabi Lienari pernicioso, calamitoso, ferino.

Itaque Herminologiam *Hippocrates* relinquit nobis, sed moderatam, sed longe, quam Scriptores Herminophilii contendunt, parciolem. *Galenus* licet Verminosorum plures, quam *Hippocrates*, vidisse videatur, ut ex textu ejus prius laudato confici fors posset, pluribus tamen in locis contradixit his, ut constitit, qui nomine τῶ θηριῶς Lumbricos ab *Hippocrate* intellectos fuisse contenderent. *Aræteus* unica modo vice hanc vocem, utique haud verminosa intentione, adhibuit; Vermines forte omnium Medicorum, quorum lucubrationes ad nos devenerunt, rarissimos contemplatus; siquidem in recensendis morborum quorumcumque causis, nulli eorumdem meminit: id quod eo vehementius miramur, quia non modo & *Joniæ*, & aliarum græcarum Nationum morbos tradidit, sed *Ægyptiorum* etiam, & *Syrorum*, *Syriæ* potissimum *Cavæ*, quæ ob id *Cælosyria* appellatur: nisi forsan ea sui præclari Operis, quæ plura edacissima ætas invisit nobis, nonnullam Herminologiam comprehendissent. Quantum vero ex iis, quæ operum ejus nobis conservata lætamur, colligere datur, neque Lumbricos tanta in praxi vidit, neque vix morbos, quorum natales ipsis deferret.

Atque hæc de *Hippocrate*, *Galeno*, *Aræteo*, Antiquitatis venerandæ principibus scriptoribus, suffecerint, si fallor, ut ii, qui universam Pathologiam, priscæ Medicinæ Patrum autoritate helminticam tradere gestiunt, abunde refutentur. Incumbit porro illis experimentorum vi, crebritate, evidentiaque, probare assertum. Equidem, in multis seu acutis, seu chronicis

in morbis, animalem potentiam probarunt, eique faventem non infrequenter deprehenderunt popularitatem. Cutanei, subcutaneiue morbi, ulcera varii cum generis, tum loci, sordibusque squalentes ad nonnulla humani corporis loca plagæ, multigenes Vermes, multigena conspectui ipsorum exhibuere Insecta: an vero ideo morbos quoscumque generant Insecta, Vermesque? Vidimus morbos, vere inde genitos a Medicinæ descriptos curatosque Parentibus; non autem eo, quo hi, sensu modoque, velint. Si in scabie, si in ulcere, repperunt insecta, hæc non causas mali, sed mali habuerunt effectus. Noverat *Achilles* Vermes in vulneribus gigni, qui inibi ovula deponerent: quare & occisi *Patrocli* corpus pallio suo contegebat, donec deferri inde cadaver, honorificeque humari posset, ut pulcre notavit *Homerus*, *Iliad.* XIX.

Μῆτερ ἐμὴ,

ἀλλὰ μάλ. αἰνῶς

Δείδω, μὴ μοι τόθ' ὦρα Μενoitίῃ ἀλκιμον υἱόν.

Μυῖαι, λαδδύσαι κατὰ χελκοτύπας ὠτειλάς

Εὐλὰς ἐγγείνωνται, αἰκίστωσι δὲ νεκρὸν.

Ἐκ δαίῳν πέφαται, κατὰ δὲ χρόα πάντα σαπείν.

Mater mea,

perquam graviter

Timeo, ne mihi interea Menoetii fortem filium

Musca ingressæ, per ære-inflicta vulnera

Vermes intus generent, deturpentque cadaver,

Vita nempe adempta est; inque corpore omnia putrescant. (1)

Ne-

(1) *Historia naturalis videtur longe perfectior Homeri, quam Aristotelis, fuisse temporibus; cum hic ex putre-*

Neque in mortuorum tantummodo, sed etiam in vivorum ulceribus, natos inde vermes intelligimus. An igitur ideo demonstrata sententiæ veritas est, ulcus per se vermibus scatere afferentis? Constitit sæpe ut oculis sive nudis, sive microscopio illustratis, infecta patuerint, morborum cutaneorum origines: at vero quotiesne vel Lynceis oculis, quantumvis vividæ imaginationis vi animatis, horum videas prorsum nihil? Igiturne quod detexeris in nonnullis, quod in pluribus detegere nequiveris, id bono animo, sapientique consilio, de tota rerum universitate affirmabis?

Sed omnes morbi, ut ajunt saltem, æque interni, quam externi, æque acuti, quam lenti, neque certius curantur, neque maturius, neque etiam tutius, quam eo genere rerum, quas infecta fugere, necare, pellereque, usu novimus. Sane si hoc ipsis largiremur,

F 4

mur,

putredine vermes gigni, ille ab ovulis insectorum illos nasci censuerit. Non semper scientias auget ornatque sæculorum lapsus. Homerus quatuor sæculis forte anterior Aristoteli, rectius illo hac in re sapuit. Quod eo magis miramur, quia Homeri fama, veneratio, & autoritas, apud Græcos tanta erat, ut Urbes septem loci ejus natalis honorem sibi aliæ præ aliis vindicarent; & ut clari iis sæculis scriptores, ipseque Aristoteles, Homeri versibus opera sua confirmare ornareque se crederent. Obstupescimus & hunc Aristotelicum in Galeno errorem; qui tamen, innumeris vicibus, suis cum Commentariis, tum Dissertationibus, sententias interposuerit Homeri. An. Achillis sive Homeri, de ortu vermium sententia, quam Dea Thetis confirmabant postea Achilli, non elucidabat magis naturalem historiam, quam illa vermium genitrix putredo, ficta Aristoteli?

mur, nihil inde roboris ipsorum consequeretur opinio: si enim succi saponacearum herbarum, fructuumque, & lentissimam Melancholiam, & rapidissimam inflammationem, ex æquo curent, an ibi acrem rodentemque humorem, & piceum, & amurcosum, frigidumque, ac tranquillum; hic humorem æstu motuque validissimis compactum, ac consolidatum, causas proinde oppositissimas, quia tamen eodem præsidiorum genere tolluntur, unas dicam, easdemque? An quod Ferrum, Fontesque ferrati, nimios menses mulierum alteri sistant, parciore provocent alteri, causa utriusque oppositissimi morbi unam eandemque vocem, quod idem remedium curet utrumque? Profecto non differret ultra a vasorum strictura eorundem laxitas, non ab humorum tenuitate spissitas, non a laudabili cruore ejus mucositas & acritudo. Numquid quod *Peruvia Cortex* torpidos augeat humorum motus, impetuosioresque moderetur, ideo hoc utrumque distinctissimum humorum vitium, unum tamen idemque habebo?

Imo, inquirunt, varii generis, variaeque prorsum indolis, infecta, vel eorum seminia, in humani corporis internis atque reconditis latitant penetralibus, quæ varias oppositasque ingenerent corporibus calamitates: sic, ut sint, quæ attenuent liquida; ut sint, quæ condensent: ut reperiantur quæ solida & laxent, & firment: ut hæc motum humorum rapidiorem concitent, illa rursus sufflaminent: ut alia tale corporis viscus infestent, alia aliud, & sic porro. Si etiam hoc, faciles per omnia, ipsis concederemus, utique Sulphure, Mercurio, Marte, Jove, Tabaco, Amaris, Cæterisque, quæ vermes aut pellere dicuntur, aut perimere, non credent, opinor, morbum discrimine gravem, quem genuissent infecta, una cessaturum, cessante, quæ generallet illum, causa. Id inde tamen consequeretur necesse esset, si ut antihelminthica proprie dicta in

Et in morbis vere verminosis agunt, ita quoque hæc in ceteris ægitudinibus operarentur.

Verum & Aquam antihelmenticam esse inquit, & Nitrum, & Mel, Sapaſque omnes Horæorum fructuum, Radicisque Graminis, Taraxaci, &c. verbo quidquid unquam vel in Chronicis præſcribitur, vel in Acutis morbis, hoc omne fere & antihelmenticum appellant, & ad vermium corrigendos effectus, idoneum habent. Hac tamen aſſertione nihil aut a veritate alienus eſt, aut experientia diffidentius. Quotiesne enim incolumes perſiſtunt in corpore Vermes, dum interea & febres, & obſtructiones, & inflammationes, tollimus fortunate? Et cur Inoculatores ita lamentantur eorum puerorum interitum, qui inoculati vermium infeſtantur, licet tota illorum ſive præparans, ſive concomitans, ſive abſolvens Methodus, & communia vermifuga Acutorum, & ſpecifica, abunde largiatur?

Igitur quod hujus Paradoxæ opinionis Fautoribus primum conceſſeramus, ut eos audiendi, eorumque argumenta expendendi præſto facultas eſſet; adeo parum hanc ſtabilivit fulcivitque opinionem, ut ab ipsis fundamentis diruta videatur: repetitis vero quæ ad tempus conceſſa fuerant, plauſibile nihil ultra in illa manet.

Aſt vero monui præſtantes Medicos exiſtere, qui Pathologiam animaleſ arctiores intra limites coercentes, ſic quidem ut fateantur claſſem morborum haud contemnendam eſſe, quibus formandis Inſecta ſymbolum non conferrent; Verminoſorum morborum claſſem tamen propter unam, alteramve ejuſmodi Epidemiam, extendant ita, amplificentque, ut demum maximam morborum partem Vermibus, ceu eorundem genitoribus, adſcribant; ſuarumque partium Sapientiſſimam Antiquitatum fuiſſe immerito, ut jam patuit, arbitrentur. His autem dudum abſoluta, repetitaque, reſponſio.

sio fuit. Prisci longe parcius de potentia animata scripserunt, quam hujus sectæ clari Patroni rentur; ut multo gravis argumenti genere constituisse putem. Conferatque maxime ut notent hi ipsi, minus celebrem, minusque amplificatam hanc Pathologiam futuram fuisse, si multi nobis Vermes imaginarios, fictos, falsoque pro talibus habitos, non tradidissent. Ne longus hic sim, mitto Lectores ad *Cl. Morgagni Epistolam XXIV*, cujus pars potior ad id, quod hic profero, probandum impenditur. Et *Cl. Gottingensis Professor Murray*, in *Dissertatione* æque docte, quam nitide, conscripta de *Vermibus in Elephantiacorum ulceribus*, ubi retulisset se deceptum a Matre fuisse, quæ sibi pro Vermibus filiaæ suæ intestinalibus, eos monstrasset, qui a spurcitie pavimenti, ad lectum collecta, nati in Matulam, Excipulumve, sub lecto irrepsissent, ut postmodum constitit, candide subjunxit; Quibus ea de
 „ causa paulo diutius immoror, ut inexercitati in ejus-
 „ modi observationibus cavere sibi a fallaciis discant,
 „ quibus maximam partem narrationum quæ in *Actis*
 „ *Nat. Curiosorum*, & aliis in locis, de vermibus ex-
 „ tant, adscribendam censeo. „ Digna hæc dissertatio
 est, quæ tota legatur, hanc materiem mirifice illustrans. Sic me ipsum deceptum opinor a Medico fuisse, qui mihi vivos vermiculos in sanguine humano se contuitum esse retulerit; cum postea resciverim, & postera modo luce hos Vermes tandem sub conspectum venisse, & locum in quo cruor asservatus esset, frumentaceis scatuisse insectis. Citissime enim, posse exclusa ovula in Vermes abire, paucasque intra horas incredibiliter grandescere, *Swammerdamiana*, *Rhediana*, & *Reamuriana*, fidem faciunt. Legendus hic *Steeneveld de ulcere verminoso*, quod opusculum, belgice conscriptum, *Bidious* latio donavit. Invenitur inter ejus *XXVIII*. Opuscula, quæ *Bidley* Opera omnia Anatomica-medica componunt.

Cautione certe opus est in legendis Autoribus, qui aut decipi se passi sunt, aut ipsi sæpe plus æquo scripserunt. Dum Verbi causa in *Boneti Sepulcreto* To. III. pag. 227. legimus anno 1663. in Rep. *Veneta* plus sex hominum millibus maligna febre correptos fuisse, Cadaverumque apertura incredibilem vermiculorum minimorum copiam inventam esse non ideo cum *Velschio*, hujus & sequentis historiæ Autore, concludam, quæ *Venetos* tenuerit, verminantem Epidemiam fuisse: ex ipso namque Autore patet vix ultra unum alterumve apertum fuisse Cadaver: „Horum nonnulli cito interibant, inquit, Ceteri brevi evadebant. „Si ergo inter 6000. ægros nonnulli perierint modo, nonnullorum tantum inspicere cadavera potuerunt; ex iis autem nonnullis ad numerum 6000. hominum id referre vellet, nec tutum, nec sincerum est.

Video ibidem in *Sepulcreto* notatam apud *Seguifianos* anno 1675. Epidemiam, qua *Burgi* uno mense homines ultra sexcentos perirent, & in qua cuncti, nemine excepto, vivos Lumbricos egererent: mortalitatem autem actutum cessasse, dato ægrotantibus ea de causa vino, quod Lumbricos vivos, vino irroratos, citissime mori, casu detectum esset. Fides Autoris non parum suspecta fit, cum illis ultra sexcentis, qui post ejectos lumbricos vivos perierint, Medici antihelminthica aut dederint, aut non dederint, necesse sit. Non dedisse illos, ubi singuli ægri vermes ejicerent, credibile non est. Si dederint, adhuc incredibilius est antihelminthica nemini profuisse, quæ alias Epidemias verminosas egregie curasse legimus. Num adeo peculiare id Vermium genus fuit, ut Vinum solum ipsi specificum esset? An vero ipsius Epidemiæ genius is erat, ut sub finem collapsas nimium vires, & ni refocillarentur, omnino defecturas, vinum restauraret, sicque a morte præservaret hominem? Quid plura? Multa eorum, quæ *Sepulcreto* perhibentur, fidem superare

utcum-

utcumque videntur. Quis crederet cum *Hercule a Saxonia* anno 1540. in *Pannonia* quodam loco, in dies mille hominum periisse, Viperis Lacertisque, corpora eorum obsidentibus? Quis credat ibi alio tempore & a Viperis Lacertisque, & a Cerebro vermibus, scatente copiosis, idque in febre pestilentiali, innumeros periisse? Quam rara est in peste Anatome? An etiam fidem non superat febris pestilentis historia, quæ anno 1637. *Burgundiam* afflixit, Cadaveribus & hominum & equorum nullam exhibentibus morbi causam, quam jecora scatentia Bufonibus?

Sed de hisce satis: qui plura amat, adeat Fontes ipsos. Merentur legi præter laudatos Viros, de Vermibus, Febribusque Verminosis, *Prosper Alpinus de Med. Ægypt.* *Joannes Maria Lancisius*, qui eruditissime hanc quæstionem tractavit *Lib. I. de nox. Palud. effl. H. D. Caubius*, in *Pathol.* *Marcus Antonius Ploneiz Medicus Viennensis*, haud minus eruditus, quam expertus, de *Contagio morborum idea nova*. Exp. *Vir. Van den Bosch Medicus Haga batavus de Epid. Vermin.* Posteriorum duorum hic *Pathologiæ animatæ* impense favet, ille impensissime.



SECTIONIS I.

CAPUT QUINTUM.

De terminando tempore quo perdurare Inflammatio non modo soleat, sed & possit.

§. I. *Dies quartus saepe terminus Inflammationis est, secundum consuetam Naturæ Legem, at vero tot exceptiones hæc Lex habet, ut hac in re fere duplex statuenda sit. Et nostra id docuere observata, & plena inde sunt Opera Veterum. Exempla afferuntur ex Hippocrate multa. Objectionibus occurritur, quæ contra hanc ex Hippocrate desumptam observationem formari possent.*

§. II. *Non modo notarunt Veteres hanc Naturæ deviationem, sed & suas indicationes ad eam mutarunt. Ita & Boerhaavii sententiam de die quarto explicandam esse, jubent ejusdem Institutiones.*

§. I. **I**nflammatiō in verminoso Juvene post diem 37 morbi fere universalis reperta, occasionem huic Quæstioni dedit: Inflammationis externæ tempus passim trium, quatuorve dierum est, quorum ad finem aut in resolutionem tendit, aut in evacuationem Criticam; sin minus, abscessum, aliumve perniciosum exitum minatur. Estque etiam in internarum partium inflammatione communiter vera: sic ut tam apud Veteres, quam apud Recentiores Medicinæ Scriptores, ea Artis præsidia, quæ mitigandis auferendisque Inflammationibus admoveri solent, haud ultra quartum diem

diem admoveantur; ne vel turbeatur morbi seu benigna, seu critica resolutio, vel suppuratio impediatur, neve insequuturus alioqui præcipitetur interitus.

Laudabilis lex ista, necessariaque est, antiquum obtinente Natura; at vero hac suum invertente modum, damnosa agrotis atque exitialis fit. Non raro autem ordinem invertit Natura morborum. Morbi acuti inflammatorii crescunt aliquando ultra quartum diem in septimum, in undecimum, in quartum decimum, & ultra: ita quidem, ut vera humorum, solidorumque cruditas, continuantis tam per symptomata sua, quam per Sanguinis, Excretorumque phænomena, Inflammationis testis, aut in longiorem diem crescat, aut perseveret saltem; & ut demum intra pauciores pluresve dies alios perfecta Crisi; & crisi quidem eadem, quæ alias communi lege morborum die quarto, septimove judicare solet; Crisi tandem, quam integra sanitas excipit, judicetur. Hoc porro non perraro contingere supra monui: tanta quippe datur ab observatione generali discrepantiæ frequentia, ut Auditores mei admodum crebro observaverint, in feros admodum acutæ ægritudinis dies, dispositionem missi de vena cruoris *Φλογιστικωτάτην*, insignesque summæ per omnes functiones Cruditatis effectus.

Neque hæc priscos latuisse video. Principio enim Morbos acutos, potissimumque inflammatorios, accuratissimo fidelissimoque calamo exarantes, hanc inflammationis prolationem & diligenter adnotarunt, & scrupulose medicam monuerunt posteritatem. Obviam ubique testimonia veniunt, *Hippocratis*, *Galen*i, *Aræti*, monumenta diligenter pervolventi. Jamque in ipso *primi Epidemiorum* exordio occurrit nobis epidemicæ febris ardentis graphica, dignaque *Hippocrati*, descriptio, quam non nisi aut 20. aut 40. aut 80. die bona crisis solvebat. Si attenti textum hunc, *Galen*i que in eundem commentarium, consulamus, percipimus dia-

the-

thesin inflammatoriam solito longe diutius extendi. Neque de inflammatione Phrenitica, quæ per id tempus observata, ad diem 11. aut 20. judicabatur, aliam formare nobis ideam possumus. Quemadmodum quoque idem censere necesse est de insequentis Hyemis cum Ardente febre, tum Phrenitide; qui morbus uterque die 11. imperfecto, 20. vel & serius, perfecto absoluebatur judicio. *Epicratis* uxori, si non ad 40. diem, saltem ad non multo maturiorem, inflammatio protracta apparet; *Cleonactidi* vix intra spatium temporis angustius; *Clazomenio* usque ad 16. aut 17. diem. Videturque is, qui *incalescens cœnaverat*, inflammationem in 11. diem, qui idem & mortis fuit, potractam habuisse. Qui in *Dealcis horto*, ad 24. diem usque. *Charion* ad 17. diem saltem; quæque in *foro mendacium* mulier cubabat, ad 14. diem inflammatione laborarunt. Sed & *Libr. III. Epid.* prolixior datur febris ardentis pernicioſa historia, cujus illius inflammatorii admodum producti indicia observes. Quidam in *Thaso*, natione *Parius*, die acuti morbi 120. moriens, notatur ab *Hippocrate* „ habuisse ab initio, ad finem, „ Alvum continenter lubricam, biliosam, multum humidam, & cum subsisteret, fervidam, crudamque: „ Urinas perpetuo malas, Coma frequens, Insomnia „ cum doloribus, atque a cibis horrorem. „ Si a dierum numero tanto quosdam *εἰς τούτους* detrahi oportere quis censeret, concedere nihilominus debeat potiore morbi tempore adfuisse, perstitisseque, inflammationis, summæque cruditatis, signa non pauca; meritoque *Hippocratem* hæc verba ad calcem adjecisse: *continenter, συνεχέως*, adfuit ardens febris. In Historia *Mulieris in Thaso*, vix illum refutare possem, qui illi perennantem in 80. diem inflammationem contenderet; neque *Galen*i Commentarius, summam morbi in 80 diem cruditatem notantis, aptum mihi suppeditaret refellendi argu-

argumentum. *Pythioni* profecto inflammationis stadium in 10 diem, ipsi fatalem, extensum fuit. Nihil autem historia *Anaxionis* convincentius: propter inflammationem pleuriticam *Hippocrates* die octavo Venam illi tutudit; postquam dolor quidem minuebatur, *ἐνέδωναν μὲν οἱ πονοί*, in Pleura vero ac Pulmone summa cruditas perseveravit, minimum ad 17. si non ad 27. diem, nec profecto sudoris iudicio, nisi die 34. iudicatus fuit. *Herophyto* in 40. diem; *Apollonio* certe ultra 24. diem, perstitit inflammatio. *Mulier in Cyzico* in diem 17. quo periit, manifesta jugis Inflammationis signa gessit, obiitque phrenitica. Uxor *Dealcis* inflammationis signa habebat, in 21. diem fatalem constantis: ita ut *Hippocrates* orationem claudat dicendo: *διὰ τέλεος Φρενίτις*. Idemque de *Melibei Adolescente* verum. Et in Epid. 4. Libro de *Thersandri Coniuge*, deque *Servo in extrema caupona*, iudicium aliud ferre non possumus. *Puerpera maritus* quoque, ad quem *Hippocrates* die 7. morbi primum accessit, die octavo ex summa, crudissimaque, Jecinoris inflammatione periit. Epid. 7. *Conjux Hermoptotomi* ad usque 23. diem inflammatione laborasse videtur.

Nonnullis forsitan dies intercalarii dubium movebunt; dies, inquam, quibus aut conticescente, aut multum se moderante, febre, inflammatio quoque cessasse videretur: sed hos ipsos ajo primi, omnibus scilicet admissi, inflammatoriorum morborum stadii quaternarii, non reminisci, in quo cum inflammationis aut constantia, aut incremento, medius intercurrat, integerque saepe dies, quo morbus quidem longe mitior adparet, & nihilo secius vel IV. die, vel serius, ex stadio inflammatorio vel in Crisi abeat, vel in Mortem, vel in alium Morbum. Neque obijciant mihi tot incipientis Coctionis signa in *Hippocraticis* apparuisse aegrotis, ut inflammationis indicia desiderarentur: nam inane argu-

men-

mentum esse ostendunt signa, quæ prioribus diebus morbi & notavit conscripsitque suis in ægris *Hippocrates*, & post omnes Practicos, in nostris nos ægris quotidie observavimus, cum subsequente tamen inflammationis deinceps augmento, ejusque in consuetas suas transmutationes progressu. Qui hæc animo bene perpendunt, hi inflammationis Membranarum in Cadaveribus Nosocomii cum crebræ, tum amplæ, observatam demonstratamque perseverantiam neutiquam mirabuntur.

§. II. Videmus itaque hæc nota fuisse Antiquis: an vero secundum hanc observationem admoverint, mutaverintque, methodum medendi, quæritur? Nihil evidentius est. Qui enim alias in mentem Coo-venisset, ut octavo die sanguinem mitteret *Anaxioni*? Eumque rite misisse continuantis diu postmodum cruditis per-
tinacia evicisset? Quod in eo fecit, id eum in numerosis ægris, quorum pertinacem Cruditatem supra memoravi, fecisse, tam certo novimus, quam ex ungue Leonem. Opportunum erit ex *Galen*i in hanc historiam *Commentario* nonnulla transferre: In hoc uno
 „ cunctorum ægrotorum, quorum morbum I. & III.
 „ *Epid. Libro* conscripsit, Phlebotomæ a se institutæ
 „ meminit: non quasi unicus ille esset, cui Venam
 „ secasset, sed quod primus esset, cui octavo die.
 „ Idque notavit ideo, quod Medici existerent, qui ve-
 „ luti certa quadam lege Venam post diem quartum
 „ non secarent. Quando igitur huic octavo die missus
 „ sanguis fuit, multo profecto plures censeas Venæ
 „ sectionis auxilio, præter diem alterum, aut ter-
 „ tium, aut quartum, usos fuisse. Reticuit autem
 „ hoc *Hippocrates*, sicuti reliqua auxilia omnia
 „ cum non therapeuticas suas Lucubrationes hic tra-
 „ dere, Observationes practicas tantum in animo
 „ haberet.

Igitur antiquorum monitis præceptisque eruditi Vi-
 ri, qui Medicinam scriptis illustrarunt, & diem quar-

tum, ut stadii inflammatorii terminum, frequenter agnoscunt, & Naturæ ingentem notant ab hac lege recessum. Unde si etiam aliquibus videatur Vir immortalis *Hermannus Boerhaave* in *Aphorismis suis* diem quartum in acutis cum diathesi inflammatoria morbis multum suspicere; videant quoque illi magnum hunc Virum in iis *Institutionum suarum* locis, quæ ad acrisis, dyscrisisque morborum tractant, has exceptiones etiam notasse, discipulorumque animis inculcasse. Hæc monere expediebat, quod famosi hujus quarti diei consideratio plurimum in animis altiores, quam aut par esset, aut ægris conducere, radices egisset; tum etiam quod Inflammationis pertinacioris, durabiliorisque indicia, in tot Cadaveribus reperta, hæc eadem expositio plurimum illustraret.



RATIONIS MEDENDI SECTIONIS II. DE PESTE.

CAPUT PRIMUM.

De Peste, et cur de illa scribendum sit.

§. I. Ratio exponitur cur de Morbo, centies descripto, scribendum de integro fuerit. Præcipuorum Autorum qui de ea scripsere, catalogus adjungitur.

§. I. **O** Uamquam sinistre ferre, vehementerque in me multi, de Peste, cui interfuerim nunquam, scribentem, ejusdemque tractandæ præcepta tradentem, inveni possent; quandoquidem cum Præcorum autorum, tum Juniorum, tot tantique extiterint, graves Viri, conscripti in Arte Patres (1), qui Luem

G 2

hanc

(1) Hippocrates Lib. III. Epid. Sect. III. Pestis accuratam dedit longamque Historiam. Et alibi Pestem, licet minus aperte, descripsisse, ut in Historia Critonis &c. commentatores voluerunt. Vide Mindere- rum, Botallum, aliosque.

Galenus in Libr. III. Epid. pariter, ut & Libr. de diff. Febr. I. cap. VI. & VII. libr. IX. de Simpl. Med.

hanc tetram oculis contuiti suis, manuque tractantes, dumque illam pellere ab aliis noctu diuque satagerent, eadem afflati ipsi correptique, masculine de ea scripseriat, aptaque curandi præcepta tradiderint; ut in tanta luce nedum inexpertorum, verum etiam ne expertissimorum quidem virorum, nova illustratione indigere minime videamur: nihilominus ut historiam, curamque, Pestilentie incudi redderem, me urgentes compulerunt gravissimæque rationes. Ac primum quidem

Med. virt. cap. I. libr. de Meth. med. V. cap. XII. & XIV. cap. X. libr. de comp. Med. sec. loc. III. cap. II.

Paulus Aegineta Lib. II. cap. XXXVI.

Hieronymus Fracastorius, de Contag. Libri tres. Venetiis 1546.

Ambrosius Paræus Libr. XXII.

Hieronymus Capivaccius in Med. Pract. Libr. VI. cap. 29. 30. 31.

Ludovicus Mercatus trium Regum Hispaniarum Archiater Tom. II. Libr. VII.

Cornelius Gemma, celeberrimus Medicus Lovaniensis, qui Peste obiit eo ipso anno 1575. quo Plantinus Antverpiensis ejus de Peste opus typis elegantibus suis excudit.

Petrus Forestus Lib. VI. Edit. Rotomag. 1653.

Jodocus Lomnius obiter Tom. I. p. 31. 32. 33.

Joannes Fernelius de abditis rerum causis Libr. II. cap. 10. 11. 12.

Joannes Heurnius de Peste liber. Ultrajectinus erat, & in Academia Lugduno-Batava primus, ac primarius Medicina Professor.

Rembertus Dodonæus Medicus Casareus in Med. observ. Plantinus excudit anno 1585.

dem fallacia, incertitudoque huius morbi; ita ut plerumque Disputatio acerba diuturnaue habeatur utrum, qui affligere morbus occeperit, Pests appellandus sit, necne? Cum nunc interea, ut *Homerus* notat, quando, Deus Νῆστον ἀνὰ σπῆρτον ὥστε κελὴν, ὀλέκοντο δ' λαοὶ, milleque Mortalium, antequam lis sit decisa sternat morbus; tentandum erat, an ex ipsorum litigantium observationibus lex confici nulla posset, quæ vel tolleret a principio dissidium omne, vel mali propagationem

Julius Palmarius Constantinus, septem de Peste Libros conscripsit, editos Lutetie 1577. & 1578.

Hieronymus Mercurialis Patavina in schola celeberr. professor, dedit lectiones de Peste anno 1577. quæ anno eodem Venetiis typo excussa.

Joannes Crato a Craßheim Nobilis Imp. Maximiliani Archiater in Cons. Med. Libris VII. 1591. 92. 93.

Schenckius a Grafenberg Tomo VI.

Prosper Alpinius Med. Ægypt. Edit. Venet. anni 1591.

Fabricius Hildanus sparsim in Centuriis.

Daniel Sennertus in Tom. VI. Libr. IV.

Raimundus Mindererus de Peste liber unus. Aug. Vind. 1608.

Felix Platerus edit. op. omn. Basiliæ 1656. ipse dederat jam partem operis anno 1602.

Ludovicus Septalius, de Peste & pestiferis affectibus Libri V. Mediolani 1622. 1630. &c.

Joannes Castellus 1608. Aug. Vind.

Lazarus Riverius Prax. Med. lib. XVII. cap. I. legi decies meretur.

Liddelius, Scotus, de Peste Neomag. 1624.

Isebrandus Diemerbroeck libr. de Peste Neomag. in op. omn. in Fol. 1685.

nem præpediret. Deinde si unquam, in peste profecto, dum jam præsentem illam omnes fatentur, tractanda, curandaque, tanta est vacillatio in consiliis, tanta in observando diversitas, tanta demum in præsidiiis admo-
vendis discrepantia, ut Pestem plane novum morbum esse colligeres, cujus, utpote ignoti eousque Medenti-
bus, quærenda primum ex *Democriti* puteo medela fo-
ret. Tertio cum ex mea Schola exsurgant, qui publi-
ca autoritate mittantur ad confinia, quæ *Austriaca* Re-
gna

Franciscus de le Boe Sylvius *Prof. Leyd. de Peste Opus confectum ex Auditorum suorum adnotatis.*

Thomas Willis, *Edm. in Fol. Venet. 1720. Tomo I. Cap XIII. pag. 65. & seq.*

Vopiscus Fortunatus Piempius Amstelodamensis, *Doctor Lovaniensis de Fundamentis Med. Libri VI. Lo-
van. 1638.*

Athanasius Kircherus, *Jesuita, scrutinium Physico me-
dicum contagiosa luis, quæ dicitur Pestis. Romæ
1658. in IV.*

Hieronymus Montuus, *Allobrox. Practica Medica Ve-
net. 1626.*

Eustachius Rudius, *Utinensis de Morb. occult. & Ve-
nen. Libri V. Venet. 1610.*

Joannes Morellus, *Cabilonensis. De Febre purpurata
epid. pest. in Burgandia &c. Lugd. 1641.*

Balthasar Timæus a Guldenkleë, *Archiater Branden-
burgicus in Libr. III. Enist. & Consil. Lips. 1665.*

Paulus Barbette *in 8. Lugd. Batav. 1672.*

**Nathanaël Hodges de Peste Liber. floruit post medium
XVII. Sec.**

Paulus Sorbait, *Vienn. Archiater ac Professor Op. theor.
pract. in Fol. 1672.*

Thomas Sydenham *tota sectione secunda.*

gna determinant a Thraciis, seu Turcis, ut coortam
ibi pestem, quod crebro fit, curent, suffocentque;
mearum esse partium ratus sum non in Lestione dun-
taxat iisdem meis Auditoribus cognoscendi curandique
luem consilia præceptaque tradere, sed quod memoriam

Jacobus Walschmid *Archiatr Hissicus Profess. Mar-*
purg. in Tomo II. Disp. XIII. de scrutinio Pestis.

Laurentius Bellini *Florentinus Professor Pisanus. De*
urin. puls. febr. &c. Lips. & Francof. 1698. Edi-
tio Bononiensis est anni 1683.

I. C. Langius *oper. omn. Tomo II. cap. XIV. Rivinus*
de peste Lips. anni 1680.

C. F. Paullini *de Febr. Verm. 1703.*

Ludovicus Antonius Muratori, *de tractanda evita-*
que peste tractatus politicus, medicus, & ecclesia-
sticus: Opus incomparabile, Medicis pernecessa-
rium, italice conscriptum, Mutini 1710.

Bernardini Ramazzini, *Mutinensis Professoris Oratio*
publice habita in Liceo Patavino 1713.

Francisc. Xav. Benza, *Relatio Austriacæ Pestis ann.*
1712. 1713. 1714. Sunt observata propria Auto-
ris, facta, Viennæ, ac Posoniæ, in Nosocomiis,
seu Lazaretis dictis.

Massiliensis Pestis *relatio, a Medicis, qui illi interfue-*
re, edita Marsil. 1720. & cum Animadv. L. A.
Muratorii aucta 1743.

Josephi Fornès, *Tractatus de peste in Fol. Barcinonæ*
1725. Operi opuscula præmittuntur, variorumque
Epistolæ de Peste, & Relatio Pestis Massiliensis
mox laudata. Multa continet opus lectu scituque
digna; stylo duntaxat barbaro difforme adeo, hor-
ridumque, ut nesciam an tot hoc sæculo Medicina
quid viderit magis barbarum.

fulciret vacillantem, quod ubique gerere secum possent, & in dubiis consulere, libellum conscribere compendiosum. Tandem quia ea dierum nostrorum calamitas est, ut ad Imperii Austriaci margines, occasione Russici Thracique belli, se manifestaverit dira lues; ob id.

De Peste Massiliensi scripta numerosa prostant, partim Medicorum Gallorum, qui aut ipsi pestilentiosis auxilio ibidem fuere, aut urbium vicinarum incolæ, aut autoritate sive Regis Galliarum, sive Regis Hispaniarum, sive aliorum, Massiliam missi: unde prodit laudatum Cl. Viri Fornès justi voluminis Opus; Medicorumque Nationum diversarum opuscula, qui circa idem tempus vel proprio motu, vel Principum jussu, ideo de peste scripserunt, ut de finibus quisque suis eam propulsarent. Hinc natus discursus brevis de Cont. Pest. & methodo præcavendi, auctore R. Mead. Lond. 1720. Tractatus practicus de peste, auctore Jos. Browne Lond. 1720. Consideratio Pestis Massiliensis, auctore Richardo Bradley, Lond. 1721. Tentamen J. Quiney, ann. 1720. Lond. junctum nova editioni operis Nathanaelis Hodges de peste 1665. Collectio variorum Edictorum &c. Lond. 1721.

Consilium sanitatis Viennensis, edidit anno 1738. Methodum pestem cognoscendi & curandi, cum eo tempore hac lues Thraces ad confinia nostra invasisset. Philippus Hecquet in Append. de Peste, & in Tractatu de Peste, ubi & de periculo coactor. Nosoc. Paris 1722.

Adami Chenot Medicus & rei Sanitatis Transylvanæ Physicus regius, dedit Tractatum de Peste. Viennæ 1766. Egregium Opus.

Autor anonymus de Peste Algerina anni 1752. 1753.

idque omnis Medicorum cura, sollertia, sollicitudo, aptitudoque requirantur; festinare hoc opusculum debui, in quo minus me, potissimum vero præcipuos Auctores, eosque numerosos, qui unquam & Pestilentibus florere temporibus, & Pestis cognoscendæ curandæque præcepta tradiderunt, vestigio temporis consulere possint. Ordine infra hi recensentur.

SECTIONIS II.

CAPUT SECUNDUM.

De difficultate Pestem interstinguendi ab aliis consimilibus illi Morbis.

§. I. Non haberi Pestis ejusmodi Diagnosin, ut Pestis & omnis, & maxime inchoantis, clara notities adsit, ex numerosissimis ostenditur Scriptoribus: quomobrem ad omnem fere incipientem Pestem, imo nonnunquam ad eandem jam grassantem, utrum Pestis sit, nec ne, disceptari solet.

§. II. Quum interim hujus disceptationis causa, Pestis saepe ita vagari visa sit, ut ultra domanda non fuerit, quid, incipiente Pestem referente morbo, provido Magistratui curandum sit? Plures Historiæ dicta confirmantes.

§. I. **P**estem determinatu difficilem, arduamque esse, ex eo colligimus, quod, ut ex singulorum Pestium historia patet, fere perpetuo hæsitatum fuerit, utrum qui apparuisset, quique peteretur definendus Morbus, Pestis appellandus esset, nec ne? Parado-

doxon hoc videri multis debet, qui hinc deplorandam
ejus per orbem universum, singulaque sæcula, frequen-
tiam, atque diuturnitatem, ex Historia tenent; illinc
ingentem conspiciunt delectorum Autorum manum, qui
tetram Luem, quemadmodum eam oculis contuiti erant
suis, inque semetipsis experti, posteritati tradiderunt.
Quo tamen videant rem, quo dixi modo, se habere,
ex innumeris exemplis me pauca contrahere necesse est.

Dum *Paræus*, & quæ ipse viderat, & quæ in lon-
go cum Rege itinere ab omnibus Medicis, Chirurgis-
que, expiscando didicerat, animo volveret, conclusit
tandem *Lib. 22. de Peste cap. 14.* Decipi turpiter ho-
mines „ pestilentiarum principio, eo quod plures inde
„ moriantur, tam quia sæpe & Bubones, & Anthra-
„ ces, & Exanthemata, indicia ceterum pestis, sese
„ cum illa non confocient, quam quia non eadem o-
„ mnibus, sed aliis hæc, aliis illa, eaque tantummo-
„ do pauciora, levioraque, signa morbi, adesse vi-
„ deantur.

Unde *Liddelius*: „ Nullus morbus, inquit, magis
„ ex se perniciosus est, aut in quo signa omnia ma-
„ gis infida sunt, & motus magis incerti, inconstan-
„ tesque. Similia *Mindererus*.

Hieron. Montanus: „ Nos Pestilentiam, ait, grassari
„ vidimus *Lugduni & Viennæ* anno 1525. Febris par-
„ va videbatur, & Febre se liberos ægrotantes opina-
„ bantur, pulsus erant moderatis similes, & Urinæ co-
„ lore, consistentia, & contentis, non illaudabiles, qui
„ tamen omnes occubuerunt.

Imo *Morellus*: „ Fit, inquit scite, ut in Peste fal-
„ lant nos sensus, fallat ratio, fallant Hippocratis
„ Aphorismi; & ipse, ut puto, in his falleretur *Hip-
„ pocrates*.

Riccobonus & Muratorius, referunt nobis, Venetiis
anno 1576. gravi oborta suspectaque ægritudine, sum-
mas orsas esse illorum Medicorum discordias, quibus
in

in mandatis dederat Senatus examinare morbum propius; pestisque an esset, nec ne, enucleare determinare: amplissimum Senatum, quo certior redderetur, duos celeberrimos inclytæ *Patavinæ* Scholæ Antistites *H. Capivaccium*, & *H. Mercurialem*, præstantes viros, editisque claros inclytosque laboribus, convocasse; qui, instituto examine rerum accuratissimo, pendentem solverent litem: tandem eximios hos Scrutatores Senatum certiozem fecisse, qui populari morbus cepisset, non esse Pestem: Pestem tamen esse cum brevi etiam Lippis ac Tonsoribus innotesceret; hoc ceterum nobile *Hieronymorum* par male oluisse universis, honestaque dimissione impetrata *Pataviam* repetiisse. Errorem autem se publice factos postmodum esse, eorum Scripta testantur.

L. Septalius, ad pestem *Lombardiæ* anni 1629. simile dissidium Medicos tenuisse; se autem Pestem esse proclamantem lapidibus ab insolente, desperabundaque plebe, fere obrutum fuisse, memoria prodidit.

In Peste *Viennensi* anni 1712. 1713. 1714. eadem quæstio fluitantes Medentium tenuit incertasque mentes, donec sævior lues tot popularetur cives, ut omnes pestem diram esse faterentur coacti: ita *Ramazzini* in Oratione, & *Murratori* de Peste Libr. 1. pag. 51. referant.

§. II. In calamitoso ejusmodi inopportunoque dissidio, Publica potestas quid actura, omissurave sit, inquit anxie? Confiniane sua sic tuta præstabit, quemadmodum, de Peste certior, & soleat, & debeat? Frustra forte commercium turbabit, jacturamque ingentem Vexatilibus inferet, & Mercatoribus sæpe irreparabilem. E contrario vero si in absolutam certitudinem cautelas procrastinaverit, seræ postmodum curæ hæ erunt, ineptæque omnes. Novamque hæc difficultas quæstionem parit sit ne hoc, an illud, Reipublicæ utilius? Solvere quæstionem potest seria maturaque ponderatio damni, quod alterum in opes, hominumque & commo-

dita-

ditatas, & utilitates, illaturum sit; alterum & in eadem res, & in irreparabilem illorum vitam.

Æqua hæc lance serenissimum *Venetorum* Senatum rem ponderasse testabatur egregius *Ramazzeni*, in oratione habita *Patavii* die 20. Nov. anno 1713. Laude enim summa ferebat Senatum, quod, Medicis *Austriacis* inter sese turpiter dissentientibus, decreta saluberrima sanxisset, ut ad confinia, terra marique, sua, locosque suspectos mitterentur, qui, & prudentia, & experientia sua Labem, si qua forsan adesset, in ortu præfocarent: prætereaque ut in singulis seu Urbibus, seu Oppidis, vel Cives præstantiores, vel Viri nobiliores, ad Portas invigilarent, ne citra datos sanitatis illibatae vades intraret quisquam: cum autem ne sic quidem salutis publicæ cautum esse sibi videretur, Senatum haud multo post & cum externis, & cum proximioribus potissimum Civitatibus, interdixisse commercium omne, minoris utique liberæ Mercaturæ commoda beneficiâque facientem, quam populi salutem.

Decretum Consilii sanitatis *Viennensis* anni 1738. memorabile ob suum est exordium. „ Quotiescunque „ Pestis utut subita violentaque oriebatur, contigit tamen, ut æque Eruditorum atque Plebejorum animi hæsitarent Pestemne appellarent, an alium morborum: interea vero dum de nomine ægritudinis imponendo disceptaretur, solebat tantas edere strages, ut neque Magistratum, neque Medicorum decreta, sitendis essent iisdem.

Exemplum æterna memoria dignum dedit Pestis, quæ anno 1630. *Parmam*, *Veronam*, *Mediolanum* &c. mille mortibus implebat, eoquod hinc Medicorum de morbi nomine lis, illinc prævisum commercii damnum, omne non aut impedivisset, aut procrastinasset cautionem; *Ferrariæ* vero, in qua urbe furere in aliquos jam ceperat, parcebat; quod Magistratus, & Medicorum altercante Collegio, & reclamante Mercatorum Societate,

te ; progressui mali prudentissima saluberrimaque obniteretur cautione . *Muratori Lib. 1. pag. 150. & seq.*

Nulla unquam Regio , quam *Gallo-provincialis* (Provincia) aut *Braccata Gallia* dicta , nulla unquam urbs , quam *Massilia* , tantas hujus contentions pœnas luit , peste in ea annis hujus sæculi 20. 21. 22. grassante . Neque inceptæ modo ; verum & progressæ , immo & adultæ pestis , nomen in disceptationem vocabatur , haud a Medicis , Chirurgisque , & Regionis , & Urbis , duntaxat , verum etiam a summis Medicinæ Antistitibus : & tandem , incredibile dictu ! collatis utriusque disceptantium partis relationibus , Archiatrorum regionum Comes *Chicôneau* ab omni peste absolvit infamia morbum . Uade & stupendo atque calamitoso hoc errore sexaginta millia civium *Massilitanorum* ignoti morbi victima fuerunt . Locupletissimam monumentorum huc spectantium Collectionem reliquit nobis *Cl. Jos. Fornès Barcinonensis* in Medicina Professor primarius , qui Regis Hispaniarum jussu *Massiliam* , Provinciamque , expiscandi causa petens , ibidemque diutius moratus , testis oculatus miseriarum fuit , commercium epistolicum cum variis Provinciæ Medicis habuit , hocque utili suo , atque voluminoso , de Peste libro , adjecit .

Notabilis Historia , quam in *Obs. Med. Cap. 54. Dodonæus* refert „ *Philippus Stroza* , & nobilitate generis , & opum affluentia insignis , lenta quadam febricula laborabat , & ex Medicis , qui ægrum viderant , alii quotidianam , sed levem , alii ob algorem , contractam febrem putabant : nec defuit qui crederet a capite destillasse materiem , quæ putrescentem febriculam gigneret . At nos , cum eam ipsam diligentiore examine perpendederemus , pestilentem judicavimus . Quam sententiam deridentes Medici , cum levatam jam febrem examinarent , latebat enim anguis in herba , familiari tantum Medico curam dimittunt . At æger , qui jam convalescere videbatur ,

„ ad-

„ adventante die VII. in Nervorum subito resolutione
 „ nem & febrem incidit ardentem: qua exhausta
 „ voce & corporis viribus convulsis, paucis etiam die-
 „ bus mors subsequuta est.

Dodonæum, cum hæc scriberet, & senem, & Pestis, ejus temporibus frequentioris, probe conscium rati, pestem, quam plures Medicorum negassent, occupasse hominem, affirmantem intelligimus; e contrario affirmatam pestem, qua nihil dissimilius adesset, enarratio sequens dabit.

Joannes Galego de la Serna, Archiater duorum Hispaniarum Regum, nec non *Anne Austriacæ*, Lud. XIII. Galliarum Regis conjugis, in sua *Methodo Medendi* anno 1639. edita, meminit malignæ Febris, quæ Reginam teneret, neglectæ, nihilque exstimatæ a Medicis suis; adeo autem postmodum invalescentis, ut de extrema Unctione adhibenda Medici deliberarent Die XI. facta hypostatica urina, febre remissa, delirioque, Crisis ait apparuisse; superstitæ tamen tanta functionis animalis debilitare, ut plurimum Medicorum consilium convocaret Rex, in eoque consideret cum Regni Primoribus. De morbi natura multam Medicorum discordiam intercessisse, nec minorem de Cura: „ sed, inquit Autor, inter omnes, mirabile dictu! doctissimus antiquissimusque Magister, & qui in tota *Gallia* primum obtinebat nomen, Doctor *Duretus*, postquam Pestilentem esse morbum per omnia signa, & potissimum ex urinæ pravitate probavit, sine hæsitatione, & facie ad faciem, præsentaneam Reginæ mortem Regi ipsi denunciavit, ac tandem, tanquam ad corpus semimortuum, sanguinis missionem præscripsit: idemque aliqui ex iis, qui sequebantur, dixerunt. (1)

Con-

(1) Non fuit hic ille æterni nomini Lodovicus Duretus qui

Consideratis porro omnibus, Regi placuit auscultare Archiatri de la Serna consilio, collapsas Reginae vires alimentis restaurandas esse censentis; latusque hinc reditam vidit Reginae salutem.

qui nobis suos immortales in Coacas, aliaque Hippocratis, commentarios dedit, sed ejus, magni quoque nominis, filius. Obiit enim Lodovicus anno 1586. adeoque 33. annis ante hanc Historiam. Galego de la Serna gratiam Regis Reginaeque magnam ob hanc curam inivit, bis mille aureis nummis ab utroque donatus, nec non annua similium aureorum nummorum octingentorum gratificatione; qua adhuc fruebatur 17. postmodum anno, quo librum edidit. Regina autem post hanc curam annis 47. vixit.





SECTIONIS II.

CAPUT TERTIUM.

De Pestis Definitione.

§. I. *Quæritur num, quemadmodum plurimorum morborum, ita & Pestis, definitio non detur, qua a quocumque alio morbo internoscatur? Ad id ut respondeatur, recensentur primo omnes seu Definitiones, seu Descriptiones, quæ ab antiquissimis Medicinæ temporibus, in nostros dies usque, data fuerunt. Responsio ad questionem in sequens caput differtur.*

§. I. **E**X iis quæ de difficultate Pestem ab omnibus aliis morbis internoscendi, mox vidimus, quæstio non minus inevitabilis, quam gravis, exsurgit, an scilicet Pestis non admitat, quemadmodum alii morbi, definitionem, quæ a ceteris conlimilibus morbis eandem discriminet? Ne præmatura videatur, aut temeraria responsio, erit omnium, quæ huc spectent, rerum, non minus tædiosa, quam laboriosa, præmittenda recensio, ab *Hippocrate* inchoanda.

Hic enim *Epid. III. Sect. III.* Pestilentem morbum graphice descripsit, symptomatibus & numero admodum variis, & nec omnibus cunctos, neque uno omnes modo, neque uno universos tempore, neque eodem singulos aut numero, aut vehementia, aut duratione, affligentibus, conjunctum. Contentus *Hippocrates* operosa hujus sui temporis febris pestiferæ descriptione, veram, & proprie dictam, pestis definitionem non dedit. De Peste eum egisse in *Historia Critonis* in *Tha-*

se & Libr. II. de Morbis ad hæc Verba: „ Alia febris. Foris ad contactum febris debilis est, „ &c. censet cum aliis *Mindererus*. Et in vita *Hippocratis* meminit *Soranus* Pestis, in *Illyrios*, *Pæonas*, *Barbaramque* regionem, ingruentis, quam ille sua Discipulorumque opera, ab *Attica* regione propulsasset. Verum de ejusdem definitione ibidem ne hilum quidem.

Aristoteles Tom. II. pag. 521. Sect. I. De iis, quæ ab Medicinam pertinent. Quæst. 7. sic pestem definit: Μόνη τῶν νόσων κοινὴ ἐστὶν ἅπασιν, „ Morbus, qui „ ex morbis cunctis ille solus est, qui est singulis hominibus communis.

Apud *Arataum Cappadecem* frustra hic aliquid quaerimus certioris. Præter defunctoriam quandam Pestis apud *Atticos* tempore *Peloponiaci* belli mentionem, nihil de illa perhibuit.

Galenus Comm. in Libr. III. Epid. Hipp. Sect. III. ad Text. XX. pag. 263. Edit. Charter. „ Quicumque „ morbus uno in loco multos simul invaserit, epidemicus ille; sin vero & multos perimat, Pestis fit. „ Et in Text. XXI. *Hippocratis*, qui dicit: ex præscriptorum generum uno quoque (morbo) multi laborabant, ac moriebantur: „ *Galenus* cum dicit, inquit, „ & multi moriebantur, Pestilentes esse morbos qui „ vulgarentur, (qui epidemici, seu populares essent) „ demonstrat. Quid quandoquidem diversi fuerint, de singulis separatim acturum se infra promittit. In Text. LVII. qui sic habet: „ Ut autem in summa dicam, „ omnes tum qui morbis longis, tum qui acutis agrotabant, ex his maxime, qui per alvum secedebant, „ interierunt. Omnes enim alvus sustulit: „ *Galenus*: „ Et Pestis quoque illa longissima, quæ nostra ætate „ contingebat, ex iis, quæ per alvum evacuantur, „ omnes prope peremit: quod quidem esse symptoma „ perpetuum febris ejus videtur, quam peculiariter

„ pestilentem vocant; cum homines καὶ χωρὶς λοιμῶν,
 „ etiam citra pestem, corripit. „ In Text. LVIII. „
 „ Cibos equidem averfabantur &c. Galenus: „ Etiam
 „ hoc symptoma omnes cepit, qui in Peste diutur-
 „ na, quæ modo viguit, laborabant: quare & multos
 „ mori contigit. Fortiores ergo, qui vim sibi inferen-
 „ tes cibum oblatum assumerunt, omnes fere evase-
 „ runt superstites. Plurimi vero mori, quam comede-
 „ re quidquam, prius duxerunt.

Libro I. de different. febr. Cap. VI. & VII. de Pestis causis, deque eadem præcavenda differuit, morbum vero non definivit, ac si notum cunctis supponeret.

Libro IX. de simpl. Med. virt. Cap. I. Porro in
 „ magna hac Peste, cujus eadem facies fuit, atque
 „ ejus, quæ *Thucydidis* memoria grassabatur, quot-
 „ quot hoc Medicamentum (Boli armenicæ cum vino
 „ albo sincero, vel cum aqua diluto,) biberunt, ce-
 „ leriter curati sunt . . . Non tamen calore vehemen-
 „ tes sunt Febres pestilenciales.

Libro de Meth. med. V. Cap. XII. de peste loquitur, tunc grassante; non definiens illam, narrat modo quibus in peste totum corpus ulceribus scateret, hos servari omnes, idque juvenis exemplo confirmat. Ibidem Lib. XIV. Cap. X. sine definitione pestis laudat venæ sectionem, ad animi deliquium usque, in Anthrace. Libro de comp. Med. secundum locos III. cap. II. Ad Parotides venæ sectionem laudat; incertum tamen an ibi de parotide pestilentiali scribat, ut quidem vult Riverius.

Celius Aurelianus nihil nobis de Peste tradidit; verbulo tantummodo innuens ab *Asclepiade* emetica laudari in Pestilentibus. *Lib. I. Cap. XIV.*

Paulus Ægineta Lib. II. Cap. XXXVI. enarrat nobis fere omnia, quæ unquam quacunque in Peste observata fuerunt, adjungitque hæc, eorumque singula, posse in Peste observari.

De Pestis Defin. Quæstio. 115

Autores, Arabes, simias Galeni, non memorabor, ne abutar lectorum patientia; Galeni simias, inquam, in multis; Rhasin, forte, exceperis; quantum saltem ex eorundem scriptis colligere nobis hucusque licuerit: quæ scripta genuinane sint, ipsorumque aut nomina iuste præ sese ferant, aut mentem exponant veram, rationes utique graves nos jubent dubitare, (1) In Catalogo Bibliothecæ Arabico-Hispanæ Escorialensis, cujus Tomum I. in fol. anno 1760. Madriti editum, dono Ill. Baronis Henrici de Senckenberg præstantissimi, dum viveret, Consilarii Conf. Imp. Aul. possideo, Rev. &

H. 2. eru-

(1) Jure proinde expectamus a laudatissima Regis Hispan. Caroli III. tanti Litterarum Scientiarumque Mecenatis, munificentia, atque a notissima Rev. Casiri, ceterorumque Escorialiensium Eruditorum, cura & labore, uti demum & Rasis, & reliquorum Arabum Medicorum principum, aut ipsa opera Arabica typis fidelibus prodeant, quas apti ad id Viri rite postmodum interpretentur, aut eorundem non ultra Persiones, sed justissimæ Versiones, lucem videant, Arsque illorum ditetur accessu.

Dudum est, quod per varias vias, modosque, ab iisdem eruditissimis Viris petiverim ut, vel Codicem Arabicum nobis ad tempus commodo darent, vel eundem, sive arabice solum, sive per ipsos latine versum, Typo evulgarent; Codicem, inquam, illum, quo ditaremur Galeni in Libr. II. Epidem. Hipp. Commentariis II. III. IV. & V. quorum primum tantum possidemus; nec non ejusdem Galeni commentariis in VI. Epid. Libr. VII. & VIII. quorum sex tantummodo novimus. Animus fuerat horum Commentariorum ignotorum D. W. Trillero, viro longe eruditissimo, indefatigabili, in Arte no-

stre

eruditiss. Vir *Michaël Casirus*, Syro Maronita, Presbyter, S. Theologiæ Doctor, Regis a Bibliotheca, linguarumque orientalium interpretatione, passim de latinis Arabum Versionibus conquerens, in vita, scriptisque *Rasis* „ Ceterum, inquit latinæ quæ vulgo circumferuntur, *Rasis* operum Interpretationes, adeo barbaræ ac insulsæ sunt, ut nec *Rasis* dictionem, nec stylum, sapiant, nec sententiam quidem exprimere aliquando videantur. Illas enim ego, quoties cum arabibus Archetypis conferre libuit, non ex *Rasi*, sed ex alio prorsus Autore, factas omnino censui.

Idem

stra præstantissimo, maximo, copiam facere, uti frui iisdem in pulcherrima sua Hippocratis universi Editione posset. Votum meum & iteratum, & ab Excell. Senckenbergio, magnoque alio Litterarum Patrono, Hispani Regis in Aula quadam Oratore, obsecundatum, inane hucusque fuit.

Idemque optandum est de laudatissimis Beitharis operibus, Galeni ac Dioscoridis Historiam simplicium tam egregie illustrantis, ac bis mille Plantarum accessione adornantis. Nec urgere rem efficacius possum, quam ipsiusmet Reverendi Catalogi hujus Fabri voto, qui ipse sic loquitur: „ Præter amplam „ eruditionem, floridum juxta ac limatum dicendi „ genus in eodem mireris. Opere pretium igitur „ quam maximum foret, eximium hocce opus in latinum sermonem transferri ab aliquo, Arabicæ „ linguae peritissimo; ope tamen aliorum, qui in „ Arte Medica & Botanica essent apprime callidi, atque exercitati: quantum enim rei herbarie „ cultoribus, maxime hispanis, ex illa translatione „ lumen! Quippe Beithar multa simplicium nomina vario regionum nationumque sermone, præcipue

„ Idem de antiquis latinis translationibus ex Arabum
 „ Philosophorum ac Medicorum scriptis confectis, eo-
 „ dem jure pronunciandum: quas *Perversiones* potius
 „ quam *Versiones* merito dixeris. Atque hoc loco tem-
 „ perare mihi non possum, quin acerbius invehar in
 „ illos, qui ex hujusmodi versionum colluvie, non adi-
 „ tis Arabum fontibus, de ipsorum Autorum pretio
 „ ferre sententiam audent. Sed qui nec suo, nec alie-
 „ no jecore sapiunt, eos despici, quam refutare satius:
 „ quippe qui de re sibi minime perspecta, & temere
 „ sentiant, & inepte scriptitent. Vide notam a pag.
 115. ad 117.

De Arabibus Medicis id notatum velim, quod nul-
 li eorum, quos centenario numerosiores hic catalogus
 recenser, de Peste peculiariter scripsisse legantur; quam-
 vis & de morbis omnibus scripserint plerique, & Pe-
 stem in *Africa* & *Asia*, ubi adeo frequens, maligna-
 que est, viderint multoties: an forsan, quod plerique
Mahommedani fuerint, adeoque de eadem curanda aut
 frustra agi, aut nefas esse opinati?

H 3

Ex

„ præ *Hispano*, obiter exprimis, ac recenset. Si
 „ *Tournefortio* fides, id *Beitharis* volumen latine
 „ transtulit *Gallandus*. At in *Catalogo* Reg. Bibl.
 „ *Paris.* ubi varia memorantur ejusdem *Gallandi*
 „ ex *Arabico* versiones, de latina *Beitharis* versio-
 „ ne ne verbum quidem. Certe hæc typis, quod
 „ sciam, necdum tradita.

Tandem pag. 280. enumerat *Regias*, *Publicas*, *Erudi-*
torumque Bibliothecas, quæ exemplaria *Arabica* va-
 riorum *Beitharis* operum possident; quarum & *Pa-*
risiensem Regiam, & *Cæsaream Vindobonensem*
 præprimis memorat: *Vindobonensis Codex* adest, ut
 ille *Autor* vult, sed non est, nisi *Beitharis* operum
Compendium.

Ex quo a lugubri Epocha *Byzantii* a *Thracibus* capti, deletique Imperii *Græcorum*, ex *Australi Europa* in septentrioni propiorem *Græci* cum *Viri eruditi*, tum *Libri præstantes*, convolarent; & recens inventa arte *Typographica*, curante inter cæteros præprimis *Aldo Pio Manucio*, excellentissimo *Venetorum* *Typographo*, cujus nitidissimam totius *Hippocratis* græcam editionem possideo, Antiquorum *Græcorum* *Medicorum* *Codices* typo excuderentur; mox sæculis *XV.* finis, totumque *XVI.* sæculum, dederunt nobis *Scriptores Medicos* innumeros, *græcarum Litterarum cultores* eximios, & studio *Hippocratico* præclaros, eruditione admirandos, facundia insignes, multiplici *Artis saluberrimæ* usu exercitatissimos, *Philosophos ἀστυερμάτιναις*, qui excusso *Arabum* iugo, sinceram, nudamque rerum naturam a *Græcis* *Medicinæ* *Patribus* edocti, nudam eandem posteritati tradiderunt. *Spectatorum* horum *Virorum* & tantus est, & selectus adeo numerus, ut quem priorem excitem, quem posteriore laudem, hæream anceps. Horum itaque nonnullos consulere de *Peste* necesse est.

Jacobus Houillier, dictus *Hollerius*, origine *Stempanus*, inter viros eruditos sui ævi, teste *Thuano*, spectatissimus, gravis vir, unaque facetus, dedit nobis *Tom. II. oper. omn.* *Tractatum de Peste*, quem sic orditur: „ *Epidemia* morbus est aliquo anni tempore, certisque locis invalescens; qui si multos rapit „ *λοιμῶδης*, id est *Pestilens* appellatur, & *λοιμός* „ *Pestis* est: qui morbus populariter grassans, multos „ interimit... nulla interdum febris sensibilis; *Dia-* „ *stole* minor quam *Systole*: signa peculiarium humorum „ corporis sequitur color. *Diaria* febris *pestilentialis* „ intra triginta horas interficit, sentiuntque vires paulatim exhalare: sæpeque neque *Bubo*, neque *Car-* „ *bunculus* apparet: sed totum venenum in corde hæ-

„ ret.

„ ret. Alia febris in quartum diem protrahitur. Omnia
 „ bona signa suspecta sunt.

Joannes Goræus, Medicus celeberrimus *Parisiensis*, pluribus præclaris operibus, maxime Libris XXIV. de *defin. med.* posteritati gratissimus, qui medio XVI. sæculo floruit, pestem definit exacte, ut brevi eam definiisse *B. Castellum* in *Lexico* videbimus, pestem quoque cum eo eandem cum febre pestilente ratus.

Ludovicus Duretus, Gallicus Archiater insignis, commentator incomparabilis cum *Hippocratis*, tum laudati mox *Hollerii*, in Caput 42. *Hollerii* praxeos Lib. II. adnot. in *Enarrationem* in *Hollerium* suam: Febres colliquantur sunt *pestilenciales*, non *pestiferae*, ut quæ fieri possint a *Diætæ* vitio. *Pestifera* febris est, quæ contagione sævit in eos, qui præsto sunt tali febre afflictis: *Pestilens*, quæ ei tantum, qui laborat infesta est. *Galenus* Lib. III. *Epid.* *Alvi profluvium omnes de medio sustulit*. Sunt autem colliquations quæ sunt *χωρίσιν* symptomata, τῇ πυρετῇ, καὶ ταλαμβάνοντος τῆς αὐτῶντες, καὶ ἀνευ λοιμῶν. Symptomata sunt inseparabilia febris, quæ homines invadit etiam sine *Peste*. Omnis *Pestis* morbus est epidemicus, qui a tempestate *pestifera* in hominum vitam invadit, & multos de medio tollit, & est contagiosus. In *Peste*, & *Veneni* & *Contagionis* summa sunt omnia: Morbi simpliciter venenati, non sunt contagiosi: itaque in febre, quæ nascitur a tempestate *pestifera*, *veneni*, & *contagionis*, summa sunt omnia: sed existit tamen quædam, quæ non est & *pestifera*. Illius qua est colliquans calamitas, dignoscitur in excrementis colliquantibus, & nigris, Hæc quidem est *pestilens* non *pestifera*. Sed febris a tempestate orta, cujusmodi descripta est *Sect. 3. Lib. 3. Epid.* contagionis & veneni summa habet omnia: Symptomata commemorantur illius tempe-

„ statis pestiferæ quotquot apparuerunt, Erysipelata,
 „ Ora aphthosa, Causi, Phrenitides, Alvi & Urina
 „ perturbatæ, Hydropes, Phthises.

„ Sed duo observanda *Galenus* proponit Theorema-
 „ ta: Unum, quod meminisse quis debet, Putredin m
 „ a tempestate pestifera nullam esse Pepasmi capacem:
 „ aliud Theorema: quod Pestis non est nomen defi-
 „ nitum alicujus morbi, sed qui sub morborum di-
 „ sperforum (forte diversorum) nomine multos homi-
 „ nes invadit, sive sit Leienteria, sive Dysenteria, si-
 „ ve Carbunculus, sive Erysipelas: qui sunt morbi
 „ sporadici. Sed tamen multum interest inter carbun-
 „ culum *pestilentem* & *pestiferum*. Omnis Carbuncu-
 „ lus fit a putredine sanguinis: sed hoc interest, quia
 „ *pestilens* neque veneno, neque contagione calamito-
 „ sus est: at *pestifer* inexplicabili quadam ratione est
 „ pestifer, tum quod pestilentes sunt sporadici, qui
 „ proveniunt pro cujus vis particulari natura. „ Re-
 „ deunt huc, quæ in Coacas hinc inde adnotavit.

Ludovicus Mercado, sive *Mercatus*, Philippi II. & III.
 Hispaniæ Regum Archiater, *Tomo II. Libr. VII. Cap. I.*
 gnarus ejus, quæ Pestis principium determinet, diffi-
 cultatis, spem nobis dederat cognoscendi inchoantem:
 verum tot requirit tantaque symptomata, ut iis præ-
 sentibus nemo ultra, etiam non Medicus, sit, qui non
 agnoscat esse pestem. Definit eam vario modo pag. 443. „
 „ Morbus is censi debet Pestis, qui cum vulgaris
 „ sit, perniciosus etiam est, atque letalis. Itaque erit
 „ Pestis Epidemia perniciosa, aut si mavis venenosus
 „ quidam vapor in aere conceptus, qui vitali spiritui
 „ omnino adversatur, aut aëreum venenum ex pu-
 „ trium vaporum admistione, vel infelici Planetarum
 „ concursu, in perniciosissimam animantium generis
 „ conditionem dira conversione mutatum, si Astrolo-
 „ gorum sententiam sequi voluerimus. Sed potest cla-
 „ rius adhuc definiri, nimirum quod nihil aliud Pe-
 stis

„ Quid sit, quam morbus communis, vulgaris, pesti-
 „ mus, atque perniciosissimus, qui perinde ac totum
 „ morborum vulgarium genus, ex Cœli statu profici-
 „ scitur. Clarius tamen & verius, atque specialius,
 „ Febris pestilens definitur, cum dicimus febrem pesti-
 „ lentem revera esse morbum, sordidæ & profundæ
 „ putrefactionis, includentem seminaria acutissimæ con-
 „ tagionis per se, ex quo letalis & contagiosa efficitur.

Hieronymus Capivaccius, Patavinæ Scholæ lumen &
 ornamentum, *Med. Pract. Libr. VI. Cap. 29. 30. 31.*
pag. 1034. & seq. Edit. Francos. 1594. „ Per febrem
 „ pestilentem intelligimus Febrem, quæ cito potest in-
 „ terficere; & intelligimus febrem contagiosam, sive
 „ fiat ex aere, sive ex aliis causis quomodocumque.
 „ Sic ergo accepta nihil aliud est, quam Febris pro-
 „ ducta a veneno calido putrefactivo. Cum dicimus
 „ quod sit febris, febrem pestilentem a peste distingui-
 „ mus, quæ interdum esse potest sine febre, dum vi-
 „ tium partes exteriores afficit, nec cordi communica-
 „ tur, ut colligitur ex *Galeno Aph. 25. & 57. sect. 3.*
 „ *Lib. 3. Epid. & Libr. 9. simpl. Cap. de Bolo arm.*
 „ Dicimus producta a veneno, ad differentiam reliqua-
 „ rum febrium, quæ non sunt pestilentes. Addimus a
 „ veneno calido, ad discrimen morbi venefici frigidi.
 „ Tandem adjungimus putrefactivo, ad differentiam
 „ morbi venefici calidi, non putrefactivi, ut continge-
 „ re solet vi Arsenici.

Desiderius Jacotius, Vandoperanus, Coacarum *Hip-
 pocratis* excellentissimus Libris XIII. Commentator, in
Comm. I. Libr. III. Sect. II. „ Pestem, dicimus, in-
 „ quit, non morbum aliquem particularem, sed omnem
 „ affectum, ex continentis deleteria qualitate profectum.

Julius Palmarius Constantinus, Libros de Morbis
 contagiosis septem conscripsit, editos *Lutetiæ* anno 1578.
 Dat hanc Pestis definitionem. Λοιμος seu Λοιμώδης

πυρε.

πυρετός græcis Pestilentia, seu Pestis latinis, Febris
 „ est peracuta, contagiosa, venenata, populariter graf-
 „ fans, multos perimens, Bubone & Carbunculo, aut
 „ Exanthematis comitata.

Jodocus Lommius natu Buranus, Medicus Bruxella-
 nus, vir totus quantus Hippocraticus, Obs. Med. Li-
 bros III. latinitate vere Celsica confecit, quorum in
 „ primo pag. 31. Edit. Amstel. Proximum est Febris
 „ pestilentialis observationes proponere. Ubi autem ea
 „ nondum quidem est, verum ut ne incumbat, metuitur,
 „ talia contingunt. Ver atque æstas calida, humidaque
 „ autros sine ventis exhibent, cœlum frequenter eo-
 „ dem etiam die mutatur, fitque modo calidum id,
 „ modo frigidum, modo nubilum, modo serenum: sæ-
 „ pius tamen nubilum, pluvioque proximum, at nihil
 „ pluens tamen. Accedit multa insectorum animalium
 „ copia, multusque quadrupedum interitus. Insueti
 „ etiam ignes per noctem in aere cernuntur, ortique
 „ subinde Cometæ calamitosam hanc portendunt luem.
 „ Ubi raptus aliquis jam morbo est hæc incidunt:
 „ Bubones sine causâ manifesta, vel pone aures, vel
 „ sub alis, vel frequentius in inguinibus; aut certe
 „ Carbunculi variis Corporis locis, purpureave Exan-
 „ themata, subito exoriantur. Inter hæc febris inva-
 „ dit continua, atque acuta, sub qua extimum corpus
 „ vix incalescit, & sensu interdum frigoris afficitur,
 „ interiora autem gravi incendio uruntur, ipse homo
 „ cum animo moesto, ac pleno malæ spei lassus segnif-
 „ que fit, & ineluctabili dormiendi urgetur necessita-
 „ te. Ejus ferox vultus, & qualis temulentorum esse
 „ solet, incertus, atque turbidus est, spiritus male
 „ olet, ac difficulter trahitur, dejicitur cibi cupiditas,
 „ os amarescit, ingens oritur sitis: fitque frequens &
 „ nausea, & vomitus, quo optimi etiam alimenti spe-
 „ ratus fructus corrumpitur: Pulsus exiguus, langui-
 „ dus, celer, frequens, & inæqualis est. Alvus fœ-

„ tida, atque grave olens. Urina alias sicut jumento-
„ rum turbida, cruda, crassa, foetidaque est, alias qua-
„ lis in homine sano, sine vitii nota meijitur. Siquidem
„ ubi simplex hæc febris e sublimi mundo mortalibus
„ immiſſa est, neque putridæ implicatur, fere obscu-
„ ris innititur signis, sic ut neque vehemens vel incen-
„ dium, vel sitis, vel inappetentia efficiat, sed & uri-
„ na incocta, omnibus absoluta numeris sit. Etenim
„ homo ad speciem non admodum æger, crebra animi
„ defectione, vomituque labefactatur, ac tandem subita
„ raptus syncope, inopinanter extinguitur.

„ Porro omnis pestilens febris, ut per se semper to-
„ ta pernicioſa est, sic tum demum & celerem, &
„ certam mortem affert, cum oppressio intus corde,
„ nihil foris vel bubonis, vel carbunculi, summo corpo-
„ re efflorescit: aut si quid efflorescit, inde tamen ne-
„ que morbus, neque æger levatur. Quin etiam neque
„ mortiferum est seimel natum bubonem, vel carbun-
„ culum, rursus intro delatum, repente delituisse,
„ itemque foetente spiritu, ac frigentibus extremis,
„ creberrimum vomitum atque ipsam syncopen in-
„ cidisse.

„ Illud quoque novisse non inutile est, satis incerta
„ sub hoc morbo salutis esse præſagia; adeo ut pro-
„ pter bonas notas plenum spei, atque promissi medi-
„ cum, mors sæpe inopinata dejiciat.

De industria Lomnii textum & prolixum, & totum,
transuli; quod stylo simplici, brevi, elegantique, om-
nia ea, & singula referat, quæ eorum plerique, quos
aut laudavi huc usque, aut postmodum laudaturus
sum, Autores, longe cum protractiore, tum confusio-
re sermone, tradiderunt. Porro hæc, quæ in prodro-
mis pestis signis determinandis pene cuncti afferunt, sa-
piunt partim observationes & veridicas, & perpetuas
tempeſtatum anni, & cœli, & telluris, alimentorum-
que naturæ; quas ab omnibus retro sæculis post Hip-
po-

pocratem quicumque de Peste commentati sunt, adnotarunt: partim vero redolent sæculi genium, in spectra, in terrifica, in Armentorum pestes, in Astrologiæ judicariæ terrores, studiosum ita intentumque, ut non Medicorum duntaxat, verum etiam & Historiographorum insignium, & sapientium Theologorum, præclara ceterum opera illis scateant. Laudatus jam *H. Mercurialis*, in *Lect. de Peste*, Veram Pestem credit extare nunquam, nisi & plurimos inficiat, & infectorum potiore demetat partem.

Guillelmus Bailliou, dictus *Ballonius*, vir non minus Religione, atque morum integritate, quam eruditione, facundia, experientiaque insignis; vir, inquam, quem celeb. *Renatus Moreau* in ejus vita laudavit, veluti priscam *Hippocratis* & *Galen*i doctrinam adversus Novatorum calumnias tuentem, non multa quidem de peste tradidit, attamen *Epid. & Ephemerid. Libr. II.* ad constit. anni 1575. ideam Pestis haud contemnendam suggestit nobis, occasione quæstionis *cur in pestilenti morbo tam sædi sint vomitus, tam graveolentes dejectiones?* Silicet & Pestem, & Luem veneream, corrumpere, inque putredinem corpora vertere, ea tamen ingenti discrimine, ut venereum malum id. longiore mora efficiat; pestiferum, exiguo temporis articulo.

Ludovicus Septalius Mediolanensis, unus de octo Medicis, quibus in Peste, quæ annis 1575. & 1576. Mediolanum invaserat, rerum demandata cura fuit, *Libro V. de Febris* Pestem distinxit in eam, quæ ab ipso inquinato aere, pestifero universæ Regioni reddito, originem habet, & in illam, quæ in saluberrima Cœli Aerisque conditione a mera contagione, quodcum non infectis infecti communicent, nasci solet. Huic fundamento præcipua superstruxit, quæ postmodum in cura Pestis ex hoc Autore excitabuntur.

Joannes Fernelius, natus *Ambianus* Galliarum Archiater. *Libr. II. de abditis rerum causis Cap. XII.*

mul

multa de Pestis disputavit causis, quas a plerisque affertur Autoribus, in dubium, audito *Fernelio*, forsitan vocabis. Morbi autem Definitionem non dat, verum longam adeo descriptionem, ut videatur nihil omisisse eorum, quæ cæteri Medicinæ Scriptores, unquam in Peste observasse se testantur, utque signis tot conspicuis, de morbi præsentia nemo, ne plebejus quidem, ullatenus dubitet.

Petrus Forestus, Alcmarianus, practicus majore vitæ parte *Delphensis*, *Libro VI. Tom. I. ab Obs. X. ad XLII.* Eodem prorsus modo, iisdemque pene verbis, Pestem cum futuram descripsit, tum præsentem, quibus *Lomnius*, quocum eodem tempore floruit. Hoc autem aut plus, aut distinctius, eo notavit *Forestus*, quod Pestilens febris & comitata detur cum Bubonibus, Anthracibus, Exanthematibus, & incomitata, carens externis hisce signis, & febris malignæ signa præ se ferens: comitatæ porro pestilentis febris signa clara evidentiæque esse animadvertit; „ at febris pestilens „ incomitata, inquit, neque ita sui veneni characterem, „ aut malignitatis ostendens, *difficillime cognoscitur*, „ non solum a *Vulgaribus*, verum hæc ipsa peritos alii- „ quando *Medicos* latet.

Felix Platerus, Archiater, ac Professor *Basiliensis*, in saluberrima tempestate, citra ulla, quæ pestis prodroma habentur, signa observata Mortalibus, coortas vidit Pestilentias; signis vero ipsis confertim existentibus, aliquando nullam; quæ cum adnotasset *Fernelius* quoque, hæc eadem cum illo, veluti prodroma Pestis, ejusque remotiores causas, exhibilavit. Cæteram definitionem non dedit Pestis, sed more aliorum divisionem in Pestem sine eruptione externa, & cum illa; in Pestem febre sociatam, eave carentem. Venæ sectionis in Peste fuit hostis. Notabile quod hisce subjungit: Quæ omnia diligenti, inquit, & longa observatione perscrutatus, qui jam *sexies* pestilentia apud nos

„ nos regnanti, interfui, & ad singulorum finem ul-
 „ que perseveravi, pesteque correptus fidenter adititi,
 „ manumque adhibui, in medium, sicut hæc vidi &
 „ cognovi, proferre, Veritati potius quam ulli addi-
 „ ctus magistro, non dubitavi, „ Licet obierit ferme
 octuagenarius, proximque prope sexagenariam coluerit,
 frequentiam tamen Pestis sæculo XVI. demonstrat se-
 xtus ejusdem eo temporis spatio reditus.

Prosper Alpinus, oriū *Marosticensis*, in *Gymnasio Patavino* Prof. ordin. pestilentialem in *Ægypto*, quam hujus miserandi morbi Scatebram plures habent, longiore mora edoctus, sic de illa *Med. Ægypt. Edit. Venet. 1591. pag. 29.* Neminem nostrum arbitror, qui
 „ ignoret Pestem, sive Pestilentiam, esse corporum in-
 „ gentem, ac summam putredinem, perniciosissimi ve-
 „ neni qualitate præditam, quæ sævissimam stragem in
 „ loca ab ipsa infecta inducit.

Raimundus Mindererus, Reip. *Augustonæ* Physicus, videtur id omne diligenter legisse, quod ab ipsa Medicinæ origine, in ejus usque tempora, scilicet in sæculi XVII. principium, de Peste traditum est. Definitiones cum Veterum tum Recentiorum, imperfectas esse censens, unius vero *Julii Palmarii* ceteri existimans perfectiorem, suam dedit: „

„ Pestis (inquiendo) est lues venenata, summeque
 „ letalis, & contagiosa, cor primario afficiens, Fe-
 „ bre, Bubone, Anthrace, aut Exanthematis, ut
 „ plurimum comitata. „ In definitione non esse adden-
 dum quod plurimos afficiat occidatque opinatur, cum
 ignis v. g. natura æque intelligatur, multane an pau-
 ca eo conflagent.

Lazarus Riverius Professor *Monspeliensis* in suo egre-
 gio opere *Praxeos Med. Libr. XVII.* multa de peste ha-
 bet, inter quæ egregia non pauca. Febris cum mali-
 gnæ, tum pestilentis, eandem definitionem habet, ita
 ut utraque pravis symptomatibus stipata, viriumque
 colla-

collapsu, humorum corruptionem subeat: intertingui autem alteram ab altera sic, ut I. in maligna periculum sit minus eo, quod in pestilenti: II. ut humorum utriusque corruptioni putredo superveniens, eam reddat pestilentem; non superveniente putredine, etiam maligna in pestilentem non mutetur. III. ut potior ægrorum pars in febre maligna vitam conservet; in pestilenti amittat.

Daniel Sennertus Wratislaviensis, Professor *Wittenbergensis*, Germaniæ *Galenus* quondam dictus, *Op. omn. Tom. V. Libr. IV. De Peste, Pestilentibusque, ac Malignis febribus*, Tria hæc distinguens, quia statuit de pestis natura non esse, ut febrim sociam habeat; sic proprie Pestem, seu Pestilentiam, definit: „ Morbus „ cordis venenosus, a materie venenata, cordique tota substantia peculiariter adversa, contagiosaque, generatus, & proinde ipse contagiosus, omnesque cordis actiones subito & ἀφρόος lædens, maxime acutus, letalis, omnisque generis perniciofa symptomata inducens. Ita *Cap. I.* At *Cap. VII.* Febrem malignam appellat eam, quæ dictis malignitatis indicibus conjuncta, neque multos perimat, neque contagione afficiat quemquam; Febrem pestilentem illam esse retur, a qua & plures moriantur, & multi convalescant, & non admodum gravis contagii sit; tandem „ si plurimi, qui „ ægrotare incipiunt, moriantur, ac obvii quique „ inficiantur, imo contagium in loca etiam remota „ diffeminetur, Pestis est.

Joannes Castellus, Augustanus Medicus, circa idem tempus edidit de Peste tractatum, in quo primum statuens non omnem Pestem aëris vitio nasci, idque exemplo pestis *Augustanæ* anni proxime elapsi 1607. suam denique definitionem sic scribit: „ Pestis est Epidemia, ex prava halitus qualitate orta, diversimode „ afficiens, & plurimos perimere apta.

Paulus Barbette, Medicus *Amstelodamus* celeberrimus, pluribus operibus clarus, conscripsit de Peste ex longa multaque experientia libellum, editum *Lugdun. Batav.* 1672. „ Pestis, ait, Morbus est incomprehensibilis, cujus causa vapor videtur spirituosus, atque
 „ contagiosus, sanguinis consistentiam subito solvere
 „ valens, quo sic & viribus & vita cor privetur . . .
 „ quædam sine febre est. Non paucis adfui, quibus,
 „ alias sanis, bene & comedentibus, & dormientibus,
 „ Bubones in inguine erant, in collo, sub axillis, &
 „ post aures, malignitatem suam in curatione certius
 „ manifestantes, bubonibus illis, qui, aliis in Subj-
 „ ctis, febrem intensissimam comitem habebant - - -
 „ Quædam Pestis cum febre est; & rursus, Febris
 „ quædam Pestilens sine Peste.

Joannes Jacobus Waldschmidt, Archiater *Hassiacus*, *Marpurgensis* Academiae Prof. primarius, *Tom. II. pag. 92. in Scrutinio Pestis*: „ Pestis est Morbus epidemicus, contagiosus, consistens in summa sanguinis
 „ turbatione, per materiem aliquam subtilem, malignam, inducta, cum apparentia exanthematum, an-
 „ thracum, bubonum, aliorumque symptomatum horrendo apparatu.

Paulus Sorbait, Belga, Archiater *Viennensis*, dignusque meus in hac cathedra Antecessor, in *Op. theoreticopract.* 1672. *Viennæ editis pag. 534.* „ Signa quæ Pestem indicant præsentem, sunt, quod sit
 „ febris continua sine typo, vel humoralis, vel hectica, vel ephemera, spontanea lassitudo, & virium
 „ repentina prostratio, capitis dolor, vigiliæ, delirium,
 „ carus, syncope, pulsus obscuritas, cardialgia, vomitus, diarrhœa a summa humorum malignitate
 „ veniens, sitis, urinæ variæ, maculæ purpureæ, bubones & anthraces, glandulæ retro aures, sub axillis. Notandum hic non ex urina tantum, sed ex signorum plarium syndrome esse judicandum. Si nempe

pe plures eodem tempore moriantur, & prædicta accedunt signa, de Pestis præsentia conjecturandum est. *Balthasar Timæus a Guldenkleee*, Archiater Brandenburgicus, in *Libr. IV. Epist. & consil.* pag. 323. „ Pestis peracutus, periculotus, ac celer morbus, Cor pervalide afficiens, spiritus vitales turbans, totiusque corporis vires admodum debilitans subitoque projiciens - - - si autem Bubonum, Carbunculorumve nihil foras prodit, non est quod de Peste quis multum sollicitus sit.

Laurentius Bellini origine *Florentinus*, celeberrimus *Pise* Med. Professor, Libro præstantissimo de *Urin. Puls. V. S. Febr. &c.* pag. 264. & *seqq.* „ Febris pestilens dici solet, cum nempe febris maligna privata sit popularis, eorum, quos invadit, plerosque necans, & contagiosa. Differunt Pestis & Febris pestilens; neque enim semper pestis cum febre, sed dantur pestes sine febre, ut apud rei medicæ Scriptores. Cum autem pestis est cum febre, antecedunt, conjunguntur, & succedunt pesti eadem, ac febri, ut patet. Differet autem pestis a febre pestilente, ut genus a specie; cum enim pestis in genere sit morbus communis, seu popularis, plerosque necans, & contagiosus; quoties febris popularis est, plerosque necans, & contagiosa, pestilens dicitur --- Exanthemata, Bubones, Carbunculi, seorsim spectata, non erunt argumenta pestis, nisi cum aderunt antecedentia; & conjuncta reliqua cum Peste: neque enim omnis Carbunculus &c. est pestilens, sed solum qui conjungitur, ac pendet a causis pestis.

Christianus Joannes Langius (trium *Langiorum*, qui artem scriptis ornavunt, junior) in *Tomo II. Parte II. Cap. XIV. §. II.* Pestem a febre maligna nulla re discrepare censet, nisi syndrome symptomatum, quarum si cunctorum, & quidem in exquisitissimo gradu, Pars XIV. I cum

„ cum eruptionibus singularissimis, quas Bubones, Car-
 „ bunculos, & Vibices, appellant.

„ Signa diagnostica Pestis unice ex his eruptionibus
 „ desumi debent. Potest tamen Medicus, populari-
 „ ter grassante hoc malo, ex aliis malignitatis sym-
 „ tomatibus suspicionem haurire de imminente Peste:
 „ circumspeditione summa tamen id fiat necesse est, ne
 „ alio morbo, per symptomata cum Peste quodammo-
 „ do conveniente laborantes, ad Nosocomia statim,
 „ & ad consortio aliorum infectorum, releget.

Bartholomeus Castellus, Messanenensis, qui ante bina
 abhinc sæcula floruit, in suo *Lexico Medico græco-*
latino ex Hipp. Gal. Avicenna, præcipuisque Medicis,
 nobis hanc dedit Pestis definitionem: „ Pestilentia, fe-
 „ bris pestilens, morbus pestilens, λοιμός, est morbus
 „ non quidem patrius, sed Epidemicus, contagiosus,
 „ perniciosissimus, communis, e communi causa natus,
 „ adventitius, præsentissimi periculi, quippe qui ma-
 „ ligna & venenata putredine humores, vitales spiri-
 „ tus, & subsistentiam cordis labefactat. Hoc *Castelli*
Lexicon auxit *Emanuel Stupanus* Basileensis Medicus,
 anno 1628. Repurgavit, tertiaque parte auxit *Adria-*
nus Ravestein Roterodami 1644. iterumque 1657.
 Tandem *Jac. Pancratius Bruno* idem lexicon auctum
 pluries correctumque, postquam nova editione ornasset,
 denuo locupletiores ejus, emendatioresque editionem
Lipsiæ edidit anno 1713. Porro ex cunctis hisce hanc
 demum confecit Pestis definitionem: „ Λοιμός pestem,
 „ pestilentiam significat, morbum epidemicum, mali-
 „ gnissimum, & omnium perniciosissimum, cujus de-
 „ scriptionem generalem vix dare licet, propter sum-
 „ mam varietatem symptomatum, & latentem causa-
 „ rum indolem, & dispositionem. Quatenus a febre
 „ pestilente distinguitur, ita & memoriæ & doctrinæ
 „ gratia describi poterit. Peltis est intemperies univer-
 „ salis,

De Pestis Defin. Quæstio . 131

„ falis , toto genere maligna , contagiosissima , epidemi-
„ ca , cum omnis generis gravissimorum symptomatum
„ congerie , præsentissimoque vitæ discrimine ; prove-
„ niens a massæ sanguineæ , & liquoris animalis , per
„ contagiosum quoddam & deleterium miasma , subita
„ corruptione , congelatione , coagulatione , fixatione ,
„ putrefactione , & interdum totali mortificatione .

Thomas Willis , Professor Med. Oxoniensis , postea
celebratissimus Medicus Londinensis , qui circa medium
XVII. sæculum potissimum floruit ; opera enim ejus
omnia jam Geneva edebantur anno 1646. dedit hanc
nobis definitionem *Tomo I. Cap. XIII. de Febr.* „ Pe-
„ stis in hunc modum describi potest , quod sit mor-
„ bus epidemicus , contagiosus , humano generi summe
„ infestus , ex miasmate venenato , ab aëre primum
„ suscepto , dein per contagium propagato , ortum du-
„ cens : qui occulte & latenter homines aggressus , spi-
„ rituum extinctiones , cruoris coagulationes , ipsius &
„ partium solidarum syderationes & νεκρώσεις infert ,
„ cumque apparentia Exanthematum , Bubonum , aut
„ Anthracum , nec non aliorum symptomatum horren-
„ do apparatu , ægros in vitæ periculum adducit . „
Pestem dividit deinde in *universaliorem* , & *circumscri-*
ptiorum ; ratione locorum ; deinde in *simplicem* , quæ
fere citra febrim , citraque vehementia symptomata ,
hominem veluti ex insidiis necat , & in *compositam* ,
quæ cum symptomatum aliorum morborum iliade so-
ciata invadit ; tandem in maligniorem & benigniorem ; „
„ est enim pestis quibusdam locis , & temporibus , lon-
„ ge mitior , ut decumbentium plurimi evadant , quan-
„ doque summe exitialis est , ut plurimi correpti inte-
„ reant & ex centum agris vix unus convalescat .

Vopiscus Fortunatus Plempius , ex patricia apud Am-
stelodamenses familia , Professor Lovaniensis , bona par-
te medii sæculi elapsi florens , in *Med. Fund. Lib. VI.* „
„ Pestis est morbus contagiosus , inquit , ac malignus ,
I 2 natu-

„ natura sua epidemice in animalia grassans, & plu-
 „ rima morti dans: comitatus plerumque febre pesti-
 „ ma, bubone, vel carbunculo, papulifve, & aliis
 „ perniciosis symptomatibus.

Ysebrandus Diemerbroeck, Medicus *Neomagensis*, qui
 in Peste annorum 1635. & 1636. deinde in ea an-
 ni 1667. numerosos pestiferos invisit, eademque affe-
 ctus ipse fuit, Libro *de Peste* sic habet: „ Est pestis
 „ morbus communissimus, peracutissimus, perniciosissi-
 „ mus, & maxime contagiosus, & maligno & occul-
 „ to spiritibus, calorique nativo, tota substantia infe-
 „ stissimo inquinamento ortus; a quo omnium visce-
 „ rum, & imprimis cordis, functiones læduntur.

Thomas Sydenham Med. *Londinensis*, quem nomi-
 nasse, laudasse est, descripsit nobis Pestem *Londinensem*
 annorum 1665. & 1666, quam inchoantem fugit;
Nathanaële Hodges, de quo mox, cum alio Medico,
 fideliter assistente pestiferis; promotam vero, ac mi-
 tescentem vidit, tractavit, cum, deficientibus Medicis,
 urbem repetivisset. Pestem igitur sic descripsit: „ Pri-
 „ mus insultus rigorem ac horrorem, quemadmodum
 „ febrium intermittentium accessiones, fere perpetuum
 „ habet comitem. Mox vomitus enormes, dolor cir-
 „ ca cordis regionem, ac si torculari premerentur, fe-
 „ bris ardens, usitata symptomatum syndrome stipata,
 „ indefinenter agros divexans, donec aut mors ipsa,
 „ aut benigna Bubonis vel Parotidis eruptio, quæ ma-
 „ teriem morbificam foras ablegat, eos a luctuosissimo
 „ discrimine liberet. Rarius quidem accipit, ut ultra
 „ ullam febris præsentionem ingruat, ac homines de
 „ improvviso e medio tollat, maculis purpureis, præ-
 „ sentanei interitus nunciis, etiam dum in foro ver-
 „ santur, erumpentibus.

Nathanaël Hodges, ejusdem *Pestis Londinensis* testis
 oculatus, ac fidelis, in ejusdem descriptione, pag. 39.
 „ Pestis est morbus, ab Aura venenata, subtilissima,
 „ maxi-

„ maxime exitiosa, simul ac contagiosa, complures eo-
 „ dem tempore diversarum Regionum corripuens; a
 „ peculiari potissimum spiritus nitro-aëri alteratione,
 „ veluti corruptiva ortus, cum febre, ut plurimum,
 „ & aliorum symptomatum perquam gravissimorum,
 „ satellitio stipatus.

Joannes Bernardus Sthaar, Cracoviensis Medicus, pe-
stilentem febrim descripsit; quæ in Cracoviam, anno
1707. Leopolo ab errantibus Hebræis illata, hominum
circiter 18000. peremit. In hac febre symptomatum
funestorum omnium, quæ malignis in morbis quibus-
cunque, in quocumque functionum genere, observari
solent, syndrome apparuit. Bubones aderant, anthraces
autem nulli; & petechiæ multis, non omnibus, nigræ.
Contagium velox. Extat Sthaari Epistola tantum in
Actis Lipsiens. anni 1710.

Richardus Morton Londinensis Medicus celeberrimus,
in Append. ad Tract. de Febr. cont. de Peste notatvi-
quid peculiare, cujus postmodum usus nobis magnus
erit in curatione pertractanda, quodque tunc ex illo
Autore præclaro integrum, referam, scilicet Febrim
Pestilentialem ludere quandoque febris συνεχής, seu
continuae remittentis personam; hanc in illam muta-
ri, ac vice versa, & ἐπιδημικωτάτον reddi sua vice
utramque, alteramque alteri cedentem.

Onuphrius Bonfiglius, Medicus quondam apud Polo-
nos celeberrimus dissertatione Cracoviae edita anno 1720.
de Plica Polonica, de Peste, &c. pestem quam vide-
rat definit esse „ Morbum endemicum, vehementissime
„ acutum, malignissimum, & contagiosum, præcipi-
„ tanter ex uno populo plurimos afficientem, quorum
„ plerosque interficit, & sæpius intra quatrimum.

In Peste Massiliensi definitiones dabantur, unde pe-
stis esse negabatur morbus ille, qui, ut capite proximo
præcedente patuit, horrida Pests fuit.

Autor anonymus *del saggio anastronomico* descripsit Pestem Algerinam quam ipse anno 1752. & 1753. *Algeria* vidit, interque plura notabilia hæc habet. „ Peltis „ ex occidentalibus Regni *Algerini* provinciis, in quibus a plurimis mensibus vehementer debacchata fuerat, tandem a nonnullis Itineratoribus, quibus liber introitus pro more patebat, *Algeriam* inuenta, manifestabat se in hac urbe, Junii principio, anni 1752. Abscondebat autem hæc Peltis se, *ut assolet*, per aliquod tempus titulo cæterorum communium Morborum, donec occultus hic ignis a ventis humidis, suffocantibus scilicet Austris, qui ejusdem mensis initio flabant, fortis, tandem generale per urbem excitavit incendium.

Exp. Medicus *Adam Chenot*, qui Pesti in *Dacie Transylvanica* quibusdam in locis ab initio Octobris 1755. ad finem Januarii 1757. sedecim igitur prope mensibus, non mediocriter grassanti interfuit, dedit, ut antea monui, *de Peste tractatum*, nitide, eruditeque conscriptum, magnique ob id faciendum, quod longo rerum usu, quod exprimentis cum propriis, tum aliorum; quod etiam non in aliis duntaxat, sed in se ipso, & initium pestis, & progressum, & sævitiam, ejusque exitum in sanitatem, probe expertus, animum demum admovit ad scribendum.

Porro Peltis latam ille descriptionem dare maluit, quam definitionem, annumerareque in eadem quæcumque symptomata in hac Pestilentia, cum eadem omnibus, tum alia aliis, & ordine vario, & variis incertisque temporibus, & diversa tam celeritate, quam vehementia, hominem adorirentur.

Secundum hanc Descriptionem, si quem morbus occupet, quia a miasmate aliunde petatur, qui cæteros acutos morbos ea superet vincatque acutie, ut jam inde a principio ea se jungant symptomata, quæ in aliis gravioribus acutis non, nisi seriora appareant, homi-
nes-

nesque ea violentia adoriantur, ut morientium pars bona quartum diem vix superet, multaque eorundem pars diem septimum vix attingat: Si *secundo* morientes, ibi potissimum, ubi manus medicatrix bona deest, numero aut superent reconvalescentes, aut æquent; aut saltem multos inferiores non sint eo reconvalescentium: si *tertio* non nisi ab Infecti cujusque consortio, rerumve inquinatarum (fomitem appellant) attrectatione, usuve, natus fuerit morbus: si *quarto* compertum sit luem in vicinitate grassari: si *quinto* æger idem, qui aut cum suspectis conversatus sit, aut res suspectas sibi applicuerit, horrorem nunc experiatur, subitam virium demissionem, stuporemque capitis, & anxietatem, & animi dejectionem spontaneam, dum interea eidem Pulsus, Calor, Respiratio, Urina, ab initio vix mutantur; ubi Petechiis latis, discretis, vel ante, vel post mortem conspicuis, intra 1. 2. 3. &c. diem obierit,, tanta, ait Autor, se jam prodit in uno, hoc casu Morbi causas vulgares excedentis verisimilitudo, ut Medicus, si non omnino pestem, saltem morbum suspectissimam, renunciare Magistratui, Magistratus vero subditorum saluti prospicere, nihilque non ordinare teneatur, quod extinguendo imminenti incendio conducatur.

„ Si *Sexto* æger sub ipsa jam invasione, aut post eandem, sub inguinum commissuris, pone aures (aut axillas.) quæstus fuerit; si durities ibidem aut tumor sese exeruerit, firmior omnino evadit Diagnôsis. Vix enim credo notum esse morbum, qui symptomata iis, quæ attuli, similia, cum tali dolore, duritie, tumore, ex loco, & adeo cito, conjungit, qui non sit ipsa Pestis.

„ Si *Septimo* & ipse morbus in quibusdam agris mitior, tumores illos protrudit, auget, & sub reconvalescentia in abscessum ducit, subinde & dissipat, tanto minor jam superest de vera peste dubitatio,

„ quum & una aliorum & præceps mors intercedat,
 „ enarratique supra typi sese in agris magis magisque
 „ declarant, & prodant.

Si tandem Octavo vel in uno agro reliquis indiciis
 „ accesserit insignitus suis Phænomenis Carbunculus,
 „ pertinacior sit oportet, qui pestem esse negaverit.


F. X. Bensa, in tractatu suo de Peste *Viennensi* anni 1712. 1713. 1714. nostram attentionem meretur; tum quod non modo totis hisce annis *Vienna*, & *Possonie*, sed etiam in variis *Hungariæ* locis, jam ab anno 1708. pestem & vidisset, & tractasset; tum quod ipse & peste affectus fuerit, & Medicos decem, curam cum illo Pestiferorum gerentes, mori viderit. Hic autor *Cap. IV. de Diagnosi*: „ Quemadmodum Diagnosis hujus mali, inquit, dum in progressu foris
 „ per tumores ac maculas manifestatur, difficilis non
 „ est, ita dum veluti favilla sub doloso cinere gliscit,
 „ propter signorum æquivocationem non ita promptè
 „ cognoscitur; eaque de causa plurimis neglecto, vel
 „ insuper habito morbi principio, sero medicina
 „ paratur.

Consilii sanitatis Viennensis amaras, audivimus, præcedenti Capite quærelas, de litibus inter sese Medicorum; quibus efficitur, ut cohibenda forsitan principio Pestilentia, jam longe lateque divagetur: Sed repararunt ne graves illi, sapientesque viri, hujus causam infortunii? Descriptionem Pestis dedere, exemplo aliorum, ut quando tot diebus ingruerit, tanta ordine symptomata excitaverit, tantumque depopulata sit hominum numerum, ne simplicissimus quidem mortalium de ejusdem dubitare præsentia possit: adduntque de
 „ mum tandem contagiosum hoc malum larvam principio aut Catarrhi gerere, aut Anginæ, aut Peripneumonix, aut Pleuritidis, Diarrhœæ, Febrisve
 „ ardentis, donec tandem Bubonibus, Anthracibus,
 „ Petechiisve, malignitatis præbeat indicia suæ.

Con-

Confirmarunt sic & Bensa & Conf. San. Viennense id, quod Gl. Sorbait conquestus pag. 20. Conf. Med. fuerat, de Peste anni 1679. quæ primum personata, abjecta tandem larva sic sæviit in Viennenses, ut illorum plus quam 76000., tertiam forte Civium partem, interemerit.

Sufficiat, ni fallor, hæc operosa Autorum Collectio, ut quid ratione motæ quæstionis oporteat concludere, caput sequens perspicue doceat.



SECTIONIS II.

CAPUT QUARTUM

De iis, qua ex Cap. II. & III. concludi
oporteat.

§. I. Respondetur tandem ad prioris capitis quæstionem, quæsitam Definitionem Pestis hucusque desiderari; eo quod omnes notæ hucusque definitiones, commemoranda ea signa omnia, quibus præsentibus nemo unquam de Pestis præsentia dubitare possit, minime nobis ejusdem incipientis tantummodo, notabilioribusque signis adhuc carentis, ideam comparant. Quare incipientibus Pestibus Medici & perplexi sæpe animo sint, & responsa perplexa Magistratui reddant?

§. II. Canones numero XI. quorum observatio certiores illos, in respondendoque veriores, redderet. Pestis contrahi potest, licet in vicinis Regionibus ignoretur. Casus Pestis falso denuntiata rarissimi sunt; negatæ autem veræ Pestis, tum frequentes, tum calamitosi. Quid hinc discendum sit? Animadversiones in Nosocomia

*comia publica, barbare Lazaretta. Medium quoddam
quaerendum est inter Thracum negligentiore curam,
nostramque sollicitiorem.*

§. I. **T**Ædere me cepit productioris hujus Auto-
rum, Sententiarumque, catenæ; neve Lecto-
res meos dudum tæduerit vereor: sed erat semel hic
exantlandus labor, uti il, qui e Schola mea ad Pestem
sive averruncandam, sive curandam, quondam admo-
vendi sunt, Librorumque, quos consulant, nullam
gerere secum suppellectilem possunt, unico oculi intui-
tu Bibliothecam Medicam inspicere, quidque aut su-
premæ Potestati referant de natura morbi, aut cum
ægotantibus agant, intelligere possint.

Intelligent quippe I. Pestis auguria illa, quæ vani
Astrologi, quæ muliebris gens garrula, quæ molesta
Atrabiliorum turba, de Cometis, certoque adspectu
Planetarum, de Lusu puerorum ferali, de Spectris,
de Avibus, de variarum Bestiarum peste, de inclemen-
tia cæli, de annonæ caritate, deque horum consimili-
bus, somniaverint, falsa partim, partim ridicula esse:
eo quod ex adductis testimoniis constiterit, & cunctis
hisce præsentibus, peste immunes mansisse mortales; &
absentibus iisdem, peste occubuisse.

II. Pestis extare nullam ejusmodi definitionem hu-
cuscque, quæ datum Morbum pestilentem aut esse, aut
non esse, determinet; quamdiu idem neque tumores
& exanthemata generet, neque a reliquis morbis non
pestilentibus, verum unice malignis, signo quodam
pathognomico discriminetur.

III. Medicorum haud paucos notasse non semper
Bubonum, Anthracum, Petechiarum apparitione, ip-
sam Pestem denotari; siquidem eadem & cum febre,
& sine febre, ab aliis causis gigni, inque externam
corporis superficiem erumpere possint. Addam ad hæc,
ex meis propriis observatis, in Nosocomio nostro con-
tigisse,

rigisse, ut famulus Nosocomii, omni certe Veneris suspitione vacuus, Febre continua, Dysenteria, pluribusque Inguinum laboraret Bubonibus; cui tamen omnem Pests defuisse suspicionem tam comitantia signa, quam subsequuta, manifesto evicerunt.

IV. Veras Pests cum definitiones tum descriptiones, quæ dubitationem omnem, omnem sustulerint ambiguitatem, eas passim continere apparitiones, quæ in ejusdem principio ab ea ut plurimum absint; quæque dum adsint, Pestem & manifestam, & longe lateque vagantem, ostendunt.

V. Neque Viros illustres in Arte, qui ob nominis celebritatem præprimis consulti, morbum, qui acceperisset grassari, pestem esse in Populorum negassent perniciem, quique postmodum errorem falsi, ore, scriptoque, essent, definitionem cæteris certiolem, explanationemque, suppeditasse nobis; id quod, si res possibilis esset, ab ipsorum moto in aliis candore expectandum fuisset.

VI. Casum oppido rarum non esse, in quo Malignas febres pro Peste, hancque pro illis, tamdiu habere Medici possint, quamdiu signa, quibus postmodum a sese internoscant utrasque, sublitescant.

VII. Medicos Pestilentia, quæ modo inceperit, signis autem pathognomicis adhuc careat, multa debere anxietate premi; cum in dubiis rebus, non monentes Magistratum, in causa ruinæ regnorum hominumque esse possint, si vera tandem Pests sit: sin vero monuerit, nec Pests fuerit, Principum Magistratuumque pondus iræ indignationisque omne in se congerant; eo quod & cunctorum mortalium animos panico terrore permoverint, & Commertium, necessarium Commercium, Reditusque regio, omnino suspenderint.

VIII. Varias omnino cum Medicorum, tum Magistratuum rationes esse, cur morbum, qui apparere inceperit, cujusque natura in dubium contagii possit vocari,

cari, communem malint, quam pestilentem, appellare. Medicos scilicet metuere, ancipiti, ut putent, in casu, eum declarare pestilentem, quod in re dubia, ne ipsi quidem inter sese consentiant; alii in affirmantem, in negantem alii, sententiam proni. Ea de causa, qui affirmaverint; æque Plebis, quam Procerum, sibi odium conciliant, periculumque incurrunt, quod & *Septalio* contigisse vidimus, & aliis in Peste *Massiliensi*, ne violentas experiantur Plebis desperabundæ manus, neve indignationem incurrant optimatum.

IX. Neque sæpe multos Medicos deesse, qui sive ipsi, sive eorum Consanguinei, Necessarii, Patroni, ab interdicto commercio damnum incurrerent: unde donec spes lucri ipsis in tuto sit, silentium altum tenent.

X. Magistratum plerorumque damnandam consuetudinem esse, ut, dissentientibus inter se mutuo Medicis, in negantium facilius abeant, quam in affirmantium sententiam; & quod pejus, in paucorum negantia vota potius, quam in ea multorum affirmantium; quodque demum pessimum, ut obturato Medicis ore, unius alteriusve Chirurgi effatum sequantur; ut apud *Fornès*, aliosque, videre est.

§. II. Ex his omnibus, quæ sole clariora Historia Pestis demonstrantur, boni Medici in nascente Peste ancipites hærent de agendis. Ex cunctis tamen, quæ eadem Historia perhibet, Regulæ nonnullæ, Canonessive, videntur formari posse, quas tuto illi sequi non possint modo, sed debeant.

Canon primus. Si Magnatum, Plebisque furorem metuunt, monendo Pestem aut certam adesse, aut verisimilem; multo graviolem metuendum illum esse, si, ipsis tacentibus, Pestis post hæc & nota sit, & longe lateque debacchetur.

Canon alter. Cum monentes, conscientia dictamen sequuti essent, tacentesque suffocassent, consequitur ut
prio-

priore casu publicum odium immeriti, atque ut probi Viri, qui DEUM, conscientiamque, omnibus mundi bonis commodisque intrepidi prætulissent, incurrerent: sin vero vel ex metu humano, vel ex lucri sive proprii, sive Amicorum, amore, ac studio, tacuerint, ingruatque interea Pestilitas, odium cunctorum sibi contrahent, metuendam Vindictam divinam habebunt, nec quo vertant sese, quove solamen capiant, alleventurque in ærumnis suis, ullibi reperient, adversum Cœlum sibi, Terramque experti.

Canon tertius. Si æqua lance ponderemus Reipublicæ damnum, ab intercepto commercio natum, Peste forte non existente, quæ credita talis fuerat, cum eo damno, quod Respublica ab eadem non averruncata, sed jam vagante, patitur, nulla profecto datur comparatio. Priore in casu commercii interceptio paucorum modo dierum est, moxque refloret; in posteriore annum & ultra ociatur. Nemo mortalium in priore perit; interit in posteriore incolarum sæpe potior pars. In priore commercio interdicto, Agricultura tamen, ceteraque negotia pergunt; in altero præ incolarum raritate manet inculta tellus, ita ut nullum redditum habeat a cessatis Respublica arvis, & λοιμὸν λιμὸς sequatur. In priore iterum casu exiguo modo tempore telonii Jure Princeps frustratur, tam advectarum, quam emissarum mercium; in altero per annum forsitan, annosve. Iterumque priore in statu sua cuique manent, Regi, populoque; in posteriore egestas crebro tanta, ut complurium annorum serie vacuum & inane ærarium publicum maneat. Tandem in primo cives fere nihil ab interdicto exigui temporis patiuntur, rerum abundantia fruentes; in secundo vel deest commeatus, vel desunt qui nobis inde necessaria parent, constititque toties plus Incolarum interire inedia, quam peste.

Quartus Canon. Tempestivo morbi relatu dum Medicus rem curat publicam, una privatam curat; suæ quippe propriæ salutis, & familiæ, & consanguineorum: sic ut opportuni relationis defectu tam propriæ suæ, quam suorum, necis possit artitex esse.

Quintus Canon. Homo unus alterve, quem invaserit maligna admodum febris, praviſque ſymptomatis, ipſis etiam ſpectabilibus in Peſte effloſcentiſ, ſubito ſuſtulerit, non urget ita Medicum, ut ejus certioſem ilico reddat Magiſtratum; ſed ut expertiſſimis collegiſ caſum narret eo ſine, ut attendant illi an ſimilem forſan obſervent & illi; utque, ſi obſervent, mox inter ſeſe conferant de agendiſ. Ex præmiſſiſ quippe conſtitit & Malignoſ exiſtere morboſ, qui Peſti quidem ſimiliſſimi, peſtilentiſ tamen minime ſint; & ipſam forte Peſtem a cauſa interna in ſingulari homine naſci, abſque vel ullo, vel notabili, alioſum contagio. Quod ſi illi ſpatio dieſum compluriſum nihil ſimile deſegant, totum alto ſupprimendum ſilentio eſt. Sin vero alioſum Medicoſum unus alterque quid ſimile obſervet, reſ indicanda Magiſtratoſi videtur, uti in ſiniſtrum eventum præparet ſe, ſi ejuſmodi obſervata contingat ingeminari.

Sextus Canon. Buboneſ & Anthraceſ hominiſ unici, febricitantiſ, nec ne, non obligant Medicum ad renunciationem: quamvis enim vera forſan peſte laboreſ, quia tamen primuſ modo eſt, in quo hæc appareant, & quia obſervatio haud oppido rara eſt ejuſmodi morbi, citra vel minima Peſtiſ ſigna, conſequentiaſque invadentiſ, ſupprimenda reſ ſilentio eſt, agendumque ut in Canone V. dictum.

Septimuſ Canon. Si vero hoſum aut ultimo aut penultimo obſervato, ſeu iſdem in ævibuſ, ſeu in illiſ, qui cum hoc homine converſati eſſent, quiſquam eodem modo, eive ſimili, laborare inciperet, prudentiſ Medici foret habere de eo maturam cum Collegiſ delibera-
tio-

tionem, cum iisdemque invifere ægrotantum; & fi brevi tertius illi fimilis daretur ægrotus, unanimi confenfu renunciationem facere Magiftratu tenentur; ut ad *Can. V.* Si autem intra complures dies nihil prorfum fimile contingat ultra, indicetur hoc Magiftratu, ut metum ille deponat, curamque omnem.

Octavus Canon. Si vero & III. & IV. ejufmodi morbus invaderet, perimeretque, monendum celfum Regimen foret, ut leges aptas difponere, ac præparare futurum poffet.

Nonus Canon. Si tandem brevi plures ejufmodi morbo impeterentur, horumque mortem evaderent pauciores, ferio Regimen de Peltis verifimilitudine majore monendum, ut promulgatis edictis fiftat illam.

Quæritur num ea adelfe Verifimilitudo poffet, Regione quacumque confini ab ea labe immuni?

Resp. I. Poffet omnino: neque enim hucusque adhuc demonftrata Peltis aut natura eft, aut origo; fpon-teque fua eandem nafci poffe, graviffimorum fententia Virorum eft.

Resp. II. Et vicina Regna ab hac labe immunia elfe poffant, & nihilominus res pelliferæ nobis inde adferri. Miasma quippe, in Sarcinis probe compactis, obfirmatifque, occlufum, a longe remotiore, fed clam infecta Regione, deferri ad nos per viciniora regna, urbesque finceras potelt, noftramque Regionem folutis & apertis mercimoniis, peftilentia inficere.

Resp. III. Peltis quandoque in vicina Provincia adefl, fed vel fuo in ortu ignoratur adhuc, vel politicis occultatur caufis.

Decimus Canon. Cum longe crebrius contingat, ut Peltis in regiones immaniter fæviat, eo quod, diffidentibus de Natura Morbi Medicis, fuprema Poteltas eam fuo in ortu prudenti cautione fiftere neglexerit, quam ut Refpublica præmaturiore Medicorum metu quid incommodi tulerit, videtur a Supremæ Poteltatis fa-pien-

piencia & prudentia id expectandum esse, ut ad Casum
Oclavi & Noni Canonis Edictis suis curet ne, si qua
Pestis sit, dilatetur.

Undecimus Canon. Ut sistatur Pestis, eave reddatur
minus populatrix, conferunt Nosocomia *libera*, *coacta*
obsunt. Conferunt *libera*, ut plebs egena civitatis, fa-
me alias miseriaque magis, quam peste conficiunda, in-
tra eadem, dum ægrotare incipit, recipi & ali, tra-
ctarique possit: *coacta* vero Nosocomia, vel *Lazaretha*
dicta, salutari huic intentioni utrique obsunt, I. quod
rudi, ac violenta manu, uxor a marito, hic ab illa,
parentes a prolibus, ac vice versa, avellantur, eaque
intrudantur in loca, quæ inferno pejora metuentes,
metu, moerore, melancholia, consumantur; passioni-
bus scilicet, quæ Pestem, per se forte adhuc curabi-
lem, jam, testantibus uno ore Medicis omnibus, in-
curabilem prorsus, desperatamque reddunt.

II. Quod multi nulla Peste, sed aut cephalalgia,
aut nausea, aut diarrhœa, &c. affecti, propter hanc
Symptomatum horum cum pestilentibus similitudinem,
violenta manu suis de ædibus tollantur, trudentur
in Nosocomia, ibidemque partim mœrore, partim &
maxime pestiferæ societatis contagione, peste demum
afficiantur, & pereant.

III. Quod vulgus hominum, tota id docente Histo-
ria pestis, summo habere horrore hæc Nosocomia so-
let, actum de se inibi esse, seque victimam barbarici
tradi raturum: unde consequitur id, ut qui peste inci-
piunt affici, vires, iis, quas habent, majores simulent,
quærelam supprimant omnem, atque ita incidant in
pestilentiam immedicabilem, cui si forte maturius Me-
dici admoti fuissent, mederi potuissent.

IV. Ex ægrorum, qui in ejusmodi Nosocomiis de-
cubuerunt, Medicorumque, qui eadem administrarunt,
testimonio, evidens fit, coacta illa Nosocomia tantis
demum ægris, farciri, ut Atmosphæra, vehementem

in

in modum peſtilens reddita, longe plures numero trucidet, quam Athmoſphæra civitatis: ut plures longe adſint ægri, quam aut locus convenienter capere poſſit; aut pauciores Medici, Chirurghi, Miniſtrique, decenter tractare queant: ut eorundem horum in perenni illatæ calamitoſæ plebis incremento non adſit numerus ſufficiens: & ut denique partim neceſſariæ adminiſtrationis inopia, partim athmoſphære virulentia, longe numeroſiores homines inibi, quam ſi domi decubuiffent, moriantur.

V. Hujus ſic deſcriptæ athmoſphære virulentia, neceſſe eſt civitatum, provinciarumque contagium, incredibiliter augeri, quando ejuſmodi Noſocomiorum magna in iis crebritas eſt; idque eo tetrius, quo eadem & frequentiora ſunt, & conſectis ægrotantibus magis facta.

Moderatius hic loquor, quam plerique Peſtis Histo-riographi. Conſulatur modo Vir reverendus *Muratori-
us*. Hæc omnia nobis tam vivis depinxit coloribus, ut, qui legerit, vix temperet a lacrymis. Sed quid plura? In Peſte *Viennenſi* annor. 1713. & 1714. Noſocomium tale extra urbem conſtructum, ſpatio XIV. menſium ex 9337. ægris, ſervatos duntaxat 3501. ſalu-
lavit; ſic quidem, ut perierint duo ferme trientes, hoſque inter Medici decem, & Chirurgorum, Diſpenſatorumque, ut vocant, propemodum quinquaginta. Et Anonymus Autor, teſtis oculatus *Algerinæ* peſtis anni 1752. & 1753., „ In ædibus libero aëri expoſitis
„ civitatis, mortuus infectorum modo triens (pars ter-
„ tia) eſt; in Noſocomio Hiſpanico Regio autem, cum
„ omni poſſibili auxilio artis, periit beſſis, (ſeu duæ
„ tertiæ partes) eo quod in Noſocomio & nimium con-
„ cluſi, & arctati, ægroti decumberent. Additque tam
„ eadem in Peſte quam in truculentiffima illa triennali,
„ quæ quondam duos incolarum trientes depopulata erat,
„ duos modo homines in palatio Regio peſtilentia affe-

„ Etos fuisse ; eoquod Palatium , licet incolis scatens ,
„ vastissimum tamen sit , libera perflatum aura , ac vi-
„ væ aquæ multiplici scaturigine irroratum , ac refri-
„ geratum . Hac ipsa observatione gignitur quæstio an
salubre tam pestiferis , quam sanis , Consilium sit infectos
suis in ædibus sic obserandi , ut perpetuo claudantur
januæ , fenestræque ? Utrique non ventilatur ibi aër
miasmate infectus , qui proinde damnosior fit ægrotan-
tibus : porro cum januas nihilominus aliquando patere
oporteat , ut vel Medicus , introeat , vel Chirurgus ,
vel Confessarius , vel qui res adferunt ad victum ne-
cessarias , contagio profecto densatiore , atque pernicio-
siore , omnium illorum vestes penetrabuntur , idemque
auctum contagium aliis afferent , pestem in urbe auge-
bunt , immaniore ea , quæ viget , reddent , & ipsi il-
li , qui istiuscemodi pestiferos inclusos adierint , gravio-
re peste affligentur . Neque juvat portam fenestramve
his intransibus , morantibusve , apertam esse , nam hu-
jus infectissimi aëris ventilatio non est horulæ opus .
Si igitur Medicina demonstratum sit ab aëre non , aut
parum renovato , communes acutos morbos in malignos
verti , respirationem vehementer lædi , extinguique ægro-
tum ; quid non timendum tandem , quando aër mias-
mate pestifero , eoque coagmentato , saturetur ? *Thracios*
ridemus , & damnamus , ob ipsorum in peste incuriam ,
& negligentiam : sed inito tam ipso suorum , quam
nostrorum mortuorum *Calculo* , rident nostras forte
redundantes curas , ut mox in exemplo *Algeriæ* . Uti-
nam vitæ extremis , medium salutare attingeremus !
Porro eo sequentia tendent .



SECTIONIS II.

CAPUT QUINTUM.

De Petechiis & sudatoria in Peste cura.

§. I. Ut via illa intermedia inveniri forsan posset, initium fit a Petechiarum descriptione, curaque. Petechiarum in Peste natura ab his salutaris describitur, ab illis letalis; tot conditiones a pluribus requiruntur, ad hanc illarum salubritatem, ut sive cum Petechiis, sive absque illis, impossibile sit hominem mori, propter signorum reliquorum praestantiam. Sententia de Petechiarum Letalitate veri admodum similis. Multa de Petechiis notatu digna ex Chenoto, Diermerbroeckio, Muratorio, Sydenhamo. Ceterum Petechiarum in morbis acutis, malignisque, tanta fuit in Nosocomio Practico Viennensi raritas, ut posterioribus annis in 300. minimum acutis, ne semel quidem potuerint demonstrari *Medicina Auditoribus.*

§. II. Conclusio ante dictorum. Laus Sydenhami; cujus Pestis curandae prior Methodus praemittitur, & commendatur, ne Petechiae nascantur. Laudatur ejusdem quoque altera Methodus.

§. III. Sudor quandonam in peste bonus. Generalis conclusio.

§. I. **U**T in cura Pestis salubriorem solita, tutioremque Methodum addiscamus, quaedam praemittenda sunt de Petechiis Pestilentibus; ut earum occasione ad curam Sudatoriam animum advertentes, profiteamur illa, an obsit, evidentius percipiamus.

Petechias & Vibices, rubras, purpureas, lividas, nigrasque in Pestilentia Efflorescentias, omnes notant, qui eam descripserint, latiores aut arctiores, planiores aut elatiores, maturiores aut seriores; hi criticas, illi ambiguas, alii iterum certo certius letales.

Exp. Chenot, in sua de Peste dissertatione varias harum, quas observavit, species tradidit: ac primo quidem Petechias miliarium forma; quas salutare descripsit, *si die Critico, si morbo mitiore, si ceteris bene aut plerumque pergentibus, si cum Symptomatum levamine*, si tandem apparentibus cum Bubonibus, tum Carbunculis, supervenirent: loquitur deinde de Petechiarum alia specie, quæ & parvæ erant, & numerosæ, & confertæ, quæque *si cum conditionibus prioribus sive omnibus, sive quibusdam prodirent*, neminem leto dederant: sermonem & de tertia Petechiarum specie habet, quæ macularum latissimarum forma, cum colore uniformi aut rubro, aut etiam purpureo erupit; quæ species cum descriptis antea speciebus concurrens, *sub iisdem reliquis conditionibus bonis* grave negotium nemini faceffivit: quarto refert maculas rariores, una cum Petechiis lenticularibus prodeuntes, purpureas, lividas, oblongas, Vibices vulgo dictas, quæ non videntur ominis fuisse pejoris: quintam demum Petechiarum discretarum speciem perhibet adfuisse, quæ lentem diametro aut æquantes, aut superantes, *pravis cum signis morbis reliquis*, plerumque funestæ erant.

De bonitate aut malignitate harum quinque Petechiarum specierum concludere vix quidquam possumus: cum bonis quippe reliquis morborum signis, vix prava signa nocent; cum reliquis signis sinistris, fere nunquam dextra profunt. Cum itaque hæc, & id genus plura aliorum Autorum, generaliora sint, quam ut consequentiam legitimam inde formemus, adeamus alios, & præcipue, qui instar omnium est, *Diemerbroeckium*; qui, quod audacia incredibili emeretur, & naturam a peste

peste vix expugnabilem haberet, & cum artis promovendæ, tum proximi sui juvandi eximio fulgeret amore, nobis ejusmodi dedit de peste Tractatum, ut jure dubitem num exemplorum numero, observationumque præstantia, parem illi in tota Bibliotheca Medica possideamus.

Hic igitur vir præstantissimus pag. 66. „ Exanthemata pestilentia, inquit, quæ vulgus, *Mortis & pestis maculas*; Itali *Petechias*, *Peticulas*, & *Lenticulas*; Galli *Purpuras & Papiliones*; Belgæ *granum piperis* appellant; sunt maculæ purpureæ, vel rubræ, vel nigræ, vel violaceæ, ut plurimum rotundæ, aliquando latæ, oblongæ, aliussve formæ, in summa cute efflorescentes. Pag. 67. Hæ semper longe periculosiores sunt, quam Carbunculi, aut Bubones; non ut causæ, sed ut signa: quia in his Cor adeo validum est, ut perniciosum venenum versus externas partes depellere, & sanguinem a pestilenti corruptione præservare possit: in illis vero adeo debile est, ut nec venenum foras expellere, nec sanguinis corruptionem avertere possit; quod breve insequenturæ mortis indicium est. Unde fit, ut ex sexcentis peste laborantibus vix unus evadat, cui Exanthemata in cute apparent.

Et pag. 73. „ Multi magni nominis Medici has maculas, quocumque tempore prodeuntes, & præcipue die decretorio apparentes, scribunt esse salutiferas: inde seducti, vel quod earum causam & originem non satis cognoverint, & ipsum venenum pestilens per has maculas putaverint; vel quod sola inani speculatione ducti, gravi stylo multa de peste scribant, cum nihil de ea viderint, nec quidquam de ejus historia curiose ad veritatem examinaverint. Quantumvis enim eorum rationes hujusmodi criticam evacuationem probare videantur, necesse tamen est, ut experientiæ, contrarium docenti, hac in parte ce-

„ dant : neque interest quam acute & docte de huius
 „ criscos bonitate disputent, si subrepens mors pen-
 „ dentis litis decisionem faciat. Nos semper observa-
 „ vimus exanthematum eruptionem symptomaticam,
 „ nunquam vero criticam esse, & semper naturam
 „ succumbentem indicare. Qua propter simul ac in
 „ hac Peste exanthematum eruptionem animadverte-
 „ bamus, omnem vitæ spem abiciebamus : - - Ne-
 „ que exanthematum multitudo, quam multi tanquam
 „ salutarem laudandam censent, neque paucitas, ma-
 „ jorem vel minorem spem sanationis dabat : nam plu-
 „ res maculæ maiorem quidem veneni violentiam &
 „ quantitatem, majusque spirituum vitalium damnum
 „ indicabant, causam vero morbi nihil imminuebant.
 „ Æque cum paucis & parvis, quam cum innumeris
 „ majoribus, per totum corpus copiosissime erumpen-
 „ tibus, moriebantur ægri. Atque in tota hac trucu-
 „ lentissima peste Unum solum, cum exanthematibus
 „ purpureis copiosis evasisse vidimus; cujus historiam
 „ raritatis gratia *Libro IV.* adnotavimus.

Porro ad hanc historiam, ibidem enarratam, sic ip-
 se commentatus est. Quod exemplum hac tempestate
 „ pro rarissimo habendum erat : nam in tota hac tam
 „ furiosa peste, præter hunc puellum, nullum un-
 „ quam vidi evasisse, cui exanthemata purpurea aut
 „ nigricantia apparerent; sed quo plura & majora
 „ prodirent, eo citius ægros semper interiisse : Reli-
 „ qui etiam, qui peste infectos tractabant, se id nun-
 „ quam amplius vidisse affirmabant. Exanthemata ru-
 „ bra, parva, & non multa, licet plurimis essent le-
 „ talia, cum his tamen pauci evadebant; cum pur-
 „ pureis aut nigricantibus nullus. Ac propterea quod
 „ maculæ illæ instantem mortem certissime pronuncia-
 „ rent, Vulgus illas appellabat Maculas mortis, iisdem-
 „ que apparentibus omnem spem de ægris abiciebat.

Petechiarum historiam sed variæ, ut videtur, oppositæque naturæ, ex *Chenoto*, & *Diemerbroeckio*, dedi; volumen prægrande daturus, si ex omnibus Loimologicis, quid de iisdem perhibeant illi, proponerem Lettoribus. Cui volupe est eos ordine pervolvere, is illas, & omnes, singula in peste descripsisse; & vel criticas, vel symptomaticas, habuisse intelliget. Unius modo referam sententiam, qui, ut omnes pervolverat, ita quoque cunctorum opinionem nobis compendio retulit; *Ludovici Antonii Muratori* scilicet; Viri apud *Italos* excellentis, quemadmodum apud *Anglos Hales*: divinis dicatus uterque, hic in *Physicis*, ille in *Politicis*, quidquid ad scientiarum augmentum, utilitatisque publicæ emolumentum, modo referre quocumque posset, popularibus suis incredibili studio, indefessoque labore, accommodavit.

Hic itaque primum *Libr. II. de Peste Cap. 8.* ex collatis Medicorum omnium sententiis demum collegit. „ Salutares quidem esse Bubones posse, Anthraces autem & Petechias, morbi vehementioris indices, funestas esse, interitus hominum, ut plurimum, causas. Clarius vero ac fusius *Cap. X. pag. 301.* Eorum sententiæ nixus, qui in peste tractanda potissimum eminuerunt, asserere ausim, Petechias in vera Peste ipsis Carbunculis deteriores esse; præsagiumque ab illis infaultius, quam ab his, habeo: siquidem nos observatio docet Petechias, sive purpureas comparuerint, sive virides, sive violaceas, mortem propinquam fere semper pronunciasse. Equidem Medici complures, iique haud incelebres, salutares perhibuere easdem: verum merito hic quaeritur, an ejusmodi eorundem sententia non ex acutiori ratio- cinio sit potius nata? quandoquidem multo frequentior experientia contraria est, ita ut in nonnullis Pestilentiis ne unico quidem die protraxerint vitam ii, quos hæc invaserant, etiam si parca modo copia

„ comparuissent ; morbo desperato habito , quocumque
 „ demum modo apparuissent .

Hæc ubi scripserat *Muratorius* , anxie quærit , quæ
 tandem rationem inveniat tantæ sententiarum discre-
 pantia , tantarumque Observationis varietatum . Hanc
 „ vero vix reperiens , nam loquor , inquit , hoc modo
 „ juxta mentem , experientiamque reliquorum . Tan-
 „ dem hanc conjecturam periclitatur . Non sum ab ea ,
 „ inquit , opinione alienus , *quod possint* nonnullæ Pe-
 „ stilentia ejus naturæ , mansuetudinisque esse , ut quot-
 „ quot eos , quos Petechiæ invasisent , saluti reddi
 „ sinerent . Etenim persuasum mihi est ab una sola
 „ peste , ratione aliquorum auxiliorum , symptomatum-
 „ que , non & singulam , & omnem , dijudican-
 „ dam esse .

Verum cum recte caperet sententiam de Petechia-
 rum letalitate non ab unica , neque a paucis , sed ab
 omnibus fere Pestilentialibus natam esse , mox abruptum
 quidem repetens sermonem „ Petechiis jam extanti-
 „ bus , inquit , vix ultra tempus est Medicamenta ad-
 „ hibendi : sin autem contingeret , ut ægroti mox a
 „ Pestis principio , remedia sudatoria , ceteraque pestis
 „ præsidia , vocarent in opem , contingere etiam posset ,
 „ ut Natura ope Crisum aliarum magis juvantium ,
 „ se ab illo acri pestifero , quo opprimebatur expedi-
 „ ret , Petechiasque , morbi & profectionis & pernicio-
 „ sioris indices , omnino præveniret .

His rite perpenſis , merito quæri potest an Autores ,
 qui Pestiferorum Petechias salutare dixerunt , hanc
 illarum salutem rite probarunt ? Dubitabilem hanc sa-
 lutem reddidere observationes opposita , dubitabiliorem-
 que adhuc Observationes Petechiarum , in febre non
 pestilentiali apparentium .

Qui enim utrarumque harum Petechiarum Historiam
 deliberate contemplatur , interque sese confert , inve-
 nit , iisdem prodeuntibus , alias una prodire evacuatio-
 nes ,

res, in salutem si tendat morbus: evacuationes ajo, singulas proprio genio Criticas, morbumque in aliis, citra Petechiarum expulsionem, perbelle judicantes. Hoc toties plenæ luci in compluribus *Operis annui* tomis exposui, tam præclaris Medicinæ Scriptoribus, quam propriis meis frequentioribus innixus observatis: idemque de Petechiarum pestilentium natura laudatorum Virorum præclara opera concludere jubent. Sic ut neque in Peste, neque in Febre maligna, Petechiæ unquam Criticæ sint, sed tristes ac fere certæ nunciæ Leti; nisi aliæ, eæque vere criticæ evacuationes, materiem sive pestilentem, sive malignam, consequenter & illam quæ Petechias aut genuerat, aut genuisset, e corpore eliminent.

Dum itaque per optimos, qui de Peste egerint, Scriptores constat, in Peste fere numquam salutares esse, criticasve Petechias; dum de Petechiis in Febre maligna Virorum celebrium, *Sydenhami* cum maxime, eadem sententia; est dum denique tanta Petechiarum acutis in morbis raritas sit, in *Hippocratico* Praxeos exercitio, ut neque mihi, Medicinam in Nosocomio publice tradenti, consiliisque in urbe assistenti; neque ceteris Medicis, qui *Hippocratis*, qui *Celsi*, qui *Sydenhami* atque *Boerhaavii*, vestigia premunt, nunquam, & nusquam, hæ pluribus ab annis compareant; merito inde conficere videor, neque in Peste, neque citra Pestem, Petechias unquam esse salutares: sin autem contingerit, ut, sive in Peste, sive sine Peste, vel nonnulli, vel etiam complures, una cum Petechiis reconvalescant, id haud aliam ob causam fieri, quam quod natura per alias vias, vere criticas, sese a virulentia morbi expediat; exemplo aliorum acutorum morborum, in quibus neque prodeuns aliquando symptomatica alvus, neque pravus per omnia sudor, neque pessima colore, odore, copia, contentisque, urina, morbum curare dicuntur unquam, verum alia qualiscumque eva-

evacuatio; quæ, si salus redeat, iudicet ægrum. Tædio foret, ea argumenta repetere, quæ toties, ut quæ hanc sententiam adstruerent, confirmarentque, alibi attuli: verissima autem ea esse Auditores mei vel ex eo norunt, quod inter trecentos homines, qui lapsu posteriorum annorum in Nosocomio morbis decubuerunt acutis, malignisve, ne semel quidem ipsis Petechias, quas harum Regionum & frequentes, & necessarias ajunt, demonstrare potuerim.

§. II. Si itaque medendi methodus extet, quæ ab his Petechiis auctis in morbis præservet ægrotantes; si eadem certam fere mortem, ni ægrum aliæ evacuationes servent, portendere soleant; si Viri præstantissimi, iique numero haud pauci, Petechias pestilentiales tanquam tristes auguratrices necis, dirasque vitæ deletrices, toties deprehenderint; annon observatio adeo frequens, annon toties confirmata experientia, annon lugubris infinitorum pestilentiosorum interitus, id demum Medicis suadeat, ut, ne hæ superveniant pestiferis, sollicitudinem omnem, curamque adhibeant requisitam?

Certum quippe est, & numerum eorum, quos demetatur Pestilitas, innumerabilem esse; & potiore eorundem partem perire Petechiis. Teste *Villano*, Pestis anni 1348. quintam modo omnium universi orbis incolarum partem in vivis reliquit. Nec multo mitior illa fuisse censetur, quæ eodem XIV. sæculo bonam afflixit *Europa* partem. Quæ anno 1564. *Sabaudium*, & confinia *Gallorum*, *Helvetorumque* invasit, ex quinque affectis vix plus uni pepercit. Et quæ sævit anno 1576. *Venetorum* 60000. tanquam falce demessit. Pestis *Mediolanensis* anni 1630. describitur in Diæcesi illa, neque adhuc tum cessans, 120000. occidisse mortalium. *Londini* anno 1665. primo suo furore hominum mille unico trucidavit die. In Peste *Viennensi* 1713. decimus & tertius infectorum vix evasit. In alia Peste *Viennensi*

Æ antiquiore memoratur nonus quisque servatus in urbe; in pagis vero circumjacentibus plus quam tertius. In Peste *Massiliensi* ann. 1720. 1721. 1722. periisse hominum leguntur 60000. In Peste *Transylvanæ*, quam exp. *Chenot* descripsit, duo infectorum periire trientes.

Est igitur major quidem, minorve, ingens tamen semper, pars hominum, quos mactet Pests, quorumque, Historiam fide, pars longe maxima Petechiis pereat. At vero *Thomas Sydenham* sancte asseveravit nobis, dum sua Methodo tractaret Pestilentes, non ultra quemquam peste occubuisse, neminem ultra scatuisset Petechiis. Ad rem hic *Muratorius*: Sarà cura dei Medici il farne la pruova: ea propter, quæ hanc in rem *Sydenhamus* proferat, patienter audiamus.

Duplicem ille agnovit Pests curandæ viam: inflammatoriam alteram, sive antiphlogisticam; alteram sudatoriam, sive hidroticam. Porro præfert antiphlogisticam, præ altera laudat, experientiaque confirmat sua: sic ut missiones sanguinis, largasque illas ac repetitas, cum reliqua antiphlogistica cura commendat, & suis a partibus stare *J. Costæum* memoret, & *N. Massam* & *L. Septalium*, *Trincavellium* &c. maxime autem *L. Botallum*.

Hic porro *Botallus*, Cap. VII. de Vena sectione, quater, sexies, aut & septies, sanguinis aut Libram, aut Libram sesqui alteram, de Vena, eduxit; qua in re cum *Sydenhamo* convenit: in eo autem *Sydenhamo* audacior, quod hanc curam instituat, Anthraces, Bubbles, Exanthemata, adsint, nec ne; id quod innumeris in ægris sibi e voto successisse asserit, & quorundam fortunatis confirmat exemplis. Eo usque ausus necdum est pervenire *Sydenhamus*, ceterum suam methodum mire extollit, confirmatque exemplo Chirurghi in castro *Dunstar*, qui cum Pestilentia prædiorum militum jam aliquot necasset, cunctis deinde venam liberalissime secuerit, illos tunc lecto commiserit,

rit, effeceritque sic, ut, licet nulla medicamenta data essent, nemo horum, quamvis quamplurimorum, desideratus fuerit.

Laudat autem hanc methodum, præ hidrotica, „ eo „ quod in multis, maxime calidioribus, ac junioribus, rarius bene prolecto sudore, Phrenitidem, aut, „ quod longe calamitosius, Petechias, Vibicesque concites. „ Præcipue autem Methodum inflammatoriam in Peste præferebat, tam quod peste jam inchoante, Ardens febris inciperet dominari, quam febrem venæ sectione, & emetico, ut præcedente biennio grassans febris requisiverat, aggressus, infeliciter pergentem videret, quartoque post decimum die necantem; quam quod sola antipleuritica cura, Pleuritide tunc quoque grassante, omnes eas ardentes febres fortunate curaret. Pestis interea popularis fiebat. Rus quidem tunc cum familia concessit; verum mortuis demum tot Medicis, ut, qui supererant, superstiti Pestilentiosorum numero curando non essent, *Londinum* rediit, & febres, quales abiturus reliquerat, pestilentesque olim appellare dubitaverat, nunc inveniens regressus, sua antiphlogistica, qua ante abitum, methodo aggressus est, mirificeque proficiens, ausus est „ Medicorum, „ qui grassante nupera lue in urbe perstiterunt, fidem „ appellare; num quis eorum Phlebotomiam larga manu, ac repetitis vicibus, nec non tumore nullo adhuc protuberante, celebratam, Peste laborantibus „ funestam esse viderint; Parcam quidem, vel tumore „ jam conspicuo, sanguinis detractionem semper damnosam esse, neutiquam mirandum est. „ Evacuationibus his solebat & Potusam, & Dietam refrigerantem, semper adungere.

Verbo moneam frustra esse, qui *Sydenhami* testimonium minoris faciant, quod Pestem fugerit: etenim redeunte eo in urbem & Pestis adhuc aderat, & qui communi methodo tractabantur, cum Petechias habuerunt,

runt, tum magnam partem occubuerunt; quo ipso tempore methodi suæ præ ceteris præstantiam vidit, gavissusque *Sydenhamus* est, atque in veritatis testimonium ceteros Medicos provocavit.

Hæc nunc de *Sydenhami* methodo priore, sive mere antiphlogistica: sequitur altera ejus, quam excogitare non utilitas major, sed vere tristis necessitas coegit. Cum enim præ hominum adversus Phlebotomiam in peste irradiato præjudicio, sæpe, pergere methodo antiphlogistica non posset, amplexus & sudatoriam est: qualem quidem millenorum pestilentium interitu fatalem expertus, eo quod & brevius, & interruptius, sudor provocari soleret, sic demum cum auxit, tum emendavit, ut primum vena, ne cum sudoribus expellerentur Petechiæ, tunderetur, & mox a tussa vena ægris in lecto optime tectis exhiberet Hidragogon, si id non vetaret vomitus: eo autem vetante, expectabat primum a tegumentorum pondere ac calore sudorem: cum jam eo oborto, semper aut lenirentur, aut cessarent conatus vomendi, dedit Sudatorium suum, inceptamque Diaphoresin haustu frequenti sive *Zythogalæ*, *Salvia* alteratæ, sive *Cerevisiæ* tenuioris, cui *Macis* tantillum intabuerat: promovit autem sudorem, non sic, ut post 2. 3. horarum sudorem, interquiesceret æger, bisque aut ter repeteret similem; quemadmodum *Meditantium* plerisque, præprimis *Diemberbroeckio*, consuetudinis erat, sed ad diei naturalis spatium, abstersione interim omni interdicta; „ imò, ait, nec infra 24. „ horas a sudoribus finitis indussum, utcunque madidum, ac immundum, mutari permitto. Id quod „ summa cautela observari velim. Quodsi sudatio angustioris temporis limite circumscribatur, recrudescit „ illico Symptomatum sævitia; atque ægroti salus, quam „ prolixior Diaphoresis extra aleam constituisset, in aciem novaculæ relinquitur.

Multus demum *Sydenhamus* est in reprimendo Medicorum metu, ac si præ continuato protractoque sudore præstaret sudor cum brevior, tum frequentior, ne æger vice una viribus exhaureretur suis; demonstravit autem e contrario omnium suorum ægrorum exemplis, continuato 24. horas sudore, vires in peste non modo conservari, sed augeri; testantibus id cum ægris, tum illorum necessariis: interea dum inter singulos breviores sudores plurimorum vires ita minuantur, ut fatiscant tandem. Quod hic *Sydenhamus* enarrat, hoc luculenter ex *Diemerbroeckio*, sudoris brevioris, frequentiorisque patroni, demonstrari potest.

Die porro sequenti curat vitari frigus omne, indusium ad corpus arefcere, cuncta calide sumere, continuareque Zythogalam: die autem tertio Purgans antiphlogisticum exhibet. Atque hac medendi ratione, inquit, anno a peste proximo compluribus febre pestilentiali correptus, sanitatem restitui, adeo ut ne unus quidem ex morbo eo mihi desideratus sit, postquam eandem exercere inceperam.

Longus fui, sed longus esse debui in hac doctrina, quod summi momenti ea esse videatur, quodque ab egregio *Muratorio* cunctorum Medicorum commendetur tentamini. Aliam quoque parit hæc longitudo utilitatem. Bibliotheca carere Medici Chirurgique solent, quos ad confinia Regnorum Pestis, vel averruncandæ, vel curandæ gratia, mitti contingit; & si Bibliotheca gauderent, eam adeundi, consulendique, deficeret tempus. Opus itaque parvo ac portatili libro erat, in quo quid & dubiis, & arduis in rebus, consulere, seligere, atque admovere deberent, cito tutoque reperire possent.

§. III. Atque ita quæstionem de sudore magnam partem absolvisse mihi videor. Paucis repetam: Sudorem in Peste criticum habuerunt Viri præstantissimi, *Historiæ Pestis* commentatores; omnemque ab ipso mor-

bi initio curam eo verterunt: nonnulli tamen circum-
spectius ac limitatius. Sic *Exp. Chenot. Canon. 4.* „
„ Sudor lenis & constans, Bubonum & Carbunculo-
„ rum exortum & elationem præeuns, aut concomi-
„ tans, nauseam anxietatemque tollens, ægros in tu-
„ to collocat. Sponte ab una parte patet cujus præstan-
tia sudoris, siquidem cunctas notas refert, quibus acu-
torum omnium morborum sudor noscitur criticus esse:
sed ab alia parte, etiam si prævus foret ac symptoma-
ticus sudor, signa, quæ hic requiruntur, adeo præstan-
tia sunt, ut demonstrent jam prægressam coctionem ef-
se, ceterasque evacuationes bonas, &, cum sudore il-
laudabili, virtute laudabilium excretionum reliquarum
redire sanitatem; quemadmodum principio hujus capi-
tis jam monitum fuit.

Diemerbroeckius Canon. I. „ Criticæ mutationes quæ-
„ les cumque, diebus decretoriis incedentes, nihil cer-
„ ti promittebant: omnes enim fallaces erant: & cum
„ his etiam optimis, æque multi moriebantur, quam
„ evadebant.

Et in nota ad hunc suum Canonem. „ Etiam copio-
„ si spontanei sudores, a quibus maximum levamen
„ expectabatur, valde incerti erant: nam etsi morbum
„ aliquando feliciter solverent, multoties tamen in prin-
„ cipio aliquam remissionem afferre videbantur, post-
„ quam longe gravius recrudescebat malum.

Paucis itaque, quod res est, dicamus. Si *Sydenhami*
& *Observationes & Demonstrationes*, Medici pruden-
ti tentamini quondam submittentes, veras illas certas-
que deprehenderint, ac tangant causam, cur alii su-
dores non laudarent, eos solos contemplati; alii iterum
summa laude extulerint, tot bona cum illis signa con-
tuiti, ut etiam vel citra sudores ægri fervarentur; &
quoque inde intelligent, quis verus modus, quod tem-
pus, quis ordo, Methodusque sit, eos eliciendi, qui
certo, qui tuto, qui soli, pestilentiam curent, sudo-
res.

res. Repeto itaque, urgeoque rem, quoad ejus facere possum: ad tantas strages ubique terrarum, ab omni ævo hucusque, a Peste editas, ita ut etiam arte sudatoria, qua pene omnes usi sunt, ex duobus, ex quatuor, ex octo, novem, imo tredecim, vix servatus unicuique sit; si, quod adverruncet benignissimus DEUS! pestis denuo alicubi renascatur, & Medici antiquum ordinem præ Sydenhamianæ doctrinæ exactissima observatione eligant, vere inhumani multis videri, crüdeles haberi, & certo quodam modo homicidæ appellari poterunt.

SECTIONIS II.

CAPUT SEXTUM.

De Venæ Sectione in Peste Speciatim.

§. I. *Absolutis sudoribus, quaestio de Venâ in Peste secanda proponitur; quam multi damnarunt, sive extantibus nondum tumoribus, petechiisve, sive extantibus: multi iterum iis extantibus: nec fere pauciores laudant illam propulsis jam aut tumoribus, aut petechiis, aut uirisque: alii iterum prioribus modo post invasionem horis, primave die; alii per omne tempus morbi: hi tandem parce, illi profuse. Collatis oppositarum partium testimoniis constat, pestiferorum potiore longe numerum perire, non sectâ venâ, aut non profuse sectâ; venâ largissime sectâ, potiore eorum partem servatam fuisse.*

§. II. *Ergo Sydenhamum, suam prononentem Methodum, nihil novi dixisse ex prædictis patet. Recensentur*

Au-

Autores, qui a Peste Phlebotomiam proscripserunt, eorumque Objectiones refutantur. Quæritur denique an Missionis sanguinis aut salubritas, aut letalitas, a tempore morbi, in quo fit, petenda sit? An a natura Nationis, Temperamentive? An a diverso Pestis genio? Respondetur ad questionum singulam.

§. I. **D**E Venæ sectione, & cura sudatoria, multa in proxime præcedente Capite, sed promiscue, & ut ice quatenus id Petechiarum petebat Historia, actum est: res tamen tanti momenti utraque est, ut peculiare sibi poscat singula caput. Primum itaque de Venæ sectione, alias missione sanguinis dicta, aut Phlebotome, Phlebotomia, sit.

Discordia Medicorum, de vena in peste sive secanda, sive non secanda, tanta est, ut necesse sit ab origine rem repetere; ut in quamnam partem descendendum sit, clare assequamur.

Galenus Libr. XIV. Meth. Med. Cap. X. in cura Carbunculorum seu Anthracum, „ sed & incipiendum „ ab incisa vena curationem esse; id neminem latere „ arbitror - - - nec illud obscurum Phlebotomiam, quæ „ ad animi defectum usque sit adhibita, magis hic „ etiam collaturam: nisi tamen aliud quidpiam obftet „ ex iis, quæ veniam incidi vetent.

Idem *Libro de comp. Med. sec. loc. III. cap. II.* eandem laudat in parotide. Ne quid eorum negligerem, quibus se Scriptores Medici muniunt ad sententiam statuminandam suam, *Galenus* hos ambos excitavi textus; nondum persuasus tamen hoc utrosque locos de Carbunculis, Bubonisque pestilentialibus agere, ut *Riverio*, & aliis, placuit.

Si *Criton Epid. I.* pestilentia laboravit, ut Commentatores volunt, & ut probabile est, *Galenus in Comm. ad hunc agrum* judicavit venam in peste, jamque cum petechiis nigris, esse secandam. „ **Admiratio**

„ ne dignum, inquit, cur huic homini, quam primum,
 „ incipiente morbo, vena secta non sit? sed scimus
 „ *Hippocratem* ad plurimos, quos scripsit, ægrotos,
 „ accersitum esse. Quamquam *Galenus* minus recte hoc
 miretur, quandoquidem *Hipp.* meram nudamque dederit
Critonis historiam, citra vel minimum dati cuiusquam,
 quod certe adhibuerit, auxilii mentionem, ex
 hoc tamen textu id recte conficitur, quod *Galenus* cre-
 diderit *Hippocratem Critoni*, qui pestilens fuisse credi-
 tur, etiam nigris maculis a principio extantibus, ve-
 nam, ni serius fuisset advocatus, aperturum fuisse.

Felix Platerus, meticulosus omnino, vulgaribusque imbutus principis, & raro quidem & parce misit Pestilentibus sanguinem; ejus autem candoris fuit, ut referri quid alii cum docerent, tum facerent, oportere ratus, hæc verba addiderit. „ Licet alii extremum ex
 „ illa (*Phlebotomia*) facientes remedium, tam copio-
 „ sa emissionem sanguinis facta, ut animi inde sequere-
 „ tur deliquium, se multos liberasse fateantur, &
 „ nullam aliam nisi vehementem sanguinis detractionem
 „ probent.

Hollerius venæ sectionis potius Patronus, quam Adversarius fuit, eam suadendo in Peste si, inquit, eam omnia permittunt: deinde etsi illam videatur, prodeunte Bubone, condemnasse, mox tamen commendat denuo, nisi quid dissuadeat, eamque, pro varia Bubonum sede, ex variis corporis venis.

Lazarus Riverius, doctrinam quidem scholasticam, secundum communem Medicorum de Vena in peste non tundenda opinionem, digessit, verum pluribus in locis, quasi altius ea sapere, & vitiosam illam hinc inde subolfacere visus, haud tamen ad rejiciendam vel illuminandam satis, vel satis audax, demum quid adversus tralatitiam, trivialemque consuetudinem, proprio Marte excogitasset, strenueque exequutus esset, his verbis tradidit: „ denique silentio hic præterire nefas est
 infi-

„ infione experimentum, quod mihi contigit, in febre illa Epidemica, quæ *Monspeli* sævissime grassata est anno 1623. ita ut media fere pars agrotantium interierit, peculiariter vero, quibuscumque Parotides superveniebant, quod solebat contingere circa 9. vel 11. morbi diem, omnes intra biduum interibant; præcedente, aut eodem tempore accedente delirio, stupore, motibus convulsivis, & pulsu inæquali, frequenti, minuto, & quasi formicante. Cum autem plures hujusmodi vidissem, qui neque Alexipharmacis frequenter adhibitis, neque attrahentibus Parotidi admotis, juvari poterant; animo revolvens si qua via liberari possent a tam certo exitio: Tandem cogitare cepi, ideo Parotides febribus hisce supervenientes sinistri esse judicii, quod locus, in quo fiunt, non est capax totam materiem morificam excipiendi, quæ intus retenta opprimit agrotantem; ac proinde opus naturæ inchoatum solummodo, evacuationibus suppleri posse, *Venæ sectione scilicet, & Purgatione*: cum etiam *Galenus Lib. III. de comp. med. sec. Loc. Cap. de Parot.* in earum curatione phlebotomiam præscribat.

„ Verum huic indicationi maxime obstat summa virium imbecillitas, quæ tanta erat, ut jam versari agrotantes viderentur in agone mortis, quæ etiam brevi succedebat. *Galenus* vero loco citato, dum præscribit *Venæ sectionem* in Parotidum curatione, duas proponit conditiones; nempe si adsit sanguinis redundantia, & vires ferant. Quæ conditiones hic omnino deerant: prius enim sufficienter sanguis detractus fuerat, tum per phlebotomias iteratas, tum per cucurbitulas scarificatas, tum etiam maxima adebat virium ruina.

„ Hisce omnibus perpensis, auream hanc *Corn. Celsi* sententiam, si alias unquam, hic maxime locum habere censui, *multa scilicet in præcipiti periculo*

„ recte fieri, quæ alias essent omittenda: & satius esse
 „ anceps remedium in uno, aut altero experiri, quam
 „ tot ægros certo exitio relinquere.

„ Hoc etiam animos addebat, quod summa illi vi-
 „ rium dejectio ab oppressione magis, quam ab exfo-
 „ lutione, proficisci videbatur. Ideo enim subito vi-
 „ res corruebant, quod natura non posset grave onus
 „ excutere; ejusque imminutione sublevatum iri spe-
 „ randum fuerat.

Exemplo deinde primi, quem sic tractabat, ægri,
 rem confiamabat, cui parvam primo, vires exploratu-
 rus ægroti, Phlebotomiam suadebat, quam facere re-
 nuebat Chirurgus senex & peritus, metuens, ne æger
 ad extrema redactus, in ipsa operatione expiraret. Cum
 a parva Venæ sectione Riverius augeri potius, quam
 collabi vires perciperet, audacter instituit largiorem,
 alteraque die antiphlogisticum purgans dedit, ægrum-
 que servavit. Omnibus inquit tandem, deinceps ægro-
 „ tantibus, quibus succrescebant Parotides, venæ se-
 „ ctio primum idque partitis vicibus, sequenti die
 „ purgatio, a me præscripta est: sicque omnes, DEO
 „ sit laus & honos! quotquot hoc tractati sunt, feli-
 „ citer evaserunt, neque ullus amplius toto illo anno
 „ ex Parotidibus interit.

Notandum denique ex eodem Riverio, si in su-
 perveniente Carbunculo Vena aut antea non esset
 sufficienter secta, aut ferri ultra ab ægro non pos-
 set, eam tamen in loco Anthraci proprio adhuc in-
 stitui oportere.

Transcribere hunc quantumcunque longum textum
 oportuit; doctrinam quippe ejusmodi, animadversio-
 nesque continentem, quæ ingenio, attentione, expe-
 rientia, e Scholarum pulvere, præjudicatisque emer-
 gere opinionibus, cordatum Medicum posse, luculen-
 ter ostendant.

At vero non erat *Riverius* de grege Medicorum primus, qui calcaret hanc insuetam viam. Ducem habuerat a quadraginta jam elapsis annis *Leonardum Botallum*, *Astensem*, Regis Reginæque *Galliarum*, nec non *Brabantiae*, Ducis, Consiliarium, & Archiatrum, in Libro suo de *Vene sectione cap. VII.* sic docentem: „
 „ Ego, ut uno verbo dicam, nullam esse pestem pu-
 „ to, cui hæc (*Phlebotomia*) non possit esse salutaris
 „ supra omnia remedia; modo oportune, & quantita-
 „ te conveniente, usurpata sit: ratus eam aliquando
 „ inutilem inventam fuisse propterea, quod *tardius* aut
 „ *parcius*, quam opus esset, aut quod *utroque modo*
 „ circa eam usurpandum peccatum sit - - - In hac
 „ tanta timiditate, & parca detractione, quæ fieri po-
 „ test, ut quis recte possit judicare quantum ea in
 „ pestilenti morbo prodesse valeat, aut obesse? Non
 „ enim morbus, pro cuius curatione requirebatur de-
 „ tratio librarum quatuor sanguinis, in quo una tan-
 „ tum detrahitur, si hominem interficiat, ideo inter-
 „ ficit, quia sanguis est missus, sed quia non justo
 „ modo missus est, nec forte etiam opportune. Verum
 „ nebulones nequissimi, & ignavissimi, in id semper
 „ culpam convertere satagunt, non quod nocuit, sed
 „ quod per nefas a cunctis vituperari exoptant: aut
 „ si id nequitia non faciant, ignorantia tamen pravæ
 „ dispositionis efficiunt: utraque certe perniciofa, sed
 „ illa magis.

Longo postmodum sermone recensitis iis, quæ *Hip-
 pocrates Lib. III. Epid.* de Peste sive in sanitatem bo-
 na crisi, sive in mortem crisi aut mala, aut nulla,
 abeunte, tradiderat; concludit *Botallus*, & ad bonam
 crisin promovendam, & ad malam corrigendam, & ad
 deficientis vices supplendas, largam conferre, repeti-
 tamque *Phlebotomiam*. His tunc subiunxit: „ Ideo in
 „ morbis pestilentibus, in obsidione *Rupellarum*, in
 „ montibus *Hannonis* abhinc quadriennium, & *Pari-*

„ suis toto hoc biennio, & *Cameracii* anno proxime
 „ acto, in omnibus meis agroribus, qui innumeri fue-
 „ runt, nullum præsentius ac salutarius, reperi, ipsa
 „ larga & tempestiva sanguinis missione. Addidit ad
 hæc Historias variorum pestiferorum, quibus aut Bu-
 bone, aut Anthrace, aut Petechiis, sive carentibus,
 sive scatentibus, multarum librarum sanguinis detractio-
 ne vitam servavit. Inter multos alios Reverendissimum
 Episcopum *Sisternensem*, suum Nepotem, ab exitio re-
 dimere nisi octava, eandemque larga, venæ sectione
 non potuit. Concludit asseverando, „ febrem nullam
 „ pestilentem esse, cui non conveniat æque, vel po-
 „ tius magis, Missio sanguinis, quam Synocho putridæ.
 Neque solus *Botallus*, sed eius coætanæ *Ludovicus*
Septalius, in peste *Mediolanensi* ann. 1573. & 1576.
 secuit venam pestilentibus: in eo tantum adhuc vernæ-
 lis Scholarum affecta, ut primo multum interstingeret
 inter pestem, quam caritas genuisset annonæ, aut quam
 afflasset contagium; phlebotomiam in illa impermissam,
 in hac vero necessariam, esse ratus: ut secundo necdum
 eam, quam & *Botallus*, & postmodum *Riverius*, san-
 guinis copiam detrahare auderet.

Præcipuum autem argumentum, quod *Septalium* per-
 movit, ut adversus Scholarum doctrinam Venam tun-
 deret, suppeditavit observatio, qua vidit, convictusque
 manifesto fuit, erroneam eam esse, falsamque doctri-
 nam, quam propemodum tenebant omnes, quæque
 statuebat Pestilentium debilitatem non a suppressis, sed
 a concisis, contractis, perditisque viribus oriri. „ Quid
 „ æque sanguinem evacuabit, ait peccantem in toto
 „ corpore, tum & dolorem illum intensissimum miti-
 „ gabit, qui sæpe vires dejecit, maxime cum partem
 „ nobilem obtinuerit, tum & materiem evacuativa re-
 „ vulsione a parte retrahet?

„ Sic hac in re, ut & in superioribus experimentis
 „ certari, & contrariis quidem: ego vero in illa Pe-

„ ste

„ ste insigni 1575. & 1576. nostræ hujus magnæ civi-
„ tatis, profiteri possum, ex octo illis Medicis, qui-
„ bus peste infectorum erat cura demandata, inter
„ quos & ego unus eram, cum unus aut alter Venæ
„ sectionem in suis ægris averfaretur, *Fracastorii*, &
„ aliorum dogmatibus insistens, nec ex sententia cura-
„ tiones succederent, mutata sententia, aliorum exem-
„ plis & felicioribus successibus utique excitati, quam
„ præstaret sanguinem evacuare, tandem cognovere.
„ Unde etiam communi consensu in Peste hujusmodi
„ nobile remedium nullo modo prætermittendum esse
„ decreverunt. „ Forte loquitur de *Botallo*, ejusque
fratre; de *Marescotto*, aliisque; qui phlebotomia pesti-
lentialium tunc temporis clarebant: nondum tamen
eorum tam celebritate, quam successu, eo usque per-
suasus, ut sectionem venæ æque largam, atque illi, in-
stitueret; minus reprehensibilis, si quod copia defuerit,
suppleverit frequentia.

Coætaneus tandem *Sydenhamo*, *Michael Synapio*,
scripto reliquit nobis, in peste anno 1679. *Viennam*
dire populante, in Palatio Principis Celsissimi *Radzi-
vil*, Poloniæ apud Augustum Cæsarem Oratoris, con-
tigisse, ut quotquot vena secta esset, hi peste emer-
gerent; utque peste perirent, quibus secta non esset.
qua notabili observatione Autor urfit lectores, ut de-
monstratam a *Botallo*, atque *Sydenhamo*, veritatem am-
plexi non vererentur.

§. II. Nihil ergo novi in curam pestilentiosam in-
vexit *Thomas Sydenhamus*, falsoque, aut Paradoxus,
aut Heterodoxus, aut Neotericus habetur. Illustrans
antiquorum complurium doctrinam, eamque luculentis-
simis testatissimisque exemplis confirmans, ut capite po-
steriore patuit, magnam inivit generis humani universi
gratiam, æternamque meruit memoriam. Hæc novis
argumentis multa postmodum probabunt, præmissa pri-
mum necessaria observatione.

Vix ex capi rationes possunt, quæ Cœtum Medicorum plurimum sæculorum universum permoverint, ut tempore pestis in Phlebotomiam, veluti in populatricem artem, generisque humani destructricem, tam asperis vocibus moti sint, tam diro infecti calamo, tantisque debacchati clamoribus. Si enim paucos exceperimus, *Mercatum, Mercurialem, Forestum, Massariam, Z. Lusitanum, Sennertum, Ballosium &c.* qui aut primis sive horis, sive diebus morbi, parcam admiserint venæ sectionem, aut plethorico admodum in corpore, aut notabili adjuncta partis nobilioris inflammatione, concesserint eandem; omnes fere cæteri, quorum nomina in hoc opere toties recensui, citra vel minimam exceptionem illam condemnarunt. *Fallopium, Hildanum, Platerum, Paraum, Mindererum, Barbette, Diemerbroeck, Sorbait, Walschmid*, alique complures, diserte scribunt, aut cunctis, aut pene cunctis, exitio phlebotomiam fuisse. Idemque Pestis Historiographi confirmare videntur. *Bernadinus Christini* in *Historia Pestis Romanæ* anni 1656. adeo perniciosam eam fuisse notat, ut Eminentissimus Cardinalis *Gaspaldi*, rerum tunc temporis ad pestem spectantium Director, summusque Præfectus, dixisset jam *Gabrielis Fallopii* observationum patere veritatem, historiæque, quam *Fallopium* tradiderat, Medicis cuiuspiam, qui in milliario hominum numero cum venam in peste tudisset, in vita vix binos servasset. *Muratorius Libr. II. Cap. IV.* perhibet in peste *Mutinesi* anni 1630. typis editam Admonitionem fuisse, quæ assereret experimento multiplici, variis in urbibus capto, Phlebotomiam, Alique purgationem, & absolutam cunctis intulisse necem, & probabiliter numerosos illorum, qui ceterum servati fuissent, sustulisse.

Jure itaque suo mei me Lectores rogabunt, ut ex narratis suspicio est, an forsan a varia morbi aut die, aut hora, Venæ sectionis infortunium, fortunave de-

pen-

pendat? II. An a natura cum Nationum, tum Temperamentorum, tum quoque consociantis forsitan se alicujus cum Peste morbi, diversitas adplicati auxilii petenda sit? III. Num varia prorsum Pestis natura, siue genius, adhibitorum præsidiorum & varios efficiat, & oppositos effectus?

Primam quæstionem solvere quidem conati sunt *Mercatus*, *Mercurialis*, *Massaria*, *Z. Lusitanus*, *Capivaccius*, *Gemma*; præcipuè vero *Sennertus*, & *Forestus*: ita quidem ut hic intra primas duodecim invadentis morbi horas, ille saltem ante Nocthemeri elapsam spatium, proficuum censuerint phlebotomiam, ultra id tempus neutiquam. Sententiam confirmare suam posterior annititur exitio universorum, quibus in peste *Delfensi* anni 1559. post elapsam diem naturalem tunsa vena fuisset. Hanc vero explicationem explosere *Paraus*, *Barbette*, *Hildanus*, & presertim *Diemerbroeckius*, asserentes priores duo in suorum temporum pestilitate iterata, hic in *Neomagensi*, absolutum omnium Venam sectorum interitum.

Aliam problematis solutionem periclitatus est *Sydenham*, observata morte eorum omnium, quibus in peste *Londinensi* missus sanguis fuisset, exorto jam aut *Bubone*, aut *Anthraxe*, aut *Exanthemate*: at vero, extantibus jam hisce omnibus, Venæ sectione eripi e mortis faucibus pestilentes, numerosis experimentis demonstrarunt *Septalius*, *Botallus*, *Riverius* &c. ut supra patuit.

Hucusque igitur determinatum Phlebotomiæ tempus non videtur ejus in causa siue perniciæ, siue salutis esse.

Alterum problema solvere annisus idem *Sennertus* est, una cum Eminentiss. Cardinali *Gastaldi*, *Pestaluzzi*, *Fornès*, & aliis. Dum enim *Sennertus* legisset fortunatas *Septalii* in peste *Mediolanensi* factas per sanguinis missionem curas, populi *Mediolanensis* Plethoram

ram censuit in causa esse infecutæ mortis non secta vena; eadem vero secta, redivivæ salutis. Nunquid bene? Profecto quod *Sennertus*, quemadmodum *Germanos* suos, voraces homines, & potatores, multum plethoricos experiretur, tales & cives *Mediolanenses* esse censuerit, in eo experientiam non consuluit. Verum hac etiam ipsi concessa temperamentorum oppositæ naturæ gentis paritate, periisse saltem *Septalius* cum sociis suis adnotasset eos, quibus Vena non plethoricis secta fuisset, & cum ceteris observatis suis cum posteritate necessaria communicasset. Sed præterea, an tempore *Cristini*, eoque *Fallopium*, nullus civium *Romanorum*; an in diebus *Paræi* nemo *Gallus*; an *Diemberbroeckio* florente, ne unus quidem *Belga*, plethoricus erat, eo quod vel omnes, vel prope omnes, vena in peste tusa, interirent?

Ad alteram *secundæ questionis* partem, num scilicet inflammatorii morbi in peste aut præsentis, aut absentes, curam Venæ sectionis salubrem, letalemque efficerent? *Sennertus* idem, multique alii, arbitrati sunt differentiam hanc petendam esse a symptomatis inflammatoriis sive Meningum Cerebri, sive Pulmonis, sive Laterum, Viscerumve abdominalium; ita ut, qui talia paterentur, venam quidem secarentur, verum cum non ob pestem, sed ob inflammationem secti essent, passim reconvalescere.

Hoc ipsis concedere arduum est. Si & Pestis corpora torquet, & inflammatio, materiei pestilentis progenies, duo morbi occupant illa, quorum alteruter par est necando. Alter horum Phlebotomiæ frequenter cedit, adeoque eam poscit: alter autem, unanimi ipsorummet sententia, in mortem Phlebotomia ruit, ac propterea hanc repudiat. Quid tandem proderit sic a morbo inflammatorio curari, ut simul ratione pestis infallibilis sequatur letalitas? Quod autem ipsa pestis materies sanguinem phlogisticum efficiat, observatum reli-

reliquorum inflammatoriorum Morborum in Peste silentium, sæpe observatum, evincit abunde. Ita ut non magis hujus, quam prioris problematis, admittenda, approbandaque solutio sit.

Ad tertiam *secundæ questionis* partem dico, Nationum quidem differentiam in morbis contrahendis non raro deprehendi, & vel modicam eandem, vel eximiam esse. Prout ex *Italorum* Scriptis & Narrationibus concludere fas est, Pleuritis ac Peripneumonia & crebrius, & maturius *Italos* conficiunt, quam plures alias Nationes. Vulnera Capitis alia atque alia in Regione curatu sive faciliora, sive difficiliora esse, præclarorum Chirurgorum scripta testatum reliquere. Hydropes in regione sicca calidaque cum rariores sunt, tum curabiliore, quam in humida frigidaque: verum hæc licet sponte facti, non ideo hæc per experimenta in Peste patere persuasi sumus. In peste *Mediolanensi*, quæ est moderatioris Cæli Regio, in ea *Florentiæ*, quæ calidioris aëris civitas est, in illa *Siciliana*, quod Regnum, ardenti *Africæ* vicinum, peræstuosum est, in *Gallia* multo frigidior, in frigida *Anglia*, *Belgioque*, apud gelidos populos *Boreales*, neque Pestium naturæ multum differunt, neque præsidiorum effectus. In *actis Lipsiensibus* anni 1727. video notissimum *Timoni* magnam afferentem paritatem pestis *Constantinopolitanæ* cum ea *Neomagiensi*, quam apud *Diemberbroeckium* legerat: convenit quoque cum peste plerarumque *Europæ* Regionum *Algerina*, cujus supra memini. Si itaque neque Pestes ipsæ inter sese differant, si quoque *Venæ* sectio æque in calidis, quam in moderatis, quam in frigidis Cæli plagis, homines a morte eripuerit, non video a Nationum differentia aliquam demonstrari ratione pestis disparitatem.

Quæstio tertia, proponebat an Pestis alio atque alio tempore haud esset mutata, sic ut præ mutata ejus natura Phlebotomia, quæ prius a morte vindicaverat homi-

hominem, eundem nunc præcipitaret in mortem, viceque versa?

Si in singula quaque Peste, diversis in locis, diversisque grassata temporibus, Phlebotomiæ sive occidentis hominem, sive servantis, adornata Historia esset, responsio facilis daretur; quæ nunc aliunde quærenda. Observationes factæ sunt in eadem pestilentia, in qua Medici, atque Historiographi, & curam debiti sudoris, quæ illis acceptior familiariorque erat, & curam Missionis sanguinis, quæ huc usque rarior, pari encomio extulerunt. Non videtur ergo a diversa Pestis natura diversæ methodi pependisse effectus. Quod vero plus stringit, in Peste *Florentina* anni 1630. 1631., notante *Muratorio*, Medicus *Rondinelli* suas curas jactabat, *Theriaca* factas & *Oleo Magni Ducis*; quod quid revera esset non exposuit quidem, calidioris autem naturæ esse docet, quia comparat, cum oleo dicto *Mathioli*. Porro hoc utroque remedio egregias laudat virtutes in iis, quorum non nimis ardens esset pestilens febris: dum ipsissimo tempore, locoque, *Filibertus Marchinus* methodum *Panormitanam* sibi præclare cessisse testaretur; *Panormitanorum* porro Methodus plane antiphlogistica erat, Emulsis constans, Lacte, Limoniorumque succo. Auxiliorum ergo, natura oppositorum, laudati utrinque effectus, tam in eadem ejusdem loci temporisque peste, quam in diversa locorum temporumque, præterquam quod responsum tertium II. Quæstionis confirmat, abunde docet ejusdem semper naturæ pestem esse, neque ex natura sua mutata efficere, ut antiphlogistica Methodus uno tempore juvet noceatque alio; siquidem tam in eadem, quam in diversa; tam in eodem anno, quam in remoto integro abinde sæculo, ex æquo profuerit.

Si itaque neque a varia morbi aut hora, aut die, qua facta Phlebotomia fuerit; neque a diversitate sive temperamenti, sive adjuncti morbi, sive regionis; neque

que tandem ab ipsa Pestilentiae natura, phlebotomicum hoc dissidium exponi, componique possit; nihil reliqui est, nisi ut Medici, in peste *Muratorii* salubre ac providum consilium sequuti, experimenta hæc accuratius ad incudem revocent, magnique *Sydenhami*, aut meram curam antiphlogisticam, aut eandem hidrotica mistam, sedulo imitentur; quo tandem num ceteris præferenda, postponendave sit, liquido constet.

Et sane multæ eo nos adigunt, gravesque rationes. Sudatoria Methodus ab omni ævo præcipuas in Peste egit partes; rariore admodum aut tempore, aut loco, aut ægrorum in numero, moris Phlebotomia fuit; rarissimo composita *Sydenhami* methodus: interea Necrologia docent singulis fere pestilentiis pestilentiosorum numerum longe maximum occubuisse satis. Relinquitur ergo ut qui medendi modus institutus quidem longe rarius, verum a summis Viris multo præstantior inventus est, universalius postmodum, accuratiusque admoveatur. Sed de hac re mox pluribus.



SECTIONIS II.

CAPUT SEPTIMUM.

De Scarificatione Pestiferorum.

- §. I. *Animadversio in omnes fere Medicos, qui Phlebotomiam damnantes in Peste, Scarificationes tamen, nec non Hemorrhagias nasales, hemorrhoidales, uterinas, imo ipsos Fonticulos, impense laudarunt. Conclusio inde, & augurium felix.*

§. I. **I**nvitus hujus Capitis materiem, coactusque, aggredior. Vereor enim ne, quæ scripturus sim, Arti nostræ minus decora videantur; neve contumeliosi in Medicinam, quæ longe maxima mortalium, Eruditorum saltem, pars est, convicia in illam congerant. Honesti tamen Viri est ea, cujus publicam salutem interest, candidè pandere.

Medici omnium, etiam remotissimorum sæculorum, in dies usque nostros, qui vel dubitanter, scrupuloseve, vel audacter & ignominiose, de Venæ sectione in Pestilentia scripserunt, omnes, si ex universa illorum serie vix unum alterumve exceperis, unanimi voto admittunt, laudant, commendantque eam sanguinis evacuationem, quæ scarificando fit; idque sic, ut qui ad certam diem horamque ita limitaverant Phlebotomiam, ut mortifera postmodum esset, hanc quovis morbis tempore concesserint: ut qui Venæ sectionem non, nisi & parcam, & raram admiserant, Scarificationem & profusam suaserint & crebram: ut tandem omnes, qui idcirco Venæ sectionem damnaverant, quod vires, quas debiliores percipere pestiferi solent, prorsum conjiceret, jam deposito quovis debilitatis, a perdita cruoris copia oriundæ metu, scarificando corpora sanguine evacua-verint frequenter, abundeque.

Scarificationis hujus Advocatos enumeraturus, deberem cunctorum pene nomina recensere, qui unquam de Peste commentati sint; *Galenī*, ajo, *Oribasii*, *Æginete*, *Fracaſtorii*, *Foreſti*, *Mercati*, *Lommii*, *Fernelii*, *Mercurialis*, *Capivaccii*, *Willisii*, *Riverii*, &c. ita ut in tota Bibliotheca medica vix duos, tresve invenia-tis, qui dubii de illa scripserint.

Interim pluribus ineptum, risuque dignum videbitur, debacchari in missionem sanguinis, eamque laudare; necis indubiam appellare causam, & vitæ servatrici ornare encomio.

Annuerem illis, nisi Viri hi præclari justam tantæ discrepantiæ rationem existerent autumassent. Quotquot illorum consulueris, uno ore cuncti respondent *primo*, Phlebotomiâ a peripheria corporum ad centrum liquida trahi, scarificatione neutiquam. *Secundo*, Peltiferis, cum passim sufferant ingentem debilitatem, Venæ sectionem, quod vires demere soleat, detrimentosam summopere esse; cum augendo debilitatem, tum vires ad expellendum per cutem venenum minuendo: Scarificationem e contrario vires non infringere ægrorum; adeoque hanc in projectarum corpore virium tutam, perniciosam alteram esse.

Primam hanc rationem ex *Galeno* probant omnes, licet non desint inter Venæ sectionis in peste instituentæ Patronos, qui contrariæ prorsum sententiæ *Galenum* fuisse asseruerint. Quid si *Galenus* docuerit utrumque? Sane *Septalium* haud inepte probare voluisse arbitror sententiam a *Galeno* traditam utramque fuisse, priorem *Lib. VI. de san. tuend. Cap. IV.* posteriorem *Cap. X.* Et *Galenum* in eruptione nigra morbi sive pestilentiosæ, sive perquam maligni, Phlebotomiam necessariam judicasse *Cap. VI.* ostendi. Profecto nihil evidentius est. Si æger vera debilitate laboraret, quo plus illi demeres cruoris, eo potentius motum cordis, arteriarumque, ab intimis corporis penetralibus versus ejusdem circumferentiam imminueres, ita ut demum roseum ejus colorem pallor exciperet, caloremque algor. At vero si homo debilis est a copia sanguinis, arteriarum cordisque virtutem superantis, illique, verbi causa, miasma aut variolosum aut morbillosum, vix figere sedem in cute queat, sanguis de vena fusus, idque forsan iterato, restaurans animum eo usque vasa inter & humores æquilibrium, efficit ut brevi corporis universa superficies harum papularum alterutra contegatur. Vere itaque *Galenus* docuit Venæ sectionem & adducere ad cutem, & abducere: Medici vero in Phlebotom-

botomix a cute abducentis *Galeri* doctrinam, quam in adducentis sententiam, proniores, inique sane eam in percuranda Pestilentia proscripserunt.

Negaverunt autem abducentem Phlebotomix proprietatem in Scarificatione deprehendi. Quo vero fundamento? In scarificatione æque arteriæ sauciantur, quam venæ: innumeris utrarumque ramulis vulneratis, proflire sanguis solet lentior quidem, sed admotione cucurbitarum protractiore copiosus; copiosum autem in peste volebant. At vero quemadmodum in Phlebotomia fit, ita & in Scarificatione: fit revulsio a remotiore parte, & in propiorem attractio. An quia lentior fluor, ideo non avertit a superficie corporis? Et revellere illum censeo, & derivare, uti de Venæ sectione dictum; prout vera adest virium projectio, aut mentitia. Verum an quod hic una ex arteriis sanguis fluit, ideo minus a cute ad interanea venenum rapit? Cor non minus debilitabitur jactura emissi a se per arterias cruoris, quam ejusdem ad se per venas redituri defectu. Cumque perpetuo damnarent sectionem Venæ, si attendissent se Venas innumeras scarificando tundere, hanc præ illa debuissent in peste proscribere.

Alteram rationem a debilitate petierunt, quam agebant a Phlebotomia gigni, hancque ideo perniciosam Pestilentiosis esse, quod una cum peste ingens virium debilitas illos invaderet. Huic autem opinioni partim mox responsum est, partim Cap. VI. Teste *Sydenhamo*, Practicisque universis, nunquam illa commentitia debilitas, ex æquilibrio inter solida & fluida, ratione exabundantis fluidi turbato nata, feliciter in requisitum robur transit, quam liberiore effusione cruoris: hæc porro debilitatis, inveram falsamque distinctio, minus notata Veteribus, multisque Recentiorum neglecta, plurimos leto dedit.

Conficere igitur ex omnibus debeo, quæ adsit in Peste debilitas, eaque crebro ingens, hanc ab humorum
sive

sive copia, sive, quod effectu eodem redit, rarefactione, erundam esse: nocuisse propterea Phlebotomiam in tot Pestilentiis, quod & rara illa, & parca, institueretur; id quod in Acutis, etiam non pestilentius, quotidie observari datur. Hinc secundo, unanimi cunctorum voto laudatas scarificationes esse, quod cum falso crederentur neque a peripheria ad centrum convergere humores, neque nocere, frequentes licet, abundantesque adhiberentur, ingentem solverent humorum de corpore copiam, sicque & simulatam debilitatem emendarunt, & naturam coctioni aptarent. Omnis Pestis historia, tam operose hucusque relata, hanc conclusionem nobis necessario format, quam suo tempore *Septalium* & *Riverium*, formantes audivimus.

Confirmant eandem haud pauca, quæ visa sunt Auctoribus, qui illa tradiderunt, paradoxa.

Ac primo quidem *Plateri*, Phlebotomiæ in pestilentibus oforis, testimonium, Cap. VI. relatum., „ Licet „ extremum ex illa (Phlebotomia) facientes remedium, „ tam copiosa sanguinis emissionem facta, ut animi inde sequeretur deliquium, se multos liberasse fateantur, & nullam aliam nisi vehementem sanguinis de- „ tractionem probent.

Secundo, testimonium *Angeli Belliciochi*, cujus de Peste conscriptum italice libellum nobiscum communicavit *Joachim Camerarius*. Pestem Venetam anni 1576. describens; eandem scilicet, de qua egit *Hieronimus* uterque *Mercurialis* & *Capivaccius*, „ deprehensum sit „ militer fuit, inquit, tum maculas, sive petechias, „ nigras deteriores fuisse, quam est Carbunculus, vel „ Bubo; quod in aliis Pestilentibus contrarium observabatur; illisque Venæ sectio admodum nocuit. Hucusque convenit cum duorum laudatorum Virorum opinione: en autem quid illi extorsit Veri amor: sic „ applicatio Hirudinum ad hæmorrhoidas venas plurimum profuit.

Tertio, in peste non modo Phlebotomiam, sed cum *Minderero*, aliisque, & narium Hæmorrhagiam, & Catamenia feminarum, damnans *Diemerbroeckius*, abesse tamen non potuit quin traderet posteritati observationem, quæ illum profecto, ni præjudicata Veterum opinione abreptus fuisset, in veram pestis, ejusque curæ, perduxisset notitiem. „ Qui pestem, inquit, an- „ ni 1568. describunt, testantur tum temporis febres „ pestilentes fluente ex naribus Sanguine copiosissimo, „ eoque florido, maxima ex parte fuisse judicatos; & „ quamvis ad Leipothymiam usque proflueret, fere „ omnes tamen, quibus hæc crisis accedebat, fuisse „ sanatos.

Quarto, *Paræus* hostis Venæ sectionis in peste implacabilis, *Paræus*, ajo, qui evacuationes quasvis sanguinis damnabat, tamen *Libr. XXI. Cap. XXV.* largioris narium hæmorrhagiæ emolumenta contemplatus, eandem aut narium icalptu, aut validiore emunctione, aut setæ equinæ irritatione, *profusam* in Peste provocare hortatur.

Quinto, An forte huc quoque quidquam confert *Hildani*, omnis evacuationis in peste proscriptoris, observatio, *Cent. IV. obs. 23.* „ Neminem, quod notandum, eorum, qui Fonticulos in cruribus & brachiis „ habuerunt, præter unum aut alterum summe caco- „ chymicum, peste obiisse memini. „ Quamvis enim, quæ inde fit, modica, sit lentaque evacuatio, quia tamen & perennis est, & ejus auxilio humorum fit jugis ad hos locos determinatio, primordia infectionis una eliminare de corpore potest, *Hildanus* in hac peste, scilicet *Lausanensi*, uxorem suam curandam habuit, filios duos, totidem filias, unamque famularum. Hanc, filiasque, sublatis peste luxit, filios cum conjugē servavit, ipseque per omnia sospes „ proinde Fonticulum „ præsentaneum Præservativum esse, inquit, tempore „ pestis, cum in aliis multis, tum etiam in memetip-

„ so, observavi. Ego enim duos habeo, alterum in
„ brachio sinistro, alterum in poplite dextro.

Diemerbroeckius cum in Historia CX. similem curam
felicem notasset, sic perrexit: „ Fonticulos ad præser-
„ vationem a peste inter præstantissima auxilia semper
„ habuimus, & multoties observavimus, si quid vene-
„ ni jam intus conceptum esset, illud per eosdem vel
„ sponte naturæ, vel medicamentorum ope, insigniter
„ & cito evacuatum fuisse; quod ex prædicta Historia
„ manifesto liquet. Illud ipsum de Fonticulis ab ex-
„ perientia testantur etiam *Mercurialis, Hercules a Sa-*
„ *xonia, Georgius, Hildanus, Joannes Arculanus*, alii-
„ que magni Practici. Potior itaque Autorum aut
Historiographorum pars hoc Fonticulorum privilegium
confirmat; pars minor dubium habet; minima negat.

Si itaque Venæ sectiones cum modicæ, tum raræ;
si rarus sanguinis aut per nares, aut per uterum, aut
per hæmorrhoidas fluor, a morte non vindicaverint pe-
stilentes; si & abundans, & frequens idem sanguinis
fluxus, sive de faucibus per lanceolam vena, sive de
quocumque alio excretorio loco, exitio pestiferos eri-
puerit; nemo, opinor, hanc meam conclusionem ini-
que feret, statuentem Pestem morbum esse, in quo vel
Rarefactio, vel Moles, Plethoricos humores efficiens,
debilitatem veram non faciat, sed simul et adeoque
sanguinis missionem quamcumque, sed abundantem, sed
frequentem, sed usque in notabilem morbi emendatio-
nem iteratam, palmarium esse pectus præsidium.

Hanc porro conclusionem solam, & minime illi con-
trariam, posse me, debereque conficere, ex testimoniis
omnium Autorum, haud secus Phlebotomiæ osorum,
quam patronorum, quos ætæ numero se operoseque lau-
davi, facile quisque per se perspicit. Missi quippe, cui
divina clementia non contingit unquam terribile id Cæ-
li flagellum propius intueri, tacendum fuit in hoc O-
pusculo: eorum vero unice loqui fuit, qui calamitosiss-

istis interfuissent temporibus; qui pestiferis adstitissent; qui pestem in pelle propria efflorescentem, propriaque viscera urentem, experti essent; qui eandem luminibus ipsis suis contemplati essent, auribus hausissent, tolerare in se suisque debuissent; denique qui fideli calamo, sinceraque mente, hæc & chartis mandassent, & seris dicassent, consecrassentque, nepotibus.

Absoluturus hoc caput, auguror fore, ut brevi omnes Medici laudatas hucusque sanguinis evacuationes in peste admissuri facile, suoque comprobaturi calculo sint, si Bibliothecam Medicam de Variolis, & Morbillis sic consuluerint, ut eandem ego de Peste contului. Nonne enim ab omni ævo eadem argumenta Viri spectatissimi protulerint, ut ostenderent Phlebotomiam in Variolis, Morbillisque, periculi plenissimam esse? An ulla Medicorum sententia, aut graviore autoritate proposita, aut religiosiore observantia culta fuit? Li vero, qui excutere jam ceperant scholarum pulverem, quam titubanter processerunt, quam meticolose, quam sæpe retrograde! Bonus *Diemerbroeckius* in sua Variolarum ac Morbillorum Historia, Venæ sectionem tandem concedens, ab illa primum pueros excludit, neque eam admittit in Adultis, nisi hi & plethorici fuerint, & nulla experti popularum rudimenta. Cum itaque horum morborum per bonam Phlebotomiam cura longe tutior, salubriorque, reddita sit, exantlatis a præclaro *Sydenhamo*, ingentique *Boerhaavia*, laboribus; cumque variolarum Inoculatoribus ipsis Artis nostræ hac in parte perfectionem longe majorem debeamus; cum tandem meliora certioraque cum edocti, tum experti, scholæ antiqua argumenta contra Phlebotomiam in Variolis hæud minus inepta, quam perniciosa esse deprehenderimus; vix video, cur ratione, experientiaque celeberrimorum Medicorum, qui sanguinis missioni in Peste patrocinati sunt, ejusdem in Peste & parem, & majorem necessitatem demonstrari, tandem omnes non agnoscamus.

SECTIONIS II.

CAPUT OCTAVUM.

De Hidragoga Methodo.

§. I. *Methodus damnanda, tam rationis pondere, quam eodem argumento, quod olim in laudem Phlebotomiae prolatum est: testimoniis enim litigantis utriusque partis, collatis, constat prolectis in Peste sudoribus, longe maximum infectorum periisse; methodo autem antiphlogistica servatum esse longe maximum numerum. In Sydenhami altera methodo tamen non rejicitur. Hæc altera Sydenhami methodus ante ipsum multis jam probata fuerat. Hecqueti de opio in Peste sententia non est verisimilis.*

§. II. *De Purgante & Emetico in Peste hic agere necesse non esse ostenditur: sed Lectorum attentio excitatur in Problema positum a Cl. Mortono de utilitate Corticis Peruviani Pestiferis exhibiti.*

§. I. **N**ON multis hic opus est, sanguinis missionis & abundantioris & crebrioris utilitate necessitateque demonstratis. Si tamen quis, aut ea, quæ Sydenhamus, forte coactus, aut arbitrio suo motus, hidroticam methodum explorandam censeat, is convictus hinc damni ineptitudinisque consuetæ methodi, illinc certus de Sydenhamianæ præstantia, unice hanc revocare ad incudem potest. In hac vero opera querendum foret, sitne absolutæ necessitatis calidis aromaticis pellere sudores? Cum enim Sydenham hisce sudores pellens, pro temporum more, id quod calore hæc

medicamenta peccarent, cum Phlebotomia, tum refrigerantium potuum copia, correxerit, sicque profuerit; merito, annon præstaret methodo, quam supra laudavimus, *Panormitana*, sudorem elicere? Si *Cl. Viro Fornès* fides, etiam multorum *Turcarum* hic mos est.

Confirmare hoc videtur *Diemerbroeckii* Historia XLII. cum ipsius adnotatione. Copiosum Acetum, sive cum *Theriaca*, sive sine ea, sed cum sale marino mistum, sive etiam purum, *multos*, ait, eorum exitio eripuisse, quos emere pretiosiora vetabat egestas; pari modo quo *Sydenhamus* explicabat, cur a pessimis Variolis tam pauci divitum servarentur, pauperumque tam pauci perirent? In mea Juventute gens *Batava*, necdum oblita pestis, semper religiose, auroque contra carius, servabat acetum optimum, cui flores *Calendulæ* essent infusi, in proximum invadentis pestilentiae, sudore expellendæ, præsidium. Et veteris scholæ adeo tenax *Mindereus*, candide tamen asseruit, si oleo *Vitrioli* destitueretur, quæ pestilentiam curaret, ignorare se prorsum.

Prætulit equidem calidas dictas officinarum confectio-
nes, post multos alios Scriptores, *Cl. Hecquet*, idque contenti in iisdem *Opii* gratia, veluti & averruncantis pestem, & curantis. Merito clari in arte Viri generaliore hanc sententiam restrinxere. Et ut unicum modo argumentum proferam, quid evidentius hanc sententiam infirmat, quam *Thracum*, gentis opium copiosissimum continuo vorantis, Pestilentia præ cunctis mortalibus frequentissima, annuaque? Si quis autem pestis hujus perpetuitatem in gentis socordiam, incuriamque, ne propagetur, referendam esse autumet, huic respondeo primo, si opio tanta, quam perhibent, inesset prophylactica virtus, utique perpetua ejusdem ingluviës tutos a peste *Turcas*, securosque præstaret. Secundo, *Turcas* damnamus tam delides in peste, tam sinistros revelatæ divinæ Providentiæ interpretes; at

vero

vero illam horum desidiā haud ita pro causa propagantis se pestis, agnoscimus, quin una eosdem non curantia sua progressum pestis, certo quodam modo, plus sistere, quam sæpe nos nostris sive præcocius, sive præposteris curis, arbitramur. Legite *Ambr. Paræum*, inspicite *Chenottum*, revolvite præcipue fidelem cunctorum fere qui de peste scripserint, Autorum collectorem, *Muratorium*; excutientur vobis lacrymæ, eas & misérias, & calamitates, & planctus, pestisque attendentibus progressionē, quas bona intentione conditæ Leges, imprudenti, ac immoderata executione, genuerunt: terroresque inde ortos, metusque ingentes; quos omnium scriptorum experientia, pestis cum fautores deprehendit, tum promotores: præterea inhumanos ægrorum neglectus, inauditam, qua tractentur barbariem, arbitrarias pestis, quæ sæpius non adest, suspiciones; inedia denique, & famem, quæ vulgo pestis seu verum, seu falsum rumorem, a tergo insequuntur. Annon gravissimis his incommodis exemptus *Thracus* est? Nonne ea fruitur animi corporisque tranquillitate, ea cum familiæ, tum necessariorum suorum auxilia, ea rerum requisitarum abundantia, ut plurimam partem ærumnarum ignoret, quæ & in Peste, & præter pestem ipsam, politiores *Europæ* nationes plectere solent? Utinam demum inter confusam, importunamque sollicitudinem, & Turcarum desidiā, medium inveniretur, quod tenerent beati! Utinam discerent eo modo reptabundæ luis cognoscere sistereque progressum, ut luctuosas populorum calamitates non augerent luctuosioribus! Publicæ salutis cura, haud secus christiana charitate, quam zelo illuminato animata, hanc exoptatam viam & inveniet, & capeffet.

Hanc animadversionem nobis extorserat *Hecqueti*, de opii specifica in peste virtute, opinio: *Hecqueti* ajo, viri ceteroqui nonnisi reverentia nominandi, Religionis, Virtutisque, haud secus quam Medicinæ scientia,

cultuque, clari: quem licet, invitum forte, fervor disceptationis hinc inde a vero paucillum abduxerit, pulcra tamen, quæ pari candore, ac sapientia, reliquit posteritati, merito æternitati consecrabunt: eumque ipsum cui ratione opii in historia pestis consentire non debui, ad confirmandam meam mox prolatam animadversionem laudare debeo, ut qui anno 1722., *Tractatu Parisiis* editio, detrimenta salutis publicæ, periculaque, vivis coloribus depinxerit, quæ, in peste, *violenta*, seu *coacta*, gignant perpetuentque *Hospitalia*.

Ut autem e diverticulo in viam; cum sudatoria remedia ea, quæ communi more multos & excitant, & ingeminant sudores, minime prohibuisse constiterit, ne pestilentiosorum potior pars succumberet fato; quid causæ, quod a tot retro sæculis, in nostros usque dies, obtinuerit in Medicina principatum?

Causa hæc ab ea famosa Scholarum opinione petenda videtur, quæ a Centro ad Peripheriam (ut loqui amabant) movendos humores esse iis volebat in morbis; qui vitale robur fere suffocantes, vario aut Phymarum, aut Exanthematum genere, cutem deturperent: unde in Peste, in quolibet Exanthematum genere, Petechiarum, Miliarium, Scarlatinorum, Morbillorum, Variolarumque, methodo hidrotica nihil solennius fuit: sic ut eadem instituta, & omnes crederetur mortis e faucibus eripuisse, quos reliquos fecisset pestis; & cuncta ea in mortuorum frequentia præstitisse, quæ salutem, si sperabilis fuisset, restituisent.

At vero quam vana hæc opinio sit, quam levis, quam detrimentosa mortalibus, quemadmodum ex prioribus constat, sic & confirmatur ejusdem condemnatio laudatissima præstantissimorum Virorum praxi, qui *Sydenhami* ac *Boerhaavi* vestigia prementes, sanguinis missionem, eamque cum largam, tum repetitam, instituunt, quando Exanthemata quæcumque morbi conjunctam non habent remissionem: quique eadem sua

methodo antiphlogistica, alimenti, medicamenti, atmosphaeræ virtute, adhibita, ne Petechiæ, neve Miliæres eruptiones superveniant acutis, præpediunt; quemadmodum clarorum horum virorum & doctrina imbutus, & animatus exemplo, a tot retro annis haud docui duntaxat, sed demonstravi. Confirmavit hoc Responsio Academiæ Regiæ Suevicæ data, ad Quæstionem ab illa Academia anno 1769. proposita, & præmio ab illa decorata, Quo pacto scilicet omne Miliarium genus tam in puerperis, quam in cæteris hominibus, & præveniri possit, & curari. Ex lingua Suevicæ in Gallicam translata hæc Responsio est, editaque Leydæ 1770.

§. II. Purgationis & Vomitorii non memini hucusque, neque illis Lectorem morari mens est; cum Medicorum plurimorum scriptis merito condemnentur nisi excipias alteram Sydenhami methodum. Attentionem autem summam R. Mortoni observatio meretur, quam in *Appendice Libri de Proteiformi Febris continens genio* pag. 160. communicat. „ Quotquot enim
 „ ex peste evaserunt, utpote mitiore veneno infecti,
 „ vel robore spirituum vegetiore præditi, quamprimum Naturæ suæ sponte, vel artis adminiculis, Buhones, Parotides, Carcinomata, maturefcentia, vel quævis alia Victoriæ monumenta, seu Trophæa, de hoste constituere ceperint, singulis, vel alternis diebus, in seipsis percipiebant symptomatum Exacerbationes, & Remissiones, statis horis alternatim sese excipientes. Unde minime temeritatis incusandam esse censeo *Facult. Med. Neapolitanam*, quæ referente *Cl. Bado Anastas. Libr. I. cap. 20.* etiam Corticem Peruvianum in Pestis curatione adhibendum iussit. Siquidem ad hoc ipsum venenum, quoties mirus esse contigerit, delendum, & deinceps ad curationem accelerandam, plurimum conferre queat. „ Legendus omnino *Viri exp. Chenot. de Peste*

liber v. pag. 142. ad. 146. Inchoata ab illo quædam experimenta, quæ perficere temporum iniquitas veruit, spem hujus remedii in Peste satis cum mature, tum copiose, adhibiti, non mediocrem faciunt. Egregie igitur pro more *Hecquet App. de Peste cap. 77.* „

„ At qui turbationum sanguinis, aut febris exacerba-
 „ tionum, *Sedativum* singulariter prælidium, confes-
 „ sum omnibus, compertumque habetur *Cortex Peru-*
 „ *vianus*, cujus energia in Variolosis febribus *Syden-*
 „ *hamo* nota fuit, *Mortonaque* comprobata; quin
 „ imo cujus potentiam adversus Malignas febres exper-
 „ tus apud *Italos* Medicus nobilis (*Torti*) illam ope-
 „ re singulari, singulariterque bono, evulgavit: unde
 „ mirari subit quo malo artis, & ægrotantium fato,
 „ oblivioni relictus fuerit bonorum tam dives fundus,
 „ ad felices curationum exitus, sub illa pestis ferita-
 „ te, (*Massilie*) quæ eruditissimos hodie luit me-
 „ dentium conatus, præsentissimaque temsit remedia.
 „ Anne discriminis plus ab illo medicamine impende-
 „ bat, jam præclaro felici suo curationum exitu, quam
 „ ab emeticorum, purgantiumque furis, sudorifero-
 „ rumque incendiis, quibus tandem ultimum *Vale* di-
 „ cendum fuit?



SECTIONIS II.

CAPUT NONUM.

*Varia Quaestiones & Opiniones circa Pestem
Recensens & Examinans.*

§. I. *An Pestis immediatum Dei flagellum? An in Africa, ac praecipuis in Aegypto, ejus Natales? Num citra contagium affici Peste homo possit? Ipseque homo vera Peste laborans, an alios semper inficiat? An nasci possit a Brutorum Peste ea hominum? Numquid a solo metu; & quidem sic, ut non feriat impavidos? Tandem an a sordibus urbium, ediumque?*

§. I. **D**E vera origine Pestis inquirentes Scriptores, haud minus Theologi, & Politici, quam Medici I. quidem immediatum DEI, vindictis malorum, flagellum esse, ex Historia Davidis, ex Deuteronomio, nonnullisque Prophetarum textibus, plures conficiunt. Hancque & Ethnicorum sententiam fuisse Liber i. Iliad. Homeri docet. Fatemur OMNIPOTENTEM & comminatum populo praevaticanti pestem esse, & immediate illam immisisse; nondum id tamen evincit a DEO immediate immisas pestes tot saeculorum universas esse. Uti Pestem, ita Famem, Bellumque atrox, inque praelio Fugam, Exilium, & alia, ingratae, ac rebelli genti Israeliticae, & comminatus DEUS, & executus est; communes tamen, & naturales horum causas intercurrisse, intelligimus, quae id, quod DEUS vellet, efficerent; Annonae caritatem apud vicinos populos, a quibus id frumenti, quod si-

bi

bi deſſet, acquirere ſolebant, infelicioꝝ temporibus, & id genus pluribus conſimilibus; Principum idololatrarum peculiare in Judæos odium, mentem arrogantem, bellicoſamque: quibus cauſis poſitis, id, quod interminatus Dominus erat, conſequebatur; quod Homerus in *Græcorum* peſte pulcre expreſſit Διὸς δ' ἀτελείετο βελή.

II. In *Africa* quidem plurimi, hi autem in ejus magis Occidente plaga, illi in *Ægypto*, terræ luis originem quærunť, quam commercii occasione in vicinioreſ, hincque in diſtiores gentes, advectam arbitrantur. Judæorum cum *Africa*, ac potiffimum cum *Ægypto*, quod vetitum tamen a DEO, commercium, multarumque *Europæ* peſtilentiarum Hiſtoria hujus ſententiæ probabilitatem admittunt, verum haud omne dubium tollunt, ut ſequentia docebunt. Ac tandem quid cauſæ dabunt, cur in illis primigeniis locis & nata primum, & perennis ſit?

III. Ex laudatis prius ſcriptoribus haud plane ſingularis eorum opinio eſť, qui ejusmodi corruptionem in humano corpore naſci ſponte poſſe autument, ut citra vel minimum cum peſtiferis ſive hominibus, ſive rebus commercium, peſtis oriatur: *Diemerbroeckius*, Priſcorumque nonnulli, exempla narrant, quæ haud omnino in probabilem hanc ſententiam reddant: neque ſic nata alios infeciſſe videtur.

IV. Quamquam centies obſervatum ſit Animalis cujuſquam Peſtilentiam ejusmodi naturæ eſſe, ut in cæterorum Animalium nulla contagium tranſat, inque hominem nullam; quia tamen nonnullæ peſtes certæ cujuſdam beſtiæ ſint, quæ ab hac in beſtias alius atque alius ſpeciei, alias poſť alias, tranſmigrant, pariter etiam peſtilitatem quorundam animalium in hominem & tranſire poſſe, & revera tranſiſſe, cum aliæ ejus cauſæ non extarent, multi opinati ſunt, deque Peſte

Re Brutorum, eam Hominum augurati. Incertam tamen hanc eorum sententiam esse pag. 138. N. 1. post multos claros Viros censui.

V. Quamvis absurda appareat, haud plane tamen solitaria ea sententia est, quæ ita pestem statuatur metu sui nasci, ut homo, excusso plane eo, Pesti impetrabilis foret. Antiquorum quorundam hanc sententiam resuscitavit *Christianus Langius*, *Rivinum* laudans, ut qui ante se hanc esset sententiam tutus.

Notemus opinionis *Langii* de *Causa proxima* pestis a communi sententia recessum: causam enim proximam neque ab aëre pestifero, neque a contagio, quacunque via contracto, verum, quod mireris, a solo terrore pestis oriri arbitratur.

Carens *Rivini* de *Peste Lipsiensi* anni 1680. opera, inveni tamen ejusdem Epitomen in *Act. Lips.* anno primo, scilicet 1682. Neque *Rivinus* hujus sententiæ se esse parentem gloriatur, sed eandem & *G. C. de Heredia*, in peste *Hispalensi*; & *Petri a Castro*, in peste *Neapolitana*, *Romana*, *Genuensique*; & *Joannis Imperialis* in peste anni 1630. & *Gresleri* in peste *Brunswicensi*, tandem & *Hodgesi* in *Londinensi*, fuisse. Sed his omnibus antiquiorem scriptorem invenio, *Petrum Joannem Fabre*, seu *Fabrum*; qui in sua *Pathologia spargyrica* non omnem quidem, sed aliquam pestem, mero terrori absque vel minima alia, seu aëris, seu contagionis admota causa, suos censet debere natales. Scribit in hoc opere Autor se longum amplumque tractatum de Peste anno 1638. edidisse, quem apud *Lindanum*, tot viri opera recensentem, non magis quam ipsam hanc *spag. Pathologiam*, invenio: hanc possideo, non illam.

Gallicus Archiater *Chiconeau*, alii que cum illo, occasione *Pestis Massiliensis* huius quoque opinionis fuerunt: quos refellere cl. *Hispanus Medicus Fornès*, ac potissimum *Rev. Muratorius*, conati sunt. Ut vero pau-

ca hisce addam ; cur toties contingit eadem affici vel intrepidissimos, seu Medicos Chirurgoſque, seu Sacerdotes, seu Affistentes, qui centenis casibus impune emerſi, demum, quemadmodum tot Historiæ fidem faciunt, sic a peste mulientur, ut ea vel gravissime decumbant, vel pereant? Quis Sapientium, cum *Langio*, infanti, recens nato, veram dabit a Peste formidinem? Peste afficitur tamen, interitque. Sagax ille Medicus & intrepidus & audacissimus, ut Pesti ipsi dominari videretur, apud *Willisium Lib. de febr. cap. 13. pag. 69.* annon Peste demum periit ipse? Notabilis Historia XXXVII. *Diemberbroeckii* est, &, quæ huc afferatur, digna: „ Eques notissimus *Schabbals*, homo fortis, „ audax & maxime temerarius, peste cum magna febre ac debilitate correptus, Bubonum in inguine & „ tres Anthraces in corpore habuit. A quibus omnibus malis cum optimi summi DEI auxilio sanatus „ esset, & jam rursus foras prodiret, nullas DEO gratias egit, sed satis impie gloriatus fuit, se ipsa peste nequiores, fortiores esse, atque nec Pestis, nec „ Diaboli spicula ipsum quidquam afficere posse; imo „ se neque Pestem neque Diabolum curare. Audivit „ Altissimus impia impiissimi hominis verba. Quid fit? „ Postquam cum reliquis equitibus hostilia castra aliquoties explorasset, (nam famosissimus erat Conductor, quem vulgo *Guide*, alii *Gidse*, appellant:) „ tandem circiter quinta post perfectam sanationem hebdomade, rursus de novo peste correptus est, & ante diem sextum victrici pesti duram subjecit cervicem.

Nihil minus peste metuebat Pharmacopæus, Hist. LXXII. „ qui amuleto arsenicali munitus semper incedebat: pustulam rubram inflammata, sine dolore, cum levi pruritu in collo percepit, quæ mihi „ aliquid mali ominari visa fuit, ac propterea ad tempestivum Antidotorum usum ipsam exhortabar. Verum

„ rum ille rem flocci faciebat, & toto corpore opti-
 „ me valens, consueta munia peragebat, bene ede-
 „ bat, bibebat, ridebat, & hilaris erat, nec quidquam
 „ mali suspicabatur, imo etiam me irridebat, quod
 „ de periculo aliquo locutus fuisssem. In tali statu cir-
 „ citer per tres septimanas vixit. Tunc demum capi-
 „ tis gravitate, cordis anxietate, nausea, & debilita-
 „ te, infestari cepit. Assumpto Alexipharmaco, cui præ-
 „ ter cætera Lapidis Bezoar orientalis integra dragma
 „ admixta erat, cum copiosius sudasset, nihil quidem
 „ allevatus fuit, sed prædicta pustula in perfectum Car-
 „ bunculum transivit. Postridie febris vehementior eva-
 „ sit, vires admodum dejectæ sunt, denique morbi vio-
 „ lentia omnium Antidotorum vim superante, post tri-
 „ duum e vivis excessit.

„ Tandem nemo horum, quos nunc ex *Diemerbroe-*
 „ *ckii Hist. LXXVII. & LXIV.* enarrabo, pestem
 „ metuit; ea tamen & impetitus, & mortuus est. „ Pa-
 „ ter *Felicianus* Sacerdos, ordinis *Franciscanorum* Mo-
 „ nachus, vir doctus, & humanissimus, peste corre-
 „ ptus est, cui vix ulla manifesta febris adjuncta erat,
 „ ut nec alia gravia symptomatum, præter solam &
 „ summam anxietatem, qua cor tanquam in prælo com-
 „ primi dicebat. Post sudorem copiosum Alexipharma-
 „ co provocatum, duo exiles Carbunculi in femore
 „ eruperunt, etiam dolor in inguine perceptus est cum
 „ obscuro quodam tumore. Exhibui tria quatuorve
 „ sudorifera, & alia quoque antidota intermedio tem-
 „ pore dedi, verum his omnibus neque inguinis tumor
 „ adauctus, neque anxietas quidquam imminuta est.
 „ Interea tamen vires egregie constabant, ac valde
 „ parum dejectæ erant. Quarta morbi die cum ipsum
 „ inviserem, totus vestitus erat, & circiter horæ qua-
 „ drantis spatio mecum per cubiculum deambulavit
 „ non titubante gradu, sed fortiter, ac de confiden-
 „ tia in DEO, de non extimescenda morte, de maxi-

„ mo & flagrantissimo suo hinc ad salutarem patriam
 „ migrandi desiderio, multa notatu dignissima loque-
 „ batur. Postea inter deambulandum monstrabat mihi
 „ etiam sex septemve Exanthemata purpurea, quæ in
 „ brachio & pectore eruperant, & rogabat qualesnam
 „ essent, & quidnam indicarent hæ maculæ? Respon-
 „ di esse mortis advenientis prænuncias. Quo nuncio
 „ intellecto, bonus ille Vir non minus gavisus est,
 „ quam gratissimo aliquo dono accepto, & statim cum
 „ gaudio in hæc verba erupit: *jam liberabis servum*
 „ *tuum Domine, & videbunt oculi mei salutare tuum*
 „ *facie ad faciem. Fiat voluntas tua! Et, sit nomen*
 „ *tuum benedictum in sæcula!* Tunc ego ipsi in æter-
 „ num vale dixi, atque discessi. Postea retulerunt mi-
 „ hi adstantes, qui illi inserviebant, quod statim post
 „ meum discessum diceret: Sentio me ab ambulatione
 „ aliquantum delassari; & cum dicto lecti margini se
 „ imposuisset sedendo, atque illico quasi in momento
 „ retrorsum supra lectum cadens, expirasset.

Ipse autem *Diemerboeckius*, qui hic fidem præpri-
 mis meretur, quod acatholicus, magni non faceret ca-
 tholicos Sacerdotes, audiatur in nota ad hanc Histo-
 riam. „ Quod in hoc ægro, illud etiam in nonnullis
 „ aliis animadvertimus; nempe in quibusdam peste la-
 „ borantibus tantam corporis fortitudinem usque ad mor-
 „ tem fuisse, ut ambulantes, nec quidquam minus,
 „ quam mortem metuentes, subito conciderint: verum
 „ in paucissimis tamen animi fortitudinem, tantam in
 „ morte constantiam, tantum Vitæ æternæ ex intimo
 „ corde procedens desiderium observavimus, quantum
 „ in prædicto D. *Feliciano* & Socio ejus *Tiburtio*,
 „ nec non Patre *Gregorio*, ejusdem quoque ordinis Mo-
 „ nacho; qui tres summo cum gaudio mortui sunt,
 „ totumque mortis metum læta spe melioris vitæ omni-
 „ no extinxisse videbantur. De Patre *Tiburtio* Hist.
 „ LXIV. jam dixerat eum Virum esse eruditione, hu-

„manitate, & vitæ probitate, excellentem, cui mor-
 „tem in peste prædixerit. Quod nuncium æger cum
 „maximo & incredibili gaudio excipiens, intra paucas
 „horas, tanquam ad nuptias iturus, lætus obiit.

Pergit autem sic in sua Adn. *Diemerbroeckchius*: „
 „Non omnes, qui Vitæ æternæ gaudia prædicant, ad
 „illa festinant, sed extrema necessitate ingruente, ple-
 „rique diverticula quærunt, & his, illisve mediis ex-
 „tremam illam horam differre nituntur. Sic Pater *de*
 „*Bruyn*, Jesuita doctus, cum peste correptus esset,
 „maximo mortis metu perculsus fuit, & tam altum
 „terrorem concepit, ut exhibita remedia (quæ in
 „nonnullis aliis, sic affectis, quid fors egissent) pla-
 „ne nihil operarentur ad salutem: tandem omnibus
 „nihil proficientibus, cum ab exanthematum eruptio-
 „ne mortem ipsi prædicerem, tres quatuorve exiguas
 „pixides de collo pendulas manu prehensens, ac cum
 „indignatione irridens, dicebat: o inania fulcra, in
 „quibus confisus sum! Quid jam mihi prodeltis? Et
 „paulo post cum magna desperatione obiit, immemor
 „versiculi.

„*Fer facilis, quod fata ferunt: si ferre recusas,*
 „*Ipsam te crucias, nec minus illa trahent.*

Igitur cum Schola universa lubenter admittimus for-
 midine a peste eam & facilius, contrahi, & difficilius
 tolerari; minime vero paucorum illorum opinionem,
 qui in tanta luce veritatis cæcutire velint, pestilentiam
 metu unice contrahi, intrepiditate autem, fidenteque
 animo, evitari statuendo, amplecti possumus.

VI. Anglus Scriptor, cui *Ingram* nomen, ante 17.
 abhinc elapsos annos de Peste Tractatum edidit, quo
 pestium, a pluribus retro sæculis *Anglos* adortarum,
 hutoriam tradens, Luis hujus natales in *Thracia* &
Afri-

Africa quærit, Vento austro humido ibidem nasci, boreaque extinguere censet, & inde contagium, mercimoniis arcte inclusum, in *Angliam* toties illatam esse agnoscit; at vero cum causa tunc temporis existeret, quæ ad pestem contagione advecta contrahendam prædisponeret, eaque causa nunc deficeret, morbum non ultra *Anglos* invasisse, nec facile invadere ultra posse, asseverat audacter. Hocque sic explicat, ut perpetuum esse statuatur contagionis afflatum, miasmate in locis, quotannis affectis, adeo intime cum multis mercimoniis compacto, commisto, ac contuso, ut earundem cum retardatio, tum expiatio, quæ per 40. dies fit, inepta prorsum sit, quæ inde totum contagium extricet: ut secundo bene considerandas esse arbitretur urbis *Londinensis* quondam & parvitatem, & sorditiem; ejusdemque post ultimam pestilentiam amplificationem, munditiemque: unde concludit hominum urbiumque majore munditie id consequi oportere, ut licet & ventus australis humidusque sæpius in *Anglia* dominetur, & indelebile contagium ex injectis pestilentia plagis assiduo adsit, pestis tamen a plus quam sæculi spatio ignota *Londinensibus* esse debuerit.

Sorditiem hominum, urbium, ædiumque & in consciscendis sibi morbis, & in perferendis, iniquam posse noxiamque esse, inficias non ibo: at vero hanc esse prædisponentem Pestilentia causam præcipuam, ac ferme unicam, minime inde consequi, quis non videat? Rogare licebit Autorem primo An ceteræ *Britannicarum* Insularum, reliquarumque Nationum civitates, pariter & amplificatae fuerint, & majore munditie cultæ? Hoc demonstrandum fuisset, priusquam hæc conclusio formaretur. Secundo annon noverit *Batavorum* eam ab omni tempore munditie Vestium, Ædium, Platearum, Templorumque culturam, ut hanc immodicam esse conquerantur extranei? Atqui Pestis in illa gente tam
cre.

crebra fuit, ut qui eandem tot conscripserint Medici, bis terve renatam sua ætate viderint. Ergo mundities non aufert prædisponentem ad pestem causam.

Atque ita hanc operosam de Peste sectionem absolvo, DEO TRIUNO consecro, Patriæ dedico, calamitosi temporibus ut prosit exopto.

F I N I S.

A D D E N D A

Pag. 138. lin. 21. post ridicula, adde, partim incerta. Plures quæstiones, de Peste motas, studio prætereo, quæ vel ad rem proprie nihil faciunt, vel ab earum Curiosis apud Auctores laudatos inveniri poterunt, vel ad Jus Canonicum, & ad Theologiam. spectant: quas partim apud laudatum sæpe Muratorium inquiras, partim apud Jurisprudentiæ Medicæ Scriptores, Zacchiam, Valentinum, Alberti, maxime vero in hujus posterioris indice operosissimo; in quo nonnulla opera adhuc laudantur, quos non possideo.

Pag. 156. in princ. adde: quamvis Anginam malignam, atque pestilentem, descripsit Lib. 1. cap. 9. de Sign. & Caus. Acut. & Lib. 1. Cap. 9. de Cur.



ANTONII DE HAEN

S. C. R. A. MAJESTATIS
CONSILIARII, ET ARCHIATRI,
MEDICINÆ IN HAC ALMA ET ANTIQUISSIMA
UNIVERSITATE PROFESSORIS PRIMARIJ,
PLURIMUM ERUDIT. SOCIETAT. SOCIJ

PARS DECIMAQUINTA
RATIONIS MEDENDI

IN NOSOCOMIO PRACTICO

*Quod in gratiam, & emolumentum
Medicinæ Studiosorum condidit*

MARIA THERESIA
AUGUSTISSIMA ROMANORUM
IMPERATRIX

HUNG. BOHEM. &c. REGINA &c. &c.



L U C Æ MDCCLXXVI.

Typis JACOBI JUSTI
SUPERIORUM PERMISSU.

^{III} ELENCHUS CAPITUM.

C A P U T I.

Historia auxiliorum, quæ Submersis, Suspensis, Suffocatis, atque Infantibus mortuis, ut videtur, in lucem missis, adhibenda sunt, quousque jam promota per Europam sit. Pag. 1.

C A P U T II.

An in Criminalibus certissima signa extent, quibus instructus Magistratus infallibiliter discernat vivusne quis, an mortuus, in undas præcipitatus sit? Pag. 12.

C A P I T I S II. Sectio prima.

Historia, hujus Disquisitionis origo, argumentorumque, ex eadem formatorum, examen. Pag. 13.

C A P I T I S II. Sectio altera.

Sextuplex Anatome Corporum laqueo Strangula-

IV

gulatorum, quorum varia phænomena Anatome describit, variumque Experimentorum effectum.

Pag. 21.

C A P I T I S II. Sectio tertia

Sextuplex hominum Anatome, quorum, Acutis Chronicisve defunctorum, Pulmones aqua spumosa scatuerunt: sexies in Nosocomio, semel in Urbe.

Pag. 31.

C A P I T I S II. Sectio quarta

Spuma Pulmonum frequentissima ab aliorum Anatomicorum experientia in iis, qui mersi non fuerint, demonstratur.

Pag. 44.

C A P U T III.

De Hydrope vero ipsius Pulmonis.

Pag. 49.

C A P U T IV.

De Dæmoniacis.

Pag. 60.

Appendix.


Pag. 75.

CA.

CAPUT I.

DE SUBMERSIS.

- §. I. *Cur tertio hanc materiam aggrediatur Autor.*
- §. II. *Laus tum Gallorum, tum Societatis Amstelodamensis, Hamburgensisque, in auxiliando submersis. Numerosa apud illos in Vitam revocatio.*
- §. III. *Parca hucusque Austriacæ Plebis laudatio. Ejus Objectiones, ad easque Responsa. Cur alibi multis, hic raris, vita suffocata animetur? Cur in Nosocomio etiam desperatos attingamus? Ut Demersorum res, sic & Suffocatorum, Suspensorumque se habet. Historia memorabilis auxilii submerso admoti, quod principio spem vitæ dedit, turpiter vero deinde neglectum, mortis in causa fuit. Alia Historia vitæ submersi viri eousque refocillatæ, ut sacris muniri ante obitum potuerit.*
- §. IV. *Infantum recens natorum vita, ubi suffocata est, mortemque simulat, qua arte revocanda? Argumentum hoc urgetur, luculentoque illustratur exemplo. Vota in Austriacos.*

- §. I.  Vandoquidem ab aliquot retro annis quaestio de revocanda submersorum vita omnes in Europa Φιλάνθρωπος inflammavit, mearum esse partium duxi tractare eandem, ipsique adhibere operi manum. Hac de causa

Tomi XIII. Rat. Med. bonam eidem partem dicavi; elapsoque abinde biennio Tomi I. Rat. Med. continua-
ta alteram partem ad elucidandam hanc utilissimam

quæstionem unice impendi, atque commissos meos in priore errores, in posteriore correxi: quo autem mea cum observata, tum experimenta, majorem publici in usum cederent, germanice verti hoc ultimum opus curavi; cujus **AUGUSTISSIMA IMPERATRIX**, ac **REGINA NOSTRA**, vera Subditorum suorum Mater, Exemplaria propemodum **CCCC.** ad Austriæ universæ Chirurgos, & Balneatores, munificentissima sua manu mitti curavit. Cum autem inexhausta sit hæc materies, interquiescendum nunquam est a novis experimentis capiundis, ut priorum corrigamus defectus, luce autem nova illustremus, eandemque insperatis forsitan ditius inventis. Quid aliæ Nationes ad salutare hoc institutum contulere præmittam.

§. II. *Inclita Natio Gallica*, ab omni noto tempore in commoda non universi tantummodo Regni, sed & Orbis studiosissima, callidissimaque, egregias Dissertationes prodidit, aptasque his Calamitosis succurrendi proposuit leges. Mirifice obsecundavit illis suprema Potestas. Intentaque in suum officium plebs tota reperitur sic, ut per singulas vasti Regni provincias reportentur de morte Triumphii, utique notiores singulis, quam ut hic recenseantur. Et nuperrime die *Martii* octavo ejus quem vivimus anni, *Juvenis*; & *Aprilis* tertia die, *Vidua*, incola *Gerontrophii*, suam de *Sequana* extracti vitam a vera morte servatam, Militibus debent, qui in excubiis ibidem, & promptum, & perseverans, præsidium tulerunt.

Societas Civium optimorum Amstelodami collecta, quam plane nescio quot laudibus cumulem, quot extollam encomiis, quaque verborum significantia ceteris populis in exemplum feram, propria singulorum liberalitate idoneam pecuniam contulit, ut cuicumque, qui superstitem viræ auram resuscitaverit submerso, seu in ea *Belgii* foederati provincia, ubi præmium sponte largitur suprema Potestas, seu in alia, in qua necdum publi-

publica remuneratio est, sex aureorum mercedem grata expendat, ne Calamitosis hñce unquam auxilium desit .

Diariorum, atque Commentariorum hujus societatis percelebris, pluries memini prioribus mei Operis Tomis; jamque quarti Voluminis laudes cano, quod partim ipsius liberali providentia, partim populi vigilantia & promptitudine, denuo homines XXXVII., qui alias certam mortem occubuissent, vivos Respublica lætetur. Profecto mihi, vitam CLIII. mortalibus hoc modo, quatuor aut quinque duntaxat annorum curriculo, conservatam contemplanti, tum & centies ac quadragesies præmium sospitatoribus, quos proba judicum locorum testimonia muniverant, concessum perpendenti, liquido constat jam 840. Aureos Societatem erogasse. Hoc resciscens unus, alterque, donum non mediocre voluntarius & ignotus, ad societatem uterque misit. Quid non facit ubi viget, ubi ardet, sincerus proximi amor!

Societas Hamburgensis ad animandas cum Artes tum Inventiones utiles erecta, Historiam octo Submersorum, quorum sex restituta adhibitis præliis vita fuerit, cum *Amstelodamensi* communicavit.

§. III. Invitus & mœstus de cara nostra *Austria* quæror. Utinam post AUGUSTISSIMÆ munificentiam, singulis ejusmodi servatoribus 24. florenorum mercedem promittentis, toties, quam alibi, a certo interitu præservarentur Submersi! Abest autem a nobis hoc animi impensum gaudium. Altius irradicatum in Vulgi animis præjudicium est, quam ut cujusquam effectus crederent auxilia fore sua. Et quia serotinum laborem usu cassum lugent, tempestivum recusant.

At vero ultra pergunt. Ut suam obvelent inhumanitatem, contendere audent ridiculum plane hic ornemolimen esse, quandoquidem in Nosocomio practico *Viennensi*, in quo hoc opus, si uspiam terrarum, tan-

ta cum diligentia, accuratione, frequentiaque exercetur, ne unus quidem revocatus fuerit in vitam. Quantacumque absurditatem habeat, injustitiamque, hæc Aisertio vulgi, æquitas, veritas, publici boni amor, atque Civis boni officium, ad respondendum adigunt me, ne ultra vel minimum habeant suæ barbariæ subterfugium.

Ac primo quidem dico, quos ad vitam revocatos publica gentium aliarum testimonia perhibent, hos nec diu in undis sublituisse, neque maturo auxilio caruisse. Interea dum Medici atque Chirurghi advocentur, sedula plebs mox in amnem delatis corporibus opem, quam possit, omnem admoveat, fricando, agitando, irritando, inspirando, madidas exuendo vestes, focum extruendo, ope fistulæ tabacariæ aut aërem, aut fumum Tabaci in posteriora injiciendo; ita ut Chirurghi aut Medici supplere ea tantummodo debeant, quibus præstandis vulgus non erat. Nec nota etiam sibi corpora deferunt ad eorum ædes, sed vel in amne locatis, vel in proximas ædes, tuguria, bubilia, stabulave, delatis omne conferunt undique auxilium, unde multoties in plures divisum præmium legimus: *Sic Parisina, sic Hamburgica, sic Batava Acta* sonant.

Jam ad nostrum nos convertamus Nosocomium. Ad hoc deferuntur Corpora, quæ quot horas, diesve unda texerit, ignoratur; quæ diu in amnem deposita fuerint, interea dum per horas ad loci Toparcham eatur redeaturque, ut quid ille de invento Corpore jubeat intelligatur. *Viennam* transferendum si mandet, horæ elabuntur priusquam & currus inventus fuerit, & equi, & auriga, qui horæ, qui miliari, qui miliariorum itinere semiputridum Cadaver in Nosocomium practicum deferant. Imo etsi Urbi propior quis fuerit submersus, neque ad ripam juvatur, neque nisi elapsis aliquot horis inferitur in Nosocomium.

Si proinde ad vitam revocari unquam vix quisquam videatur, nisi quem aut aliquot minuta duntaxat, aut horæ quadrantem, quod frequenter; aut semihoram, quod rarius; aut horam, quod rarissime, merferat unda: si præterea in vitam demersi non redeant, nisi quibus, mox a flumine exceptis, auxiliatrix fuerit adhibita manus: si deinde plerisque non nisi plurium horarum labore salus redierit: quo demum pacto velint hi, ut si vel per horas diesve corpora humi jacuerint, antequam deferantur ad nos, aut ne minimo quidem auxilio, aut seriore tantummodo, exiguoque præstito; vel si primo tentamine frustrato, omnis abjecta spes, omnisque projectus labor fuerit; quo, inquam, jure ea resuscitari in Nosocomio velint? culpa profecto eorum est, quorum fuisset supremis parere mandatis, & educto protinus de flumine corpori, tempore modoque idoneis, afferre præsidia; opus tunc non habuissent, ut *Viennam* conferrent exanime corpus.

At vero navatis interim, inquiunt, strenuam horarum plurium operam; corpora delata itaque exanimia non censetis: vitæ adesse scintillam ni supponeretis, frustraneo parceretis labori. Cum nunc neminem resuscitaveritis hucusque, jure, an injuria, etiam nostra inania conamina fore concludamus?

Non attendunt, qui talia fantur, quid toties olim ad ejusmodi ineptias responderim. Quamvis passim haud alii revocentur in vitam, quam quibus & protinus, & perseveranter, fuerit admota manus; quia tamen ultima restituendi meta necdum demonstrata est, & historiane, an fabulæ? extant, quæ post horas diesque submersionis auxilia & serotina, & levia, vitam resuscitasse memorant, institutum nosocomij est etiam attingere desperatos; ut num inter centenos forte vel unus existeret, qui hujusmodi mirandis historiis apponeret sigillum veri, constaret.

Neque etiam attendunt ad plura in nostris contenta relationibus, quibus convicti esse debuissent dudum, vitam ad omnem industriam hominum restitui ceptam, demum in nosocomio multo cum labore ad suum cum augmentum tum stabilimentum, feliciter ductam fuisse; ut vel hinc inutilem omnem nostrum laborem fuisse injuriose negent.

Tandem haud attendunt iidem ejusmodi corpora, tentatis incassum auxiliis, alios in fines exenterari a nobis, quærique in illis verum causæ mortis intellectum, quo rectius forte opitulari possemus Demersis; peti etiam ex iisdem quæstionum Medico-legalium solutionem; naturas aliorum morborum, & sic porro, ut brevi patebit.

Cum jam suspensorum hominum eadem sit, quæ demersorum, ratio, in repentino auxilio conferendo; nosque nihilominus iis, eodem modo neglectis, manum admoveamus, etsi vix specula super sit; sciant hi nos iisdem de causis, quibus submersorum, etiam suspensorum corpora attingere.

Redeo itaque ad priora mea monita & consilia, ut demersis, suspensisque, præceptis admoveatur constansque auxilium; eaque nova observatione confirmabo.

Augusti die nono Anni 1772. trium cum dimidio annorum puer, ludens cum sociis, præceptis in *Viennam* labitur ad 5. pomeridianam horam, rapidoque flumine ducentorum circiter passuum longitudine vectus, ad quendam inibi palum sistebatur. Monachus reverendus accurrens, eum flumine festinanter eripuit, capite humili, pedibusque sublimibus, validissime succutiit, quætescit, parentumque curavit in ædes referri. Hi actutum nares, & cordis regionem, calente aceto fricantes, & deuntem percipere & calorem & cordis motum. Porro hæc illi, interea dum Chirurgus expectaretur: accedens tunc ille, turbamque hominum circa puerum occupatam cernens, abiit. Inde hi spiritum Melissæ,

vinumque calidum puero in os ingesserunt; excitatam autem vitæ scintillam convulsio extinxit.

Hunc casum non minus inter fortunatos numerandum esse, quam inter infortunatos, intelligit facile quisque per se. Reverendi viri, atque parentum sollicitudine, suffocata vita animari manifesto visa est; mors autem convulsiva imputanda Chirurgo est, qui nec Venam tutudit, nec reliqua auxilia ipsi apprime nota, admovit. Profecto est nunc in tanta luce collata res, ut quisque eum homicidii reum existimare debeat, qui impositæ cunctis legi non pareat. Et bene qui paruerint, consulent sibi. Ex laudatissimo enim Principum, atque Magistratum, ad hoc opus perficiendum studio, & labore, brevi fore auguror, ut qui huic Religionis humanitatisque officio defuerint, quorumque turba multa est, severe puniantur: & si de ipsis non liceat dicere: *Oderunt peccare boni virtutis amore*, dicatur saltem: *oderunt peccare mali formidine pœnæ*.

Si vigesies, si octuagesies spe frustrarentur; si ex centum duos tresve certo alias morituros, duntaxat servarent, nonne locupletissimam laboris haberent mercedem? imo si vitam eo usque animarent tantum, ut homo tempus nancisceretur se cum Deo reconciliandi, an hoc solum non deberet ineffabili gaudio ipsis esse? Porro ut exemplo id capiant, internectam historiam, quæ cum scripto toto hoc opere demum contigerit, nullibi appositius, quam hic, inferere possum.

Hoc ipso, quem vivimus, anno Julii 4. die, vir atrabiliarius per intervalla sive delirus, sive semitanniacus, semet vespere in profundioris *Viennæ* plagam præcipitat, luctansque cum undis a transeunte homine conspectus, ab illo, aliisque transeuntibus, unco oblongo in ripam trahitur, nulla ultra exhibens vitæ signa. Hominem tamen diligenter palpant, fricant, ac pedibus sublatis puat faciunt sic, ut libra non minus aquæ vomitum ab eo fuisse testentur. Quo viso eum protinus

nus curant in Nosocomium practicum deferri. In eoque post multa nostra molimina tussis excitata fuit, & alvi copiosus fluor. Continuato autem labore rigorum ac glaciale corpus primum recalescere cepit, dein sudore leni madere, per intervalla obdormire, voceque eousque privus homo, intelligentiam annuendo abnuendoque testari. Vox demum rediit, impossibilisque fere hactenus Deglutitio: sic ut 17. a Submersione hora alimenta atque medicamenta commode deglutiret. Ad prima quidem molimina nostra, cum vitæ quædam signa adessent, Sacræ Unctionis Sacramento eum muniri curaveramus; ad redditam vero & intelligentiam mentis, & vocem, reliqua sacratissima animi præsidia ipsi conferri omnis nostra sollicitudo fuit. Spem tamen integri in vitam reditus vehementissima oborta Peripneumonia elusit, quæ cunctis auxiliis immorigera, hominem ad 38. a submersione horam sustulit.

Transactis 19. a morte horis, Cadaver in pleno cum Medicorum, tum Studioforum, conventu lustravi. Aperto primum Thorace, Pulmo lævus, lobo superiore purulentum tuberculum recondens, cum Pleura nonnihil; dexter vero totus & cum hacce, & cum Mediastino, Septoque medio, vinculis omnino latis coivit, crassisque iisdem, fortibus, ac vasculosis. Uterque autem superficie anteriore ruber, laterali purpurascens, dorsali tota nigerrimus. Neque in Trachæa, neque in Bronchiis, vel minimum aut spumæ inerat, aut aquæ; Lobi vero in taleolas transcissi plurimum sanguinis, ac nonnihil spumosi liquoris, compressi adhuc copiosius, fuderunt. Aperti cordis ventriculi valido reperiiebantur flavoque Polypo repleti, ipsi vero præ Inflammationis intensitate vehementer rubebant, quemadmodum et tota Trachæa, Pulmonalis arteria, Aorta, lateris utriusque Pleura, Pericardium, Pleuræque Diaphragma tam qua musculosum, quam qua tendinosum, succingentis portio, Renesque. Intestina bona; ita ut ter
inje-

injectus Fumus Tabaci nihil prorsum nocuerit illis. Jecur albescens, perque omnia durum. Bilis in vesicula amplissima erat abundans, atra quidem, verum diluta potius, quam, ut ceterum in Atrabiliariis est, spissa, aut, ut ajunt, picea. Primam inter alteramque dextri lateris superioris costam Musculus intercostalis, una cum ea, qua cum superscandentibus musculis connectitur, cellulositate, profundissime per omnem suam carnem inflammatus. Sine externis signis cujusquam contusionis haud modica Pericranii portio rubicunda fuit. Dura Mater bona: Pia solito rubicundior, potissimum vero in posteriore dextri Hemisphaerii lobo. In Sinu longitudinali polypus flavus. Ventriculi naturales, Sinusque, Glandula Pinealis ex pluribus indurescentibus corpusculis constabat. Igitur post Libras medicas sanguinis quinque, sex Phlebotomiis homini detractas, tanta adhuc inventa fuit ejusdem in corpore copia, ut universalis propemodum inflammatio conspiceretur in denato; eandemque observationem multa nobis suppeditarunt cadavera.

En denuo Submersi historiam, qua I. constat frictione, corporisque inversi quatefactione, vitæ mortem simulantis scintillas jam ad fluvii amnem emicuisse. II. Hanc vitam nostro excitatam valde fuisse labore. III. Itaque Submersos ad auxilia matura, constantiaque, utut vita penitus extincta esse videatur, resuscitari per sæpe posse. IV. Haud raro autem contingere, ut nobiliores in corpore partes tanta sive Inflammatione, sive Convulsione, sive Defectione afficiantur, ut aut Apoplexia, Peripneumoniave, aut Epilepsia, aut Syncope, intereant; quorum singulorum ex variis Autoribus plura exempla *Tomo XIV. Cap. III. pag. 122. 123.* excitavi: sin vero non moriantur, eosdem aliquando in morbos seu acutos, seu lentos, non raro gravissimos, difficulterque curandos, incidere; quorum exempla, loco mox laudato, eaque ex propriis Nosocomii obser-

observatis, protuli. V. Etiam si nonnulli illorum, quorum vita videatur resuscitata fuisse, post liminio pereant, nihilo secius & laudandos, & divina Lege imperatos esse revocandæ vitæ latentis coratus: cum quemadmodum ipso eo XIV. Tomo retuli in *Actis N. C.* in iis *Amstelodamensium*, tandemque in hoc postremo viro, eousque vita sæpius per admotâ Artis præsidia revocata fuerit, ut sincera peccatorum Confessione, eorundem Absolutione, & Sacra Synaxi, se convenienter parare ad beatam æternitatem potuerint; quo summo beneficio desideribus spectatoribus privati fuissent. VI. Haustam Pulmonibus aquam pro maxima parte resorptam fuisse.

Interim dum de auxilio præstando Submersis sermo fit, ex supremæ Potestatis Decreto, meisque variis scriptis, liquere manifesto singulis arbitror, & ad suspensos idem officium peti, & ad illos, quos aut Vini Cerevisiæque fermentantis exhalatio, aut carbonum vapor, aut clausorum diu puteorum halitus, e vivis videatur sustulisse. Superest unicum tamen, de quo debuissém maturius monere plebem, cujusque eam nunc, defectum meum correcturus, monebo.

§. IV. Infantum recens natorum simulatam mortem volo; quibus si debitam tulerimus opem, vitam profecto non paucis rediisse lætabimur. Cunctorum Obstetricantium libri si fortunatis exemplis abundant, multo magis, si plura auxilia nunc, eaque diuturniora, iisdem admoveantur, abundabunt. Prævit laudabilissimo exemplo egregius in *Palatinatu* Embriulcus, qui nona proxime elapsi *Aprilis* in oppido, aut pago, *Lampertheim*, infantem, quem post uterinam 14. dierum hæmorrhagiam vertendo eduxerat, mortuumque crediderat, quia tamen ex repletis funiculi vasis nondum exsanguem esse concludebat, in vitam plane restituit; tanta quidem cum patientia, atque sedulitate, ut postquam infanti, in tepido balneo vinoso hærenti, suum exspiratum ac-

se caute inspirasset, frictuque ventrali artificialem respirationem creasset, primordia demum vitæ, post quadraginta minutorum laborem advertere ceperit, ac integram vitam brevi renatam gavissus sit. Conamina fiunt fateor, vario obstetricum artificio, aërisque inspiratu, sed vel non clausis naribus, aër ore inspiratus, naribus expiratur; vel post aliquot inspirationes frictionesque frustraneas, cito desperatur. Si *Palatinus Obstetricans* post inanes quadrantis horæ inspiratus, si post mediam horam, si post mediam horam mediumque quadrantem horæ defecisset, mortuum esse infantem & ille, & reliqui, credidissent, mortuusque mansisset infans, quem nunc vivum salutavit laboris constantia. Utinam quæque Obstetrix, plebsque universa, de utilitate hujus experimenti convicta, nullam unquam negligeret ejus faciendi occasionem! Utinam demum non modo in hisce infantibus, sed etiam in Submersis, in Suspensis, inque Suffocatis, quid ab homine singulo, divina, quid politica Lex, quid proximi exigat amor; quamque reum coram divino TRIBUNALI hominem hujus neglectus sistat; Omnes verbi divini Præcones frequenti urgenteque sermone, tam ex suggestu, quam ostiatim, Parochianis inculcarent! Non est quod dubitemus, quin mota convictaque populi conscientia, cunctis hisce miseris efficacius consuleretur.

Profecto hi si in via deficientem fame hominem offenderent, qua animi commiseratione non convolarent, hanc extinctam pene vitam conservaturi? Quod si quis illorum aptum in penu gerens cibum, porrigere illum deficienti præfractæ negaret, quam hujus detestarentur crudelitatem! Quam indignabundi hoc ab illo non extorquerent alimentum? Hocque hominis simulacrum, quamdiu feram animam traheret, propalam diffamarent! Se porro serio respiciant, sitos ad fluminis amnem, dum recens ex eodem educitur Submersus: auxilia præsto habent, quæ si adhibere recusant, æquant profecto.

Et, si non superent, illius qui cibum habebat, & negabat, immanitatem; neque homicidii crimine se minus eo scedant. *Non pavistis*, inquebat *B. Cyprianus* divitibus, qui in annonæ caritate non subvenerant indigentibus, *non pavistis: occidistis*. Jure illis dicere possumus: *Non juvistis: occidistis*. Merito in Sacerdotem atque Levitam invehuntur, qui fauciatum in via *Jerichontina* hominem, quantum ipsorum fuit, prætereundo occiderunt; summoque, qui semimortuum curaverit Samaritanum, prosequuntur amore: abesse utique non possunt, quin sese, demersum prætergressos, & inhumano Sacerdoti, & barbaro Levitæ, consimiles esse cum fateantur, tum erubescant.

Monui mox lubenter nos Submersorum, Suspenso-
rumque corpora in Nosocomium admittere, quod, ir-
rito revocandæ vitæ labore, gravium aliarum quæstio-
num solutionem, morborumque minus cognitorum no-
titiem, quæramus: ad has ambas nos in sequentibus
Capitulis accingemus.



C A P U T II.

*An in Criminalibus certissima signa extent,
quibus instructus Magistratus infallibiliter di-
scernat, sit ne quis vivus, an mortuus,
in flumen præcipitatus.*

Regula certo distinguendi ea creditur esse spumæ
crassæ, flavæ subinde, atque tenacis, copia major
minorve in Animalium repertæ pulmonibus, quæ viva
aut ipsa sese, aut alii, præcipitia in undas dederunt.
Rejicere hanc regulam cogimur propter experimen-
tum

rum contrariorum evidentiam; quæ cum I. ex eorum Anatome petita sint, qui vivi essent submersi; II. ex eorum Anatome, qui post mortem essent in undam præcipitati; III. ex Anatome hominum, qui quolibet communi Mortalibus morbo vitam cum morte commutarunt; operæ pretium erit hoc caput in totidem sectiones dividere, quæ singulæ singulorum Anatomæ tradant.

CAPITIS SECUNDI

SECTIO PRIMA.

- §. I. *Laus Tractatus de hac questione editi Lugduni Gallorum. Causa memorabilis, ob quam editus fuerit.*
- §. II. *ASSERTIO autem, hujus Tractatus basis, ostenditur experimentis necdum sufficientibus inniti: Numerosa experimenta nos fallunt, ubi opus numerosissimis est; imo aliquando ne tunc quidem veritatem propalant. Textus Salomonis huc facientes. Defectum laudati Tractatus conabitur suis supplere experimentis Autor, ea spe, fore ut defectus utriusque suppleant alii. Cur non contractas hic, sed integras Historias Anatomæ dederit Autor?*
- §. III. *Exempla deficientis liquidi spumosi in Pulmone Demersorum. Vindiciæ Autorum, qui in Demersorum pulmone hanc aquam negarunt: qua tamen in re peccarunt? An Corporis inversi succussio aquam omnem excutere de Pulmonibus possit? Negatur.*
- §. IV. *Juvencula Lugdunensis mori a submersione & citra inventam hanc aquam potuit, & simul a spasmo Tracheæ strangulatione.*

§. V. *Aqua potest pulmonem non subisse videri, & revera tamen, indubitatoque, subisse.*

§. I. **T**ractatus eruditus, numerosisque experimentis dives, nuper *Lugduni Gallorum* prodiit, cui Titulus: *Experimenta & Observata de mortis in Demersis, nec non comitum symptomatum, causa: instituta coram Deputatis Scholæ Regiæ Lugdunensis, ad Brutorum Medicinam erectæ, Deputatorum eorundem testimonio confirmata, & ab Academia Regiæ Chir. laudata: Autoribus D. D. Champeaux, & Faissole. Germanico idiomate an. 1772. Dantisci prodiit. Occasionem dedit Lugdunensis Puella Claudina Rouge, quæ die 25. Junii 1767. hora 9. vesp. Felem suam quæsitura, paternis ædibus exeuns, nunquam redierat. Die 30. Junii Rhodanus ad suam ripam, 18. ab urbe *Lugduno* Lapide, submersum corpus deposuit, quod a parentibus necessariisque *Claudina*, eo ad rumorem convolantibus, toto habitu, vestibusque, illud esse corpus sine ulla hæsitazione affirmabatur. Judicis loci jussu Chirurgus legalem jubetur facere Anatomen, qui in sua ad judicem relatione sustinuit non submersione, sed violento laqueo, strangulatam *Claudinam*, dein præcipitem datam in *Rhodanum* fuisse, eo quod laquei signum, striam rubescentem circum collum, conspiceret sibi visus esset. Corpus dein sepultum fuit.*

Lugdunensis Prætor vigilantissimus misit duos celebres urbis Chirurgos, eos scilicet, qui Dissertationem hanc conscripserunt, ut effodi sepulchro cadaver curarent, deque visis repertisque referrent. Hoc fecere 10. Julii. Clari hi Viri, cum putredo totum corpus externum deturpasset, externa quidem mortis violentæ signa, quæ ante 10. dies Chirurgus loci cum testibus se vidisse testatus erat, se nulla quidem deprehendisse declararunt, at vero cum Encephali vasa valde turgida sanguine, & Pulmones citra vel minimum aquæ in se

se inclusum, indigestamque cœnam in ventriculo reperiissent, censuerunt *Claudinam Rouge* brevi post cœnam violenta morte (& ut postea censuerunt) Itranguatione, peremptam, in *Rhodanum* præcipitatam esse. Haud impiger ad hæcce Judex, quandam fœminam, & ancillam, nec non Fratres *Perra* vocatos, stupri suspitione in Carcerem coniecit. Scriptitatum mox adversus nostrorum Chirurgorum sententiam fuit, cum a Jurisconsulto, captivorum patrono, tum etiam ab aliis Medicis & Chirurgis, Acriter nervoseque defendere duo illi viri suam sententiam, atque ad eandem statuminandam sedulitate, patientiaque tanta, experimenta in Canibus vario, ac multiplici artificio cum Submersis, tum Suspendis fecerunt, ut negotium totum se confecisse crediderint, ac citra hæsitationem asseruerint: I. Submersos mori ab aqua inspirata, spumosa facta ex sua cum aëre, & traßudante pulmonum mucō, commistione; suaque mole sic aëreum pulmonum spatium universum implente, & extendente, ut transitus sanguinis per eosdem penitus sistatur. II. Deficiente in Demersis hac aquea spuma pulmonis, certo id concludi oportere, quod mortui aliunde, in aquam projecti fuerint, Adeoque *Claudinam*, hac aqua spumosa in pulmone carentem, mortuam fuisse priusquam *Rhodani* incolæ fieret. III. Suspendorum mortem apoplecticam esse, ut encephali eorundem docuissent infartus; apoplectica autem morte puellam periisse, eo quod & ejusmodi infartum vasorum caput haberet, & quod præterea non illi, sed qui decem antea elapsis diebus Cadaveris inspectionem Judicii retulisset Chirurgus, vestigia laquei circum collum, & linguam ad duos digitos latos extra labia exsertam, deprehendisset. IV. Nunquam suspendos gerere hanc spumose in pulmonibus aquam. V. Submersos nunquam linguam extra os prolatam habere, nec omnes Suspendos; sed illos solos, quos laqueus infra cartilaginem scutiformem Itrin-

xerit.

xerit. VI. Partes corporis, ut brachia, femora, collum, a morte fortiter constrictas, vestigium quidem servare pressiois, haud vero ullum aut excipere, aut relinquere eodem in loco ruborem: hunc impressionis ruborem in *Lugdunensis* Juvenulæ sexta a submersione die adhuc perstitisse, & illatæ per strangulationem mortis testem irrefragabilem esse.

§. II. Si omnia hæc sic se haberent, ut hi, quos veneror, Viri censuerunt, opem multam eamque laudabilem Foro juris contulissent, multaque dubia ictu citius inter Medicos & Jurisconsultos dispulissent. At vero priusquam hæc in leges artis cudantur; (quo enim alio horum Autorum, Cenforumque, conaminantur?) dabo hic experimentorum meorum plura, quæ cum illorum experimentis collata, & sincerissime comparata, forsitan hanc illis, quam olim mihi, confessionem extorquebunt, quod conclusio ex experimentorum numero insufficiente petita, propriæ famæ inimica, Arti nostræ noxia, ac Veritati odiosa sit. Insufficientiane dixerò quæ numerosa ediderunt, quæ laboriosa repetiverunt, quæ idem perpetuo clamantia notaverunt, experimenta? Nisi, ut in multis aliis difficilioribus negotiis, ita & in hocce, post numerosiora sane experimenta, quam clari hi Viri fecerunt, proprios detexissem errores, ex necdum sat numerosis experimentis natos, monere erroris illos non auderem; jam vero dum de re summi momenti agatur, audeo, debeoque. Autoritate *Plateri*, *Wepferi*, *Walschmidii*, *Beckeri*, *Dethardingii*, *Senaci*, quanta in hac quæstione nomina! evidentia quoque experimentorum, semel in submerso homine, decies ac nonies in submersis canibus factorum fretus, audax censui ita carere deglutita aqua ventriculos Submersorum, ut qui ultra id affirmarent, ne audiendi quidem forent. Interim occisorum hunc in finem Canum meorum trigessimus septimus, trigessimus octavus, & omnium maxime quadragesi-

gesimus, atram in qua Submersi fuerant, aquam ventriculo eorundem haultam esse monstrabant. Centena mea forte ad naturam sanguinis, atque urinarum, indaganda experimenta, videbantur mihi ad Conclusionem irrefragabilem pluries duxisse; at vero quotiesne palinodiam canere nova me experimenta compulerunt? sic nobiscum, in Re Physica limitatissimis, comparatum est. *Cunctæ res difficiles, non potest eas homo explicare Sermone.* Eccl. 1. *Vidi afflictionem quam dedit DEUS filiis hominum ut distendantur in ea. Cuncta fecit bona in tempore suo, & mundum tradidit disputationi eorum, ut non inveniatur homo opus, quod operatus est DEUS, ab initio usque ad finem.* Cap. III. *Et intellexi quod omnium operum DEI nullam possit homo invenire rationem, eorum quæ fiunt sub sole; & quanto plus laboraverit ad querendum, tanto minus inveniatur. Etiam si dixerit sapiens se nosse, non poterit reperire.* Cap. VIII.

Interim cum Medici, atque Chirurgi, in Operum DEI contemplatione perpetuo versentur, eorundemque cognitionem in usus convertere humanos obligentur, reperiunt se se in eorundem operum perquisitione necessitate inevitabili perpetuo innexos; Philosophiæ autem, ac Medicinæ omnium sæculorum erroribus, jugiter monentur, ne quidquam in humanos usus concludant unquam, nisi experimenta, a centenis centies repetita, idem perpetuo clamitent. Hinc quæ amicorum Gallorum experimentis defunt, meis supplebo, brevi & illorum, & meorum ingentes hinc inde hiatus amici alii explebunt, præproperas delebunt conclusiones, serique demum opus non perficient, sed emendabunt, augebuntque, Nepotes,

In referendis porro meis experimentis Lectorum haud paucis displicebo, cum non ea modo enarraturus sim, quæ directe ad rem pertineant, verum historiam singulorum totam, cum universa anatome, sim traditu-

rus. Considerent autem hi duplici de causa me ad hoc cogi; primo ut prævertam omnes cavillationes, atque subterfugia, quæ ad plausibilem difficultatum explicationem qualemcunque, conjecturalem plane, atque illegitimam, quæri possent, si integra singulorum historia desideraretur. Secundo, ex varietate phænomenon, quæ nostra experimenta hucusque habent, conabor peculiari capite morbum quempiam, eumque notabilem quidem, atque frequentem, obscuriorem tamen, & multis ignotum, sic illustrare; ut ex incertis certa, quod paradoxon, eruantur. Hinc forent singulæ hoc capite traditæ historiæ magnam partem de integro in altero capite repetendæ; quod cum Lectoribus onerosum atque tediosum foret, malui ad semel traditas in hoc capite enarrationes integras referre, quam easdem in futuram morbi cuiusdam elucidationem remittere: quibus interim omnis illa displicet enarratio, legant modo illi, quæ literis italicis exarata, filum historiæ continuatam dabunt.

§. III. Puerum cujus historiam Cap. I. §. IV. dedi, post consuetos restituendi labores incassum admotos, aperui horis 25. a submersione elapsis. Dura mater omnino naturalis; pia non nihil rubicunda: ventriculi vacui omnes; plexus autem choroidei solito turgidiores. In sinibus lateralibus sanguis admodum paucus. Motu sectionis, & agitationis abdominis, liquidi quid ore profiliit; quale quid etiam in vitæ revocandæ tentamine observatum fuerat, non modo hic, sed in ple-risque ejusmodi factis tam in Bruto quam in homine tentaminibus. Colon valde, intestina tenuia leviter, rubicunda. Ab aëre solo valde turgebat ventriculus. *Nec in aspera Arteria primum firmiter constricta, ne quid efflueret, neque in Bronchiis ulla spuma; imo ne perscissi quidem Pulmones, multumque compressi, vel minimum spumosi fudere liquoris. Vacuus cordis Thalamus uterque. Aorta ad cor vacua. Parum sanguinis in ve-*

na cava. Ter venæ sectionem inter resuscitandi labores tentantes, vix unicam sanguinis unciam colligere potueramus, postmodum autem ex singula fluxerat corpore agitato apertura, tenuis atro-ruber, nec vel minimum, etsi diutius repositus, concreescens. *Tomo I. Rat. med. cont. part. 2. pag. 67. duobus in canibus aqua submersis; & maxime pag. 128. & 129. in tertio cane, aquam spumofam vix habuit Pulmo.* Inde capimus egregios Viros, aliquos, qui aquam subire pulmonem in Demerfis negarunt, in cadavera similia incidisse, quæ huic puero, quæ hîc consimilia fuere brutis. Unde liquet non esse, qui hoc negarint, aut negligentia, aut malitia, insimulandos; præcipitantia tamen taxandos esse, quod ex una alterave Anatome id concluderint, quod pluribus primum experimentis fuisset explorandum.

Quæret forsan aliquis, cum puer hic a Reverendo Monacho pedibus in altum sublatis, ac declivi capite quatefactus, sit an non aqua delabi sic e pulmone potuerit, ut in Anatome is ea orbus apparuerit; & an non propterea hoc exemplum male affertur, ad improbandam sententiam de Submersorum morte, ab aqua pulmones ingressa?

Non putem: primo, Vir Reverendus testatur se non vidisse hac corporis succussione aquam ori naribusque produisse. Secundo, Canes non paucos eodem modo succussimus, aquam ipsam ore elabi vidimus, & nihilominus spumofa aqua scatere conspeximus Pulmonem; unde aquam hanc aut gulæ, aut ventriculo, aut utrisque, profluxisse censeo. Tertio aqua spumosa si inversi corporis succussu eliminari potuisset, multo id facilius copiosiusque per nostras pressiones, cum variatas, tum diuturnas, universi Thoracis contigisset. Sed his ipsis compressionibus ore & naribus aliquando spumofum liquidum expressimus, & nihilominus penetratos aqua invenimus pulmones: penitus se insinuassee aquam, &

intimius se commiscuisse cum mucosa, atque tenaci visceris materia, quam ut per hos motus omnes eliminaretur censemus: quod jam dudum observavit eximius *Tyflot* in libro dicto: *Avis au peuple pour sa santé*. Unde quoque in *Lugdunensi tractatu* pag. 244. asseritur „ hoc spumofum liquidum nulli defuisse Submersorum „ pulmoni, sive protinus sive post diuturnam putrefactionem animalium, examinaretur: imo ne post diu „ Suspenfos quidem humili capite canes, neque in „ pulmonibus Submersorum transcissis diuque aëri expositis, unquam hanc spumofam aquam defuisse.

§. IV. Exempla igitur adsunt deficientis in Submersorum pulmone spumofæ Lymphæ, qui nihilominus, hac deficiente, submersione sola perierunt. Potuit *Lugdunensis* Juvencula horum e numero fuisse, adeoque sola submersione periisse, periisse autem in aqua non Submersorum, sed Strangulatorum more; spasmus enim, sive terrore, sive undarum frigore natus, glottidemque claudens, funis vice perimere Submersos potest.

§. V. Sed longe mirabilia vidimus. *Tom. I. Rat. Med. cont. part. 2. a pag. 127. ad 129.* Spuma aquosa deerat canis nostri XXXVIII. pulmoni, eundem subierat tamen. Copiosa atramenti fœce aqua sordescens, relictis in tota aërea visceris superficie grumis crassis, copiosisque, procul dubio in semimortuo animali absorpta fuit in vasa sanguinea: sic ut percisso in lamellas pulmone, hujus feri spumosi exprimi nihil omnino potuerit.

Itaque cum ex §. II. & III. constet & homines bestiasque submersione perire aliquando, non inventa pulmonis aqua, & aquam subire pulmonem posse, citra ejusdem a morte præsentiam; evidens fit generaliorem debito sententiam de absoluta necessitate aquæ, Submersorum pulmonem replentis, Magistratibus in alias mortis causas inquirendi frustraneum faceffere negotium posse.

CAPITIS SECUNDI.

SECTIO ALTERA

Anatome Corporum laqueo strangulatorum, quorum varia dedit Phænomena Anatome, variumque Experimentorum Effectum.

- §. I. Experimentum primum hominis laqueo suspensi deinde in aquam præcipitanti, cujus Pulmo nullum liquidum spumofum habuit.
- §. II. Experimentum alterum quod aquam hanc spumofam præsentem sistit.
- §. III. Tertium experimentum secundo simile.
- §. IV. Ut & experimentum quartum.
- §. V. In experimento quinto, non facta demersione Singulati, aqua spumofa deest.
- §. VI. Sextum simile quinto.
- §. VII. Conclusio ex hisce experimentis.
- §. VIII. An per tria laqueo suffocatorum experimenta id conficere quis possit, quod spuma careat Pulmo hominum? negatur per experimenta aliorum.

§. I. **P**RIORE sectione constitit in eorum Pulmone, qui vivi merfi fuerant, aliquando aquam defuisse, adeoque limitandam esse famofam, circa quam versamur, opinionem: hac sectione alteram ejusdem opinionis partem, quæ in nullius, post mortem in aquam jacti, Pulmone aquam spumofam reperiri posse statuatur, plurimum limitabit Anatome.

In quodam suburbio homo quadragenarius, duro labore victum quæritans, torosus, taciturnus, jam ob

panaritium domi residere coactus, postquam hora semiprima optime comedisset, sapientemque miscuisset cum ancilla sermonem, elapsis abinde hora, & horæ quadrante, laqueo suspensus invenitur. Accurrunt ad ancillæ clamorem quotquot in ædibus erant, sed relinquunt suspensum. Chirugi famuli, absente magistro, vocati, spectaculum vident, abeuntque. Tandem ad horam pomeridianam quartam vice-judex cum Chirurgis accedens, curat corpus laqueo solvi. Inanem fore hi in obrigescente jam corpore laborem, quem lex jubet, arbitrati, illud in Nosocomium practicum, ut resuscitetur, conferri curant, horis forte quinque a suspensione elapsis,

Collum vestigia gessit pollicem lata loramenti coria rigidi, quo se desperabundus suspenderat, & quod ipsa fibula ad occiput nexerat. Loramentum sub carinae Cricoidea principium compresserat Tracheæ. Crura prima erat tota, quam strinxerat, pars colli ante pollicem lata. Lingua non exserta. Os firmissime clausum. Valde magna & dura glandula Thymus. Quamvis hic nihil spei superesse videretur, tamen, ne aliquid præter expectationem contingere nonnunquam posset, ea quæ tentata a nemine fuerant, tentare apud animum statuimus, & integro trihorio consuetos nostrosque prioribus Tomis recensitos, adhibuimus frustra conatus. Cadaver per noctem frigida in cavea repositum fuit, sequenti mane in Nosocomium relatum, ibique in paratum ad id Balinei instrumentum præcipitatum, sic, ut bihorio in aqua submergeretur; abstersum deinde coram summi Prætoris Delegatis, discipulorumque compluribus, apertum fuit, a capite initio facto.

Utraque Meninx sanguine infarta, copiosusque sanguis inter utramque effusus, tenuis, niger, idque ubique quidem, potissimum autem ad lobum posteriorem dextrum. Fere vacui Ventriculi cerebri omnes. Vix

in sinu longitudinali, vix in sinibus occipitalibus, lateralibusque, sanguis fuit.

Neque collapsi Pulmones fuere, neque multum tumidi, colore autem purpurei Peripneumonicorum more. Ligata a principio Trachæa, ne quid efflueret, nihil in ea, nihilque in Pulmone, spumosæ materiæ. Parum utroque in corde sanguinis. Sed hic, & omnis ille, qui ex majoribus vasis collectus, & in Lintheaminibus ex Venis tunsis defluus, nec non ille qui ex vena secta fuit in vasa exceptus, vel hilum consistebat, pulsem atram tenuemque referens. Intestina omnia ubique purpurea.

Ut Pueri submersi Anatome adversa fuit sententiæ, quam examinamus, defectu spumosæ pulmonem lymphæ, ita hæc suspensi per omnia favet, cum pulmonis siccitate, tum infarti sanguine Encephali.

§. II. Octo ab inde transactis diebus, in alio suburbio se suspendit fœmina crassa, torosa, procera, circiter quadragenaria, maritata, a novem annis separata, eidem haud ita pridem rejuncta. Male habere ceperat. 28. Oct. sequenti die pejus. Ex suburbio venit in oppositam urbis plagam ad Chirurgum venam tundenda, domumque cum Marito redux, impransâ lectum petiit, vesperscente, die demum exiit, nocte latuit, & rubescente aurora laqueo suspensa inventa est ad VI. horam. Quamdiu perpenderat, incertum. Solvebatur laqueo, sed sine ulla ope relicta est, & Gestatorio in Nosocomium practicum ad horam decimam illata. Attulere & laqueum nobis; Lintheamen scilicet longum, quatuor pollices latum, non contortum, non latius tamen quam trium linearum vestigium relinquens, necans autem, licet genibus fere flexis pendere debuisset. Strinxerat collum eo cavo, quod supra cartilagineum scutiformem est. Lingua exerta inter labia prominebat. Molimina nostra consueta adhibitori, licet frustranea crederemus, pro consuetudine fuisset, nisi fœdatum

cruore corpus delegatos Prætoris expectare suasisset, ut iisdem præsentibus examinaretur an non prius vulnerata, ac dein suspensa fuisset. His demum elapso quadrihorio se sistentibus, constitit omnem illum sanguinem ex pertusa pridie vena profluxisse.

Cadaver tunc, quemadmodum prius, aqua submersi septem minutorum spatio, detersumque cultro subjeci, a capite orsus. Oculi necdum corrugati erant, opacari autem modice cepti. Utraque meninx utcumque rubicundior solito. In frontis interni dextro Cranium asperius fuit, & officula duo immersa in D. M. cum eademque concreta, & in P. M. simile officulum eadem in plaga inventum. Nulla signa læsionis externa. Ventricle cerebri superiores nonnihil Lymphæ habuere, vix tertius, nihil quartus. Plexus Choroidei naturales. Modicus admodum in sinibus lateralibus sanguis. Neque aut fractæ colli Vertebrae, aut dislocatæ.

Pulmo lævus membranaceis vinculis fortissimis cum pleura coivit, pluribus atque latis in plagis, pede autem equiro suo cum Diaphragmate; dexter autem liber omnino fuit. Ruberrimus uterque, minimeque confidens. *Tracheæ principium plane vacuum, album. Lobi Pulmonum agitati nihil detumescere, transcissique in tomos ultra quadraginta, tantum spumosa, ejusque ex rubro albescentis, atque tenacis Lymphæ, cum sponte, tum compressi, manarunt, ut nunquam abundantius Demeisorum aut hominum, aut animalium, pulmones fuderint.*

Colon Intestinum leviter, Ileum multum, Jejunum plurimum inflammatum, imo præ inflammatione nigrum. In hujus jejuni Intestini duobus in locis nidi erant teretium vermium copiosorum, viventiumque. In altero nido materies glutinosa, purpureaque inventa est, in altero copiosior ex flavo alba. Lumbrici & in Colo.

In submersi pueri Cadavere Cap. II. Sect. I. §. III. nulla spuma inventa est; in Cadavere viri suspensi
Cap.

Cap. II. Sect. II. §. I. quem mortuum bihorio merferamus, nulla aqua Pulmones subierat. In foemina hac ultima, post laquei strangulationem demersa per semiquadrantem horæ, tantum spumosi liquidi profluvium prodiit ex Pulmone, ut ex iis, quos vivos unda merfit, nunquam abundantius. Nulla signa hic Apoplectica, sed vere Peripneumonica mortis. Ergo cuncta hic gallorum virorum sententiæ adversantur.

§. III. Nuncius cujusdam Civitatis, per octiduum in quodam Diverforio *Viennensi* moratus, nunquam nisi ebrius ibidem conspectus, die 9. Febr. 1773. male se habere dixit, jacuit in Paleario; die sequenti, ad 3. matutinam, Aurigis mercatorios suos currus ad iter accingentibus, se immiscuit, sed elapsa vix media exinde hora, de cujusdam currus mercatorii brachio adeo humili suspensus invenitur, ut digitis pedum humum, genua flexus, contingeret. Deposito Chirurgus venam confestim secuit, & corpus gnaviter fricuit. Cura Judicis allatum corpus est in Nosocomium hora VI.

Venam secuerat Chirurgus, nos illico pariter. Observaveramus in Submersorum Suspensorumque plerisque sanguinem ad factam aperturam pleno jactu proutinus proflire, mox vero penitus quiescere; idem & hic contigit in altero brachio, inque jugularium utraque: ita ut vix unciam ex omnibus simul sumptis colligere potuerimus, vix dicam sanguinis, potius aquæ profunde rubræ, nec eo, nec sequenti die, vel minimum coeuntis. Reliqua auxilia pro more, uti quoque tria larga fortiaque vesicantia, frictis aceto plagis admota sunt, & servens Cataplasma vesicantibus circumpositum, laborioseque renovatum.

Quo autem sanguis uberius flueret, magni *Trilleri* exemplo crura in ferventem aquam immitti, alteramque post alteram pedum venam tundi curavi; extra aquam vix tantillum, in fervente vero aqua abundantissime sanguis fluxit. Qui pauculus fuerat vase exceptus, tenuis

tenuis ille, nec concreescens unquam; qui in aqua, ne minimum quidem grumum formaverat, ubi alias si v. g. ex brachio profluum cruorem in aquam ferventem exceperis, tenax coagulum vides. Interea dum sanguis in ferventem aquam de pedum venis fluebat, prorupis pariter de juguli ac brachii utriusque venis, longeque postmodum; sic ut tandem venæ hæ obligandæ essent. Sex horarum impensa in hoc corpus opera fuit.

Anatomie ad 4. pomeridianam, postquam corpus fuisset per horam submersum. Duplici fune suspenderat se homo, funisque eum locum constrinxerat, qui supra Thyroideam Cartilagine est, sic ut os hyoidis & linguæ radicem ad vertebrae apprimeret, & Epiglottidem Glottidi fortiter admooveret.

Vesicantia septem horarum spatio nihil egerunt. Aperto corpore, attenti notavimus omnem illum, qui tota sectione effluxit, sanguinem non nisi rubellum fuisse, citra cohesionem vel minimam, liquorem. Meninges ambæ naturales, adstabant tamen, qui plusculo rubere easdem censebant. Medulla transmissa solito pauciora puncta rubra ostendit. Multus liquor in ventriculo superiore dextro, nullus in ceteris.

Cor dextrum fluidi sanguinis tantillum, nihil dextrum habuit. Aorta vacua in Abdomen usque, ejusque in initio principium osseum. Pericardii superficies interna leviter rubuit. *Pulmo sinister & cum universa Pleura, & mutuos inter lobos, concretus; dexter liber omnino. Neuter contidit. Uterque numerosa divisione transmissus, aquam albam spumofam fudit abundantissime: eadem & Trachea, & Bronchia scatuerunt.*

In abdomine inflammatio, ingens, fere universalis, Intestinorum tenuium, sic tamen ut portiones aut æquales Spithamæ, aut ea longiores, vel nihil, vel pauxillum tantum, inflammatae essent: occupabatque eadem inflammatio fimbriæ Mesenterii portiones, notabilem Peritonæi partem, omnium autem maxime Pancreas; &
Duo-

Duodenum; penitus enim nigrescebant: nec ab ea ventriculus immunis fuit. Mirabili coli & ventriculi figura tabula potius, quam sermone, explicanda est. Et in ventre & in Thorace viscera valde calebant, hora licet 13. a morte elapsa, & corpore horæ spatio in frigida aqua posito.

In hoc corpore notamus primo in suspenso deesse Apoplexiæ signa, adesse ea Peripneumoniæ. Hoc tamen minus hic urgeo quoad Apoplexiam: facilius enim Encephalon, quam Pulmo, revulsionem pati, a tanto sanguinis, quantum hic contigit, profluvio, potuit. II. Aquam copiosam a mortui hominis Pulmonibus haustam. III. Ingentem & horrendam inflammationem visceribus inhæsisse abdominalibus. IV. Iterum hic, ut in Submersis Suspensisque affolet, sanguinem tenuissimum fuisse. V. A fervida aqua mentitum circulum cruoris observari posse.

§. IV. Homo mediæ, ut videbatur, ætatis, pugnax, caput a quatuor retro septimanis malleo percussus, ex eoque tempore tristis, ac stupidus, *die 11. Febr. 1773.* jubebatur a diversorii hospite, cui famulabatur, quidquam quærere in Granario, hora circiter quinta pomeridiana; & cum bihorio retardantem quærant, invenerunt suspensum. Nihil auxilii ipsi præstitum est, ad undecimam autem noctis vectus in Nosocomium fuit. Consueta auxilia admota sunt, trihorii spatio. Nullus fere sanguis sive ex Brachiis, sive ex venis fluxit jugularibus, sive ex locatorum in ferventi aqua pedum venis; quique paucus excipi in vasculum potuit, tenuis ille omnis fuit, nec mora coit. Injecti in gulam liquores descendere in Ventriculum non potuerant.

Die 12. Febr. Cadaver ad 5. pomeridianam submersimus bihorio, & ad 7. aperuimus. Laquei vestigium non supra Cartilaginem scutiformem ut §. II. & III. neque infra Cricoideam, ut §. I. verum ad mediam Cartilaginem scutiformem erat. Ingens omentum. Vix

emi-

eminens infra costas jecur. Tenuia intestina tota purpurascebant: ut & hinc inde Colon & Cæcum. Mira Coli figura cursusque, fere ut in §. III. Capax valde ventriculus, vario ciborum genere plenus.

Pulmo dexter totus cum Pleura firmissime coivit, lævus minime: uterque ruberrimus, jecinoris instar, maxime dexter: varii Lobi perscissi transversim copiosum sanguinem, & separatim spumofum serum fuderunt, copiosum quidem, sed minus, quam in proxime priore abundantem: Trachææ autem, ac majora Bronchiæ, aqua leviter spumosa vere turgebant. Cor utrumque pene vacuum, tantillum aquæ rubellæ in se continuit; tenuis rubellusque liquor, minime consistens ex apertis per universum corpus vasis prodiit. Meninges Cerebri naturales, excepta leviori rubedine ad posteriora. Paucus admodum, isque tenuis omnino, in sinibus lateralibus sanguis. Sinus longitudinalis vacuus. Ventriculi autem superiores & triplo naturali capacitare ampliores, & aqua pellucida pleni; sic & tertius; an & quartus, ruptura infortunata inter examinandum contingens, dicere vetat. Læsionis in capite externo nullum vestigium.

§. V. Matertera die 17. Aprilis privignum 3. annor. strangulaverat. Trihorio jacuit corpus non soluto laqueo. Tandem ad nos delatum, consueto nostro labore incassum agitavimus. Pericranium in ea ossis bregmatis plaga, quæ frontem respicit, ruberrimam plagam habuit, ac si vis externa adhibita fuisset. Integumenta tamen nihil simile ostendebant. Dura mater leviter, Pia tota vehementer inflammata. Vix Lympha in ventriculis: Plexus choroidei turgidiores, ac hydatici. Pulmo non concidebat solo, eoque immani, infartu sanguineo, nam spumosæ Lymphæ nihil habuit. Cor perfecte vacuum utrumque. Sanguis solutus.

§. VI. Homo vultu totoque corporis habitu venustissimus, ad libellum supplicem Aulæ datum repudiatus,

tus, 21. vel 22. Apr. 1773. suspenderat se, nescitur utrum incipiente, an progressa nocte: ad 10. mat. repertus in laqueo erat. Solitus labor irritus pro more fuit. Sanguis solutus, sequenti autem die feri quid supernatabat, quod cochleari exceptum, ac igni immositum, instar albuminis ovi coagulabatur. Rubra ejusdem pars non concreescens, aliquid plus tamen spissitudinis, quam pura aqua habebat. Interea dum pectus spiritu vini calido fricabat noster Chirurgus Scherer, advertit pectoris sibilum, ejusdemque alterna pressione ac remissione veluti respirationis motum: hinc quamdiu hic sibilus motusque durabat, perrexit ille, & dein alii, thoracem premere alternatim, donec post adhibitum sine ulla pausa hunc laborem, & motus respirationis, & sibilus cessaret omnis. Cum vinum calens in os injectum videretur sibilum vel ronchum impedire, siphone ex ore id exantlavimus, moxque rediit ronchus. Dein totum scrotum spiritu vini calido continuo fovimus, & lata multa admovimus Vesicantia. Sequenti mane hora octava cadaver inflammatione Pericardii, & utriusque Cerebri Meningis, nec non ecchymosi inter utrasque, imo ipsis contusionibus integumentorum, suspicionem dedit hominem voluisse se occidere capitis in parietem allisione, antequam confugeret ad laqueum; vel agitatione violenta in suspendii principio caput ad trabem vel parietem violente allisisse. Laqueus supra Cartilaginem scutiformem strinxit. Pulmones membranaceis Vinculis ubique cum Pleura & Pericardio concreti. Pulmones graves a plurimo sanguine, *sine minimo vel spuma vel lymphæ*. Cor utrumque vacuum. Omentum ingens. In Ileo ad novem spithamas a valvula coli stercorea materies, Ileum totum purpureum ac fere nigrum a sanguine.

Si his addideris experimentum *Tom. I. Rat. Med. cont. Part. II. pag. 143.* relatum de absentia spumæ aquosæ, flava, aut rubellæ, in suspensi militis pulmone,

ne, habebis septem suspensos, strangulatosve, quorum tres, post suspensionem non merfi, quavis caruerint spuma pulmonis; unus post suspensionem merfus, eadem quoque vacuus repertus fit; tres vero eandem haud minore quantitate, quam unquam vivorum demersorum plerique pulmonibus gerant, gesserint.

Totum quod mihi ex hisce licet conficere est I. suspensorum pulmones hac spuma vacuos reperiri sæpius. II. Suspensi, & post Anatomen submersi hominis Pulmonem etiam ab omni aqua vacuum reperiri, ut in primo hujus sectionis cadavere apparuit. III. In Suspensis, qui ante Anatomen submerguntur, non raro aquam intrare in Pulmonem, quemadmodum tria cadavera docuerunt; nisi forte alia subsit hujus spumæ causa, de qua deinceps: hucusque enim non debeo nisi secundum eruditorum horum virorum principia, atque systema, ratiocinari, & concludere. IV. Adeoque contra experimenta esse, & quod mortuorum pulmonem non subeat aqua; & quod ejus in submersi corporis pulmone vacuitas violentum arguat, atque ante submersionem illatum mortis genus.

Liceat autem hic rogare, an saltem ad trium suspensorum, qui spuma pulmonum caruerunt, experimenta, si reliqua de industria non fecissem, contra prudentiæ regulas peccassem, si spumam in suspensorum non reperiri unquam pulmone conclusissem? Omnino, minor est enim experimentorum numerus, quam foret ad bene concludendum necessarius. Forte meum judicium, vel alii, vel ipsemet, præproperum fuisse, argueremus. Quod enim alii observarunt, an non idem a me observari poterit? Idque non penitus raro? si *Bartholinus* deprehenderit, vid. *Bonnetum Med. sept. Lib. VIII. pag. 620.* in suspenso homine *Fistulam pulmonalem spuma copiosa impletam*; si aliam suspensi Anatomen referat *Bonnetus*, cujus *Pulmo distensus fuerat, implensque Thoracem totum, hic spumofus atque sangosus,*
ibi

ibi marmoris instar variegatus; si alio loco *Bartholinus* dicat: In strangulato inveni pulmones grandes, variegatos, cæruleos, rubore intersperso leves & spongiosos, sanguine spumoso tam plenos, ut non tantum externæ venæ tumidæ in membrana apparerent, sed in dissectione cordis demonstrantem me fere impedirent, an non vix condonandæ temeritatis me similia, postmodum observanda, damnarent? Quod autem similia haud raro obtingant, faciet palam sectio sequens.

CAPITIS SECUNDI

SECTIO TERTIA.

Septuplex hominum Anatome, quorum, morbis acutis chronicisve defunctorum, Pulmones aqua spumosa scatuerunt; sexies in Nosocomio, semel in Urbe.

- §. I. Hominis Peripneumonia atque Ischuria mortui Pulmo habuit spumam aquosam.
- §. II. Studiosi Pleuro-peripneumonia denati Pulmo eandem quoque habuit.
- §. III. Rev. Sacerdotis Pleuro-peripneumonia denati.
- §. IV. Nec non Pulmo Ducis militum, chronico morbo diu afflicti, & aucto demum sublato.
- §. V. In saltandi amatore, Pleure-peripneumonia enecto.
- §. VI. Præterea & in eo hominis febre ardente denati.
- §. VII. Tandem & in similem morbum passo.

§. VIII.

§. VIII. *Conclusio ex precedentibus. Precipitantior Lugdunensium Conclusio, & minus vera pro veris Magistratui refert, homines plane innocuos in carceris, tortureque periculum conjicit, & sæpe inanes eidem Magistratui creat labores.*

§. I. **F** Inis Sectionis II. paradoxon proponebat, imo assererebat, de spumoso liquore abundante in suspenforum pulmone; quo autem minus paradoxon appareat, quædam nova observata enarrabo.

Rude donatus miles, & talis quem locum tenentem appellitant, 73. annorum, anno 1773. die 26. Jan. in Nos. pract. susceptus, narrabat se post 24. annos valetudinis integerrimæ, eo petulantia cum Commilitonibus pervenisse, ut post evacuata ad ebrietatem pocula, eadem frangeret, dentibus conficeret, ac deglutiret; haud insolita hisce in terris petulantia est; glorianur de ea etiam nonnulli Nobilium. Quod sibi, ejus protervitatæ tironi, dolorem oris, fauciumque; paulatim vero in eadem Magistro, tam parum molestia intulit, ut inter socios eminens omnes, par calicum post Computationem devoraret: semel tamen contigisse, ut procacitatis poenam crudeli morte luisset, nisi post diuturnam colicam viti fragmenta immisso clystere alvo exturbasset. Contigisse quoque in ultimo Austriacorum cum Thracibus bello, ut & ter acute decubuerit, & pectus semel vehementer contusus fuerit: ab hac contusione superstitem mansisse Tussim, eamque ad mutatas anni tempestates crebram, cum sputorum tenuium excretionem. Multis tandem ab annis Dyturia atque Ischuria periodicis laborasse, cum urina sabulum gerente, crassaque, ac flava.

Die 25. Jan. sputis jam ab aliquot retro diebus plane deficientibus, colico dolore cepit torqueri, febre ac tussi anhela. Purgans antiphlogisticum sumpsit; quo nihil operante; in Nosocomium vespere illatus est.

Con-

Continuum inibi conquiescit ventris dolorem est, ventre primum nec duro, nec tumido, sensim vero duriore & tumidore, idque a sinistro umbilici latere potissimum oblique deorsum. Paucam urinam principio, paucissimam deinde, ultimo calamitatum biduo nullam misit, neque scone, neque ad inductum Catheterem. Alvus quidem die morbi tertia prodiit atque continuavit; Tussis autem sicca fere, molesta, jugis, insomnia, colica, continuarunt, & immorigera omnibus ægri tudo hominum Peripneumonia & Ischuria sustulit die undecimo morbi incipiente.

Jecinoris erat immensa adeo moles, ut ad umbilicum, & ad dextri ossis Ilei cruriam pertingeret; & cum anteriore non tantum facie, sed & tota mole omnia ad lumbos usque expleret, causa capiebatur ventriculi intestinorumque mutatae sedis. Dexter Ren cum suo uretere sanus. Sinister mole ingens, in pelvi suppurans, durus totus, in sua papillari substantia Lapillulos numero septem gerebat, ureter quadruplo non crassior, ut fieri assolet, sed amplior, in via sua media ostendebat lapillum, æque dein amplius ad Vesicam usque. Vesica contracta & indurata sic, ut duas uncias urinæ æger capere posset. Nullus in ea, sed prope glandem in Urethra parvus calculus.

Pulmo dexter multum, sinister integre, firmissimeque, concretus cum Pleura. Cohæsione patienter soluta, Pulmo nec tunc, nec in tomos transmissus, concidit: *effluxit autem seri non nihil spumosi ea abundantia, ut nunquam abundantius ex Demersorum expresse- rim Pulmonibus.* Aspera arteria dura valde, & superius veluti *Ruisehiana* injectione rutilans. Thyroidea glandula pene ossea. Coaluerantque in unum corpus tres priores Annuli cartilaginei. Initia Bronchiorum, unaque circumpositas iisdem glandulas, calcarea replebat materies.

Cor ingens. Aorta triplo crassior in sua substantia, duraque valde. Ejus semilunares valvulae ossae prope-modum duritiei. Polyposa massa alba mollis, non commissa, sed cohaerens cum sanguine grumoso, soluto, cor arteriasque explebat,

§. II. Die 7. Febr. 1773. *Studiosum Poësius* 17. ann. ex Monte aureo in Nosocomium suscepimus, qui a sex retro annis, post gravem Pectoris morbum, tussi, anxietate, sinistri lateris dolore, febre varia, corrhyza, catarrho, frequenter laboraverat, jam vero faucium ac palati leviori inflammatione a sex abhinc diebus curatus, Pleuro-peripneumonia labore cepit, & altero die morbi ad nos delatus, praeter alia auxilia adhibita, ne per novem quidem Venae sectiones a vehementia inflammationis liberali potuit, sic ut principio sexti diei interiret. Urinae perpetuo aut jumentosae erant, aut crassum enaorema in globum collectum, gerebant. Sputa & pauca semper, & tenuia, & paucis mucis subinde commissa.

Exiguum omentum. Immensum iterum Hepar, figuram plane singularem, depressamque Intestinis sedem concilians. Copiosa quidem, at minus colorata Bilis. Mesentericae venae repletae ultra morem. Ren dexter bonus: laevus triplo major, durus compactus.

Dexter Pulmo cum Pericardio, tum universae Pleurae, hic firmius, ibi laxius, concrevit. Uterque anteriore facie naturalis, laterali ruber, dorsali purpureoniger, neque confidens. *Quaetunque in parte perscindebatur aliquid feri Spumosi albescentisque, profudit.* Cor, vasa majora, polypi, ut in proxime prioris Thorace; ea differentia, ut post novem Venae sectiones, quarum ultima crassissimam durissimamque crustam illico formaverat, ac rubram ejus portionem vix scissilem dederat, tamen concretiones polyposas, & longe majores durioresque, Cor, Ventriculi, Sinus, Auriculae, & Vasa omnia majora gererent, nec grumosi ac
pur-

purpurei erroris sibi coherentis nisi pauculum haberet; inlo in capitis sinu longitudinali mere flavus crassusque polypus cum adhærescentibus ramis ex cerebri venis extractis, citra vel minimam rubedinem inveniretur: ita ut a posteriore convincemur eum omnem morbum absolutæ lætalis esse, in quo toties educto sanguine inflammatorio, totque diluentibus ac sanguinis tenacitatem solventibus ingectis, plurima sanguinis pars polyposa, adeoque per minima vasa impenetrabilis, pertinaciter manat.

Historiæ huic eandem notam, quam priori adnecto: quæ nvis enim minorem spumosi feri copiam dederit Pulmo, eam dedit tamen, ut majorem in submersis sive hominibus, sive brutis, aliquando non invenerimus.

¶. III. Rev. Sacerdos 70. ann. ter meminit se acute ægrotasse, ante elaplos abhinc 20. annos; ab eo vero tempore sibi nihil morboſi accidisse, præterquam frequentes admodum Catarrhos; quos mitigare, ac læpe pellere penitus, pulvere *Lapis de Goa*, quem conficere noverat, soleret; maxime quando cum regimine ad sudorem, integro quotannis mente, eo lapide sudabat.

Die 13. Martii catarrho, seu potius Pleuro-peripneumonia, laborare cepit ad noctem, & cum ad Venæ sectiones & adhibita auxilia alia ingravesceret, in Nosocomium practicum suscipi petivit. Medio die tertio in idem illatus est. Inflammatio tanta fuit, ut coriacea sanguinis crusta nunquam densior, rubraque ejusdem portio, nunquam durior fuerit, quam in Venæ sectione quinta. Lateris tamen dolor post hac cessavit. Urinæ paucæ, crebræ, urgentes, paulo coloratiores naturalibus, enæorema gerebant crassum, copiosum, globum formans. Finis diei quinti idem & vitæ fuit.

In cadavere ingens Hernia, dicta *entero oscheo-cele*; omentum enim non inerat, quia & breve nimis, &

cum peritonæo conatum. Celaverat autem hanc, cum duos Medicinæ studiosos, qui duobus cum dimidio annis familiariter eo usi fuerant, tum mihi; ne autem ramicosum illum suspicaret, vomitus absentia, alvusque obsequiosa, vetabant. Intestini cœci saccus locabatur ad annulum abdominis, & Ileum, mox ante suum in cœcum ingressum, in prælongum Scrotum, prolapsum erat ad usque testem, & quidem sic, ut intestinum usque ad testem ab omni cohæsiōe cum sacco peritonæi liberum esset, ipse vero saccus toto itinere suo arctissime cum vicinis concretus. Testis bonus, non, ut in similibus fit, complanatus. Prolapsi Intestini longitudo trium cum quadrante partium ulnæ *Viennensis* erat. Annulus ita amplus, ut duo digiti intra illum se commodè movere possent. Brachierium non gerebat; an gesserit quondam ignoramus. Si gesserit, id abjecisse illum arbitror, eo quod per annulum amplum juxta pulvinar brachierii Intestinum elabatur facile, & sic compressum doleat. Et quia ex sacci universi cohæsiōe firmissima antiquam fuisse Herniam conclusimus, neque tamen Intestinum cum sacco coivisse deprehendimus, Rev. Virum frequenter, forte singula nocte, Intestinum reduxisse in ventrem credimus.

Ileum Intestinum habebat in latere sinistro ventris appendicem seu lateralem saccum, eumque cœcum, in quo recondi Nux moschata posset. Colon adeo suo in cursu irregulare, ut faceret tredecim flexus.

Hepar mole minus quidem quam in præcedentibus, magnum tamen; & cum Ventriculus ingens esset, & a latere lobi jecinoris minoris spatium quidem haberet sese expandendi, minime vero expandere se ob lobi majoris molem in medio ventre posset, intestinale formam affectare debuit a latere Epigastrii sinistro, usque ad Pylorum. Oesophagus ad duos digitos latos in Abdomen descendebat, antequam abiret in Ventriculum. Pylorus angustissimus, non spasmo, sed præternatu-

naturali membranarum crassitudine. Magni Ventriculi sacci superficies interna vehementi Inflammatione rubebat.

In Thoracis cavo dextro unc. XIII. aquæ rubellæ; unc. VI. in sinistro. Utriusque pulmonis lobus superior cum Pleura arcte coaluit. Pro more iterum hic Pulmones facie anteriore minus, & per insulas duntaxat, multum ad latera, plurimum ad dorsum, inflammati fuerunt.

Aspera arteria percissa spumam albescentem, eamque copiosam fudit; continuata autem longitudinali sectione, scatebant eadem universa Bronchia. Quod autem notandum, nihil concidentes, imo ponderosi Pulmones, dum in lamellas divisi conjiciebantur in aquam, partim innatabant, partim, cum maxime autem ea dextri Pulmonis, fundum, lapidis instar, petebant. Aqua quippe pulmone gravior, obsidens Pulmonis cellulositatem; sanguis pulmone & aqua gravior, opplens ad crepaturam fere, Arterias; una cum Pulmonis Parenchymate, massam confecerunt, ejusmodi aquæ volumine specificè graviores. Contenta hac in pulmonis cellulositate aqua, cum turgentibus sub vitæ finem arteriis venisque premeretur, in cava Bronchia, Tracheamque, transsudasse videtur; quemadmodum in Demersis ex cavis Bronchiis in Pulmonum cellulositatem observatur transire. Sic ut aëreo hoc canali loco puri aëris, nunc crassa ac sebacea materia repleto, pondus Pulmonis adhuc auctius fuerit.

Pericardii tunica exterior inflammata multum, interna aliquantum. In eodem Liquoris unc. j. B.

Cor sinistrum vacuum, fere & dextrum, nisi quod hinc inde grumosi sanguinis quidquam hæreret inter columnas.

Pleura tota utroque in latere inflammatissima.

In Encephalo D. M. vix, P. M. valde inflammata, imo ad posteriores cerebri lobos purpurea. Sub

Arachnoidea opacus liquor esse videbatur, qui hæc pertusa limpidus erat. In ventriculis superioribus solita copia feri. Plexus choroidei turgidi, pluribus hydatidibus obfessi. Ventriculus tertius tantillum, quartus nihil liquidi gerebat. Omnia vasa per universum Encephalon, ut Arteria basilaris, Circulus Willisianus, &c. crasso purpureoque sanguine infarta erant.

§. IV. Die 18. Aprilis 1773. invitabar ad Anatomicum Viri prænobilis, Militis strenui, septuagenarii, qui a quatuor retro annis multum tussiverat, sputa reddiderat, lævoque in latere dolorem, sæpe ad animi deliquium usque, externa vel levissima pressione in Leipothymiam fere exacerbantem, tum ad motum, & ad calidiora, palpitationes ad præcordia & per omne corpus horribiles toleraverat; quem demum febris ardens, ex justa indignatione orta, intra quatrimum sustulit. Pulmones ambo cum Pleura undique concreti, sinister etiam cum Diaphragmate; & dum sinistri hujus pulmonis concretiones a Pleura solvebantur, loculi cavi inter has concretiones alii ichorem, alii pus referebant. Pulmonis ejusdem lobus superior crassus, at jam gangrænosus; interior lobus ingens, durus, ponderosus, ita ut portiones nonnullæ aquæ fundum peterent, cum universo tere pericardio firmissime concreverat, parte autem sua non indurata, sed non confidente, spumosa lymphæ copiosa scatebat. In dextri Pulmonis inferiore, medioque lobo, non confidente, sanguis plurimus, vix effluens, & siccum fere pulmonem in transscindendo ostendebat; lobus vero superior non minorem feri spumosi copiam referebat, quam multi referunt Demersorum. Uncia forte aquæ rubellæ in pericardio. Inflammatum Mediastinum nonnihil erat, Diaphragma valde, pluresque Intestinorum longæque portiones. Abscessus in ipsis Pulmonibus nulli, etsi tot annis tussisset, sputaque ejecisset. Polypi ut in prioribus cadaveribus. Undenam dolor in sinistro latere, atque

atque ad minimam pressionem ingens , explicabitur facile ex pressione cordis contra durum accretumque Pulmonem , & a vellicatione omnium inter se concretarum partium .

§. V. Die 27. Aprilis recens elapsi , coram universa Juventute Medica cadaver aperui hominis 28. ann. qui post frequentiores saltationes in Pleuro-peripneumoniam dirissimam incidens , eadem nec decem venæ sectionibus , nec ceteris remediis cedente , septimo die perierat . Oculi corrugati , atque opaci 30. a morte horis , isque , qui Cadaverum esse solet , artuum rigor . Colli pressione ore atque naribus liquor fluxit . Pulmo dexter duobus in locis cum Pleura concretus , intermedia substantia quadam , hic membranosa , ibi ligamentosa non laceranda , sed perscindenda , rubrisque hinc inde vasis ornata . Rubor inflammatorius Pulmonum , ut in præcedentibus . Concretio deinde Pulmonum Pleuræ , Diaphragmatis , Pericardii , ope feri transsudantis supremis prope mortem horis . In cavo dextro Thoracis erant Lymphæ rubellæ unc. III. & media , in sinistro unc. II. & media .

Pulmones transcissi mædebant , serumque manabant omni ex parte ; pressi autem feri spumosi fuderunt uncias octo .

Aspera Arteria & Bronchia omnia , per totam longitudinem perscissa , deterfaque , superius pannum rubrum , inferius purpureum referebant . Cor rubrum valde ; Valvularum aliæ rubri , aliæ purpurei coloris . Rubra valde Arteria pulmonalis interna , internaque Aorta , ad Iliacas arterias usque ; ibi autem color plane purpureus , non pergens tamen per easdem . Polypi vitalium viscerum , quales priorum cadaverum . Omnis venæ cavæ sanguis , omnisque axillarium vasorum , niger ac dissolutus .

Monstruosum Intestinum colon , sic ablato Peritonæo universum explere videbatur abdomen , ut nihil fere

præter illud replere ventrem cerneretur. Mesenterium solito rubicundius. Præ mole jecinoris ingenti ventriculus eam intestinalem, qualem jam supra notavimus, formam induere debuit.

Polypus venosus in tota longitudine sinus longitudinalis. Pia Mater quidem tota admodum, in sinistro autem Hemisphærio magis, inflammata. Ventriculi vacui.

Ex hac & singulis sectionibus hominum, quos morbus inflammatorius e vivis sustulit, abunde liquet quanta rubri sanguinis copia, post toties iteratas venæ sectiones, nariumque hæmorrhagias, adhuc præsto sit in cadaveribus; quæ longiorem harum sectionis enarrationum non minima causa fuit.

§. VI. Mensis Maii 28. die, hominis cadaver publice in Nosocomio aperui, qui febre ardente correptus, eam præter morem in diem XV. protraxerat: horis a morte 25. elapsis, & frigida in Cavea cadavere per id tempus servato.

Aperto pectore, Pulmonis utriusque inferior lobus membranaceis vinculis cohæsit cum Diaphragmate ac Pleura, magis autem sinister: ceterum inter se mutuo lobi omnes transsudante sero coiverant. Pulmones facie anteriore valde rubicundi, laterali validus, dorsali nigerrimi. *Lobi superiores transscissi compressione serum spumofum fundebant modice, inferiores vero primum sola transscissione illud transsudabant, deinde autem compressi tantam spumosi liquidi copiam fundebant, ut facile libram mediam colligere potuissem, si perrexissem.* In corde & auricula dextris multus erat sanguis polyposus, flavus, cui sanguis solutus ac niger sic cohærebat, ut in sanguine misso rubra insula cum crûsta cohæret. Aorta a suo principio, per totam superficiem internam, usque in Iliacas, rubra, in Iliacis adhuc magis: Vena cava pariter, & internum Cor, Pleura modice, Diaphragma vehementer. In utroque pectoris ca-

vo, & in abdomine, nonnihil Lymphæ rubellæ. Hepar in externa supercië inflammatum; in utraque Venter, vehementissime autem qua parte ingenti lieni incumbbat. Colum tympaniticum, ac figura flexibusque monstrosū. In Ileo ingens Appendiculus, seu Diverticulum. In Encephalo sola forte Pia Mater paulo rubicundior. In fronte & versus futuram coronalem, plaga florenum magna, ruberrima, in Pericranio, adnexaque cellulositatē; in fronte externa nihil.

§. VII. Die 22. Junii coram Auditoribus aperui 19. a morte horis cadaver hominis 42. annorum, qui ab elapsis 18. retro annis ex equo in durum obstaculum dextro sui Thoracis latere præceps datus; male quidem postliminio pectore habuerat, suum tamen semper præstiterat domino famulatum; febrim intermittentem, nec non pectoris acutam, semel passus. Pleuræ peripneumonia tandem dirissima, quæ ne post undecim quidem venæ sectiones cessit, affectus, interiit octavo morbi die.

Costa tertia dextri lateralis fracta quondam, ligamentosa sic coaluerat substantia, ut quandam æmularetur articulationem. Pulmo eo in latere cohæsit per insulas cum Pleura, Mediastino, Pericardio, Diaphragmate, vinculis latis, robustis, membranaceis partim, partim ligamentosis, vasculosisque. In plagis a concrezione liberis inter erosum Pulmonem, Pleuramque, puris crassi copia ea, ut siphone quantum potuissemus id exantlantes, plus libra colligeremus.

Graves, nec concidentes pulmones, non a pure, quo carebant, sed ab infarto sanguine, copiosaque lymphæ; sic ut medius lobus inferior in aquam injectus, laevis instar subsideret. Reliquus Pulmo dexter, totusque ruberrimus sinister, in taleolas numerosas transcissi, sero strumoso manabant, compressi effundere rivatim. Ape-
ra autem Arteria a summo suo per totam longitudinem, divisiones, imaque Bronchia, alba spuma plenissima.

Aipe-

Aspera eadem arteria leviter inflammata ad suum principium, in medio plus, in bronchiis maxime, ut purpurasceret. Utroque pectoris in latere Pleura, in dextro autem dirius, inflammata. Inflammatum tendinosa sui portione Diaphragma; Ventriculi interna prope Cardiam fere gangrænosa superficies; inflammati etiam valde Renes, de quorum regionis dolore æger vehementer in ultimo morbo conquestus fuerat; urina interim probe secreta semper.

Tympaniticum valdopere Colon intestinum; an inde ponderosum Hepar trusum, in altum, ut in dextro latere latis digitis duobus altius, quam in sinistro assurgens, exiguum affecto relinqueret Pulmoni spatium?

§. VIII. Ex his omnibus manifesto constat supervacaneos creari Magistratui labores, ad perquirendos sollicite ficti homicidi reos, & ejusdem Magistratus necessariam veræ internecionis autores indagandi labefactari sollertiam; si Medici atque Chirurghi legali testimonio perhibent aut hominem submersum esse, sine violenta morte prægressa, cujus pulmo aquam spumofam gerat; aut eundem esse truculenta nece peremptum, antequam in aquam præcipitaretur, eo quod lymphæ ac spumosa ejus pulmo careat. Constitit enim, & eos, quos sola demersio in aqua peremit, omni posse carere lymphæ Pulmonibus. Constitit illos, qui mortui mergantur, haud raro plenum eadem hoc viscus habere. Constitit his, quos morbis consuetis abstulerit atra dies, Pulmonem etiam tanta hujus spumæ copia sæpe madere, ut non majori Demersorum pulmo madeat. Constitit demum potuisse Pulmonem hausisse aquam, & homine necdum perfecte mortuo, hanc resorptam intra vasa sanguinea fuisse (vide supra canis nostri XXXVIII. Anatomem) sic ut spumæ nihil toto in Pulmone conspiciatur, in quo tamen intrasset abunde, ut fœces Atramenti docuerunt.

Quæ cum ita habeant se, quotiesne imponimus Judicibus locorum, eosque cogimus, ut vel inanes in peremptores inquirendi molestias subeant, vel necessariis forte eisdem indagandi supersedeant artificiis, si, quod omnia hæc experimenta subvertunt, sequamur Systema? Si quis serio omnia revolvit, quæ hucusque communicavi experimenta, errorum horum frequentes occasionem esse posse, facile per se perspicit: si v. g. *Vir* §. I. aut *Juvenis* §. II. aut *Reverendus Vir* §. III. aut *Belli Dux* §. IV. aut *Pleuro peripneumonicus* §. V. aut *Febre ardente mortuos* §. VI. aut tandem *Pleuro-peripneumonicus* §. VII. peregrinatus, alicubi in Diverforio subita morte extinctus esset, locique Magistratus, violentiæ illatæ suspitione, legalem cadaveris inspectionem exigeret; profecto hoc, quod infirmamus, principio imbuti Medici atque Chirurghi, hominem aqua suffocatum, abstersum lectoque repositum esse, vel sponte jurarent; forentque in causâ, saltem ubi frequens adhuc vigeret Torturæ insania, ut necis suspecti admovebantur ad Torturam, hique eidem perferendæ impares, se insontes accusarent, immeritamque sibi morte consciscerent.

Equidem haud is ego sum, qui egregios hosce Auctores hæc, quæ scripserint, scripturos fuisse sustineam, si unquam in similia, in quæ ego, cadavera incidissent; potius crediderim incidisse eos in ejusmodi nunquam hincque mea observata rariora esse autumabunt, quæ vix, aut ne vix quidem, in consueto ordine naturæ faciant exceptionem. Attamen primo in re tanti momenti etiam rarissimas observationes notabilem facere Legis universalis exceptionem, primum assero; secundo exceptiones has adeo raras haud existere, si intra quatuor menses in septem Cadaverum sectionibus mihi obtulerint. Ut vero rem in aprico ponam, observationem hanc non modo non in rarioribus, sed in frequentioribus collocandam esse, ostendam; hæcque sequentis erit sectionis hujus capituli materies.

CAPITIS SECUNDI

SECTIO QUARTA

Spuma Pulmonum frequentissima Anatomicorum experientia in iis, qui mersi non fuerunt, demonstrata est.

§. Unica Confirmatio priorum observationem per XIV. Anatomicas Sectiones Cl. Viri Morgagni, & per nonnulla aliorum insignium Anatomicorum. Conclusio ex his omnibus.

§. I. **U**T hoc probem, Autorem accuratorem, fideque digniorem, immortalis Morgagno non novi; unde ab eo, quibus indigeo, petam *Ep. Anat. Med. XXII. §. 19. Pulmonis ubique multo sero referti hominis, qui per quadriennium anhelus respiraverat maxime ad motum corporis. Ep. XXI. §. 33. Pulmo dexter durus compactus ut jecur, sinister vero fudit aqua sanguinolenta, et spumosa non modicam copiam, thorace vacuo. Ep. VI. §. 12. pulmo sinister aëre mediocriter distentus, et, si secares, multum effundens spumosi humoris. Ep. XIII. §. 3. Eminentiss. Cardinalis Barbadicus Antistes Patavinus, catarrhis obnoxius, febre dicta catarrh. epid. moritur. Graves erant ipsi Pulmones, sed a catarrhali materie, quam continebant, multa passim e bronchiis, quacunque incideres, erumpente. Ep. XXX. §. 2. In homine cancro ventriculi mortuo: ex omni utriusque Pulmonis incisi parte serum prodibat Ep. XXXIV. §. 18. Homo ab hernia omenti et intestini non integri, sed parte sui diverticulum qua-
fi*

si facientis, ceterum in ventre aperti, peremptus, habebat Pulmonis partem indurata[m], *Pulmones autem ubique ferme humore imbutos*. Ep. XXXVI. §. 17. Mulier ante mortem subito in magnas anxietates lapsa, multam spumofam & sanguine tinctam materiem expuit. In Thorace omnia sana, nisi quod *pulmones rubore suffusi multum*, cum secarentur, materiam emittebant ejusmodi, qualem novissime mulierem expuisse scripsimus. Ep. V. §. 11. In homine ebrio, subito mortuo, cujus historia vitæ non scitur, Pulmones graviores, et spumam si premeres emittentes, sana tamen eorum substantia. Ep. VII. §. 11. Figulus, potator strenuus, pleuroperipneumonia periit. Lobus superior sinistri Pulmonis in suprema parte sero turgidus spumoso, ibidemque niger & durus erat, sed ita durus, ut vetus potius vitium, quam recens, existimares: parte autem reliqua ferme exsuccus, nec multum dissimilis sani. Ep. XXI. §. 29. Ancilla a 3. mensibus minus menstruans, a capto frigore incidit in morbum prioris similem, sub finem ex ore effluebat humor aquæ instar spumofæ in qua caro recens lota sit. Die 7. moritur. Excepto superiore sinistri Pulmonis lobo, reliqui lobi omnes quamvis spumoso humore prorsus distenti, naturalem substantiæ modum servabant, ex qua dissecta is humor prodibat. Ep. XVIII. §. 30. Vir intemperantis vitæ, post magnas in respiratione anxietates, et cordis palpitationes, cum œdemate corporis, 40. die moritur. Pulmones dissecando variegati, et spumoso humore scatentes, & ibid. §. 34. Latrix a sexennio spirandi difficultate, quæ asthmatis convulsivi spem habebat, sæpe in Nosocomium venerat, eodem demum malo inibi moriebatur. Nullus hydrops thoracis. Pulmones non annexi pleuræ, sed turgidi ... & referti humore spumoso: at nihil præterea intus extrave, quod morbidum esset, ostenderunt, Ep. XXI. §. 23. A pleuritide die 4. moritur homo, cujus nulla anamnesis additur.

ditur. In sinistro latere pulmo ferme sanus, fulvo catenato humore imbutus quacumque securemus. Qui vel uberius ex Pulmone prodibat dextro. Hic vero & major & gravior & durior ubique Hepatis substantiam referebat, exceptis quibusdam non exiguis tractibus, in quibus substantia erat albida & quasi ad corruptionem vergens. Epist. XVI. §. 30. Adolescentuli ultra tres menses difficulter spirantis; pulmones ichore spumoso, albidoque si manu comprimeres, scutere conspiciebas.

Ias igitur si nunc mihi esse videtur confirmandi omnes eas, quas ad priores sectiones hujus capitis formaveram, conclusiones. Si aqua non eorum Pulmo hauriat, quos post rata merferit unda; si magnis anatomicis pulmones hominum laqueo itra gulatorum, hac spuma scaturisse visi sint, ut supra constitit; si aqua spumosa scaturierint pulmones hominum septem, intra paucorum mensium spatium, a ne post mortem publice examinatorum, quos e medio continuas morbi sustulerant; si denique Morgagni minimum hoc decies & quater notaverit; nihil in posterum aut imprudens, aut perniciosius, referri magistratui poterit, quam quod praesens hac spuma hominem & submersum in aqua esse, & quidem viventem, certo indicet; quodque, spuma hac absente, homo demersus violenta manu peremptus fuerit, priusquam mergeretur.

Terminaturus hoc caput duo opponi mihi argumenta posse praesentio, quae nunc praevertere, quam postmodum subvertere, malim.

Ac foret forsitan prius hoc: cum in prioribus meis operibus similibus post communes morbos pulmonum non meminerim, jamque paucorum mensium spatium eodem septies memorem, insoliti quid in natura rerum obtrudere me mundo velle: imo inhonestius quid forte suspicari si poterunt, qui spumofam hanc aquam in frequentiore anatome nunquam nisi in iis, qui viventes submersi sunt, prehenderunt; ac si quid exaggerationis, ne pejus dicam, meus sermo haberet. Re-

Respondeo primo vel ad notas morborum, moriisque causas confirmandas, vel ad novas detegendas, vel denique ad conjecturales examinandas, corpora exenterari, eorumque exerceri anatomen: Intentionem primam alteramque priores nostras sectiones direxisse plerumque; tertiam vero nos in Pulmonum phænomena contemplan- da reddidisse attentiores, quo quid de nova *Lugdunen- sium* sententia censendum foret, caperemus. Hinc crebro contigisse, ut citra interni pulmonis examen olim corpora mitteremus; jam vero quo veritas patefeat, nunquam ejusdem visceris internum omittamus examen. Disputationes de valvula Coli ortæ, omnes Anatomicos in accuratiorem ejusdem examen, descriptionemque, excitarunt. Nunquam tam crebra mentio, vitiorumque descriptio, facta glandulæ pinealis est, quam postquam *Renato Cartesio* placuisset figere in eadem animæ sedem. Clarus Anatomicus scripserat se in 2000. quidem cada- veribus vix bis terve inflammata pleuram advertisse; quod facile admitto dum Anatomici intentio ad longe alia converterit sese: eodem modo post multa lustrata olim cadavera non potui sæpe pleuræ affirmare inflam- mationem, eandem inadvertenter prætergressus, & aliis conspicuis rebus in corpore contemplan- dis occupatus. At vero cum *Valsalva* in rem intentus *Morgagnus*, de- cies & quinquies pleuram vidit inflammata, & ea quidem in plaga, unico casu excepto, quam occupave- rat in vita dolor. Parique ego modo, postquam pleu- ram & inflammari, & præ vasorum defectu inflammari posse, negatum fuit, in rem nunquam non intentus, & inflammata hanc membranam, & vasculosam esse, ipso *Morgagno* crebrius meis demonstravi Auditoribus.

Respondeo secundo, non ita me pulmonem præter- vidisse, ut non frequenter in illis id, de quo jam ser- mo fit, animadverterim. Quo pacto alias Tomo XIII. scribere auster potuissem: *pneumofum autem serum o- stendi Auditoribus pluries, defunctorum variorum perscin- dendo*

dendo Pulmonem. Quod ergo sapius quondam, sed modo generaliore notaveram, id nunc & distinctius, & continentius, notavi.

Alterum quod opponi mihi posset, conclusionis errantis foret accusatio. Ex eo quippe quod pulmo, quos demerferam suspenforum, spumosa lymphā abundaret, id esse systēma erroneum, quod aquam nunquam in mortuorum pulmones penetrare statueret, decrevi; id quod ex eo minime concludi posse videtur: si enim in non Submersis mihi toties sero spumoso Pulmones scatuisset videri sint, quo tandem jure ego asseram aquam suspenforum, deinde Submersorum, subiisse Pulmones, quæ adesse in iisdem, eo quo in agris meis modo, dudum potuerit? Vitiosum proinde meum hoc esse argumentum: suspensus homo, ante Anatomen merfus, aquam gessit in Pulmone: ergo ipsa hæc demersionis aqua hujus mortui hominis subintravit Pulmonem. Penitus subvertunt observata mea posteriora, ut arbitrantur, hanc conclusionem.

Respondeo I. *Lugdunenses* nostri amici ex priore sua conclusioe alteram & quidem hanc, formaverant: ergo Demersus omnis, cujus carent Pulmones aqua, morte violenta peremptus fuit, priusquam præcipitaretur in flumen. Jam contra experimenta illorum, me mea docuerant illorum in Pulmone spumosam aquam inventam esse, quos merferam mortuos. Argumentum proinde eorum secutus, debebam ex contrariis experimentis Thesim contrariam ponere; quandoquidem si ipsi, si meis experimentis adstitissent, aquam in mortuorum Pulmones intrare posse, pro eo, quo sunt candore, ultro falsi fuissent. Videatur qui hanc objectionem præverterim *Cap. II. Sect. II. ad finem §. VI.*

Sed II. cum viri immortalis *Morgagni*, tum mea ipsius experimenta, & observata, omnia illorum argumenta & conclusiones penitus subvertunt, quandoquidem non eorum duntaxat, quos mortuos submersi, verum

rum etiam illorum, quos morbi communes sustulerunt, Pulmo hac spuma manaverit. His enim sic toties demonstratis, qua demum veri umbra sustinere ultra hoc suum argumentum poterunt: nun uam in Pulmone hominis spumofus liquor invenitur, nisi in illius, quem vivum merferit unda. Ergo omnis, qui spumofam aquam in Pulmone gerit, vivus fuit merfus?



CAPUT III.

DE HYDROPE IPSIUS

PULMONIS.

§. I. Ex infortunatis experimentis nostris videmur id lucrati, ut in lucidiorē veri Hydropis Pulmonis, propriē sic dicti, pervenerimus notitiem. Dubium videtur num Hippocrates hoc nomine eum intellexerit, quem nos, morbum; & an non, vel Tumores Cysticos aquosos, seu Hydatidas, vel Hydropem Thoracis, innuerit? neque aut Aræteum, aut Trallianum, aliud quam Hippocratem, subintellexisse liquet.

§. II. Recensitis sententiis Mercati, Jacotii, Martiani, Pisonis, Ruischii, Albertini, Boerhaavii, ejusque illustr. Commentatoris van Swieten, Simsonis, Maloetti, Tozzetti, id unice colligi posse videtur, quod si quandoque appareant velle de nostro morbo sermonem facere, mox, ut Hippocrates, vel de Tumoribus aquosis Cysticis Pulmonis, vel de horum tumorum Lympha in Thoracem effusa, & pectoris Hydropem

dropem generante, tam in Diagnosi, quam in Prognosi, curaque, loqui videantur.

§. III. Colliguntur accurate omnia signa observata unquam in vita eorum, qui a morte inventi sunt vero cellulositatis Pulmonis Hydrope laborasse, & qui eundem annosum citra graviora incommoda, nisi per intervalla, tulerint: multa conveniunt cum phænomenis Hydatici Pulmonis, & Hydropis pectoris.

§. IV. Curatio Hydropis Pulmonis.

§. I. **O** Uod anxie quærimus, non invenimus sæpe, ut inveniendo quod minime quærebamus, damnum frustrati reparare laboris. Sic ad magnam fortunam viam infortunia sæpe paudent: ipsique per immensum Pelagus errores, atque naufragia, nos ignorantium Regionum divitiis cumularunt. Nobiscum compararum eodem modo est. Curas Submersorum & Suspensorum, quas, idoneo tempore adhibitas, toties vitam consopitam revocantes, universa jam lætatur Europa; nos etiam tempore idoneo dudum præterlapso, an forte tunc adhuc effectum fortirentur, irritas experti; incidimus, DEO, a quo omnia, & quo sine nihil, sic benignissime disponente, & in tutiorem gravissimæ Medico-legalis quæstionis solutionem, & in morbi cuiuspiam abstrusioris latentiorisque, gravioris nihilominus, ac frequentioris, illustrationem: *Hydropem* volo, non *Pectoris*; fuscè quippe ille tractatus ab Autoribus est; sed ipsius *Pulmonis*: cuius verus in Medicina desideratur hucusque intellectus. Quod ut clarius ostendam, ab ipsis Medicinæ, in artem conversæ, incunabilis exorsus, perque sæculorum ordinem profecutus, docebo quid notum de eo hucusque fuerit, quidque demum ejus notitiæ atque curæ, nostri cæterum inanes addiderint labores.

Hippocrates Lib. II. de morbis Cap. XXIV. Edit. Chart. Tom. VII. pag. 576. ἰδερὰν πλεῦρονος, Hydro-

dropem pulmonis descripsit, in eoque Febris meminit, tussis quoque, & respirationis densa, atque conferta; pedum aliquando & ventris, scroti etiam ac faciei, tumoris, unguum contractorum, hocque morbo laborantes iisdem, quibus suppuratos, remissius tamen ac diutius, affici solere. . . Eisdem non nunquam se existimare curatos, in ventrem humore effuso: verum eadem mala, usque pejora, redire. Num hic de vero *Pulmonis Hydrope*, & non potius de eo, qui Thoracis est, *Hippocrates* differat, quandoquidem solitam suam Diagnosin, & curam *Hydropis Thoracis*, hic addit, cui convenire, minime vero *Hydropi pulmonis*, hæ videntur; non admodum urgeo, iudicio potius submitto sapientum. Par mihi dubium est de textu *libris de internis aff. Tom. VII. Cap. 24. pag. 655.* Illud modo notavit *Hippocrates* quod *Hydrops Thoracis* ex Pulmonum Hydatidibus nonnunquam nascatur, inventis quippe a se in varii brutorum generis pulmonibus; quæ scilicet ruptæ pectoris crearent *Hydropem*. Porro describit in hisce singulis textibus cum symptomata, tum curationem *Hydropis pectoris*; *Hydropis* vero ipsius *pulmonis*, Hydatidas istas, de quibus proprie nulla hic quaestio, si exceperis, nec symptomata narrat, nec curationem.

Fugitivum verbum *Aretæo* elapsum est *pag. 94. edit. Leyd. τῆ ὑδρὸς*; quale quid & *Alexandro Traliano* excidit *lib. V. cap. IV.* nihil vero distincte utrisque: ut minime pateat notum iisdem morbum fuisse. Plurimum laboris impendi pervolvendæ Bibliothecæ Medicæ trium posteriorum sæculorum, ut quid lucis mutuarer a majoris nominis Medicis; verum si qui morbi meminerint, vix cognovisse eundem videntur, quandoquidem eum mox cum *Hydrope Thoracis* confundunt. *Ludovicus Mercatus* nonnihil plus de vero ipsius *Pulmonis Hydrope*, eoque ab illo Thoracis distincto, obscure differuit, *Tom. II. Lib. II. Cap. IV. Desiderius*

Jacotius autem sæpius in cadavera incurrerit oportet, quorum Pulmones spumofum fudere liquorem; suo enim *Commentario in Hollerii Lib. V. text. 62.* Coac. expositionem, de sanguinis sputo, utrum ex Hepate, an ex Pulmone prodeat, discernendo agens, *quum leviter, inquit, spuma permiscetur sanguis, ex Guttore, Thorace, Hepate, prodire potest: cum vero plurimum spumat, e Pulmonis vasis effunditur, cum totus spuma est, ex Visceris carne, cujus induit similitudinem. Est enim Pulmo veluti coagulata spuma.*

Prosper Martianus in Comm. ad versum 197. Lib. II. Sect. 3. Hipp. de morbis, ipsum Parenchyma Pulmonis hydropicum fieri agnoscit; suamque Lympham in cavum Thoracis transsudando, gignere pectoris Hydropem; ita tamen, ut una consistere sic & Pulmonis possit, & Pectoris Hydrops, Ceterum inter numerosissimas apud *Bonnetum* historias vix unam, quæ ad scopum hunc nostrum faciat, reperimus.

Carolus Piso, sæculi XVII. inchoantis celeberrimus Autor, morbum novit, descripsit, curamque adjecit, breviter quidem, at lucide satis, Lib. de morbis ex coll. ser. natis, sect. III. Cap. VI.

Eo ipso senescente sæculo, *Thomas Willis, cum Lowero suo, clarus & insignis, morbum dilucide apud Anglos novit, descripsit, in decursu profecutus est, & suam curandi Methodum evulgavit. Pharm. rat. Part. II. sect. I. cap. 6.*

Ill. Baro van Swieten, in Comm. ad §. 1220. Boerhaavii, nobis ex Ruischio, Albertino, Simsone, & Maloëtio, nonnulla refert, quæ ad verum Pulmonis Hydropem pertinere videntur: haud tamen sic, ut cadaverum sectione demonstraverint hi Autores morbum: Ruischius enim non loquitur, nisi de Pulmonis cellulositate aëre turgida; Simson vero fatetur rarius Hydropem Pulmonis in cadaveribus inveniri; partim quia facilius curationem recipit, partim quia Hydrops pulmo-
nis

nis pertinacior, facile, rupta tali *Vomica aquosa* pulmonis, in Hydropem abeat Thoracis: an igitur *Simson* directe de nostro morbo egit? & non potius de cystico tumore aquoso in pulmone? Tandem doctissimus *Maloët* in tota sua dissertatione ne meminit quidem *Hydropis pulmonis*, sed unice modo saccorum duorum, plenorum sero, Hydatidum in morem, qualem & jecur in eodem corpore gerebat. Hydatidas atque Pulmonum hydropicos saccos, in laudato Aphorismo *Boerhaavii Ill. Baro* recensuit: ipsam Pulmonis fabricam cellulofam lymphâ repleti, hancque vel in cavum Tracheæ aliquando transprimi feliciter posse, vel infortunata in cavum depluere Thoracis, utrique admiserunt, *Boerhaavius*, & *Swietenius*; ex professo vero de eodem neque hi, neque quos laudarunt, Auctores, egerunt, ut de *Hydrope pectoris*, *ventris*, *scroti*, &c. egerant.

§. II. Ex omnibus igitur liquet paucos exstitisse summorum Medicorum, qui ex Anatome morbum novissent; ut certo videantur vel oscitanter præterisse eundem, vel crebritate observationum pulmoni naturalem credidisse, qua exundaret, lympham. Profecto quisquis cum *Morgagnianis* observatis mea conjunxerit, minime rarum esse morbum intelliget, mirabiturque proinde nullibi fere eundem ex professo tradi, per signa indicari sua, vel sua diagnosi, prognosi, atque curatione, exponi. Perpauci enim ipsum nomen recensuerunt: quique recensuerunt, ut *Hipp. Gal.* cæteri-que, aut intellexere eo nomine Thoracis Hydropem, aut sive in pulmonum superficie extantes, sive vomicæ in modum in ipsa pulmonum substantia locatas Hydatidas, quæ, more vomicarum, vel in aerea pulmonum vasa, vel dorso suo in cavum exonerare se pectoris possint: sique forsan pulmones in tota sua cellulofitate posse hydropicos fieri existimarunt, ut *Piso*, *Albertinus*, *Simsonus* &c. id sane nulla demonstratione, sed mera conjectura ex quibusdam symptomatibus protulerunt.

runt. Si enim cum incipiente partium externarum œdema, difficilior redderetur respiratio, ut *Albertinus*; vel si aut vultus, aut malleolorum tumorem respiratio anhela, vixque tangibilis præ suppressione pulsus, concomitaret, ut *Simson*; vel si post prægressum aquæ quam plurimum potum, homo respiratione laboraret, cum signorum cujuscunque Pulmonum morbi absentia, ut *C. Piso*: Hydropem verum Pulmonis adesse conje-ctarunt, cadaverum autem inspectione nunquam probaverunt. In quo igitur illi defecerunt, nos peculiari-ter in hoc capite versemur oportet, ut morbi natura curaque pateat.

§. III. Hinc quæ alii, quæ nos, in vita eorum, quos Pulmones hydropicos a morte invenimus, peculiari-ter notavimus, hic recensebo. *Em. Card. Barbadicus* catarrhosis in vita fuerat, & catarrhosa febre epide-mica perierat. *Vide Capitulo II. Sectio IV.* Et in can-croso, & in hernioso, inventus sic Pulmo fuit; vita antea-cta ceterum non additur. *ibid.* *Mulier* autem cui spumosis a morte pulmo, magnas anxietates passa erat, multamque expuebat spumosa, ac sanguine tinctam, materiem. *ibid.* *Ebrii hominis* vita antea-cta non me-moratur. *ibid.* *Figuli* historia non additur, nisi quod strenuus potor esset. *ibid.* *Ancille*, minus a tribus men-sibus menstruanti, & a capto frigore in Pleuro-peri-pneumoniam illapsæ, in morbo hoc ex ore effluebat humor aquæ instar spumosæ, in qua caro recens lota sit. *ibid.* *Vir intemperantis vitæ* magnas passus fuerat in respiratione anxietates, palpitaciones cordis, & corpo-ris œdema. *ibid.* *Lorix* a sexennio spirandi difficulta-te, quæ astmatis convulsivi speciem habebat, sæpe in Nosocomium, consilium captura, venerat, & eodem morbo ibi moriebatur tandem. *ibid.* *Pleuritici* Historia non additur. *ibid.* Sed *Adolescentulus* ultra tres men-ses difficulter spiraverat. Hæc de agris, quorum pul-mones spuma scatentes invenit *Morgagnus*: jam de noltris. Noster

Noster rude donatus Miles Cap. II. Sect. III. multis ab annis tussi, sputorumque tenuium excretionem, laboraverat, inque letali suo morbo unicum aderat a sputis tenuibus spumosisque levamen. *Studiosus* a sex annis tussi, anxietate, lateris sinistri dolore, febre varia, corrhyza, catarrho, frequenter laboraverat, suaque in letali pleuro-peripneumonia pauca quidem, sed tenuia, ac spumosa, modico subinde muco mista, sputis reddidit. *Reverendus Sacerdos* ab annis 20. catarrho frequenti vixerat obnoxius, sudandoque frequenter malum mitigaverat. *Belli Dux* præter cordis palpitacionem, quatuor retro annis multa vexatus tussi fuerat. *Saltator* noster se sæpe vehementer eo exercitio, in quo peritus Artifex audiebat, se defatigaverat, & catarrho non raro laboraverat. *Febre ardente* in nostro Nosocomio defunctus ter in vita Pleuritide decubuerat; ante quadriennium ultima. Sed & ante biennium scabiem unguento repulerat, & consuetam venæsectionem hoc anno præterierat.

Et ut tandem de aliis supra laudatis viris aliquid dicamus; quamvis supra jam nonnulla retuli; egregius *Piso* Sect. III. Cap. VI. pag. 225. ex frequenti aquæ gelidæ, præprimis autem exæstuante corpore, potu, *Adolescentulum scholasticum* in hydropem verum pulmonis incidisse judicabat, cum ex illa gelidæ potandæ consuetudine duos ante menses spirandi difficultatem pati cepisset, quæ sensim increbrescens æqualiter sine febre, & sine tussi orthopnoëica, & stertorosa quodam modo videtur jam fieri: nam nonnisi cum alto anhelitu, & gravi, spirare videtur, imo auditur, & decumbit semper cum gravi stertore: ac tametsi corpus exercere potest, a labore tamen quolibet non mediocriter affectus augefcit.

In *Inst. Bonon. Tom. I. Albertinus* œdematis pulmonis Diagnosin formavit, quando una cum œdemate partium externarum statim adsit difficilis respiratio. *Simson Act. Edimb. Tom. V. Part. 2. Oedema seu Hydro-*

dropem Pulmonis suspicabatur, si vel vultus, vel circa malleolos pedes, intumescerent, cum respiratione difficili, pulsuque præ suppressione vix tangibili.

Maloët Acad. Sc. R. P. anno 1732. Vomicas aquosas in cadavere duas, uncias sex pellucidæ lymphæ continentes invenit, in singulo pulmone singulam. Homo miles fuerat, magna difficultate respirandi laborans, cum febre lenta, nec in dorsum nec in alterutrum latus cubare valens præ molestia tunc percepta pectoris, unde erectus passim esse cogebatur: brachia & manus, cruraque ac pedes, obsidebat oedema. Signa hæc multum conveniunt cum iis, quæ narrantur esse Pulmonis in sua cellulari substantia vere hydropici; ut in *Morgagni* nostrisque experimentis.

Targioni Tozzetti Racc. prima pag. 83. conjecturas habuit præsentis hujus mali ex consimilibus symptomatibus, & ab excretis aliquot libris materiæ similis ovi albumini; at vero cum unus a morte examinatus anatomicè non fuit, alter convaluit, uterque homo *Tozzetti* non demonstrationem Hydropis aut *cystidis* Pulmonis, ut in casu *Maloëtii*; aut *cellularis*, ut in nostris; sed meram conjecturam, reliquit.

§. IV. Igitur catarrhosa dispositio diuturna, vel sine tumore oedematoso sive faciei, sive inferiorum crurum, sive corporis fere universi, vel cum tumore earundem partium: respirandi anxietates validæ, cum spumosa materiæ, sanguinis leves notas gerentè, sputando ejecta: Spiritu abundantes potus prægressi: Mensium insolita paucitas: Vitæ intemperantia, quæ respirandi anxietates, cordis palpitationis, & corporis oedema genuerat: Dyspnoea frequens, ac convulsivum asthma simulans, idque demum letale: Dyspnoea trium mensium: annosa tussis cum copiosa mucis spumosi per sputum excretionem: Diuturna tussis cum frequenti & anxietate, & dextri thoracis lateris dolore, frequentique febre, catarrho, corrhyza: Catarrhosa 20. annorum dispositio, quæ annua

qua sudorum curatione levare solebat: Tussis multa, atque annosa, cum palpitatione cordis: prægressi inflammatorii pectoris morbi: retropulsa scabies &c. hæc ea signa sunt, quæ & nos, & alii, qui morbi causam non conjectando, sed inspecto cadavere percipimus, in vita prægressa esse observavimus: reliquorum autem Scriptorum, qui ex semel iterumque aquosa pulmonis vomica inventa, eam postmodum adesse suspicati sunt, signa morbi haud absimilia deprehenduntur iis, quæ hucusque recensuimus.

Et sane similem casum, quo hæc nunc tempore scribo, Nosocomium habet.

Mulier ægrarum nostrarum ministratrix, 28. ann. nupta quidem, sed nunquam adhuc gravida, cum a decem retro annis pessima intermittente febre, eaque diuturna, curata esset, longo tempore comatosa fuit, experge facienda ut comederet, mox a pastu iterum soporosa. Post trium septimanarum spatium hoc comæ cessit universi corporis œdemati: hoc iterum Cephalalgia intolerabili, quæ demum curabatur copiosæ materiæ, flavo-viridis, per nares auresque profluvio; ita tamen, ut posthac æque æstare, quam hyeme, perpetuo repetentibus, ut vocant, Catarrhis, obnoxia hucusque vixerit, pauca sputa tenuia, mucosa, sanguine subinde tincta, reddens, cum pectoris ardore, & non infrequenti dolore.

Ineunte Decembri ann. 1772. ejusmodi Catarrhum habens, hunc retinuit 14. dierum spatio, munus suum perficiens, suum modo solitum se pari Catarrhum ceteris Nosocomii domesticis afferebat. Jam vero febris, tussis, anxietas, sputa admodum cruenta, Pulsus suppressus, Cephalalgia, Viriumque defectus tantus, ut se mihi sisteret, atque ego illico libram medicam sanguinis ipsi detraherem, cujus sanguinis tertium vasculum albam gessit densamque crustam. Porro in corpore hoc phlegmatico, tam fera fuit inflammatio pleuro-peripneumoni-

monica, ut Plethoricæ instar tractanda fuerit; & ut post quater iteratam Venæ-sectionem sputis paucis, iisque aquosis, spumosis, mucosis, ac subinde suppurulentis; alvo per omne morbi tempus crassæ pultis instar, & quotidiana; sternutatione frequenti per plures dies; & urinæ sabulum passim sitientibus, mensis circiter spatium sic de hoc morbo convaluerit, ut primum major minorve & tussis & anxietas, redeunisque sæpe corporis oedema, eam leviter affecerint, licet ancillare obiret quotidie munus; & ut tandem ferè omnia symptomata desierint. Hæc profecto signa habet pulmonis hydropis multa, quorum laudati Autores meminerunt, eaque jam tot retro ab annis hucusque. Serosa colluvies post febrem comam primum, succedens comati oedema, suffecta oedemati cephalalgia, & cephalalgiae crisis pro parte duntaxat per aures naresque facta, pulmonis oedema seu hydropem genuit. Imo ne curata quidem sic cephalalgia per illam crisin fuit, quin cephalææ in modum sæpius affligat foeminam, & vesicante ad nucham admoto conticescere soleat. Morbum hunc bono regimine, moderato motu, auxiliis expectorando, urinam, alvum ac diaphoresin promovendo agentibus, serosa hæc colluvies verno hoc tempore sic emendata est, ut respiratio bona sit, ni se nimio exercuerit motu, tussis rareseat, corporis, ac vultus præsertim, oedema exulet; jamque diathesis serosa ne redeat, ferratis annisi aquis, fortunatissime progredimur.

§. V. Curationem morbi ex laudato mox *Carolo Pifone* petitam huic mulieri adhibui. Quippe ex eodem, elapsis abhinc ferme quadraginta annis, morbi petiveram notitiam; atque in omnibus serosis capitis, pectoris, ventris, articulorumque morbis, illum consulens, opem haud plane mediocrem in morbis istiusmodi cognoscendis & curandis me tulisse fateor: unde & Auditoribus meis inter Principes practicos laudare *Pisonem*

mem soleo : ne vero idem repetam , & *Pisonis* , & memoratorum Autorum omnium , curandi leges sic sunt , quemadmodum mox in §. IV. exemplo ostendi : modo aliqua adjungantur , quæ Nosocomiorum conditio passim vetat , ut aër serenus ac siccus , vel Aromaticorum fumo , talis , vel potius locata in Montanis habitatione ; sicca cum lecti stragula , lintheaminaque , tum corporis indumenta ; victus siccus ; Equitatio , motusque omnis , quo perspiratio libera sit ac larga ; victus siccus , parcus , isque roborans potus &c.

Cura hæc multum differt ab ea , quæ cæteris Pectoris obstructionibus , Phthisin minantibus , adhiberi solet : unde plurimum confert hujus morbi signa & singula , & omnia , accurate adnotasse , ne aliena medicina , alieno in casu noxia , alieno adhibeatur morbo .



CAPUT IV.

DE DÆMONIACIS.

- §. I. *Ratio hujus Dissertationis.*
 §. II. *Historia femina a Demone 18. annorum spatio obsessæ habitæ, quam fictam Nosocomium deprehendit.*
 §. III. *Notabilis impostura similis ex Historiographis Gallis, multum illustrans hoc negotium.*
 §. IV. *Phænomena quæ adesse iis dicuntur, quos obsidet Dæmon.*
 §. V. *Difficultas ea verane, an ficta sint, dignoscendi. Alia vident hic qui mente præoccupati, alia qui non. Ficti morbi multum faciunt ad fictas obsessiones Diaboli interstinguendas. Methodus num fictæ eadem sint, an falsæ internoscendi.*
 §. VI. *Quid proprie de obsessione Dæmonum statuendum sit. Solutio Difficultatis formata ex sana corporis post insultum constitutione. Solutio quarundam questionum.*

§. I. **I** Ngratam plane rem, tædiosamque eandem, ac plane erubescendam, iterato tractare compellor, quantumcunque hanc Tomo V. hujus mei annui operis abunde tractasse mihi visus sim. *Dæmoniacos* volo, quos *credula gens* multos existere censet, cujusque credulitatem ii heu nimium! firmant, augentque, quorum fuisset antequam suum officium periclitarentur, aut per se, aut per aptos operi viros, inquirere, utrum verâ Dæmonis obsessio foret, an vero aut morbus, qui post maturum examen nihil videretur præternaturale habere, aut demum ars mere præstigiatrix, esset. Cum dedecori & Ecclesiæ sit, & Reipublicæ, ludibrio toties

a vaferrimis hominibus exponi, mearum partium esse duxi ad hanc rem illustrandam operam omnem navare, in qua utrum temerarius habendus sim, an bonus Ecclesiæ, Reique publicæ civis, veri, & æqui, religionisque Censores, dijudicabunt.

§. II. Porro ut ordine hæc pertractatio ducatur, enarranda historia erit, quæ fundamentum jaciatur dicendorum. Mulier 41. annor. futoris in agro *Linziano* uxor, ab annis retro 18. elapsis Diabolo obsessa dicta fuit, sic ut primis tribus annis rarius, posterioribus quindecim vero neque vel unicum diem noctemque, Diabolus illam tranquillam reliquisset; ita ut de hac re nullum videretur dubium superesse, Ecclesiasticis viris, pietate, doctrinaque conspicuis, id sancte restantibus,

Verno hoc tempore futor viam diu quæsitam demum invenit, libellum supplicem in AUGUSTISSIMÆ NOSTRÆ IMPERATRICIS ac REGINÆ manus tradendi, quo ejus erga se, quem & pauperies, & obsessa a dæmone uxor dire premerent, misericordiam, benevolentiamque excitaret. His intellectis, AUGUSTÆ nota singulis sagacitas, verique amor, eo ejus animum impulerunt, ut juberet hanc feminam *Linziæ Viennam* transferri, meoque in Nosocomio examinandam sisti. Nosocomium inferebatur 5. Junii proxime elapsi. Tres quatuorve horis quotidie cum illa occupatus, testis loquar autoptes; quæ me absente contingere, ex Diario Nosocomii exactissimo suppleturus.

Mox illata in Nosocomium maledixit benignissimo SERVATORI, AUGUSTISSIMÆ,isque, qui eam *Viennam* duxerant. Reposita in lectum horrendè contorquere se cepit, oculos rotare in omnem partem, ut plerumque nihil nisi eorum album, sed perpetuo motum, convulsamque adpareret. Omnes faciei muscoli modum in omnem convellebantur. Collum novit ita & in humeros, & præcipue in dorsum flectere, ut simile
vide-

viderim nunquam. Interea vociferabatur, cantilenas cantabat aut germanicas, aut incondito sermone non intellegibiles, quasi exoticam linguam æmulari conata. Ad hæc cepit corpus in semicirculum agere, caput ac pedes lecto figens. ventrem in altum: mox extendere sese, & altitudine aut pedis, aut sesquipedis, totum corpus in sublime conjicere, idque haud minus celeriter, quam frequenter; forte vigesies, trigesies, & sæpius, sine interposita quiete; post momentum quietis, idem reperivit, moxque demum imprecationes in DEUM, in AUGUSTISSIMAM, in Maritum, & hoc modo ultra horam continuavit.

Interea temporis & Rosarium, & S. Crucem, in manu habens, ter in terram indignabunda projecit, terque redditam osculata amplexaque est, imo veniam a DEO rogavit, moxque illi iterum maledixit, monens non prius se, mox iterum in se diabolum, loqui.

Has, & plures aut alias, aut mutatas hinc inde gesticationes edidit, pulsu ac respiratione semper post agitationes summe naturalibus.

In media interquiete sic fuit, ut mente ac corpore sanissimam illam dixisses, & vitam suam totam non plane laudabilem narrabat, & quæ a diabolo jam 18. annis patiebatur, quamque ardentè sæpe a DEO petiisset, ut se a tanto hoste liberaret: in media ejusmodi confabulatione suas convulsiones imprecationesque repetebat.

In prandio ac cæna comedit bene, quamvis a Diabolo deglutitionem sibi impediri diceret. Ab Opii grano sex horis tam bene dormivit, ut ronchus audiretur. Expergescit, Rosarium, aliasque preces, flexis genibus orat. His absolutis, paroxysmum repetit, maledixit DEO, veniamque ab illo petit: communicat demum confidenter cum custodibus & assistentibus, diabolum mox sibi pro sua cum illa familiaritate inter alia sua arcana id revelasse, quod Professore Nosocomii hodie lubentissime interimere vellet.

In-

Interea advenio, audio quæ gesta erant, repentinis convulsionis spectator sum, jamque fuci per omnia gnarus, experimentum *Toni V. pag. 137.* instituo, dæmonem fugo, & quæ quindecim annorum spatio ne unicam quidem diem noctemve, se ab intulto diabolico liberam fuisse testata erat, jam ab hora nona matutina diem hanc, & alteram, & tertiam transegit, tranquille, rationabiliter, devote; femineum manibus laborem ad fallendum tempus exercuit, comedit optime, & colicam semel conquesta, ab enemate bene habuit.

Ad finem hujus lucidi intervalli familiariter, blandeque cum illa confabulans, conatus sum eam convincere quod non esset a diabolo obseffa, cum vidisset per auxilia nostra totum malum cessare; quod si diabolo autore natum esset, minime cessaturum fuisset: hoc cum ægre admitteret, dixi se melius convictum iri de hac mea assertione, dum malo forte adhuc redeunte, auxilium idem adhiberetur.

Hæc minime placuerunt: unde post mediam noctem leviter affici malo suo cepit: audiens vero curam priorem repetendam mox fore, tranquilla in horam sextam fuit; tunc vero gesticulationes iteravit, ex lecto prostravit, capiti innixa in pavimento totum corpus in anteriora, ut pueri solent, projecit, lateraliterque se per cubiculum circumvolvitur, viam ad me, remotius stantem, volvendo affectans, veluti me, si perstitissem, in terram projectura. Blando meo hucusque habito cum illa sermone in serium minantemque verso, composuit se, & exinde toto, quo apud nos adhuc fuit, biduo, nihil ultra contra decus, contra rationem sanam, contra bonos mores, gessit. Rerum actarum gnara AUGUSTISSIMA, ne consuetæ meæ ægrorum demonstrationes in Nosocomio turbarentur, eam ad Nosocomium *S. Marci* duci jussit: in quo recusavit primo suæ vafricitiei rationem causamque fateri; tenuissimo demum victu ceterum sana & summi appetitus femina, denum coacta,

coacta, confessa est se obsessam simulasse, cum ut Maritum vexare perpetuo posset, tum ut sibi eleemosynas corraderet; artificium autem hoc a Militis uxore se didisse.

§. III. Priusquam autem hanc historiam absolvam, opere pretium duxi hic singularem quandam historiam intermiscere, quam mutuavi ex duobus scriptoribus politicis summæ fidei, estimationisque Historiographis, ac Galliæ ornamentis, *Thuano*, & *Mezeræo*, Compendio traditurus, remitto eos, quibus omnia legere volupe fit, ad *Mezeræi Tomum III. pag. 1224. Edit. parisi. anni 1685.* & ad *Thuanum Tom. V. ad annum 1599. a pag. 869.* per sex septemve sequentes. Hæc historia nostram illustrabit, multamque in curando monstrabit paritatem.

Jacobus Brosserius, pannificii sui rusticique laboris pertæsus, circulatoriam vitam prætulit, atque cum tribus filiabus, quarum *Martha* a dæmone obsessa dicebatur, vagabunde varias urbes adivit, ut suam cum filia *Martha* Comœdiam luderet. Cum veram obsessiōnem esse judicarent multi sacerdotum, exorcisarunt quidem dæmonem, sed illa exorcismos elusit omnes. Fraude *Aureliæ* ab Ecclesia detecta, aliorsum aberrandum erat, ut belle continuaretur. Itum ergo *Andegarum* fuit. *Carolus Miro*, Reverendiss. urbis Antistes, fictane an vera res esset, modis explorare variis contendit. Dum ad aquam, cui benedictum est, diabolus immaniter ferocire visus est, ad aquam vero communem minime; permutata, ipsa inscia, aqua, ad communem fremit, ad sacram minime. Exorcismorum librum jubenti afferre alta voce Episcopo, dum clam profanum quendam librum tradi curasset, offertur *Virgilii Æneidas*; magno tunc apparatu, veluti exorcizaturus, legit: *Arma virumque cano, Troiæ qui primus ab oris, &c.* & mox furorem immanem & horrendas convulsiones *Martha* sinit. Unde Patrem & filiam vehementer corri-

corripuit Prælati, & domicilium antiquum, laborem-
que repetere iussit.

Cum salutare hoc consilium scelestissimis his homini-
bus displiceret, *Parisiis*, urbe populosissima, se mayo-
rem fidem habituros arbitrati, mox illuc appulerunt,
& ad *S. Genovevæ* Templum primam scenam iusserunt,
eaque cum arte, ut pleris & potissimum *Rev. Patres*
Capucini, quos inter Pater *Seraphinus* eminebat, *Mar-*
tham a diabolo indubitato obsessam esse asseverarent.
At vero *Eminentiss. Card. Gondius*, *Parisinorum Epi-*
scopus, examinandam feminam quinque celebrioribus
Medicis tradidit; *Michaeli Marefcotio*, *Nicolao Elia-*
nio, *Joanni Alrino*, *Joanni Riolano*, & *Ludovico Du-*
reto. Cum neque latine, neque græce, interrogata quid-
quam intelligeret, sed gallice modo, responderunt Me-
dici nihil a spiritu, multa ficta, pauca a morbo esse.

Postridie *Duretus*, cum *Ellanio*, infixa inier polli-
cem & indicem acu, an sensu doloris tangeretur, ten-
tare voluit: cum ad ictum non tremisceret, ille & *El-*
lanus, petunt collegas advocari, & in crastinum rem
deferri.

Igitur Kalend. Aprilibus magna omnium expectatione
a *Seraphino Patre* exorcismi repetuntur; ad quos *Mar-*
tha oculos rotans, lingua exserta, & contortis membris
ac toto corpore, exhorrescebat: tum ad hæc verba: **ET**
HOMO FACTUS EST, supina desultatione veluti ex-
ollato corpore fluctuans, ab altari ad valvulas sacelli,
in quo erant, erepsit. Qua re perculsis adstantibus, Pa-
ter *Seraphinus* commotior exclamavit: Si quis sit adhuc
incredulus, hic spiritum intus agentem sistat, & vitæ
periculo cum eo luctetur. Hæc *Marefcottus* nihil nisi
fictum videns, & imposturam non ferens: ego vero in-
quit, periculum in me recio: spiritus, si potest,
me validior ferat! quibus dictis statim contra obluctan-
ti manus in cervicem injicit eamque consistere iubet. Il-
la ubi se captam vidit, cum se amplius commovere non

posset, ut imposturam tegeret, spiritum abiisse, seque reliquisse respondit.

Multo dein sermone *Thuanus* refert agitatum negotium & inter hosce Medicos fuisse, & inter quinque alios, qui prioribus suffecti erant; præcipue quia contrario experimento *Martha* nunc quibusdam visa erat anglice latineque calere; quos tamen omnes rebutabat egregie *Marescotus*. Vide pag. 869. 870. 871. Interim *Henricus IV.* metuens ne forte hæc præstigiatrix ad tumultus contra recens *Nannetense Edictum* concitandos, rem supremo *Parisiensi Senatu* dijudicandam tradidit. Exacte *Martham* esse 40. dierum spatio observandam Senatus edixit, serioque a præcipuis urbis Medicis examinari: hi vero nihil præternaturale subesse testati sunt. Hinc Senatus tumultum metuens, eoque propiorem, quo Templorum suggesta de violatis Ecclesiæ privilegiis, hæreticorumque prædominante consilio, fortius resonarent, hanc errandam familiam suam in Domicilium remisit, patri poena corporali, ut vocant, indicta, si *Martham* egredi domo, citra loci Judicis veniam, sineret.

At vero necdum finita res fuit. Vir nobiliss. ac rev. *Alexander Rupi Fulcaudius*, sancti Martini Abbas, frater hujus nominis Cardinalis, & *Claramontii* Episcopi, forte a fratre instigatus, *Martham Avignonum* primum, deinde *Romam* duxit, spe fore ut autoritate Patrum Societatis hæc femina contra gallorum Episcoporum, & præcipue contra secularis potestatis sententiam, vere dæmoniaca pronunciaretur. At vero & res Societatis, cara sua de *Gallia* pulsæ, postulavit, ne huic negotio se immisceret, quo facilius Rex in ejus reditum commoveretur; & summus Pontifex, ejusdem imposturæ jam gnarus, omne tentamen suppressit: miserandus Abbas autem, exploso toto negotio, ludibrio habitus, veniam a Rege petivit, non obtinuit, brevique confectus mœrore interiit: *Martha*, paterque, Xeno-

Xenodochiorum stipe misere vivere, ac perire.

§. IV. Ex his duabus Historiis, eorumque libris, qui hanc quæstionem tractarunt, apparet dæmoniis adscribi. Primo, horrendas, infætas, ac præternaturales convulsiones, contorsiones, corporis in sublime projectiones, rotationes, convolutiones. Secundo, clamores, ejulatus, boatus, balatus, latratus, mugitus, cantus. Tertio, linguæ græcæ, hebraicæ, arabicæ, latinæ, cunctarumque Europæ Nationum, aut enuntiationem, aut saltem dum quis exotica lingua alloquitur, eum ejus intellectum, ut suo patrio sermone apte respondeant ad ejusmodi interrogata. Quarto, in suis agitationibus cursibusque a nemine posse, citra summum vitæ discrimen, sisti. Quinto, diras imprecari eos Deo, Beatæ Virgini, Angelis, cunctisque Sanctis. Sexto, furorem summum ad lectionem divinarum rerum, ad auditum Dei, sanctorum, rerumque sacram nomen, vel applicationem, ad exorcismos, &c.

In *Gallica Martha Broissier*, & in *Austriaca nostra Anna Maria*, videmus omnia hæc, vere personata contigisse, ac bene illas fuisse de agendis instructas. Optimum quidem nostrum *Ludovicum Duretum* duo morabantur, ne imposturam fateretur; indolentia ad puncturam, & rumor de notitiæ anglicæ ac latinæ linguæ, non abs se quidem observata, sed ab aliis enarrata; at vero primo nos in nostris fictis dæmoniis hanc indolentiam plus semel observavimus: ad hanc simulandam obduratus in malitia animus eas aptat. Si quis dubitet, videat *Tom. V. Rat. Med.* quo pacto scelestissima mulier ter sustinuerit profundam incisionem Chirurgi, indolentiam simulans, ne qua victum quærirabat epilepsia, falsi argueretur. Secundo, *Dureto* examinanti donum linguarum defuerat, hoc dono *Martham* donatam esse alii negavere, alii affirmarunt. Novimus abunde quam ingenuosa sæpe rerum fictrix sit mens humana, præsertim si est præoccupata. Qui *Lin-*

zio Viennam nostram Annam Mariam duxerunt, per omnia sacra testari volunt eam, in itinere convulsam, ac S. Crucis imaginem humum indigne projicientem, a transeunte Sacerdote latine iussam fuisse a terra hanc levaret, osculareturque, & mox executam mandatum fuisse. Nos similia testari potuissenus, si non egissemus penititius. Verum per multa latine apud ipsam dicta, certi eramus ignotam illi hanc linguam esse; deinde intra horam contigit, ut ter a sese S. Crucis projece- rit imaginem, terque repositam in lectum osculata, amplexaque tuerit; semel vidi non ab ea projectam Crucem, sed ad latus positam, brevi in manibus sum- tam, habitamque honorifice fuisse. Porro si inter S. Crucis projectionem, & amplexum, quis nostrum num latine aut græce calleret, his linguis explorasset, hæc- que protinus iussa hæc exequi visa fuisset, an ne veri- similitudinem nostra affirmatio habuisset de linguarum dono? Jam vero, quod ter apud nos non iussa fecit, ostendit feminam latini sermonis ignaram sic in itinere fecisse, uti non iussa pluries in nostro Nosocomio fecit.

Sed multos stupendæ corporis contorsiones movent, corporis in altum projectiones, horrendaque convulsio- nes enarratæ, quas sola malitia non posse peragi exi- stimant. Respondeo his hæc nobis ideo præternatura- lia non videri, eo quod paria illis in variis epilepticis, & catalepticis, non fictis, conspexerimus: deinde om- nia hæc mirifica symptomata & in iis, quorum *Tom. V. Cap. IV.* memini, apparuisse; qui tamen totam rem se finxisse, & convicti & fassi sunt.

§. V. Ex datis Historiis hisce, ex libris de hac re agentibus, & ex nostris *Tom. V. Cap. IV.* descriptis observatis, constat varias methodos quibus fucusne, an sinceritas innotescat, adhiberi solere. Imitatione Re- verendissimi *Andegavensis* Episcopi, experimentum a- quæ sacrae, & profanae lectionis pro sacra, feliciter i- mitati sumus: puncturas, vellicationes, ignes, effica- ces

ces sæpe, non perpetuo, licet summa impostura esset, deprehendimus. Linguas nunquam caluerunt; sed ferax imaginatio harum defectum supplevit, ut mox patuit; unde hoc tentamen rite captum semper irritum est. Si resisti iis sine vitæ dispendio non possit, & nostra, & *Parisina*, & omnes mei priores dæmoniaci, imposturam ostenderunt.

Restiti eis currere volentibus, ut consisterent, & meo jussu jacerent, sederentque. Hanc Annam Mariam in medio brachiorum suorum violento motu composui, ut non moveret se, imo in ultimo paroxysmo omnem motum minis protinus sufflaminavi.

Imposturam præterea aliud demonstrabat. Dum in molli lecto jacens, ac linteamine straguloque recta, corpus in pedis ac sesquipedis altitudinem projiciebat, corporis opercula casum per latera minabantur. Pudor ne denudaretur effecit, ut ter in unico paroxysmo opercula in corpus adaptaret, eisque verum daret, ne caderent, æquilibrium.

Experimentum, seu tentamen aquosum, nunc memorabo. Et hanc foeminam, & alias, quarum toties jam laudato *Tomo V.* memini, unico momento sic curavimus hoc tentamine, ut de paroxysmo ne grum quidem superesset. Est cura comendatissima *Hippocrati* in *Tetani* specie. Sex, septem, octo in acie locati, & amphora frigida aquæ armati, stant: mulieri convelli jam ceptæ, aliasve gesticationes edenti, primus suam amphoram in vultum, nihil tale suspicanti, uno jactu totam effundit. Terror ab insolita salutatione, horror frigore excitatus, conspectus tot hominum vitris magnis amphorisve, ad prosequendam affusionem adstantium, sistit paroxysmum parumper; Sed cum malitia omnium tanta soleat esse, ut brevem post pausam gesticationes repetant, omnes ordine suum officium præstant, ut unico tali experimento aliquando quinque sexve mensuras aquæ profundamus. Tunc resipuerunt om-

nes ; indusium autem, togaque madida, mutantur, in calefactum lectum reponuntur bene tecti, ac calido jure carniū refocillantur, ne frigus corpora lædat.

Sic passim unica vice impostura detecta est, & plane suffocata ; maxime si tunc a suprema potestate minæ seriæ intententur condignæ poenæ, si vel minimum deinceps advertatur malitiæ indicium. Fuit tamen quæ hoc tentamen secundo institutum fefellerit, & quidem hæc nostra femina ; cujus nihilominus malitiam minæ intentatæ mox compescuerunt, & penitus suffocarunt.

In singulis nostris dæmoniacis dictis, ut & in fictis Asthmaticis, atque Epilepticis, pulsum a paroxýsmo ficto finiente vix mutatum d'prehendimus a sanitate, & corporis universi vix læsas ullas functiones ; interea dum in vera epilepsia post paroxýsmum debilis, inæqualis, multisque modis peccans, soleat deprehendi, pluriumque per horas, diesve, miserabilis teneat corpora languor. *Parisiſinorum Medici* qui in causa *Marthe* a parte *Ludovici Dureti*, summi viri, stabant, ex bono post paroxýsmum pullu, corporisque alacritate, vere dæmoniacam concludebant : *Marescottus* vero ex hisce contrarium oportere confici censebat, fretus auctoritate evangelica, cum *Marci Cap. IX.* in curatione dæmoniaci legatur sic : *Et cum videret Jesus concurrentem turbam, comminatus est spiritui immundo, dicens illi : Surde & mute spiritus, ego præcipio tibi exi ab eo, & amplius ne introeas in eum. Et exclamans, & multum discerpens eum exiit ab eo, & factus est sicut mortuus, ita ut multi dicerent : quia mortuus est. Jesus autem tenens manum ejus, elevavit eum, & surrexit.*

Neque ineptum hoc *Marescotti* argumentum est. Omnes illi personati homines exercent se paulatim in vafro suo artificio, in quo si principio turbetur nonnihil ipsorum corporum œconomia, paulatim nihilominus assu-facti, gaudio sui in malitia profectus, spe eam perficiundi, mundumque egregie decipiundi, vix tandem

sem a suis gesticulationibus aut defatigantur, aut anhelant. Dum nos Fabrorum ferrareorum Malleolas tollere, & aliquot ferre passibus cogimur, jam anhelamus, & pulsum cum respiratione mutatum habemus; interea dum ipsi Fabri malleum per horam elatis continuo brachiis agitant, vix mutati deprehendantur. Nolim vero regulam invariabilem ficta a veris distinguendi hanc asserere; corpore enim debiliores, & maxime in impostura addiscenda tirones, aut ne fraus detegatur meticulosi, facile mutatos habere pulsus, mutatamque respirationem, possunt. Ceterum *Marescotti* argumentum admittendum videtur, & crebro nobis in mentita epilepsia, mentitoque Astmate, magno auxilio fuit.

§. VI. Candida hæc gestorum expositio offendere neminem poterit, neque me de aliquo in Religione errore reddere suspectum. Obsessos a diabolo homines multos fuisse, ex sacris evangelis, & Apostolorum Actibus, certus novi, multos quoque prioribus Ecclesiæ sæculis, Sanctosque numerosissimos, virtute dæmones ejiciendi claruisse. Tandem nullus dubito, quin hinc inde adhuc dum tales habeantur. Hinc veneror preces, exorcismosque Ecclesiæ, quibus illa utitur singula vice, qua sacrum Baptismatis Sacramentum Cathæcumenis, Infantibusque confert, & veris applicat energumenis. Est hæres illa summæ benignissimi Servatoris nostri in dæmone potestatis: hanc ipsi ut sæpe prius, ita jam jam in cœlum adscensurus, ad mundi usque finem tradidit: *Dæmones ejicient. Marci Cap. 16.* At vero hominum vafrorum malitia tanta est, ut & fingant se dæmones obsessos esse, & venerandas Ecclesiæ ceremonias venerandosque Ecclesiæ Ministros, ludibrio exponant. Hoc porro prævertere, decus servare Religionis sacratissimæ, sacrorumque ejus Ministrorum, cujusque, ni fallor, Catholicæ suæ Religionis splendorem amantis, omnino est. Hæc sola me ratio compulit, ut a tot retro annis ea mihi indicia compararem, quibus verane

res, an ficta esset, probe interitingerem: quo demum modo & vere a dæmone obsessi Ecclesiæ traderentur curæ, & imposturæ convincerentur personati. Neque rem video dedecentem Medicos esse, quod, cum officio teneantur fraudulentos fictosque morbos a veris discernere, idque revera per certa tentamina præstent, eadem quoque tentamina in usum apud dæmoniacos vocent, ne scelestissimi homines Deum, Religionemque vituperent. Profecto nullus video, quod ob id oporteat, liceatve in Medicos stomachari. Si de auctoritate Ecclesiæ actum esse, quando supremus Senatus, idque Medicorum opera, causam *Marthe Brosferiæ* dijudicabat, non minus ignari, quam fervidi Ecclesiastici clamitabant, profecto *Clemens VIII.* summus eo tempore Pontifex, sic non censuit, etsi *Martham* jam *Romæ* se sistentem, examini Ecclesiastico submittere potuisset. Attamen si Viri Reverendi, quos ob Religionis cultum, morumque Sanctimoniam, veneramur, hoc nostrum tentamen male ferant, lubenter id mittimus, illisque reddimus; modo cum hæc regulas, tum quas ipsis industria, usus, ac Religionis amor, ultra suggerent, accurate, patienterque in usum vocent. Nihil enim, nisi harum regularum neglectus, in causa fuit, ut hæc mihi demandata provincia sit. Maxime optandum foret, ut ad sacras Ædes, ad quas pia plebs convolare peregrinabunda consuevit, legionesque dæmoniacorum conduci undique solent, debita tentamina Viri venerandi præmitterent; ne profanarent istiusmodi personati homines, neve Ecclesiæ ministrorum imperitiam, simplicitatemque, false riderent, dum in Miraculorum Diariis postmodum nefandum suum vident sacrari vaframentum.

Finem capiti impositurus, duas me morari quæstiones percipio, quæ quidem responsionem vix mererentur; eandem tamen cum multorum animis alte irradiata videantur, omnino poscunt.

Prima eorum est, qui propter frequentes imposturas
ita-

statuunt neque hodi existeret, quos obsideat, diabolus, neque olim extitisse: cunctas scilicet curas dæmoniacorum enarratas morborum quidem mirabilium, at vero præternaturale nihil habentium, curationes fuisse, quam sententiam eruditis jam olim, maxime vero hoc tempore Viris, operum mole notis, vehementer placere video.

Hos porro primum rogo an admittant revelationem, nec ne? Hanc si non admittant, eos plango, non negantes diabolicam obsessionem ratus, nisi quia suo Materialismo infatuati, pneumatologiam omnem rident. His mentem sanam apprecati, eos volumus, qui admittunt revelationem, eisdemque precor, ut deposita præoccupatione, Sacra Evangelia cuncta pervolvant diligenter, notamque ad illos affigant, qui dæmoniacorum meminerunt, locos: certénario plures ejusmodi notabunt, qui sincere, n que præoccupate, considerati, non permittent unquam illis ut ad non præternaturales morbos has referunt dæmoniacorum Historias. Videbunt dæmones id effatos, quod homines, quos obsidebant, ignorabant. In principio certe ignorabat Israelitica gens Jesum, & Messiam esse, & Dei Filium; utrumque Diaboli homines obsidentes, ultro fatebantur. Ubique curationes morborum ab illis dæmoniacorum distinguuntur, distincteque enarrantur. Quin & in gloriam suam intraturus Servator, in ultimo suo ad Apostolos Discipulosque sermone, *Marci 16. cap. Signa autem eos, inquit, qui crediderint, hæc sequentur; in nomine meo demonia ejicient, linguis loquentur novis, & si mortiferum quid biberint, non eis nocebit: super egros manus imponent, & bene habebunt.* Apostolorum igitur eorumque, qui ipsis prædicantibus fidem amplexuri erant, distincta potestas fuit in res distinctas; quæ potestas & hic, & in tota evangelica Servatoris historia, tam distincte separatur, ut qui voluerit præfracte negare, & morbos curare, & dæmonem expellere, res diversas esse, affirmare necessario

fario quoque debeat donum linguarum, venenique immunitatem, neque a curatione agrorum, neque a diaboli expulsionem quid separatim esse, licet hic quadruplex, aque distinctissima inter se potestas promitti videatur; quo quid dici absurdius possit? Dolendum profecto in pyrrhonico hoc sæculo & plurimam gentis eruditæ, revelationem credentis, turbam in absonam hanc opinionem abire, & vel hac ipsa se doctiorem, se sacrorum librorum intelligentiorem, esse opinari.

Quæstio altera eorum erat, qui mirentur id nunc afferri, quod quantumcumque olim frequens diaboli obsessio fuisset, ea tamen nunc inter rariora ponatur; dum interea illi minime causam capiant, cur rarum hoc nunc foret, quod frequens olim: hominum nunc eandem quam olim conditionem esse, eandemque Diabolorum & malitiam & potestatem: videri proinde sibi & præproperum nimis esse hoc de raritate obsessio- nis dæmoniacæ assertum, & quæ ad imposturam detegendam ex hac assertione laudantur, temeraria.

Hos primum rogatos volo, quo demum argumento probent, quod olim in rerum natura contigerit, id perennare, quandiu eadem rerum natura persistet, oportere? Utique non ex revelatione, minusque multo ex observatione, id probabunt. Et in divinis rebus, & in humanis, non idem perpetuo apparet Providentiæ ordo. Donum linguarum, donum Prophetiæ, donum ægros imposita manu, alave actione, curandi; communia in primitiva Ecclesia erant, jam vero rarissima observantur. Quid lepra communius Judæorum? sciant ea veteris novique Testamenti Codices: uti dæmoniacorum historiam Evāgelium refert, sic & leprosum; interea dum nostro sæculo pene ignotus morbus, nili hinc inde apud Indos sit. Ergo nihil solidi ejusmodi argumenta habent. Pro omni autem responso sufficit detecta impostura; ita ut velimus, nolimus, paucos nostra, paucos Patrum nostrorum memoria extitisse, quos obsederit dæmon ultra fateamur.

A P P E N D I X.

DIE 20. Aug. 1773. fatalis contigit casus ad Paludem prope *Danubium*, in loco, quem *Thabor* vocant; qui cum ad argumentum, quo toto capite secundo hujus Operis occupabamur, mirifice faciat; typis autem illo jam edito contigerit, necessario hic memorandus est.

Adolescens 16. annorum, multis ab annis valetudinarius, pertinaci laborans diuturnaue scabie, piscatus hamatilis adeo immodicus, ut ob eundem pridie vapulasset; denuo hoc die, hora decima antemeridiana, vento procellosissimo, in vicina Palude, binis tribusque pedibus haud profundiore, hamans, ab altiore amne pronus in aquam incidit, idque in acutum abruptumque veteris hujus paludis aggeris palum. Emergit, vociferatusque est. Vidit, atque audivit eum, præteriens femina, quæ auxiliari cum sarcinata non posset, in opem vicinos compulit hortulanos. Convolantes undique hi, oblongum, quem casu reperiunt, asserem luctanti cum aquis porrigunt, quo arrepto eum in continentem ducant; at vero ille genibus tenus tenacissimo immersus, expedire non potuit se. Nonnullis interea vicino in horto uncum quærentibus, altius insigitur limo Adolescens, submergiturque. Horæ, ut credunt, quadrante submersum, uncis vesti infixis, in continentem trahunt; signa vitæ nulla edentem, in altum elatis pedibus quâtes faciunt; & spumofam quidam aquam ore naribusque, ut putant, profluam vident, sed ne vel minima vitæ superstitis signa. Ad hæc vicini suburbii *Leopoldini* Balneator quæritur, qui quo perniciosior adsit, currus, junctis raptim equis, mittitur. Ejus vero loco duo prodeunt tirones, qui vix conspecto corpore,
& se-

& feros se vocari miffitant, & neque aut venam tundi, aut alia præfidia artis admoveri ultra poffe contententes, fe subducunt.

Elapfo tandem bihorio in noftrum Noſocomium Corpus conferri jubet Loci Judex. Mox conſpicitur ſiniſtro in Bregmate, notata jam a Chirurgiæ tyronibus, contuſio, atque Epidermidis ſeparatio. Calefacto protinus in lecto variis & rebus, & modis, fricatur: ex vena Jugulari dextra ſanguis mittitur, qui rapidus principio, moderatus poſtliminio, unciarum X. copia profluxit, tenuiſſimus, nigreſcens, mora bihorii ſubnigra aqua præcipitata excolor, ad ignem more albuminis ovi coagulatus. Reliqua Artis præfidia, quemadmodum *Tomo I. Rat. Med. cont. part. II.* traduntur, ordine admota ſunt, aſt vero, ut facile prævideramus, incuſum. Agitato ſub experimentis corpore, ore ac naribus multa ſpuma profluxit, œſophago, ut leviter eodem in ſeſſione vulnerato conſtitit, oriunda: imo etſi ex aſpera arteria prodiſſet, ſpumæ duntaxat, ſi qua aſuiſſet, portio quædam prodiſſet. Galli enim noſtri ſcriptores ſua ſpuma evacuari ſic Pulmonem non poſſe, evidentiffimis experimentis demonſtrarunt.

Die 21. Aug ad 7. mat. Cadaver luſtravimus a pectore orſi, ne quid mutaretur in pulmone. Pulmo liber uterque. Aorta, vena cava, ſuperioreque trachæa, ne quid eſſlueret, probe ligatis, tum & ſeparato a Diaphragmate pericardio, eximebantur cum corde pulmones. Nulla in Trachæa aqua ſpumota, nulla in bronchiis, nulla in Loborum, quos numerofas in taleolas diviſeram, vel minima portione: neque ſeri ſpumofi quidquam perſciſſione tantummodo non prodibat, ſed ne forti quidem preſſione; nihil enim hac, niſi ſanguis exprimebatur. Porro multus inerat aer illis, irrituſque ſic, ut ex quibus expreſſus ſanguis fuiſſet, partes, ne poſt horas quidem conſiderent, bullas modo ſub externa tunica preſſione formantes: quod pulmonis
emphy-

emphysema non a submersione, verum ab antiquiore huius visceris in sua cellulositate dispositione, explicandum est. Ex variis scriptoribus hoc pneumaticum Emphysema in hominibus non demersis, una cum magna ex hac membrana aerem explodiendi difficultate, adnotavit Ill. Van Swieten in cap. Boerhaavii de Hydropse ad §. 1220.

In Corde, vasisque majoribus, cruor nigrescenti similis aquæ. Intestina singula inflammata. Colon, postquam ex sinistri Ilei cavitare emerisset, quinque flexus ingentes, antequam in rectum abiret, formabat. Et inflammatus pone pylorum Ventriculus.

Ad os bregmatis lævum, tegumenta inter ac pericranium, ea scilicet plaga, in qua læsionem externam videramus, inventa Ecchymosis est, multaue pericranii rubedo. In Encephalo ambæ quidem meninges ad cerebrum universum rubebant, verum præterea in ipso contuso loco multam rubri, nigrescentis, tenuisque sanguinis ecchymosin inter sese mutuas continebant. Ventriculorum parietes copiosis vasculis, iisque rubris, scatebant.

Hæc igitur anatome nos docet primo: licet in cadavere patuerit invincibilis causa mortis, quia tamen hæc ante anatomen ignorabatur, Chirurgiæ profecto tiro-nibus, quantum ab ipsis res pependerit, imputandam esse mortem; quia quidquid in eo casu agendum est, & a Magistro Discipuli tenent, & lingua vernacula conscriptum de hac re libellum, dono Augustæ, possident Magistri omnes; quem & communicare exponereque Discipulis lege iussi sunt. Sin vero plane rudes in hoc negotio hi fuerint, pars culpæ multa redundat in Magistrum, quod nec libellum communicaverit cum illis, nec exposuerit, nec si potuerit, in auxilium accurrerit.

Secundo: ut Canes meos mittam, jam hic hominum Demersorum alter est, cujus caruerint aqua pulmones:
huic

huic autem præterea apoplexiæ extitere in encephalo
causæ. Ponamus hanc historiam vel nocte, vel ianem
nullis præsentibus contigisse testibus, & Cadaver tan-
dem inventum iussu iultrari Magistratus. Qui ejus sunt,
quam refutare conatus sum, sententiæ, cum in Ana-
tom. & vacuum inveniant sero spumoso pulmonem,
& haud contemnenda mortis violentia manu illatæ, in-
dica, Magistratui referent meridiana luce clarius esse,
quod hic juvenis morte violenta prius peremptus fue-
rit, antequam præcipitatum corpus in paludem sit;
quo quid unquam a veritate alienius? interim Magi-
stratus amplissimus, Magistratus Lugdunensis exemplo,
in homicidas severe inquireret, in carcerem suspectos con-
jiciet, ad eosque convincendos artificia consuevia ad-
movebit. Si quis, quam inanes hi, quam arduo, quam-
que periculosos, cum Judici concilient, tum accusatis,
labores, mature perpendat; an gravari, mirarique pos-
sit, me quavis oblata occasione Gallicanæ sententiæ ur-
gere perniciam?

At vero totum hoc meum argumentum negotio se
facili confodere posse, hujus sententiæ Autores forte
arbitrabuntur, Adolescentem meum submersione neuti-
quam vel ob id perisse rati, quod e gurgite in subli-
me emerfus, vociferatus sit, oppletum proinde aqua
habere non potuerit pulmonem. Hinc eum videri non
submersione, sed fluente paulatim tussis de encephali va-
sis sanguine, ex cerebri oppressione vere apoplecticum
perisse: quodque proinde aqua spumosa vacuus depre-
hensus ejus pulmo sit, mirabile non esse.

Profecto multam mihi hic illi suppeditant differendi
materiem. Sed in eadem in *Appendice* respondere oppor-
tunam non videtur, ne ex *Appendice* novum succrescat
voluminosumque opus. Hinc id, quod contendunt, ip-
sis impræsentiarum omne dabo; modo ex datis conce-
dant necessariam consequentiam.

Scilicet, si hic Juvenis, nemine teste, incidisset in paludem, atque elapsis aliquot diebus inventus, Legali examini fuisset subiectus, ipsi hi, quos veneror, Viri, necessaria lege pronunciare debuissent *primo*, mortuum illum præcipitatum in aquam fuisse, cum omni prorsum aqua ejus pulmo vacaret: *secundo*, ex visis atque repertis in Capite eundem fuisse violenta morte peremptum, priusquam præceps in aquam datum fuisset Cadaver. Reddentes itaque casum hunc illi suæ *Claudine* consimilem, argumenta profecto fortiora ad hanc conclusionem in isto, quam in illa haberent. Interim Historia nostra, tot testibus pleno in die visa, atque audita, hanc conclusionem non minus damnosissimam, quam falsissimam esse, omni ex parte toties jam ostendit. Quocumque igitur modo exponere hanc historiam contendunt, eam sententiæ suæ destructricem semper inveniunt.



INDEX CAPITUM

QUÆ IN TOTO OPERE CONTINENTUR.

In Tomo I.

C A P U T I.

DE *Dieta ægrorum.* Pag. 9.

C A P U T II.

De medicamentis in morbis acutis. 14.

C A P U T III.

De aere, decubitu, sessione, aliisque circa ægros moderandis. 22.

C A P U T IV.

De diebus criticis, & crisibus variis. 27.

C A P U T V.

De urinis. 36.

C A P U T VI.

De sanguine humano. 38.

F

CA-

CAPUT VII.

Quædam Anatomica.

Pag. 51.

CAPUT VIII.


De vi Electrica.

60.

CAPUT IX.

De Variis.

64.



In Tomo II.

CAPUT I.

De Methodi Hippocraticæ, Sydenhamianæ, ac Boheraavianæ, præstantia.

75.

CAPUT II.

De generatione puris.

78.

CAPUT III.

De Variolis.

93.

CAPUT IV.

De Herniis.

100.

CAPUT V.

*Nonnulla de Tympanitide, & Ileo morbo.*103.
CA-

CAPUT VI.

De nonnullis infortuniis nostris. Pag. 113.

CAPUT VII.

De Polypo. 122.

CAPUT VIII.

De singulari modo respirationis, & motus cordis. 126.

CAPUT IX.

Quædam de pulmone innatante aut subsidente in aqua. 133.

CAPUT X.

De supputando calore corporis humani. 134.

CAPUT XI.

De vario tumorum genere. 145.

CAPUT XII.

De mira variorum medicamentorum efficacia. 150.

CAPUT XIII.

De Machina Electrica. 159.

In Tomo III.

CAPUT I.

De morbis malignis .

Pag. 171.

CAPUT II.

De Colica Pictorum .

201.

CAPUT III.

De sanguine humano, ejusque calore .

220.

CAPUT IV.

Experimenta in Calculosis, & de calculo varia .

230.


CAPUT V.

De virtute singulari quorundam Medicamentorum .

246.

Quæstiones sæpius propositæ super methodo inoculandi Variolas .

271.



In Tomo IV.

CAPUT I.

De Febris Malignis dictis.

Pag. 1.

CA-

CAPUT II.

De Aneurysmate .

Pag. 13.

CAPUT III.

De Tympanitide & Hydrope cystico varia . 38.

CAPUT IV.

De Coxario Morbo .

73.

CAPUT V.

De Apoplexia & Nervorum morbis . 92.

CAPUT V.

De Sanguine & calore humano . 110.

CAPUT VII.

*De singulari quorundam medicamentorum vir-
tute .* 124.

CAPUT VIII.

De Viribus Electricis .

133.

In Tomo V.

CAPUT I.

*De febribus cum exanthematibus, quæ Petechiæ
& Miliaria vocari solent .* 9.

CAPUT II.

De Hydrope, & Tympanitide. Pag. 24.

CAPUT III.

De Hydrope pectoris. 39.

CAPUT IV.

De Epilepsia & convulsionibus. 60.

CAPUT V.

De calculo, ura ursi, Lithontripticis dictis. 71.

CAPUT VI.

De Aneurysmate. 90.

In Tomo VI.

CAPUT I.

De Cardialgia chronica. 7.

CAPUT II.

De vario Hydrope ac tumore abdominis. 21.

CAPUT III.

De Hydrope pectoris. 37.

CA.

CAPUT IV.

Problemata, & difficultates. Pag. 46.

CAPUT V.

De Calculo vesicæ urinariæ, & Lithotomiæ. 78.

CAPUT VI.

De Cranii uestione in pertinacioribus capitis vitiiis. 106.

CAPUT VII.

De peculiari quorundam medicamentorum virtute. 125.



In Tomo VII.

CAPUT I.

De Aneurysmate externo spurio. 7.

CAPUT II.

De Aneurysmate vero. 35.

CAPUT III.


De Hydrope cystico, & Hydatidibus. 51.
CA-

CAPUT IV.

De Intestino in Inguine perforato, & excrementis inde foras expulsis. 71.

CAPUT V.

Varia. 90.



In Tomo VIII.

CAPUT I.

Varia de sudoribus in morbis acutis. 5.

CAPUT II.

Varia de crisi morborum. 13.

CAPUT III.

De morbis acutis cum Petechiis, aut miliaribus. 48.

CAPUT IV.

Problemata de Scorbuto. 87.

CAPUT V.

De Machina ad curandum Ileum desperatum. 106.

In Tomo IX.

CAPUT I.

Sistens Anatomicas aliquot sectiones, una cum brevi prægressu morbi historia. 5.

CA-

CAPUT II.

Sistens pathologiam prioris capitis discussio-
nem. 26.

CAPUT III.

De Miliaribus. 45.

CAPUT IV.

De systemate Halleriano. 49.

CAPUT V.


De morbo Ileo, & prosecutio experimentorum
cum Machina adaptata ad eundem, etiam de-
speratum, solvendum. 92.

CAPUT VI.

Varia. 105.

CAPUT VII.

Nonnulla de insitione Variolarum. 116.



In Tomo X.

CAPUT I.

De Colica Pictonum. 11.

CAPUT II.

Pathologia priorum Anacephalæosis. 44.

CAPUT III.

De Tetano. 60.

CA-

CAPUT IV.

*Dissertatio de Tetano, ejusque speciebus, nec-
non de curandi eum methodo, a primis me-
dicinæ sæculis, in nostra usque tempora ob-
servata.*

67.

CAPUT V.

De febre miliari, ac petechiali.

95.

CAPUT VI.

Varia.

128.



In Tomo XI.

CAPUT I.

De Febris intercurrentibus.

5.

CAPUT II.

De morbis Acutis.

44.

CAPUT III.

De Ileo morbo.

60.

CAPUT IV.

De vario Hydrope.

94.

CAPUT V.

*Anatomica quædam, & expositio Tabula-
rum.*

151.

CA-



In Tomo XII.

C A P U T I.

Hippocratis de pulsu notities, & doctrina. 5.

C A P U T II.

Prosecutio Historiæ pulsus ab Hippocrate, ad tempora nostra. 12.

C A P U T III.

De recentiorum Scriptorum circa pulsum observationibus. 43.

C A P U T IV.

De damno, quod a Neotericorum de pulsu placitis medicina patitur. 74.

C A P U T V.

De Lumbrico lato. 95.

C A P U T VI.

De variorum Medicamentorum virtute. 103.

C A P U T VII.

Finis quæstionis de sensibilitate, & irritabilitate. 118.

C A P U T VIII.

De Inoculatione Variolarum. 123.
CA.



In Tomo XIII.

CAPUT I.

De methodi Hippocraticæ præstantia in morbis acutis . 9.

CAPUT II.

Causa exponitur, cur methodi nostræ, a Macbridio laudatæ, explicationem, æque physiologicam, quam pathologicam, admittere non possimus : quæ ipsa causa, utpote ad plures quæstiones Theoreticas, Pathologicas, atque Clinicas, spectans, necessariam reddit earundem quæstionem pertractationem. 45.

Sectio I. ejusdem Capituli II. 50.

Sectio II. 52.

Sectio III. 56.

Sectio IV. 58.

Sectio V. 67.

Sectio VI. 78.

CAPUT III.

De auxiliis præstandis his, qui aut in aqua, aut aliis de causis, suffocatis, sive morti propinqui videntur, sive veram mortem simulant . 91.

In Tomo XIV.

SECTIO I. CAPUT I.

De iis, quæ in med. nonnunquam improvisa contingunt, ac consuetis legibus contraria. 8.

SECTIO I. CAPUT II.

De necessitate notandi exacte viscerum in cadavere situm, sive a natura, sive a morbis natum. 41.

SECTIO I. CAPUT III.

De inflammatione ac dolore membranarum. 43.

SECTIO I. CAPUT IV.

De febre verminosa. 67.

SECTIO I. CAPUT V.

De determinando tempore quo perdurare inflammatio non modo soleat, sed & possit. 93.

SECTIO II. CAPUT I.

De Peste, & cur de illa scribendum sit. 99.

S E C T I O II. C A P U T II.

De difficultate pestem interstinguendi ab aliis consimilibus illi morbis. 105.

S E C T I O II. C A P U T III.

De Pestis definitione. 112.

S E C T I O II. C A P U T IV.

De iis, qua ex Cap. II. & III. concludi oporteat. 137.

S E C T I O II. C A P U T V.

De petechiis & sudatoria in peste cura. 147.

S E C T I O II. C A P U T VI.

De venæ sectione in peste speciatim. 160.

S E C T I O II. C A P U T VII.

De scarificatione pestiferorum. 173.

S E C T I O II. C A P U T VIII.

De Hidragoga methodo. 181.

S E C T I O II. C A P U T IX.

Varie quæstiones & opiniones circa pestem recens & examinans. 187.

In

In Tomo XV.

C A P U T I.

*Historia auxiliorum, quæ Submersis, Suspen-
sis, Suffocatis, atque Infantibus mortuis,
ut videtur, in lucem missis, adhibenda
sunt, quousque jam promota per Euro-
pam sit.* Pag. 1.

C A P U T II.

*An in Criminalibus certissima signa extent,
quibus instructus Magistratus infallibiliter
discernat vivusne quis, an mortuus, in un-
das præcipitatus sit?* Pag. 12.

C A P U T II. S E C T I O I.

*Historia, hujus Disquisitionis origo, argu-
mentorumque, ex eadem formatorum, exa-
men.* Pag. 13.

C A P U T II. S E C T I O II.

*Sextuplex Anatome Corporum laqueo Stran-
gulatorum, quorum varia phænomena Ana-
tome describit, variumque Experimentorum
effectum.* Pag. 21.

SE-

CAPUT II. SECTIO III.

Sextuplex hominum Anatome, quorum, Acutis Chronicisve defunctorum, Pulmones aqua spumosa scatuerunt: sexies in Nosocomio, semel in Urbe. Pag. 31.

CAPUT II. SECTIO IV.

Spuma Pulmonum frequentissima ab aliorum Anatomicorum experientia in iis, qui merfi non fuerint, demonstratur. Pag. 44.

CAPUT III.

De Hydrope vero ipsius Pulmonis. Pag. 49.

CAPUT IV.

De Dæmoniacis. Pag. 60.
Appendix. Pag. 75.

FINIS.

